

USURAN DO GORIJA SOMPOMOGUNAN
om
USURAN DO GORIJA PROTESTAN SID SABAH

Web Publication 2009
1993
Kudat/Malaysia

Pirin di syarikat Perusahaan Percetakan TEP
Kudat

Boros di President do PCS

Iti buuk dot USURAN DO GORIJA SOMPOMOGUNAN om USURAN DO GORIJA PROTESTANT SID SABAH (PCS) diti sinurat, sinumuhut di gama sumurut om i kavazao dot Ongomomogun sid mintutuk do Kudat sumuhut di koubasan dot ongoulun bansa do Rungus.

Kogulu nokosurat it Usul di Goriija di Kristus sompomogunan, supaya atalahas it inantadon do goriija. Iri-ogi it usul di goriija sid Sabah.

It ongousuran do nakamung antad dit aso-po nokorikot do missionari sid pialatan dot Ongomomogun sinurat, supaya elaan banal do kuran i gama dioti potimpun pahabal di Habal do Kovosihan di hiza diri.

Ong imatan tokou it usuran gulu di toun 1952 dino, atarang do varo-no laid ongomissionari. Topot minonginjil ioti sid pialatan do Kino om it ongomissionari do Roman Catholik (RC) minonginjil-po ioti sid pialatan dot Ongomomogun sid mintutuk do Kota Kinabalu om Sandakan.

I gama monginumpak do boros om it ongousuran sinumuhut di nongokosurat laid antad di kinotimpunan dit ongomissionari pahabal di Habal do Kovosihan di toun 1952 sampai bianco (1993). Topot i kotua minangagama di buuk diti, i Amai Traugott Forschner mangakun dot varo-po dati nalazan antawa amu nelaan banal om varoi sid pialatan do najadi antad toun-toun do nakatalib dot amu-no nisuvang.

It ongousuran diti kadapat it ongoulun mamasa om monorou di kavazao ko i gama do Goriija PCS sumurut antad di tiumimpuni it ongomissionari antad sid Eropa minongovit di Habal do Kovosihan antad sid Kinoringan om i gama tokou monorima di kuasa om samod do Kinoringan minimbulai antad sid gama tokou mangasip.

Banalko agazo o kounsapatan-ku bahagi diti buuk diti, tu keso, it usaha di Amai Forschner om it ongokoruhang dau monurat om mongobuuk-po, nga nopud sampai nopongo. Iti buuk diti kadapat monulung dit ongumulok-po mongilelo dit usuran do PCS.

Ioku, i Ulion do PCS mongontok do PCS monorima kaseh dit usaha di Amai Forschner tumabang posurut do PCS sampai gumama-po mamakai do tenaga om i guvas dau kondiri.

Kovian, ohigak o ginavo-ku sampai monorima kaseh sid Kinoringan, sabap elaan-ku do sid gama monodia dit ongousuran diti, i Tuhan mozo-vozo om mamarakat di sokovia i nagama dioti. Iti buuk diti jodizon dot iso o barang do kihorogo sid PCS om harapon-ku dot ajadi do tudukan kananganko usuran do Goriija PCS.

1st Julai 1993

Hendry Ogodong Dangki,
Ulion, Goriija Protestan sid Sabah

USURAN DO GORIJA SOMPOMOGUNAN

Umpatod

1. Ong pajakon mongitung i kogunaan di gama humarati dot USURAN di nunu-nopo, o tomodon:

I riniba okonko iadko dupot. Ong dupot, iri-no ko iri. It anak do dupot sumusui di molohing dau sid dau do tampat, supaya opud iosido pempatai. Ombo it atag ot akanon om inumon, ombo it dupot dot imporizon ko korosizan, ko sakot dit avantang dot akanon om ombo it osusa dot ontupaton om jagaon, ino kavi dino oromitan dit anak antad sid molohing dau. Iadino i tambang hiza di limo ribu toun kodori sampai biano, iri-no ko iri: Ko i pirit om i godingan, nga iadino. Ong sumimban i kobuatano dot ongomusim, i dupot mogihim do kopudan, minsanko nosimban i kodorunan ko i kaadahan, antawa i kosukupu dot akanon om inumon. Iri-no ko iri i tambang sampai biano. I tambang amu engat do kinumuro it aki lombus dau ko patahu-po di dau do pangalaman sid buuk, supaya it ongomuaki kadapat mongohondom ko misingilo di pangalaman dit aki dau.

Ong riniba, antad di kodori-po varo kenginan di molohing dot osinang it anak dau turun-tumurun. Kodung nakaharati-no i riniba dot i palad okonko bai kadapat kumavid do barang ko pagama dit ongohal, iadko monobil do kulit ko mamambang om monokon do dupot sid gama mamakai do kazu, ko mangansak dot onsi dot dupot sid apui, di nokemot-no dit apui antad sid gonit di kadapat pahandab do kazu, nga sokovia i pangalaman dit iso't ulun nokolombus sid koruhang om anganak om muaki sampai turun-tumurun, minsanko aso-po't elaan di riniba diri monurat. Alaid-nopo, i riniba kaharati-po do mangagama do tanda dit apakai sid gama mongohondom. Inot ongotanda dino jinumadi do surat. Kogulu i riniba minonurat do bai minananda di tana dot osilou di nagama-no laid sid bata, do nokosurat-po, dinadang-no sid apui ko bai sid kolosuo dot adau. Iri-ogi minongolukis it ongoulun dit ongotanda om gambar sid ongovatu. Sabap ino, varo't ongosurat om gambal di kakali antad di kodori sid ongoluvang vatu do vokon-no ong 15000 toun ot umul i surat om gambal dino. It ongoulun sid Masir minonurat sid ongolobong di Faraun, dot i surat diri kakali mad gambal nokopiamung-nopo o gambal. Iri-ogi sid tohudi di nakaharati it a-ko piro o bansa do mangagama dot ongohurup bahagi ipat-ipat it uni di tatalanan sampai nokembulai it ongohurup iadko i pakazon tokou biano.

Sabap banalko apagon ong bai monurat sid ongobata, tu avagat it toriso-iso i bata om okonko alangkas opongo, nokemot it ulun dot oruhai monurat, ino-no mamakai do dawat (antad sid arong dot domburan o ginama) om monurat sid kulit do sapi. Alaid-nopo, nelaan-no di riniba do momihai-bihai di kulit do sapi om potombil sid ongonalad dot alaab o kulit, supaya ajadi do linundunan dot anaru. Sid linundunan dino, ogumu o surat korusod om ino linundun dino amu rumungoi koduruk.

Na iadko it ongoulun sid Babil diri mogihim do kohormat om ngaran dau, tinumimpun-no it ongoulun dit ongomogunan patahu sid surat di dau do pangalaman om kohormatan om kosioho dau, supaya sid tohudi, kakali andaman dit ongoulun i kogosoo om kakansango om garal dit ongogulu-gulu. Iadno dino banal o kinotimpunan do patahu di sejarah ko usuran sid surat. Sabap ino, i sejarah ko usuran, varo a-ko piro o kogunaan, ino-no:

- sid tohudi kadapat mongohondom it ongoulun ko bansa dit inantadon dau om kuran i kopudan dit ongogulu-gulu
- i pangalaman kodori kolombus sid ongotohudi sampai amu osusa dot ipat-ipat i generasi misingilo vagu dit ongohal. Kokiraai, kodung kaharati i riniba mangagama do ruda sid kurita, amu-no osusa-po do mamakai-po do pakakas di mad paud do tomod mangatod do barang. Ong it ongojal di Faraun, hiza di Musa, minamakai-no laid do kurita di tinarik do kuda. Topot it ongokina sid Sabah, minsanko hiza di 60han kakali minamakai do paud sid gama mongumpug do nizuw sid kabun dau.
- i kavazao di kopudan dit ongogulu-gulu om i sokovia i kosuruto di pangalaman dioti monulung di tokou biano do humarati om posurut di tokou do kobudayaan om undang-undang om hoturan sampai i vaza mioopud sid razat om piniizaan.
- Minsanko sid gorija tokou PCS atag do rumamit di kinosurutan do gorija antad di kinotimpunanani,

supaya atag o gama tokou sumuhut di hoturan di Tuhan Yesus om kumavid di tradisi do gorija, supaya atag om ahatul o kopudan do gorija di Kristus sid Sabah. Iti-no o sabap do misisingilo tokou om osusa tokou humarati dit usuran do gorija sompomogunan.

2. I pitonidan do tangon om usuran ko sejarah

Ong songogom-ogom it ongoulun, varo't ulun dot elo manangon. Na i gama dit ulun do mongimbulit dit ongotangon pengkaa dino, Varo't andaman dau do varo't osiou ot ulun di kodori-po ko varo dupot dot elo mangakal. Aso't andaman dit ulun do sera om kuran banal ino, tu i-po kodori gima ino hal dino. Iadko i tangon di Kurudong, iso-po mad andaman dit ulun bianco, ino kuta di retanko Kuta di Kurudong sid Kirangavan, ko i talaga di Kurudong, ka, ka di boros dit ongoulun ponong sid Muhang. Topot aso't elaan tantu dot ulun do sera om kumuro, bai mad momoros dot hovo-hovoroni, retanko, Kuta, ko, Talaga di Kurudong, ka, tu varo mintutuk o poring di mad tinanom sid timpak dot ompulogon, ko i talaga, mad aralom banal om oliou om osou i vaig dit okonko iadko kotubazaan dot ongoulun vokon manalaga. Manjadi ino kogofoo ot vazaan dot ulun mangahavol do retanko i di Kurudong diti, ka. Ong hiza di 90an, minsanko ino natanus-no, tu aso vaig sid retanko, Talaga di Kurudong, om aso poring di sid timpak dot ompulogon, i retanko, Kuta di Kurudong, tu nahandab-no. Pengkaa ino't ongotangon dot ongodupot di elo mangakal, i tambang ko i kogiu ko i pavus om i palanuk, bai tuturan dit avantang o kening-iningon dot okonko kiharati tantu. Varoi bo ko varo o harati dau ngaran, ino-no, it osilat oruhai mamalid dit obul om obungou, dot aso bida, dupot ko riniba. Rontob-nopo, ino tangon dino okonko aralom o pangalaman di kiguna sid ongotohudi't adau. Ong tuturan mitanid tantu dot usuran. It ulun monuturan om mongusul dit ombo-nopo i nahajangan dau. I pitonidan: ong monuturan, i pangalaman dau kondiri. Topot ong mongusul, hal di kodori ko it alaid-no kinodizian. Kokiraai, varo monuturan dot,

Nokokudat-oku di konihab, nga nokendakod-oku-po sid upis om nakatambi-oku di kuvo om iadino o tinomod. I koruhang-ku it ivanon-ku om it anak-ku do kotuaan, ka.

Na it onsi di tuturan dau dino, hal do konihab ko hal do bai somminggu ko sombulan kinotoliban, nga kiguna bahagi dit ulun di mongining, tu iosido nga varo tomodon sid Kudat do iadino, sid kadai, ka, ko sid upis. Manjadi it ulun di monuturan, kakali andaman di sera om i kuran om nunu i tinomod om i nunu-nopo i tomod do minamanau om nahajangan om kinohigangan sid tanga do ralan, tu oduruk-ogi o kinotoliban di kinodizian di hal dino. Kagi i pangalaman dau sid Kudat diri monulung dit ulun di tikudat do monodia om mongumba di dau do panahon.

Ino-no rontob, bang duvo ot ulun o nakapanau, dolupo ong a-minivozo, minsanko kopivozo, nga i gama dioti monuturan om mongimbulit di nahajangan sid tanga do ralan ko i sid kadai, nga okonko iseso, inoi nga ogumu o hal do mad kopitanid o tuturan, iadko okonko songvinazaan o buatan om mad okonko iseso o norikot. I tinuturan dit iso nalazan di koduvo ko ombo it andaman di koduvo, nalazan sid kotiso. Kokiraai,

it iso bai andaman dot anaru-no banal i baas di sinakaan dioti. Topot ong i koduvo bai andaman dot arang i baas dino. It iso andaman dot it ulun sid kadai do kopi kibongit, dot i koduvo monuturan dot kiparamatok i kinambo, dot i sanganu mad amu otutunan dau, indoson dot i kibongit bai ulun di minonginum siri.

Inot ongotuturan di duvo it ulun dino okonko hal do vudut ko olim, inoi nga vazaan do mongimbulai dit ombo i nemot di mato dau om norongou di tolingo dau om i nokiro dit utok dau sampai kakali andaman. I mato om tolingo dot ulun amu enizo rumamit dit ongohal di sid tinoguvangon dioti dino. Na i hal do baas ko i hal di kinambo sid kadai, suvai agazo o harati, ong varo kagavul do hal dit amilo-milo hondomon om gunaon. Kokiraai, ong varo kosusaan sid kadai, otimbak ot ulun sampai osusa mogihim do sasi, supaya kadapat mogihim dit ulun di minionimbak dot ulun, iri-ogi suvai atarang dot isai i kinambo. Kaluto, banalko kibongit i kinambo om kiparamatok-po.... antawa ong varo baas di nakaranggal do besikal, ino tanda dot baas panjang arang, nga tanda bahagi di gama monodiri dit ongobaas.

Na i hal dot usuran om sejarah, okonko bai hal do pangalaman dit bai kajadi, inoi nga hal om pangalaman antad di kodori-po, sampai varo sikul om tudukan om varo't ongoulun do saientists di moniim monodiri om mongusul ombo i najadi antad di kodori banal do tomod mongintutun di

kinembulazan do vinangun om pomogunan om i riniba om it ongobansa om i kosurutan dit ongokobudayaan om ongohoturan om ongoturunan dot ulun. Na i gama mongusul, ino-no mogihim ombo it otopot, nga amu engkod mokitarang di kinumuro om pinokurazan om it inantadon om sera it ongohal dino. Na sid saralom di gama monginsosok, amu pagazo ko popodok-po di hal, ko mangamung ko varo alazan, pasaap ko mongindazou, inoi nga bai mongimbulit di kuran banal i najadi i hal, i sera om i nunu om kuran it ongohal di najadi-no. I gama mongusul dot otopot, okonko bai kiro-kiro, ko hovo-hovoroni ko mangalu-kalu, inoi nga ombo-nopo it amu atarang ko amu atantu, amu-nobo manantu dino ko mamanal, gam manalahas dot ino dino baiko kiro-kiro ko indoson dot ulun do iadino. Ombo-nopo it atalahas om atantu, ino-no ot usuron dot otopot om atantu om abanal om atarang.

3. I vaza do Momogun kodori mongusul om mongintutun di hiza kodori

Ong sid Momogun okonko ogumu o vazaan do monodiri di sera it ongohal. Ong gulu banal, retanko, Kodori, ka. Ong duvo, tolu toun gulu, retanko i toun gulu ko i toun diri.

Ong sontoun katalib, retanko	i toun
ong duvo tolu't toun retanko	i toun diri
ong duvo tolu't adau retanko	i songkonihab
ong sangadau gulu retanko konihab	
bang hiza di monuturan retanko	biano ko didino

Panarangan dit ongopongoretan do HIZA sid Momogun

Bang engin-ko manarang di sera banal di kinojodian ko kinopisomungan, nga varo pongoretan laid dit angaki sumusui di kavazao dit **ADAU**. I pongoretan dot adau manalahas dot,

- i titiu sid avan di manganavau di pomogunan sid saralom dot ipat ipat it adau
- i hiza dot iso't adau om iso o sodop, o ino-no nasadapan om nosuvaban =sangadau

Sid saralom dit iso't adau (adau om sodop) varo-po vaza do Momogun monodiri: sodop, adau, minsusuvab, minsosodop, gam ogumu-po vokon o pongoretan manantu di hiza banal songkonoruvo dot adau. Ino-no

3 a.m.	minsusuvab
5.30 a.m.	talangan palad
6 a.m.	sumilau it adau
6.30 a.m.	nokosilau
8 a.m.	opian manggas
9 a.m.	tanga mindakod
10.30	oruhai sumakai
12 am	sumakai it adau
1 p.m.	nopulid
2 p.m.	tanga ruhuk dot asavat
3 p.m.	tanga ruhuk
4 p.m.	tanga ruhuk dot osibak
4.30	tobpong kazu
5 p.m.	tobpong goholu
5.30	mampal-ampal-po sid burul
6 p.m.	tumonob it adau
6.30	notonob-no
7.30-8	nabarou
12 p.m.	tanga sodop

Gulu-ko siumusui di hoturan di porinta British om iri-ogi Malaysia do mangarait dit ongongaran dit adau do minggu, sinumusui it Ongomomogun dit kavazao do vulan. Ino-no i kotimpunaan do vulan: piromutan om iri-ogi

kosilau keso, koduvo sampai kopupusan do kosilau
om tavang, ino-no hiza dot ovokou i vulan
om iri-ogi tolikud om tontong sampai tumonob.

Tanid-po keno varo't a-kopiro ongopomogunan di minongiro dit ongoadau isuhut di hoturan do badi, ino-no it adau di kopisomungan sid tuhunan ontokko midagang ko tumalob. Varo-no badi do monikid kolimaan, vokon-no ong kotoluvan om pengkaa. Manjadi minongiro it ongoulun dot, Koduvo di badi, ko keso di badi om pengkaa dino.

Na i toun do Momogun sinumuhut di hoturan do vulan om it adau, do varo toun do hopod om duvo o vulan, dot totolu-tolu toun, nga hopod om tolu o vulan, isuhut di kembulazan di korimbutuon di retanko pangasakan (ino-no i korimbutuon ORION). Na i kotimpuunan do toun Momogun, ino-no i piromutan di vulan humiza di sumilau i pangasakan ontok do minsusuvab. Ino-no i vulan keso om kotimpuunan do rumilik. Kodung kavantai i pangasakan, iri-ogi hiza dot oruhai-no om mangasok, tu nokorikot it tinadahan dot opoit i parai. Retanko dit angaki do kotoluvan amu moniim it ongopirit do mangakan di nakasok, ka. Manjadi it ongovulan narait sid gama sid tagad, ino-no

rumilik, managad monutud om mongintavun, mangasok, monginsakot
kenduvo monginsakot monguvak di dalai mongomot mongomot
do ranau

mongulok mangaramai/moginakan

Topot ong i gama mongiro dit ongotinounan, mad aso't elaan do Momogun diri mongizap ko mangarait. A-insan nokotiim it Momogun do mongizap dit ongotoun gulu di kondiri dau, ko gulu di ama ko i di aki dau. Ino-no o kotubasan mongiro, it ongotagad ko it ongopogun ko i hiza do mononjipun antava i hiza dot aso-po porinta British sid Kudat, ka.

Ong mongusul it iso onkob di dau do turunan, oduruk-no om avi-no it pangahandaman.

Kokiraa, I turunan di Bapa Majimil

It ama dau, ino-no i Tuorong om it aki dau, ino-no i Sopunal,

iri-ogi i Mokijil om i Koliman om i Giak om i Mingaton

om iri-ogi i Bantang, i retanko AKI BANTANG, tu sid aki Bantang nga kovian di kinapangahandaman. Ombo i guluko i aki Bantang, bai tangon-po, iadko i tangon di kinopitotongkizadan dit ongorurungan do Momogun sid NUNUK ARAGANG.

4. I Vaza mangarait om manantu do hiza

Tanid mantadko i Momogun kodori, ko it ongousuran dit ongoraja kodori di minonuhu i raja do patandon sid surat di nunu-nopo it nongogama om hoturan om rumpak om karajaan dau diri, dot ipat-ipat it usuran di iadino, nga bai minongusul di kotimpuunan di karajaan om hoturan. Topot minatai-po i raja, nengkod-no patandon dit Usuran, nga varo a-ko piro o vaza mongusul dit ongousuran do riniba di kodung nokotimpuun-no, minomongo sampai mangarait sampai biano isuhut dot iso-no o kiroon. Sid pomogunan do Kina, kodung varo turunan do raja, nga antad diri mongiro it ongokina di dau do hiza, minsanko i karajaan diri, nga labaan do limo ribu toun katalib. (Imatai sid Toun Kina do nunu sontoun ong biano!) It ulun ponong sid Barat, ino-no sid Europa, varo't ulion do gorija RC di minongimbulai di vaza mongiro dit usuran om hiza, isuhut di hoturan antad di toun do Kinosisinaan di Yesus Kristus. Retanko it adau di kinosisinaan di Yesus, ino-no 1. 1. toun keso Minananggung ko Anno Domini. Ombo i gulu najadi, nga toun gulu di Minananggung ko TGM. I pope i minangahatul do iadino, ino-no i Gregor. Iti-no o sabap retanko iti-no i Kalender di Gregor. I toun di Gregor dino, varo 365 ot adau, isuhut di hoturan di Mato dot Adu.

Na it Ongosilam mongiro di hiza tanid mantadko i tokou Kristian, tu it toun dit agazo banal o harati bahagi dit Ongosilam, ino-no i toun di Kineduan di Muhammad antad sid Makka. Sabap ino, i kinotimpuunan di Toun Silam, ino-no ko-16.7.622 TM. Kagi i Silam sumuhut di hoturan do toun vulan, ino-no ikid toun, varo hopod om duvo vulan (dot i vulan, isuhut di kosilahan om kotonobon do vulan). Sabap ino, i toun Silam onibak mantadko i toun di Gregor dot i pitonidan, ino-no hopod om iso't adau (354 adau).

Sabap labaan do limo ribu toun minanahu-no it ulun sid Kina (om labaan do apat ribu toun ponong sid

Asia Barat it ulun sino,) di nongohajangan om pangalaman om kinojodian dit nunu-nopo it ongohal do kiharati, hoturan, rumpak, keloo om i iadino, minsanko i tokou biano kadapat mongitung om humarati di kobuatano di pomogunan di hiza diri, kuran i hoturan do raja, sera om nunu o gamaon dot ulun (iadko elo mangagama do tumbaga, saring, basi ko karatas om ongopakakas), kuran i kopudan, ombo o kokurangan ko panakit om i iadino. Kagi sid gama mongukad dit ongopogun om ongolobong nokemot it ongosaientist do barang antad di hiza diri di manarang om manantu, ombo i nokosurat om nakalapor diri. Iti-no o sabap varo duvo o sasi di manarang, ombo it otopot om ombo i bai tangon. Na it ulun di moniim mongintutun di hiza kodori diri, retanko ARCHEOLOGISTS, ino-no it ulun di mongintutun di hiza kodori diri.

5. I kogunaan do sejarah ko usuran Goriya:

Ong mamasa tokou di tuturan di Tuhan Yesus sid ongoinjil, a-kembulai dot i tuturan dino, hal di 2000 toun katalib. Sabap, ong amu monginsosok, mad hal di jinumadi dot amu-po songkuro koleido. Suvai sid Lukas 2,1 om kaharati tokou do sera banal i kinosinaan di Tuhan Yesus, ino-no hiza dot i Kaisar Augustus porinta do Rom om hiza do iosido minonuhu do pezap di sokovia it ongoulun di sid suvang di karajaan dau.

Antad diri sampai biano, ogumu o najadi om nosimban, nakatanid-no om nokembulai-no dit a-nengat laid diri. Iti-no o sabap dot osusa do mamantaran di pialatan antad diri sampai biano, iadko mananjambatan do tomod potupak di hal kodori diri, ino-no i gama om vaza om tudukan di Yesus, supaya koromut i Habal do Kovosihan di minongimbulai di goriya diri hiza dit Adau do Pentakosta sid di tokou, sampai i karajaan om hoturan do Kinoringan, i nokotimpun-no diri (Markus 1,15: *Nosukup-no it ontok om nokorikot-no i karajaan do Kinoringan*, ka), nga mimbulai om jumadi sid tanga tokou biano.

I hiza di Tuhan Yesus diri varo a-ko piro ot ulun di nokovozi di Yesus. Ioti sinumasi sid ongotohudi dit ombo i nokemot om ombo i norongou, dot alaid-no, ino kososizan dioti dino, suvaiko nakatandon sid surat om iri-ogi aso-no kotonusoi. Na it ongopiumpugan di nokembulai antad sid kososizan dit ongorasul, i Paulus ko i Petrus om i Matius, nakaramit di Habal om kososizan dit ongorasul. Ioti mogulu nokokristian om najadi-no do goriya di Kristus. Topot antad di hiza dioti diri sampai biano, alaid-no banal om osodu-no banal i di tokou. Iti-no o sabap dot atag monginsosok om monodiri sampai mongonsi do nunu banal i tinomod di Yesus pengkakat di goriya dau om nokokuro, tu i biano i goriya di Kristus okonko miabal banal di goriya diri, hiza di Paulus om it ongorasul vokon. Varo-ka kosurutan, varo-ka kokurangan, varo-ka kosimbanan do hoturan om nokokuro, tu minsanko biano, kakali mad osodu tokou antad sid gama monuluk di kenginan do Kinoringan om mamung om mimbulai di hoturan om karajaan do Kinoringan sid tanga di razat do Sabah om sompomogunan.

I gama mongintutun om humarati di hiza om vaza om kosurutan di habal dino sampai biano mad kungsi om cadangan di paharati di hiza biano om pemot di tokou do vazaan lumombus sid gama mopud om mongopud di goriya di Kristus sid tanga do razat do Sabah.

LIANG KESO: I KINEMBULAZAN DI GORIYA DI KRISTUS

1. I tinomod monurat di Kitab Vagu

Hiza-no di Tuhan Yesus diri, it ongoulun do Yahudi varo-no laid KITAB. I koubasan dioti mangarait di buuk dino, ino-no i TAURAT om it ONGONABI. Minsanko i Tuhan Yesus minamasa sampai nakaramit di buuk dino (Matius 5,17-20 ko Lukas 4 sid Nasaret). Ong hiza di sid tanga ralan i montiri ko panakavan di raja Kandake (Usuran Rasul 8), minamasa-no iosido do Kitab, nga bai i songlundun i Kitab di Yesaya o kinovidan dau. Aso-po KITAB VAGU ino hiza diri, bai i KITAB IBRANI. Aso-po Injil om aso-po surat antad sid isai-nopo it ongorasul diri o nopongo-no. Kagi-po, inot ongosurat dit ongorasul, tanid o kinembulazan. Pengkaa dino: I Paulus, ong kodung nokorikot iosido sid pomogunan do Europa, sid Pilipi, ko, sid Tesalonika, ko, bai oduruk iosido sid ongobandar diri om linumombus-no. Vokon-no ong osunsub, vokon-no ong ahago o gama di Paulus posurut di kapangahabaran di Habal do Kovosihan sid ongobandar di karajaan do Rom. I kenginan di Paulus, tumongkop di karajaan do Rom pahabal di Habal do Kovosihan (imatai sid Rom 1,16-17). Nokolombus-po antad sid Tesalonika om nokorikot-po sid Korintus, amu songkuro, varo't ulun di

piumpugan do Tesalonika kakaa sid Korintus minsamung om mokikovosihan di Paulus. Varo dati bai tolu, apat vulan antad kineduan di Paulus sid Tesalonika, minatai-no it a-ko piro ulun di nakamung-no sid piumpugan. Sabap ino, banalko humongkop it ongokristian sid Tesalonika, tu i habal di Paulus diri, sokovia i it ulun Kristian sumamung di Yesus, hiza do rumikot vagu iosido sitid pomogunan.

Kuran-ma, ka dioti, ong minatai it ama ko it idi ko obpinai om savo, amu dati kasamung ioti di Yesus di rumikot-ogi iosido, tu minatai-no laid ioti dino, ka. Manjadi ino kosusaan dino, minangahabal ioti sid di Paulus di sid Korintus om minindamo ioti do kovosihan om kensasamadan antad sid di Paulus. Varo-po hal vokon minokitarang ioti di Paulus dit ongokosusaan di piumpugan sid Tesalonika diri. Na I Paulus, ong kodung nokorikot ino habal om nokening-no i Paulus dioti dino, okonko rontob tinumimpa sid ongowakil do Tesalonika, inoi nga i gama dau mangambat sinurat dau sid karatas, supaya okonko bai kabang minongolombus dit timpa di Paulus, inoi nga nakatandon-no sid surat i kovosihan di Paulus dino. Manjadi iti-no o kinembulazan dit iso-ogi i surat di KITAB VAGU, ino-no i Surat keso di Paulus pakaa sid piumpugan dot ulun Kristian sid Tesalonika. Sid surat dino minonguji i Paulus di kobuatano di piumpugan sino, pendongou dioti di gama dau mongontok minta dua om monorima kaseh sid Kinoringan bahagi dioti om kuran i gama dau popuhondom di piumpugan, supaya okosog om aparau ioti posurut di piumpugan om kosukupu do koposizon. Minanarang iosido dit ongokosusaan dioti antad sid ongoulun do Yahudi di minangasau di piumpugan, om kuran i kopisomungan dot ulun Kristian di Tuhan Yesus, mizau ko minatai, hiza di kovian do pomogunan sampai pinohodtol i Paulus dot okonko ino kovian rontob ot itungon dot ulun Kristian, inoi nga suvai adau-adau posurut it ipat-ipat it ongoulun Kristian di tugas dau sid ongekob om sid tanga do razat om piumpugan om atag-ogi.

Manjadi iadko i gama di Paulus mangahatul dit ongoulun do Tesalonika o gama dau mangahatul dit ongopiumpugan vokon sampai minongirim iosido dit a-ko piro it ongosurat vokon sid tasantanid-tanid i piumpugan diri. (Korintus, Galatia, Rom, Efesus, Pilipi, Kolose)

Topot ino hiza diri, iso o surat, iso-no o linundunan. Manjadi ong varo piumpugan vokon dit engin dara do milang sid surat di Paulus pakaa sid piumpugan vokon, suvai solinon dot unturu sid karatas vokon om elaan-ogi dioti mongovit i kovosihan di Paulus sid piumpugan vokon. Iri-ogi kadapat ioti do sera-sera mongimbulit mamasa dino boros di Paulus, sera ong varo kosusaan, ko kopigogogutan, ong amu andaman banal i hoturan om kovosihan om habal di Paulus. Manjadi a-milo-milo, varoi ko varo't ulun ko piumpugan di minoghihim dit ongosurat di Paulus antawa i surat dit ongorasul vokon. Kagi, alaid-nopo, a-kopiro it ulun vokon minoniim do monurat do mangalapis di surat di Paulus ko bai mamakai di ngaran om garal di Paulus do tomod momudali om mamalid dot ongoulun om piumpugan, vokon-no ong, tu mongindaraat ko pokihi di Paulus, retanko i Paulus okonko rasul, tu amu nokokoruhang i Paulus di Yesus, gam minongogusa i Paulus dit ongokristian, ka. Boros dioti, suvai rasul om sasi banal di Tuhan Yesus, ong nokovoza it ulun di Yesus.

2. It Injil di Lukas.

Bang mamasa tokou dit Usuran dit Ongorasul (UR) F.16, varo't ahajangan tokou do boros dot, *iokoi, iokoi nga minamanau, rinumikot-okoi*, om i iadino. It ulun di mangahabal do kuran i Paulus sid Troas om Pilipi, kondiri nokovoza sino om mato dau kondiri o nokemot om nokohondom di pangalaman di kinapanahan di Paulus sid Europa. Iosido kondiri o minonurat mangahabal sid Teofilus di sokovia i nongohajangan di Paulus sid tanga do ralan. It ulun di minonurat dit Usuran dit ongorasul, ino-no i Lukas. Okonko sinod Yerusalim iosido hiza di pentakosta i kinendohuvan di Sundu dot Osusi sid ongorasul diri. Pengkaa dino, aso sinod torungku i Lukas sid Rom (Fasal 28). Kagi, i Lukas dino okonko rasul. Tukang obat iosido, dokutol, nga ulun iosido dit agazo o ginavo dau monginsosok om mongonsi sampai mongimpuun di kavazao om hal di Habal do Kovosihan. Iti-no o sabap minonurat iosido di duvo o bahagi di Tukuran di Yesus, ino-no, it Injil Lukas om kuran i Yesus minomongo posurut di Habal do Kovosihan sid gama papanau om posuhut dit ongorasul dau. Sabap ino minoniim i Lukas do mogihim om magandaha sid ongoulun di nakasamung di Yesus, iadko i Mariam, i Elisabat, i Zakarias, i Mariam om Marta ko Lazarus, i Zakai om i Nikodemus om vokon-po. Ininsasakan-po dau ioti, supaya notontuan-no dot ombo it otopot om amu. Kagi-po sinumusui iosido do kuran banal i ralan om vazaan di Tuhan Yesus antad sid Baitlahim sampai sid Golgota om kuran i kinolombusan di

Habal do Kovosihan antad sid Yerusalim sampai sid Rom om it ongopomogunan vokon. Ino surat di Lukas diri, kogulu bahagi di koubasan dau, ino-no i Teofilus. Gam i Teofilus diri nokoponuhu di Lukas do monodiri dino kavi sampai hinaragaan dau dati ino gama di Lukas mongimpuras. Antad dino i gama di Lukas varo usul dit a-ko piro toun antad di kinosinaan di Yesus sampai i hiza do sid torungku i Paulus sid Rom, ino-no it USURAN DIT ONGORASUL. Minsanko i kinapatazan di Paulus sid Rom, nga a-kembulai sid surat di Lukas dino. I harati, i toun 60 TM om nengkod-no i habal om it usul dino.

3. It ongosurat vokon sid KITAB VAGU

Kananganko it ongosurat vokon di Paulus di sid KITAB VAGU, vokon-no ong kondiri it unturu di Paulus o minonurat, vokon-no ko ong bai minonuhu i Paulus monurat, o ino-no i Tertius o ponuration di Paulus dino, hiza dot okugui i mato di Paulus, tu kisakit i mato dau. Antava ong i Petrus, tu buta hurup iosido, tantu suvai ulun vokon o sinuhu di Petrus monurat mongontok dau. Na alaid-laid dino, hiza di kakalpo it ongorasul, varo-no ulun om piumpugan di mindamo dot i tuturan om habal di Yesus itandon sid surat, tu boros dioti, Ong kakal-po sino it ongorasul, ino-no i sasi om koruhang di Yesus diri, antad sid rasul kadapat mongining di tuturan di Yesus. Topot, kodung minatai-no it ongorasul, isai-po-ka o sasi banal di Yesus, okonko bai ulun dit korongou sid sasi dino antawa tuturan dino.

Manjadi, it amu-po minatai i Petrus, i murid dau, I Marakus o minoniim do mongonsi di tuturan di Yesus iadko norongou dau antad sid di Petrus. Ong i Matius, tu elo-no do monurat antad sid gagamaon dau diri, minamakai di surat di Markus sampai inomungan dau it a-ko piro it ongotuturan om tudukan di Yesus (Fasal 5-7; 10; 13; 18; 23-25.) Sid tohudi banal, ontok dit osomok hatas toun it umul di Yahya diri, varo't ulun di minongogorot di Yahya do monurat-po dot Injil. Iri-ogi om kembulai it Injil di Yahya dino. Topot inot ongoinjil dino nokosurat kavi bahagi di tasantanid-tanid o piumpugan, isuhut di vatas om bansa di porikatan om intoronon dit ongorasul. Kokiraa, sabap tu i Matius nakagavul sid ulun Kristian dit warga negara Yahudi, ogumu o gama dau manarang di Habal do Kovosihan maza sid boros di KITAB LAID. Om it Injil di Lukas ponong sid ulun di nokosuvang sid hoturan do Rom, na i hal do kabanaran, nokembulai antad sid kosikimo dot ulun om i hoturan do Rom.

Manjadi ombo i piumpugan di nakagamit di surat ko injil dau dino, tinaud-no i surat dino om injil dino mituturun-turun sid a-ko piro o generasi, dot alaid-laid, varo't ulun om piumpugan vokon di minokisalin di surat om injil vokon dino, tu i tomodon milang di surat om injil vokon dino. Topot kakali amu-po noulud it ongosurat om Injil sid iso o buuk dino. Suvaiko aso-no kavi it ongorasul om varo-ogi nokopongitung dit ongoulun Kristian dot lobi-po avantang dara ong varo osompuru inot ongosurat om injil dino.

Na i tinomod diri do patandon sid surat di sokovia i it ongohabal om ongokososizan antad sid Tuhan Yesus okonko tomod mongimbulai dot adat ko hoturan om hukum vagu, inoi nga kenginan dioti diri dot i Yesus Kristus, i minonuhu di kinoruhangan dau diri, sid surat om kososizan dit ongorasul kakali momongo mozo-vozo dit ipat-ipat it ulun Kristian om piumpugan do momongo mangahatul om mogkovosihan dit ongoulun di dang Kinoringan. I kiniro dioti, om iti-no kagi o tomodon tokou sid gama monginsosok dit Usuran do Goriya di Kristus, ino Tuhan Yesus diri om i tuturan om gama om tugas dau, amu-po nopongo. Iosido kakali momongo didino do mangagazad om monuhu om tumalad di tokou posurut di kenginan do Kinoringan.

4. I kinotimpuunan om sabap do varo goriya di Kristus.

Sid Injil Yahya kahrati tokou dot i gama di Yesus okonko antadko sid ginavo om kenginan kondiri. Ingapat nopod mongimbulit i Yahya di boros di Yesus dot, *I Ama i minonuhu dohon*, ka. I harati, i Yesus suvai sinumuhut mongovit om poromot sid riniba di samod do Kinoringan, tu sinuhu di Kinoringan it Ama. Iri-ogi i Yesus polombus dino tugas dino sid kinoruhangan dau: Yahya 20,21, *iadko it Ama-ku minonuhu dohon o gama-ku monuhu dikou*, ka di Yesus. Ino tugas dino avalang-no sid a-ko piro it ongoayat, iadko sid Matius 5,13

Ikou dino iadko asin do pomogunan

Ikou dino o panganavau di vinangun.

it ongovalai di sid timpak do burul amu kosusut

Ko Yahya 13,35 om 17,21:

ino-no i pogintutunan dikou di sokovia i it ongoulun do koruhang-ku ikou, ong varo kopisasamadan dikou.

Mindamo-oku, supaya koiso kavi it ongoulun di mangasip sid dohon, om mangasip-ogi i vinangun, ka di Yesus.

Iri-ogi minonuhu-no i Yesus di kinoruhangan dau do minud sid Yerusalim sampai kotorima ioti di kuasa do Kinoringan, ino-no i Sundu dot Osusi. Suvai nokotorima di Sundu dot Osusi om jumadi-kou do sasi-ku sid Yerusalim, sid Yudea, sid Samaria sampai sid pentongkop do pomogunan, ka di Yesus. (Usuran Rasul 1,8)

Sabap ino, koubasan dit ongoulun Kristian momoros dot, I kinembulazan banal di gorija, ino-no i hiza di kinendohuan di Sundu do Kinoringan hiza do Pentakosta sid Yerusalim. Ong lukison ino kinapatazan di Yesus sampai sid bai kovian dit Usuran dit Ongorasul, iadino o buatan. Ong onsizon i laporan di Lukas, iaditi it ongotoun antad kinosinaan di Yesus.

01 TM	kinosinaan di Yesus sid Baitlahim
12	sid panambayanan i Yesus
30	kinopodsuan di Yesus sid Yarden
33	Golgota, kinapatazan di Yesus kinogulianan di Yesus, kinendohuan di Sundu dot Osusi kinembulazan di gorija
34	kinosurutan do gorija sid Samaria
37	i Saulus jumadi do Paulus sid Damshek
42	sid Antakia i Paulus
45	miting sid Yerusalim
48	Paulus tumupak sid Troas kakaa sid Europa
49-51	Paulus sid Korintus
52-55	Paulus sid Efesus
56	magandaha i Paulus sid ongopiumpungan
57-59	sid torungkus i Paulus
59-60	sid Rom i Paulus

5. It laporan di Lukas om it usul sid karajaan do Rom.

Minsanko ahatul o gama di Lukas diri monginsosok om mongimpuras di kogumuai di habal ponong sid kososizan dot isai om kuran i Yesus om i rasul dau, okurang o tomodon dau mongusul ko monurat sejarah, isuhut di vaza tokou biano mongitung om mongusul do sejarah. Ong sid sejarah di karajaan do Rom, okudik nga aso nakalapor kananganko i Yesus om kuran i kinapatazan dau. Varo laporan kananganko i Pilatus om it Festus om i iadino, i Galio sid Korintus om i Kurenius humiza di Yesus. Topot i pomogunan do Sur om Palistina bai daerah dit okonko agazo o guna bahagi Rom, gam bai daerah dot asarok varo mongodurhaka om sumaap do porinta. Sabap ino, asarok ohukuman-no it kogumuai ot ulun Yahudi do apatai sid kazu do sangkap, tu i hukum do patazon sid sangkap, nga hinotusan, om gam rinibuvan ot ulun ot nanangan i hiza diri. Ong sid ulun Rom, ino kinapatazan di Yesus sid kazu do sangkap bai iso sid pialatan do rinibuan dot ulun Yahudi di nohukuman do iadino, tu nakaranggal di hoturan do Rom. Sabap ino, bai i Kitab Vagu o monuturan sid di tokou di tuturan di Yesus, om ino tuturan dino okonko sejarah o tomodon, inoi nga Habal do Kovosihan om kososizan di karajaan do Kinoringan, it inovit di Yesus antad sid Ama dau porikot sid tanga do riniba. Gam iosido mad puun di hoturan vagu dino om iosido o minongimbulai di hoturan dino sid gama posuhut dit a-ko piro ot ulun sid rombongan dau, supaya ioti jumadi di hoturan om bansa vagu do Kinoringan, mad riniba vagu om tanda di vinangun vagu dit antad sid kovosihan do Kinoringan. Ino hoturan vagu dino nokembulai sid pialatan dit ulun mosikim om it ulun dit aso ngaran, okonko sid istana do Rom antawa Yerusalim. Topot i Yesus dino i Minananggung di sokovia i riniba, dot amu monodiri Yahudi om Rom, ulun dit obebas om uripon, ondu om kusai. Ensan an it ongoulun varo tomodon om panangan

om harapan ponong sid Kinoringan, gima i Yesus Kristus.

Isuhut di Usuran Rasul 1-2 minonuhu-no i Yesus di kinoruhangan dau do minud di kendohuan di Sundu do Kinoringan, ino-no i kuasa do Kinoringan di monunda om monguasa dit ulun Kristian sid tugas pazazad di Habal do Kovosihan. Ontok dit Festa Pentakosta nokosondot-no i Sundu dino sampai tumimpun-no i khotbah di kinoruhangan di Yesus. Bai adau diri, varo nakamung do 3000 ot ulun. Inot adau dino mad adau di kinosinaan do gorija. Topot i tinimpun diri, it ongoulun di sinumuhut di kosipan dot ulun Kristian koluu di boros laid di Yesus dot, Asin ioti do pomogunan ko panganavau diti vinangun.

I hiza diri aso-po hoturan tantu koluu di hoturan dit ongobansa ko ongokarajaan. Banal-no, i hiza dot i Paulus minamanau sid ongopomogunan dot okonko Yahudi, varo't a-ko piro rasul sid Yerusalim i retanko origi do piumpugan, ino-no i Yakobus om i Petrus. Iri-ogi i Paulus potugas dot ongoponulung om ongomangahatul om mandul (imatai sid 1. +2. Timotius). Rontob-nopo, ino tugas dioti okonko sinumuhut di hoturan sid ugama Yahuda di kiadministrasi, inoi nga i kiniro di Paulus om it ongosinumuhut di Paulus, ioti notugasan di Yesus. Inikid ulion do piumpugan mad wakil di Yesus di mongontok di Yesus sid gama manaud di piumpugan. Pengkaa dino, ipat-ipat i piumpugan nga rombongan di sumasi di samod do Kinoringan sid tanga do razat. (Yahya 13,35 om 17,21). I hiza diri bai onibak i kosipan dioti diri, ino-no, I Yesus o Tuhan. Na i pongoretan TUHAN ko kyrios (ong boros Yunani) nga kiharati dot iosido o manansanganu di sokovia. Topot i hiza diri bai i Kaisar kavasa mamakai di garal dino.

Na amu songkuro antad diri, tinumimpun-no i koubasan dot it ulion do piumpugan i retanko mandul ko uskup (bishop), minonguasa di piumpugan sampai guru ioti om nabi-po do piumpugan. Ioti sinumusuhut dit ongorasul sampai minongimbulai di hoturan do suvai i uskup o momodsu om kiguna-ogi i kopomoduan dot ulun Kristian. Iri-ogi varo-po kotua gorija om i ponulung sid piumpugan. Ino hoturan di iadino, nisurat-no laid sid 1.Surat di Clemens TM 95. Ino hiza diri sinumodiri it ongopiumpugan dit ulun di kitugas om i-po't ulun di bai razat do Kristian. Ong i kitugas minangagazad om minonunda di piumpugan, topot i razat suvai sumuhut om mangasip di hoturan dit ulion om atag-ogi.

Pengkaa dino hinoturanan-no i gama sumambayang om manambayang. Suvai varo-no laid tudukan do kopomoduan om opodsu-ogi it ulun, sampai kaamung sid poginakanan di Tuhan Yesus. I kinotimpunani diri, it ongopiumpugan minongohormat di poginakanan di Tuhan Yesus iadko vaza poginakanan banal. Topot i Paulus minamajal dit ongoulun sid Korintus, gima amu atag o gama dioti mongohormat di poginakanan dino. Iri-ogi osodiri i poginakanan di Tuhan Yesus sid ongopiumpugan sampai minamakai di kakanan om inumon do bai tanda-po di gama di Yesus mongontok di riniba. I vaza sumambayang, varo-no longoi, Pomintaan dua, mamasa di Kitab om Khotbah om iri-ogi i poginakanan di Tuhan Yesus. Isai-nopo it amu-po nopodsu, a-kavasa mamung sid piumpugan sid rinuvang do panambayangan. Ino hiza diri minimbulai i pongitungan dot i poginakanan dino okonko bai mongohondom di kinapatazan di Yesus o tomodon, inoi nga mad poginakanan, supaya aso kapatazan. I kakanan om inumon mad ubat di potiru di koposizan dot ulun. Kagi suvai it uskup kavasa mangahatul di poginakanan dino. Kodung nakakan om nokenum dino, najadi-no it kogumuai dot ulun do guvas di Kristus om piniizaan di Yesus.

It ongopiumpugan minamasa di Kitab Laid, tu sid Kitab dino nokembulai i kenginan do Kinoringan, ka. Boros di gorija diri, suvai i Kristian kaharati banal dino kenginan do Kinoringan i nisurat-no sid Kitab Laid. Ong it ulun Yahudi mad amu kaharati di kenginan dino, ka. Alaid-laid-po om varo-ogi it a-ko piro surat om bahagi di retan tokou Kitab Vagu. Suvai it Abad ko-3 om noumpug-ogi i Kitab Vagu sampai minangarait ioti dit pinongumpugan dit ongobuuk dino dot KITAB DOT OSUSI.

6. Isai-ka it ulun Kristian diri?

Sampai i hiza di Kaisar Marc Aurel (161-180) i kogumuai dot ulun Kristian nga uripon om ulun do mosikim, nga amu minonodiri i piumpugan do lumundu ko mosikim, oebas ko uripon. I hiza diri bai okudik it ongoulun dit okonko uripon. Na i kiroon dit ongorasul, iadko i Paulus, oduruk-no om korikot vagu i Yesus. Sabap ino mad aso tinganan do mamajal dit ulun di monguripon dit ongoulun ko

moniim monimban di hoturan do varo't uripon. Sabap, ka di Paulus, I kobuatano diti vinangun diti nga tumanusi (1. Kor. 7,31). Kodung korikot i hoturan vagu, tumanus-no sokovia i ongohoturan laid dino, ka di kiroon di Paulus. Kagi, sid tinoguvangon do Kinoringan it ulun dot obebas, nga uripon di Tuhan, om it uripon, nga pengkaa dino, ka.

Sampai mavi-no it Abad koduvo, aso-po valai do panambayanan dit ongopiumpugan. It ongopiumpugan miuumpug sid ongovalai dot ulun, sabap vokon-no kakali osusut i gama miuumpug sampai kakali amu-po koho i porinta do Rom do varo piumpugan. Aso-po kabanaran dot ulun Kristian i hiza diri. Na nokotimpun-ogi dot varo sumuvang sid Kristian it ongoulun di kitugas sid porinta, minsanko sojal, varo-no nakakasu om iri-ogi minongoho-no it a-ko piro i porinta dot varo piumpugan om varo kobebasan dit ongopiumpugan dino. Topot sid gorija kakali varo't ulion di moniag do ulun Kristian kumaraja sid sojal, tu, ka di Tertullian (150-223), it ulion sid Afrika Utara, Kondiri di Yesus minoniag di Petrus do kumavid do sapadang, pengkaa dino it ulun Kristian a-kavasa mozo sid rumpak.

It uskup di mad randavi i hiza diri, ino-no i Kuprian (210-258). Iosido minongimbulai di tudukan di kesaan do gorija. I boros dau, Sabap nokoboros laid i Yesus dot, I Petrus, ino-no i pampang di potimpakan di gorija, ka (Matius 18,18), a-milo-milo i gorija sumusui di tudukan om hoturan dit ongorasul. Sabap nisuhu-no laid di Yesus i kinoruhangan dau dot, Iadko it ama-ku minonuhu dohon o gama-ku monuhu dikou, (Yahya 20.,21). Inot ongorasul dino o piniizaan do Kristian sampai sokovia i it ongoulun Kristian, nga sumusuhut di hoturan dioti dino. (Antad ino tudukan di Kuprian diri inanu di gorija Rom (RC) di kabanaran bahagi di tugas di Pope.)

7. It ongoulun Kristian om i Kaisar do Rom

Varo boros di Paulus sid Rom 13,1 dot, Atag-no dot ipat-ipat it ulun sumuhut dit ongoulun di dikuasa sid pomogunan dau, tu aso't iso do kuasa dot okonko antad sid Kinoringan, ka. Ino boros dino amu oruhai ohorotizan dit ongoulun Kristian hiza diri om sampai biano.. Antad tinimpun tinumiim it ongokristian dot avantang o gama dioti ponong sid karajaan. I Aki do gorija Justin minonurat sid Kaisar dot, Iokoi Kristian monulung dikau do pengkakat di kopioondusan sid sompomogunan sampai amu mengkod mongontok minta dua bahagi dit ongoulun do pomogunan (1.Timotius 2,2 om 1. Petrus 2,17. Ino-no rontob, amu minangakun it Ongokristian do mongohormat di gambal om tiningulun di Kaisar di mad pinokokinoringan. Topot i Kaisar nakapangahatul-no dot sid siombo-nopo sid suvang di pomogunan dau, varo gambal ko patong di Kaisar sampai a-milo-milo sokovia i razat sumamba sid gambal om tiningulun ko patong di Kaisar dino. Ong it ongoulun Yahuda nakadapat do kabanaran dot amu osusa mamung sid gama mongohormat om sumamba di iadino. I Herodis o nakanu-no di kabanaran di iadino. Ino kotubasan di iadino nakaraliu sid Ongokristian sid saralom dit a-ko piro toun.

Alaid-nopo, hiza do norumpakan-no vagu i pomogunan do Palistina om Yerusalim, mad aso tenganan dit Ongokristian do sumusut om mongolim di gama tumohiang sid gama sumamba sid gambal om bondira di Kaisar. Hiza di Kaisar Nero om alanta-ogi banal dot it ongoulun Kristian moniag di gama di iadino. Na i Nero, hiza di najadi iosido do Kaisar, bai 17 toun it umul dau (44-68 TM Kaisar iosido). Sampai i hiza diri, it ongokaisar pinengkakat di kogumuai do valai, bai upis-nopo dot avantang it ongovalai dino sid Rom, it ibu kota. Topot ong it ongovalai dot ulun, bai dundung om kazu dot kiongoruhak-ruhak om bata o nigama. Asarok do nosorob it ongovalai dino om ahandab. Iit-no sabap minongumba i Nero do monimban dit ongovalai di iadino. Rontob-nopo, a-koho it ongoulun di minizon sinod Rom, tu rumosi ioti, ong kodung varo valai vagu, asavat i siwa. I toun 64 tigogi varo apui di minangahandab dit ensanan it ongovalai dit ongoulun do mosikim sid Rom do kosizamam om opisok-ogi it apui diri. Asapou it ongoulun do nokorundun sid apui dino. Varo minomoros dot i Kaisar o minonutud dit ongovalai dino. Topot i Nero o minongimbulai di habal dot it Kristian o minonutud sampai minangahandab dit ibu kota Rom dino, ka. Norongou-po di razat i iadino, ensani minanangkap ioti dit ongokristian sampai minangahatul di kapatazan dit ongokristian, vokon-no ong nisangkap, vokon-no ong tinuntugan do air tiil om otutudan-no sid koribing dot alun-alun ontok do sodop iadko rilin, vokon-no ong isumad dit ongodupot dot orongit. Varo tangon dot i hiza diri i Paulus om i Petrus minatai sid Rom.

Ino hiza diri nakaharati it ongoulun dit okonko Kristian dot i ugama do Kristian mitanidko it ugama do Yahudi. Manjadi hiza di Kaisar Domitian (81-96) manabpo-nopo dit isai-nopo it ongoulun dit amu sumamba sid gambal di Kaisar sampai uriponon ko pinatai-no. Ino hiza diri nisurat-no di Yahya, i koruhang di Yesus, i Buuk do Kentalangan. Na i Kaisar di sinusuhut di Domitian, ino-no i Traian (98-117) minangahatul dot amu atag do mongogusa dit Ongokristian. Banal-no ong varot ulun dit amu sumamba sid gambal (patong) di Kaisar, ino-no onong do hukum dot apatai. Topot ong varot ulun di mongoruput do Kristian, pemozoon di pagawai ino ruputon dino.

Ong onsizon i sokoviai it usuran dit ongokaisar diri sampai toun 311, ogumu o hal nokembulai di banalko araat. Ogumu it ongokaisar minamatai di varis ko anak ko it kaisar gulu, i savo om idi do tomod momihot di hoturan dara, nga vokon-no ong it ongosojal minamatai di Kaisar om minamangkat di kopitan dau do Kaisar. Na sokoviai kinumavid dit ugama di Mato dot Adau, retanko i Kaisar anak di Mato dot Adau, tu minongitung dot ino ugama dino popizo om pomihot di hoturan do Rom. Sabap ino, salaid do varo hoturan do iadino, ogumu o kosusaan dit ongoulun Kristian, isuhut di kobuatano om kozian dit ipat-ipat i Kaisar diri.

Suvai toun 311 om varo-ogi hukum di manarang dot mangakun i Kaisar do varo Kristian sampai koho iosido do momongo ioti sumambayang sid Kinoringan om mangahatul dit ongopiumpungan, ong sukul amu sumaap di hoturan di Kaisar, ka. Gam varo-po nakamung do boros dot, Isuhut di gama-za mongoho sid ugama dioti, atag dot ioti minta dua sid Kinoringan dot i Kinoringan mamarkat om mogkovosihan di karajaan om i Kaisar, supaya osinang i pomogunan tokou, ka. Manjadi itit toun 311 o kinotimpuunan di kobebasan do gorija sid karajaan do Rom om i gorija di karajaan do Rom. I Kaisar o minangahatul di iadino, ino-no i ngaran dau, Konstantin. Gam kodung nokoponori-po iosido di sampapas do karajaan do Rom Barat, ino-no i Ibu Kota Rom, minangahatul-no iosido dot sid saralom di karajaan varo kobebasan di sokoviai it ongougama sampai it ongopandita do gorija miabal kigalar om pangkat sid porinta iadko it ongobobolizan dit Ugama rasmi, ino-no i ugama di Mato dot Adau ko Ugama Kaisar. Suvai hiza do mongingab-po om minokipodsu-ogi iosido, tu ginaratan dit idi dau di Kristian laid iosido. Songkoledo di Kaisar iosido, minomurimon iosido dot it ugama di Kaisar mad aso kuasa. Topot ong it ugama Kristian mad kakansangan di popizo dit ongoulun dot amu osodiri i bansa ko boros.

Minatai-po i Konstantin, nokembulai i tangon dot i Konstantin minonginipi-no sampai nakasamung i hatod dau di Yesus hiza di minirumpak iosido di daerah barat di karajaan do Rom. Na niboros di hatod di Yesus sid hatod di Kaisar dot, Kovidai-no iti sangkap-ku om kamanang-ko dino. Ong boros Latin, ino-no, IN HOC SIGNO ko IHS, dot ino IHS mad hurup timpuunan di ngaran di Yesus Kristus.

Na i hiza di Konstantin diri, varo iso pihopodon dit razat di karajaan do Rom nga Kristian. Na nokemot i Kaisar dot ahatul banal i gorija. Sabap ino, iosido tinumabang do patatap om popizo di sinoda do Gorija di toun 325, supaya atarang i kosipan dit ulun Kristian om a-koho iosido do varo-po't ulun di mangasau om mongunang di kosipan do gorija. Iti-no o kinotimpuunan do varo KOSIPAN DIT ULUN KRISTIAN, iadko i PCS mangakun di kosipan hiza do sumambayang. I Konstantin minangahatul dot isai-nopo it amu mangakun om sumuhut di kosipan dino, osunsub sid gorija sampai jumadi do rombongan di nokotihang-no. Ino hiza diri nosunsub-no i uskup Arius om i uskup Donatus, tu sompi ioti amu minangakun di kosipan isuhut dit upakat do gorija om i Kaisar Konstantin sid Nikea.

8. Isai-ka i Yesus Kristus?

Ong i di Petrus do kososizan, ino-no, *Ikau dino i Kristus, it anak di Kinoringan i kapapasi*, ka (Matius 16,16; Markus 8,30; Lukas 9,20). Ong i di Paulus do kososizan, ino-no, *I Yesus o Tuhan*, ka (1. Kor. 12,3). Ong hiza di kinotimpuunan do gorija, miuma dot onibak i kososizan dino. Alaid-nopo varo't ogumu ot ongoduatan om ponginsasakan om pongimpurasan di tasantanid-tanid it ongoulun di siombo-nopo dot nunu o harati ino kososizan dit Ongokristian kananganko i Yesus. Iri-ogi minoniim it Angaki do gorija, ino-no it ongoulun hiza dit Abad koduvo manarang dot,

*Kasip-oku sid Kinoringan, it Ama, i monguasa di sokoviai om
sid Kristus Yesus, it anak do Kinoringan dit iso-no, i Tuhan tokou,*

i nisangkap di Pontius Pilatus om nilobong-no, adau-po di kotolu nogulian-no antad sid ulun minatai, nokendakod sid surga, mogom sid vanan dit Ama, om rumikot vagu, tu mongohukum dit ulun di mizau om minatai

om sid Sundu dot Osusi, i Gorija dot osusi, i kaadaan do sala om i kogulianan do guvas. ka.

insanko nakasasi do iadino, kakali it ongoulun songitung-itung do kuran banal i i Yesus varis do Kinoringan it Ama. Sabap sid ugama do Yunani, varo ogumu o kolu-koluvon kananganko i Kinoringan om i Minamangun. Retanko i Arius, it Anak, ino-no i Yesus okonko miabal dit Kinoringan it Ama. Suvai nokosino i Yesus humiza diti riniba, aso-no laid ong i Yesus, sabap iso nga aso kerad do Kinoringan ko koluu di kohormatan do Kinoringan, ka. Na i sinoda sid Nikea TM 325 o minongolumbatos dot, i kobuatano di Yesus miabal dit Ama dau, ka. Manjadi isai-nopo it amu minangakun dino, nosunsub-no sid gorija do Rom.

Kondiri di Kaisar minonuhu do bai ino kosipan kavasa mamakai sampai isai-nopo it amu sumuhut, nga nokedu-no sid gorija di Kristus. Gam varo uskup di minomoros dot ino sinoda dino mad Pentakosta koduvo om mad kotimpunan di karajaan do Kinoringan, ka. Ino iadino nokosurat sid USURAN DO GORIJA DI EUSEBIUS.

Ino hiza diri notontuan it adau Minggu di retanko Sunday ko adau do pongintaranan, tu adau di Mato dot Adau, mitanid dit adau Sabat dit ulun do Yahudi. It Mato dot adau, i harapan laid di karajaan do Rom, inanu-no do pangaharati do KABANARAN, om i kanavahan, sabap i Yesus o kabanaran do Kinoringan om i kinourugan o minongimbulai dit adau.

Pengkaa dino notontuan-no it adau di kinogulianan di Yesus, ino-no it Adau minggu di sumuhut dit ovokou i vulan katalib di kotimpunan do monongvusak (ovokou i vulan katalib dit 21st Mar, i vulan di kotorindak it adau sid Sabah. Ong it adau do kinosinaan di Yesus, varo-no laid dot 6. January, nga amu songkuro om osimbanan dot 25. December, ino-no it adau i retanko adau di kinosinaan di Mato dot Adau di jumadi do sinundu. Tanid mantadko ino, i Kaisar Konstantin minangahatul di koturugan dot a-ko piro o valai panambayanan sid Istanbul, sid Betlehem, sid burul Golgota om Rom.

9. I gorija jumadi dot Ugama rasmi sid karajaan do Rom.

Minatai-po i Konstantin (TM 327), binahagi-hagi-no i kuasa dau sid tolu it anganak dau. Topot inot anganak dau minioduw sampai bai it Konstantius II o nobi. Iosido dino minoniag di nunu-nopo songugama vokon sid suvang di karajaan dau sampai minonuhu dit ongojagal om jaga do pomogunan do momunso di sokoviai it ulun dit amu kasip sid Kinoringan om mongorongoi di sokoviai it ongopanambayanan dit okonko dang gorija. I Kaisar Teodosius (379-395 TM) minangahatul-no vagu di gorija om it ugama rasmi sid karajaan dau, dot ino-no i kovosihan sid sokoviai i razat di karajaan dau, *sokoviai it ongojagal di nokosuvang sid hoturan-ku, a-milo-milo mangasip di kosipan dit antad sid di Petrus. Isai-nopo i mangasip di iadino, nga arait do Kristian Katolik. Topot it ongovokon di mad mulau om obungou dino, nga a-kadapat do bantug om okonko arait-po do gorija, anangan di hukum do Kinoringan om ogusa-po diti hoturan-ku, supaya antad sid Kuasa do Kinoringan mongohukum-oku dioti.*

Ino dino notontuan-no vagu sid Sinoda sid Konstantinopol TM 381.

10. I kotimpunan do varo hoturan di Pope sid Rom.

Ong isuhut di tradisi di RC, retanko i Petrus minangahatul di piumpungan sid Rom sid saralom do 25 toun. Antad di gama di Petrus manampal dit ulu dit ulun di gumanti dau do uskup sid Rom, mituturun-turun ino gama do patampal di palad om povozo di barakat di Kristus, isai-nopo i uskup sid Rom, nga nakanu-no om nokotungkus-no i barakat di Yesus bahagi di tugas dau dot ulion iosido di gorija sompomogunan (Matius 18,18). Ong otopot, amu atarang banal sid boros di Yesus, isuhut di laporan di Matius, dot ino boros dino mad gama mamangkat di Petrus dot ulion do gorija sompomogunan.

Kananganko i kinembulazan di piumpungan do Kristian sid Rom, okonko i Paulus om okonko i Petrus o pinengkakat di piumpungan dino. Ong i Paulus, bai a-ko piro toun iosido sid Rom hiza di notorongku iosido (UR 28). Aso boros sino dot i Petrus, nga sinoi. Sid surat di Klemens I (TM 95) varo tuturan kananganko i kinapatazan di Paulus om Petrus sid Rom, nga bai onibak o boros sino dino kananganko i kinapatazan dioti. Aso boros do songkuro kalaid ioti sid Rom.

Kuran-kuran, ontok dit pintangaan Abad koduvo, i piumpugan do Rom it agazo banal, labaan do 30000 Kristian om varo 150 ot ongoulion do piumpugan, kotua gorija om pandita i retanko uskup om ponulung. Ino piumpugan dino okonko atandas ulun do Rom, varo-po Yunani om ulun vokon, om i kogumuai, nga bai uripon-nopo. Hiza di Kaisar Teodosius minoniim it ulion do gorija sid Rom do monginsavat di garal dau, retanko iosido nga mogom sid ogomon di Petrus. Topot ino hiza diri varo koubasan do mangarait di sokovia i it ongouskup do PAPA- = pope, ko Ama. Suvai avi-no it abad kolimo om ino pongoretan papa ko pope jinumadi do pangkat dit uskup do Rom di monguasa di sokovia i gorija di dang katolik sid sompomogunan, ka. Bai ino hiza diri nokotimpuun-no sid palad dit ulion do gorija sid Rom do mongumpug di sokovia i it ongokovosihan di Kaisar om upakat di gorija kananganko i kuasa om hormat dit uskup do Rom, supaya alaid-nopo, varo tradisi di retanko antad sid palad om kuasa di Petrus om i Kaisar, ka.

Na sid gorija ponong sid Yunani om Turkey, varo-no vagu kopigogutan kananganko i Yesus. A-ko piro it ongouskup minangarait di Mariam do MINAGANAK DI Kinoringan, ka, teotokos ong boros Yunani. Topot i Uskup Nestorius sid Iran dinumahava dot, A-kavasa mangarait di Mariam dot ondu di minaganak do Kinoringan, suvai Kristotokos om atag-ogi, ka dau, ino-no i harati, I Mariam o minaganak di Kristus, ka. Kodung varo't ogulou do iadino, i uskup Cyrill sinumaap di Nestorius sampai i Kaisar minongumpug do sinoda sid Efesus (431 TM), supaya varo kolumbatasan kananganko i kososizan bahagi di Yesus om it inantadon sid di Mariam. Na i Cyrill nakadapat do mangapil dit ongouskup vokon, supaya iosido kamanang om osunsub-ogi i Nestorius dino. Ino hal dino, banalko agazo o hal. Tu antad dit ongopiumpugan di Nestorius diri, ogumu ot ongomissionari nakapanau-no kumaa sampai sid pomogunan do Kina sampai nokotimpuun i gorija Kina om nokosurut sid a-ko piro ot ongoabad diri. Hiza di toun 685 varo't ongoduvo natus ribu Kristian sid pomogunan do Kina, dot alaid-no, tinumanus-no vagu ino gorija sid Kina dit antad sid hoturan di Nestorius, sabap i gorija di Nestorius sid Iran om Irak, tinumanus, tu gima i pinigogogutan om pinisasanaan dit ongoulun Kristian diri di mioduw-nopo, kananganko isai-ka i Yesus Kristus, Kinoringan iosido ko bai riniba, koluu do Kinoringan ko otopotko Kinoringan om pengkuro. Manjadi ino pinisasanaan kananganko i kososizan dot isai i Yesus o kinosongkutan do gorija pasasi-po di samod om kabanaran om kovosihan sampai i Habal do Kovosihan do Kinoringan sid sokovia i it ulun, sid razat kondiri om ponong sid ongoulun om ongobansa vokon. Ino iadino dino mad kinotimpuunan di kokuguzan do gorija i hiza diri.

LIANG KODUVO: I GORIJA SOMPOMOGUNAN SID ABAD ko9 sampai ko15.

Varo koubasan dit ongosaiantist do mongusul om mongimpuras di hiza do mongiro dit ongohiza pengkaa dino, **I hiza di kodori banal** (ong Inggeris antiquity), ino-no i harati, guluko it abad kosizam. Iri-ogi i **hiza sid tanga** (Middle Ages), ino-no it abad kosizam sampai ko-15. Ong i hiza antad dino sampai bianco, ino-no i **hiza vagu (ko modern Time)**. Na sid saralom di **Hiza sid tanga** varo a-ko piro o hal dit atag mongohondom, ino-no;

- I. I gorija sid abad ko-9 om ko-10. I Kaisar om i Pope
- II. It ongoabad di perang salib
- III. Napalid i gorija, tu oholian i kuasa dau
- IV. Sid pongovian di Hiza sid tanga/Pongovian abad sid pintangaan

I. I gorija sid abad ko-9 om ko-10.

1. I karajaan di Charles sid Europa

Ontok do Kristmas 800 napangkat-no i Charles do Kaisar do Europa Tanga dot ino kinapamangkatan dino najadi-no sid Rom dot i Pope o minamangkat sampai pinasantak dit antub-antub sid ulu di Charles, tu iosido-no o Kaisar. Ino Kaisar Charles dino, retanko i Charles Randavi antava Charles Magna. I sokoviai it ongopomogunan do Europa di nokokristian diri nokosuvang sid kuasa di Kaisar dino. Ombo i suku bansa dit amu-po nokokristian diri, topot sid pialatan di karajaan di Kaisar diri, nga kakali dot i Kaisar o minangahatul sampai minamakai di kuasa dau om rumpak, supaya kokorositian kavi it ongoulun om it ongobansa di nokosuvang sid hoturan dau. Sid saralom di hoturan dino nokotiim i Kaisar do pemumui di suku bansa do Saxonia sid gorija. Topot banalko mangamu ioti di hoturan diri. Iri-ogi minonuhu i Charles dit ongosojal dau do mamatai di sokoviai it ongoketua kampong om ginaratan dau i sokoviai i razat do mokipodsu. Isai-nopo it amu mokipodsu, pinatai dau. Ino-no i tomodon di Kaisar diri, popizo di hoturan do gorija om porinta. Rontob-nopo, kodung minatai-no i Kaisar Charles diri, it iso it anak dau i retanko **Ludwig it elin**, ka, a-kogoos iosido mangahatul di karajaan dino. Amu songkuro nabahagi-no i karajaan dot i tolu it anganak dau jinumadi dot ulion dit tolu o bahagi dino. Topot sabap, tu enizo okugui i hoturan dioti diri, kinumavid-no vagu it ongoulion laid dit ongobansa om suku bansa di hoturan sid dau om dau do watas om daerah om pomogunan. Na i hoturan di karajaan amu-no noguna banal sid saralom do hatas toun.

2. It ugama Kristian monguasa do Europa

Amu oruhai mongusul do kuran it ongobansa do Europa jinumadi do Kristian. Vokon-no ong kodung it ulion do daerah ko pomogunan sinumuvang do Kristian, iosido minangahatul om minangagazad di razad dau sumuvang. Rontob-nopo amu miuma i gama dit ongoulun di minonuduk di kosipan do Kristian. It ongoulion baiko minongimbulai do hoturan vagu om minongohukum dit ongohal dit akavasa sid Kristian om minonimban-no di buatan om kavazao om undang-undang dit ongobansa dino isuhut di pongohorotizan do Kristian. Manjadi minsanko kumoristian it razat diri, nga baiko sid soribau o nokokristian ioti. Topot ong sid saralom kakali ogumu ot ongohal om ongokoubasan isuhut di hoturan dit ugama laid diri. Na i Charles Randavi minoniim do popisuhut banal dit ongoulun sampai mongitung, iosido okonko bai ulion do pomogunan, inoi nga ulion-po iosido do gorija sampai i karajaan om i gorija, na enizo it ongohal om hoturan.

Sabap i razat di bai ngaran nokokristian diri banalko hinumarap sid ongohojimat om barang i retanko dang ugama, tulang do rasul ko vinsil di sangkap di Yesus antava i paku di napakai hiza di asangkap i Yesus diri, minonuhu-no i Kaisar dot, A-milo-milo ipat-ipat it ulun Kristian ohondom i Kosipan om i Pomintaan dua di Yesus sid dau do boros sampai pamung sid gama sumambayang om mangakun di kasalaan dau sid pandita ipat-ipat toun sampai minta dua suvab-suvab isuhut di hoturan dot ilunsing. Rontob-nopo, ino hoturan di Kaisar dino amu tinumongkop di pomogunan dau. It ongoulion dit ongowilayah om daerah, i retanko Bishop okonko enizo ozi do polombus di hoturan di iadino sid dau do vatas om amu ozi ioti do varo mangahatul tanid mantadko ioti kondiri. Vokon-no agazo o ginavo dit ongoulion do gorija sid ongowilayah do bai pengkakat dot agazo o panambayanan di mad bantug di kuasa dau mantadko i gama monuduk om mangagazad dit ulun Kristian sid kosipan om harapan om it atag o gama mongimbulai di kabanaran do Kinoringan.

Kananganko i kinorikatan di Habal do Kovosihan sid Europa diri, varo rombongan do semfug antad sid Ireland di minizon sid a-ko piro o tempat sid Europa Tanga om minong-ingkakat do piumpugan dot ulun Kristian om kampong do Kristian. Pinihiza dioti minuvalai om minangahatul dit ongoalunalun om i vaza vagu mananom dot gandum om anggul. I kososizan dioti diri sid tanga di razat vokon minanarik di ginavo dot ulun sumuhut di hoturan dioti dino. Kagi sid kavavalazan dioti dino nokengkakat-po o sikul. Inot ongokavavalazan dino o minongovit do komojuan do pomogunan do Europa dino. Alaid-nopo it ongoulion do gorija om ongowilayah minanansanganu-no dit ongokavavalazan dino do tomod monguasa om mamakai di kolunduo di rombongan dino bahagi di dau do kenginan om kuasa. Minsanko ahatul-no i hoturan sid ongokavavalazan hiza di kinembulazan, alaid-nopo, sinimbanan i hoturan sampai oluvau i hoturan om iri-ogi rinumaat i kavazao om undang-

undang om bahazan dit ongoulun di nakamung sid rombongan dino.

3. I hoturan di Kaisar om i dang gorija

I hiza diri asarok do nokopigavul i hoturan do porinta om gorija, tu iso-no't ulun o minangahatul di sokovia. Antad sid hoturan dot ugama, retanko it ongoulion do wilayah ko daerah om pomogunan dot **Ulion antad sid kovosihan do Kinoringan**, ka, dot it ulion do daerah om wilayah, ulun do kitana om valai dot istana om it anak dau, mitutungkus-tungkus di kuasa dino om minamung-po i kuasa om kolunduo. Antad sid kobuatano do Europa di iadino, ogumu o gama misasaap-saap om mivovoguvogu do hoturan om kolunduo om kokuasaan om pangkat om nalalau-no i hoturan do kristian, isuhut di hoturan di Yesus Kristus. Vokon-no inot ongoulion pinosurung di volit dau ponong sid ulun dit amu-po nokokristian, retanko pahabal do Habal do Kovosihan, vokon-no ong pinosurung di volit di pomogunan om vatas dau ponong sid rompit dau do mongorumpak di malingko sompikristiani. Vokon-no ong i Pope sid Rom minomogos dit ulion do pomogunan om it ulion do pomogunan minongorumpak di Pope sid Rom. Pengkaa dino i Pope sid Rom minoniim do manguasa di pomogunan om gorija ponong sid Timor, ino-no Konstantinopel om i gorija sid Yunani om Asia Barat. Sid saralom di gama di iadino, okurang-no i tomodon di hal do rohani, inoi nga hal do kuasa om garal om pangkat om momolitik.

4. Ino-no it ongosabap dot nakaraag di kobuatano do gorija di hiza diri, varo a-ko piro ot ulun di minonimban di kavazao dit ongorombongan do semfug do tomod **monimbaru di hoturan laid** diri. Tu minsanko it onkokavavalazan dit ongorombongan nokosuvang sid gama momolitik om it ongoulion diri nokopongunang di hoturan laid di rombongan dino. Vokon-no ong minamangkat ioti di dau dot anak dot ulion do rombongan, vokon-no ong it ulion minanganu di sokovia i hasil di rombongan dit antad sid gama dioti mutanom, vokon-no ong inanu-no i kavavalazan dioti do torungku bahagi dit ongoulun dit nohukuman-no dit ulion. Tigogi hiza di abad ko-10 varo iso kavavalazan do semfug sid Cluny di minongimbulit di hoturan laid dot,

- a) it ulun di mamung sid rombongan, suvai obinsuhut banal sid ulion do rombongan,
- b) om sumuhut di hoturan minta dua om momuasa
- c) amu manansavo/mokisavo
- d) amu mogihim do barang om kolunduo.

Suvai ensanan i ginavo om guvas ponong sid Kinoringan om atag-ogi, ka di hoturan dino. Na ogumu ot ongorombongan sinumusui di hoturan di iadino sampai nakazazad-no i habal di kelino dioti dino sid ongopomogunan vokon.

II. It ongoabad di perang salib

1. Islam om Kristian

Antad di abad kavalu i Silam minangahatul di Rahat Tanga. Antad di kinembulazan dit Ugama Silam (Muhammad 570-632TM) minonoruvang i Silam sid Asia Barat, Palistina, Sur, Parsia om ponong sid Afrika Utara sampai nokotupak-po sid Spanyol, gima ginaratan di Pope dot i Silam monurung dit ongoulun sid Spanyol ponong sid Rom (dot it ulun sid Spanyol, bansa do Gotia Barat, nga ugama Kristian di dang Arius di nosunsub-no sid Nikea 325 TM). Ong i hiza di nokorikot it Ugama Kristian sid Europa, banalko amu kogoos it ugama laid do Europa do sumaap dit Ugama Kristian. Sabap i kobudayaan do Kristian banalko ahatul om oruhai minonori di kobudayaan om hoturan do Europa laid diri. Topot ong it Ugama Silam diri, nga kosipan dit ahatul banal dit oruhai manguasa dit ongoulun om oruhai oromitan dot ulun, tu amu apagon mangasip om sumuhut di hoturan do Silam dino. Bai onibak i kosipan do Silam, ino-no, Bai iso o Kinoringan, om i Muhammad, nga nabi do Kinoringan, okonko Mananggung. I Muhammad o minangahabal di kenginan do Kinoringan. Ino kenginan dino nokosurat sid Quoran. Silam, ino-no o harati, i vaza dot ulun sumamba om sumahau sid kenginan do Kinoringan. Ong i tudukan do Kristian, retanko patod di kopioondusan do Kinoringan sid tanga do riniba, supaya i riniba sumuhut om mamakai di kabanaran do Kinoringan om i samod do Kinoringan. Dot ong otopot, kakali ogumu o gama mirurumpak om miooduw om misasana sid pialatan dit onkokristian. I hoturan vagu i retanko **Karajaan do Kinoringan** mad bai suromo bahagi tohudi't adau

om adapat mangasip, topot amu emot.

It Ongoarab diri, kodung elaan do bai iso o Kinoringan sampai ensanan i riniba nga a-milo-milo sumuhut di hoturan om kenginan do Kinoringan, iso ot engat dioti dot ulun, ino-no pazazad di hoturan do Silam sid pentongkop do pomogunan, supaya ensanan i riniba kakavid di kenginan do Kinoringan. Kodung nokembulai i Silam do iadino, kinumugui it ongorija sid Afrika Utara. Kagi, antad sid pioduhan dot isai i Yesus, Kinoringan ko riniba, banalko nolingan dit ongorija sid Afrika do sumasi di kosipan om samod do Kinoringan sid ulun vokon, gam minomongo midadahava di kosipan om keloo dot isai i Kristus sampai tinumanus-no i kosipan dioti diri. Na i Silam amu minonusa ko minongogorot dit ongokristian om Yahudi do posuvang sid Silam. Bai it ongoulun di kiugama vokon ko asot ugama ginaratan-no dioti sumuvang om mamung sid Silam. Iti-no o sabap dot alangkas nakaranzat i Silam sid a-ko piro it ongopomogunan. Minsanko nokoponoruvang i Silam sid Yerusalim TM 640, kakali oruhai it ulun antad sid Europa magandaha sid Yerusalim do tomod sumamba sid lobong di Yesus. Gam i hiza diri mad ahatul i tourism antad sid Italy kumaa sid Palistina. It ongotourist diri minongoi dit ongohojimat om ongobarang di mad pangahandaman sid di Yesus, supaya varo barang do iadino sid dau do kampong om dau do panambayanan.

2. I perang salib keso.

Ontok di TM 1054 nokopitongkizad banal i gorija sid Byzanz (Konstantinopel) om Rom, gima amu kopionong i vaza manarang di kosipan, ino-no: Ong i gorija Rom minangakun dot i Sundu do Kinoringan nga antad sid Kinoringan it ama om it anak Yesus o nokembulai. Topot it ongoteologian sid Byzanz minomoros dot, i Sundu suvai antad sid Kinoringan it Ama o kinembulazan. Manjadi ino tolu linsou do boros dot, **om it anak** o sabap di kinopitongkizadan di duvo i bahagi do gorija diri. Ino hiza diri minonurung-no it iso bahagi do Silam, ino-no i bansa dot Selsukia (bansa do Turkey) ponong sid Armenia om Turkey (Asia Minor). Manjadi i Kaisar sid Konstantinopel minindamo do kotulungan antad sid Rom, ino-no i harapan dau, varo't ongosojal di tumabang dau mangapad di dau do karajaan sid volit ponong sid Timor. Topot i Pope Urban II, nga tanid o pongitungan dau. Aso kiroon dau do tumabang di gorija sid Timor, tu i gama di iadino, okonko hal di dau do garal om bantug. Inoi nga minongingut iosido dit ongoulion di gorija barat rumikot sid sinoda sid Clermont sampai minangahabal iosido sid sinoda di banalko asapou ot ulun dot, Banalko osusa it Ongokristian sid ongopomogunan ponong sid Timor. Rumbul satu i bandar do Yerusalim, i tempat di lobong di Tuhan Yesus. Iti-no o sabap dot a-milo-milo it ulun Kristian kumavid di pakakas do rumpak om mozo di Pope kumaa sid Yerusalim, supaya osopulan-no vagu i bandar dino. Sabap, ka di boros dau, Amu apatut dot it ulun dit amu kasip sid Kinoringan manansanganu di bandar dino om monginsasakau di lobong di Yesus, ka. Isai-nopo i mozo sid rumpak dino, nga ulun di sumamba sid Kinoringan. Isai-nopo i matai sid rumpak dino, tumorima di kaadaan di sokoviai i kasalaan dau om turus lumombus sid karajaan do Kinoringan om manansanganu di koposizan penlaid. A-milo-milo kondiri di Kinoringan mangagazad dioti kumaa sid Yerusalim, ka di Pope Urban II. Manjadi minangambat i kinogumuai dit ongoulun di noumpug siri, **Banal-neno. Kinoringan ot engin do iadino** sampai ogumu ioti minangakun do mozo sid rumpak dino. Manjadi isai-nopo i minangakun do mozo, varo-no otombil sid likud dau i tanda do sangkap antad sid ongokumut di nokinis-no.

Manjadi sid pentongkop do gorija nihabal-no i kodim dino sampai miniuumpug-no it kinasapahan dot ulun, tu mozo kumaa sid Yerusalim. Ikid ioti kitanda do sangkap. Manjadi tasantanid-tanid i tinomod dit ulun di minozo diri, Varo-no ong i kaadaan di kasalaan dau o tinomod dau, varo-no ong mogihim do kohuntungan. Manjadi i Pope om it ongopandita minamarakat dit ongosojal om it ongopakakas do rumpak, tu, ka dioti, ino gama dioti dino momuka di lalavangon do surga.

Ong otopot, i nakasabap do rumpak dino antad sid banalko napalid i gorija. Tu i tudukan dot i Kinoringan mozo sid rumpak om i iadino, mad kakali pongitungan dit ugama laid dit ulun sid Europa, okonko tudukan di Kitab Vagu om tudukan di Tuhan Yesus. Ensanan i gama di perang salib, nga atandas dot antad sid kasalaan om karaatan di gorija diri di minongimbulai do kopisanaan sid pialatan do Kristian om Silam di mitutungkus-tungkus misasana-sana sampai biano. Dot ong otopot, i Silam humarap sid di Ibrahim dot iosido o Ama dit ulun di mangasip, om i tokou Kristian, nga iadino o kososizan kananganko i Ibrahim. Om it ulun Yahudi, nga iadino. Topot antad sid gama kiumavid do

sapadang om pakakas do rumpak varo kinopisanaan sid pialatan dit tolu ot ugama dino sampai bianco, sampai banalko apagon do mogihim do vaza kumiboros om kumiupakat om kumiandus.

Ong it ongojojal di minamanau antad sid Jerman, ino-no antad sid bandar Kologne, kavi-avi labaan do 20 000 it ulun, ginazad do semfug di banalko ahatul o gama mongonsug om monginsasana dit ongojojal ponong sid Silam om Yahudi. Amu osodia laid i kosukupan di balanja sid tanga ralan. Siombo-nopo o vazaan, sino-no minanganu om minangarampas ioti do kosukupan. Minamatai-nopo ioti dit ongoulun dit a-koho do monongkorui dit ongojojal. Kakal-po sid Jermani, ong kodung nokorikot sid iso bandar di kiulun Yahudi, turus minamatai it ongojojal di kinogumuai dit ongoulun Yahudi om minonutud dit ongovalai dioti dino.

Duvo toun sid tanga do ralan ioti om korikot-ogi sid Yerusalim om minonoruvang sid kuta dino om minomunso di sokoviai it ongoulun, Silam, Yahudi om Kristian di dang Ortodox. Noromizas om varoi ong tosontumpuk-tumpuk it ongobuntung sid Yerusalim ontok dit adau Jumaat, it adau di pangahandaman dit adau di kinapatazan di Tuhan Yesus. Iri-ogi nokengkakat i karajaan do Yerusalim dot it obpinai di raja do Franzis o najadi-no do raja sino (Balduin I 1100- 1118 TM).

3. Mongimvagu do gorija

I kinagamaan dit ongorombongan mongimvagu di gorija antad sid hoturan do Cluny, nga alaid-nopo, mad natanus-no vagu, iadko it ulun ko i dupot dit nokololomu-no, na amu-no kogoos mamananu om gumama-po. Banalko ahatul i gama dioti diri pengkakat dit ongopanambayanan do vatu o ginama di banalko asavat i tiningusan, retanko iti-no i tanda minta dua di rumikot sid Kinoringan. Dot amu songkuro, varo-no vagu mimbulai i pongitungan dot amu konong ong i gorija lumundu, topot i razat mosikim. Iti-no o sabap, suvai mosikim i rombongan dit ulun dit atapat om amu asavat i panambayanan, gam ahatul i gama monulung om mangagazad dit ulun Kristian sid kosipan om i gama mongimbulai di samod do Kinoringan, iri-ogi kopionong di kosipan om samod om gama dot ulun Kristian sid tudukan di Yesus. ka.

It ulun di minongimbulai di hoturan di iadino, ino-no i Bernhard antad sid Clairvaux 1091-1153). Bai iso o tudukan dau, ino-no, suvai it ulun lumuu di vaza di Yesus om atag-ogi. Ong sukul mongodim di Yesus hiza dot olungui, a-milo-milo kembulai i kanavahan di Kristus sid ginavo om atarang i ralan dit ulun. Manjadi i Bernhard dino minanala di sokoviai it ongohal sid gorija dit amu onong, i gama dit ongoulion momodrusuk om mangaladtak di mosikim ko i gama dit ongoraja om ketua daerah do momudali di hoturan dit atag. Na sid saralom dit a-ko piro hopod toun, ino tudukan di Bernhard minonimban di kavazao dit ongopiumpungan om i hoturan di Pope. Rontob-nopo, amu songkuro antad diri, nembulit-no vagu i vaza laid diri sid gorija om sid ongopomogunan dino.

4. Okonko impiro-piro nokotiim vagu i Pope do papanau dit ongojojal kumaa sid Yerusalim do tomod palabus di bandar antad sid kuasa do Silam. Sabap bai oduruk om otori-no i raja do Yerusalim om osunsub-ogi sino. Na impiro-piro nokotiim-no vagu mongorumpak do rumpak salib, nga aso tenganan. Kagi i tinomod di sokoviai it ongorumpak diri bai tomod monoruvang om mamatai om mangarampas om mogihim do hormat om garal. Siombo-nopo it orikot dit tentara diri, minangarampas ioti di kosukupan do pomogunan. Minsanko i bandar Konstantinopel, nga rinampas dioti diri do oholian o gama mamatai om manakau om mongorongoi di bandar dino (1203 TM). I harati, i nakamanang sid saralom di sokoviai i gama mongorumpak, ino-no i hoturan do Silam. Iri-ogi i Osman I (1288-1326 TM) pinengkakat di dau do karajaan di Osman. Ino karajaan dino minonodia di rumpak ponong sid Europa. I toun 1453 notori-no dioti i bandar Konstantinopel om jinadi do bandar do Silam. I gorija sino siniliu do Masquid. Iadino nokohino-no di kuasa di Pope di tinumiim mangahatul om manansanganu di hoturan sid Europa om ponong sid Asia Barat.

III. Napalid i gorija, tu i kuasa dau

Iadko i hoturan di Bernhard minongimbulai dot a-ko piro i rombongan vokon di miabal hinumarap do suvai mosikim it ulun Kristian, isuhut di gama di Yesus, ino-no, ong mamananu, amu mongovit do barang ko kosulungan. Ong sukul inot ongorombongan minangakun do sumuhut di hoturan di Pope om midamo sid Pope di barakat dau, nembanaran-no ioti di Pope. Topot isai-nopo i rombongan di

minongindaraat di vaza do gorija om i hoturan di Pope, gima amu kopionong sid tudukan di Yesus, kopihiza sinumuhut banal di hoturan di Yesus iadnoko nituduk sid tudukan sid burul, ogusa-no om olupu-po di Pope. Gam i Pope minonuhu do mongogusa om momunso dit ipat-ipat i rombongan dit amu sumahau sid hoturan di Pope. Iri-ogi minsanko i Bernhard antad sid Clairvaux tinumbang di Pope mongogusa om mongohukum sampai mamatai dit ongorombongan di iadino. I Pope i minangahatul di gama di iadino, ino-no i Innozenz III. Om i gumanti dau, i Gregor IX, nga minongimbulai-po di hoturan do Inquisition, ino-no i tugas do mongimpuras di sokovia it ongoulun do momorisa dot konong i kosipan antava amu. Ombo it amu otopot mangasip isuhut di hoturan do gorija, apagasan om alapos-po sampai apatai dot araah o vaza mamatai.

Ino Pope Innozenz o minongimbulai di tudukan, retanko hiza di mongohormat di poginakanan di Tuhan Yesus sumiliu i roti dot onsi di Yesus om i anggul do raha di Yesus. Suvai i pandita kavasa mangahatul di poginakanan di Tuhan Yesus. Isai-nopo it amu sumuhut di hoturan do iadino, apatut dot apatai. Kagi, suvai it ulun Kristian tumoronong laid om tumoguvang sid pandita om mangakun di kasalaan dau, om kavasa-ogi milang sid poginakanan dino. Iri diri nga vazaan do momorisa di kosipan dot ulun. Ombo it amu atarang o gama mongimbulai om mangakun di kosipan dau, ino-no it ohukuman dot apatai.

IV.I kinompuso di hiza do tanga.

1. I hoturan do Europa

Minsanko i Pope minonori di Kaisar do Europa sampai minonguasa di hoturan di Kaisar, alaid-nopo i hoturan di Pope nga rinumungoi-no. Vokon-no ong varo duvo, tolu o Pope di kopihiza momorinta di gorija om miooduw om mirurumpak. Sid saralom di sokovia i vaza mogihim do kuasa do momorinta di sompomogunan, i Pope minongimbulai di kogumuai do hoturan om vaza monukoi om momorinta om mokihuhuntung antad sid razat. It ongopandita kavasa manganu di persepuluhon, nga osusa polombus dit agazo o bahagi di persepuluhon dino sid Bishop om i Bishop osusa do polombus sid Pope. Isai it engin jumadi do Bishop, nga a-milo-milo osusa monobus di pangkat dau dot agazo o horogo.

Sabap tu iadino it ongohoturan naraag banal i gorija diri, varo a-ko piro ot ulun di minongohondom vagu di tudukan di Yesus sid Kitab om minongonsug dit ongoKristian do sumuhut di hoturan do Kitab. Sid England varo't ulun di minanalin di Kitab sid boros dot Ingeris, ino-no i Wiclif (1324-1384). Ino-no i tudukan di Wiclif: Ong i kuasa do porinta amu kotombil sid hoturan do gorija om ugama. It ongobarang om tana do gorija, nga dang porinta om dang razat. Bai i Kitab it iso tudukan do gorija, aso vokon, sampai it ulion do gorija, ino-no i Kristus, okonko i Pope. Gam i hoturan di Pope mad hoturan di Anti-Kristus. Na ino tudukan di Wiclif nakazad-no sid Europa om sampai sid Bohemia. Na i Yahya Hus (1369-1415) kinumavid di tudukan di Wiclif om minanala sampai dinumahava di hoturan do Pope. Iosido dino nohukuman-no sid Konzil do Konstanz (1415) sampai nosorob-no sid apui sid Konstanz diri. Na it ongokristian sid Bohemia minongodurhaka di porinta, gima i kinapatazan di Hus, na rinumpak-no ioti, topot amu notori. Alaid-nopo minokiandus i Kaisar sampai minangakun dot ioti kavasa mongohormat di poginakanan di Yesus, minsanko aso pandita sino di mangahatul di poginakanan dino. Pengkaa dino kavasa dot varo penginjil dit a-nokosikul. Sid Italy, nga varo-no ulun di sinumaap di hoturan di Pope, ino-no i Savonarola. Iosido nga minamajal om minanala di kobuatano di Pope. Tu sid istana di Pope varo korusukan om i gama mangarampas di barang dot ulun, varo mangapil om monipu do tomod popolundu dit istana di Pope. I Savonarola minonuduk di kosimbanan do ginavo muli sid Kinoringan, isuhut di tudukan di Yahya in minomodu, supaya mosikim it ulun, amu mongumpakai dit ongorija ko ahatul banal i kosulungan dit ongopandita om ongobishop om Pope nga iadino. I kinotimpunan, ogumu it ulun di sinumuhut di gama dau monimban di kobuatano do gorija om ongopiumpungan om ongopanambayangan. Piningsaraban-no dioti it ongoumpakai do panambayangan sid natad do gorija kopihiza minongolusing, supaya pendongou sid sokovia. Na tiniag-no di Pope ino gama dino om minonuhu dit ongotentara do manangkap di Savonarola. Natangkap-po iosido, nohukuman-no iosido do sampai nosorob sid Rom TM 1498.

2. I keloo om i kosipan.

Sampai it apad ko-12, mad enizo i pongitungan om pongiraan om keloo dot ulun dot Europa, isuhut di pongilaan sid Kitab om i tudukan di Pope. Sid ongosikul sid ongakavavalazan dot rombongan, bai i boros do Latin ot pakazon sid sokovia i gama mamasa om humarati di Kitab. Kagi sid gama humarati di Kitab, vokon-no ong banalko okilong om obungou o gama midadahava om mongimpuras om manalahas mokitalahas di harati do Kitab. Suntuan, Ong kodung varo tudukan dot i roti sumiliu di guvas di Kristus, ka, varo mongoduat om mokitarang dot nunu o hukuman, ong varo gonsuri di mangakan di roti dino sid panambayanan. Kisala i gonsuri dino ko aso sala, tu bai dupot, antava ong kisala, kuran it atag o gama mongohukum.

Pengkaa dino, i kiniro dioti di hal do kavasa dot itungon, suvai isuhut di tudukan do Kitab. Ong varo boros dot i Kinoringan mogom sid surga, topot i hakod dau sumondot sid pomogunan, iri-ogi minongitung ioti do songkuro konoruvo i hakod do Kinoringan. Antawa, tu indoson, i pomogunan mad pinggan, a-kavasa momoros it ulun dot i pomogunan mad bola sampai i pomogunan mamananau om tumurug sid mato dot adau. It ulun di minongitung di iadino, sisiri-no ong ohukuman di hakim do patazon. Suvai it ulun dino, ino-no i Galilei, minomoros dot, Amu otopot i pongitungan-ku dino, ka, iri-ogi amu nontok do hukum.

Na antad di abad ko-12 minimbulai dot a-ko piro o universiti. Sid ongouniversiti minoniim it ongoelo mongitung do mongimpuras di kobuatano do pomogunan om i riniba om it ongodupot om i songvinangun. Na tumimpuun-no do iadino o hoturan sino: suvai antad sid kosipan om kadapat-ogi humarati om mangaharati di sokovia i nunu-nopo. Alaid-nopo, hiza di nokopigavul it ongoelo antad sid Silam om Yahudi om ori-ogi kaharati ioti sid Europa di keloo di Aristoteles, it ulun do Yunani i napasi guluko i Kristus sid Yunani. Na varo guru dot RC ino-no i Tomas Aquino i minoniim do popisuput om popisavo di keloo do vinangun om i kosipan sid dau do tudukan, i nokosurat sid Summa totius Theologiae (i kinosompuruan do sokovia i teologia). Sid tudukan dino nokembulai-no dot, I Pope kavasa om kikuasa do monukat di tudukan om politik om i dogmatik. Antad dino minoniag i Pope dit ulun dit okonko sumikul do Kitab om pandita do mamasa di Kitab. Tu, ka dau, it ulun koubasan amu milo mamasa di Kitab, tu amu kaharati iosido di Kitab. Suvai i Pope kavasa manarang om manafsir di Kitab. Om it ongobishop om it ongopandita, suvai sumuhut di tudukan om panarangan di Pope om atag-ogi i gama dioti mamakai di Kitab.

Minsanko iadino o hoturan antad sid gorija do Rom, minoniim it ongosaiantist sid ongouniversiti mamasa om humarati di Kitab om popirompok sid Kitab dit ongobuuk do keloo vokon. Ino hiza diri kagi varo't ulun di minongimbulai di gama momirin do buuk sid saralom do mangagama do surat antad sid toriso-iso hurup dit gundol o ginama. It ulun momirin popirompok dit toriso-iso hurup sampai opongo i sangnalad. Iri-ogi opirin i nalad om ehas-no vagu it noumpug i hurup om pakazon-no vagu it ongohurup dino bahagi di nalad om surat vokon. Antad diri oruhai-no momirin do pogumu do buuk, tu kodung opongo sangalad, hinotusan ko rinibuvan o nalad kadapat momirin antad sid ongohurup dino.

Manjadi antad di kinembulazan di gama momirin do buuk, ogumu it ongoulun kadapat mamasa di Kitab om it ongobuuk vokon sampai sid a-ko piro o tempat om pomogunan minimbulai it ongorombongan di tumorima di tudukan di Yesus sampai minoniim dot ino dino jumadi do hoturan di karajaan do Kinoringan. I tinomod dioti dino, sumusui di Yesus ko kumuruhang di Yesus, ka. Manjadi, ino dino banalko osodu o pitonidan di tudukan om vaza do gorija RC i hiza diri antad sid Habal do Kivosihan om i tudukan di Yesus, inot ongorombongan dino pinasasi dot atag o kavazao do gorija, ino-no i gorija di bana-banalko nipahatul di Sundu do Kinoringan, okonko i gorija di minonguasa om minomolitik di sokovia. Mad nopiduvo-no i razat do Kristian i hiza diri, ino-no it ulun dit elin om apaham di posuntu di kenginan do Kinoringan sid kopolosizan dau om it ulun vokon di bai sinumuhut di hoturan do gorija isuhut dit undang-undang di Pope om Bishop om Pandita. Iti kavi dino retanko i razat Kristian sid Barat.

Ong i Silam di nokentoron sid Spanyol dit a-ko piro abad diri, nosunsub-no sino hiza dit amu-po avi it abad ko-15. I toun 1492 nengkod-no i kuasa do Silam sid Spanyol. Tanid mantadko i korosizan, gama i Silam i nokoponoruvang sid Europa antad sid Timor, varo-po ulun Yahudi sid pialatan dit ulun

Kristian sid Europa.

3. It ulun Yahudi sid tanga dit ulun Kristian

Antad di kinorungazan di kuta Yerusalim TM 70, nosunsub-no it ongoulun Yahudi sid sompomogunan. Ontok-po di karajaan do Rom sid Palistina, nokoponoruvang-no i kogumuai di bansa do Yahudi sid ongopomogunan vokon. Topot kodung norungoi-no i Yerusalim, mad a-koho i Kaisar do Rom do sid Palistina-po ot intoronon dit Ongoyahudi. Manjadi sampai i abad ko-4 aso-po kosusaan dit Ongoyahudi sid ongopomogunan, tu i porinta Rom minangakun do varo ugama do Yahudi. Suvai it Ugama Kristian najadi do ugama rasmi sid karajaan do Rom, humiza di Kaisar Konstantin (311), iri-ogi nosimban i kavazao dit ongokristian ponong sid ulun Yahudi. Ong otopot, sinod piumpugan do Kristian sid Rom, varo-no laid hal dot amu kopionong i Yahudi om Kristian. Nokotiim laid it ongokristian tumanid om tumongkizad antad sid ulun Yahudi. Alaid-laid diri, i gorija minomoros dot, i Kitab dot Ibrani okonko i buuk do Yahudi, inoi nga Kitab do Kristian sampai i gorija ginontian di ugama Yahudi om jinadi do bansa dot Israel dit otopot (Galatia 6,17: i gorija ino-no it Israel di dang Kinoringan, ka di Paulus). Boros dit ongokristian, it ulun Yahudi o minamatai di Yesus. Iti-no o sabap do nokotongkizad ioti om nokedu-no antad sid hoturan om kovosihan do Kinoringan, ka. Varo-po ong varo dit ongoulion di minongitung do moniag do mananus dit ugama do Yahudi. It ulun Yahudi osusa do mamarai do sukoi, gima okonko Kristian ioti dino. A-kavasa do manansavo/mokisavo i Yahudi sid Kristian om a-kavasa do gumaji it Kristian sid valai dot ulun Yahudi. Sera-sera varo kosusaan, lizud ko koruzahan do pomogunan, nga retanko iti-no o sala dit ulun Yahudi sampai pinembulai di hungot om sana sid bansa dot Yahudi. Bai hiza do nokosoruvang-no i Silam sid Spanyol, nengkod-no i gama momogos om monusa dit ulun Yahudi sampai sid saralom dot 700 toun osinang it ulun Yahudi sid Spanyol di gumavul sid Silam om Kristian di dang ugama Arius. Topot sid ongopomogunan vokon sid Europa, tasantanid-tanid i pangalaman dit ulun Yahudi. Ong sid Rom kadapat ioti pengkakat do valai do panambayangan dang Yahudi. Ogumu it ulun Yahudi nga Dokutol om ulun midagang sampai kingaran ioti sampai linumundu ioti om kadapat ioti pangkat do siin sid ongoulun vokon. Ioti minongimbulai dit ongovalai potohuan do siin om elo-no ioti monukung dit ongopope om ongoulion do pomogunan, isuhut di dau do kovosihan om kenginan. Topot kodung nokotimpuun-no i rumpak salib keso dino, ensani i Kristian pountun di sana ponong sid ulun Yahudi. It ongopandita minongonsug di razat do mamatai om momunso dit Ongoyahudi. Varo boros dot it ulun Yahudi kisala, tu ioti nga lumundu om ioti o minamatai di Yesus. Manjadi vokon-no ong i gorija minoniim do pemumui dit ulun Yahudi, vokon-no ong bai momunso ko momogos dit ulun Yahudi o tomodon dit ulun Kristian, vokon-no ong pinangarakop dit anganak dit ulun Yahudi, supaya it anganak, ong sukul opodsu-po, nga jumadi do Kristian. I hiza diri mad ogumu o gama manala dit ongoulun do Yahudi, retanko ioti mangagaras dit anganak do Kristian ko monginsasakau di roti sid poginakanan di Tuhan Yesus ko pouza do kavanit sid ongotalaga. Kodung varo habal do bai kavaza sid barat, atangkap it a-ko piro it ongoulun do Yahudi om sampai pogoson, miringvaro ohukuman dot garason, ko osusa ioti mamarai dot ogumu o siin, gumanti di sala dau. Vokon-no ong osunsub-no vagu it ulun do bai okudik-po o kampung koho do mizon sid tanga dioti, ong sukul kopirompok it ongovalai dioti dot amu kopigavul sid ulun vokon. Vokon-no ong orinding-no it puvavalazan dit ulun Yahudi do banalko asampit i tana dit ongovalai dioti sampai oruhai i gama di porinta momorisa om mongontupat dit ulun Yahudi.

LIANG KOTOLU: I REFORMASI

1. Martin Luther (1483-1546)

I Martin Luther nokosino-no sid Eisleben ontok do ko-10 November 1483. It ama dau minangahatul do kilang do pongonovan dot arong do vatu. Sinumikul i Martin sid Sikul Latin, supaya misisingilo iosido do Lawyer. Umul do 22 toun, nopongo i sikul dau om poriksaan di jumadi iosido do guru sid Universiti, dot tigogi, sinumuvang iosido do rombongan do semfug, tu i boros dau, hiza di sid tanga ralan iosido, anangan iosido do gonit sampai sinumumpa do sumuvang do rombongan, ong sukul a-korundun iosido sid gonit diri. It ama dau banalko hinumungot, tu a-koho dara dot it anak dau amu

mangajal sid universiti. Sabap agazo o harapan dit ama dau dot jumadi it anak dau do guru do koronuw. Duvo-ogi toun sid rombongan om najadi-no i Luther do Semfug om tinumimpuun do sumikul do teologia. I Toun 1512 minanganu i Luther di digri do Dokutol do Teologia sampai jinumadi do Professor sid Universiti do Wittenberg.

Sabap tu i Universiti diri kakali mad vagu-po o hoturan om kinengkakatan, oruhai i Luther moniim do pogili sid ongomurid di pongohorotizan do Kitab. Minonuduk iosido dit Ongozabur, i surat do Rom, Galatia om Ibrani. Atalahas sid tudukan dau dot i tinomod di tudukan di Luther, ino-no poromot banal i Kitab om i tomodon do Kitab, okonko i vaza di Pope mamakai di Kitab bahagi di dau do kenginan om panangan. Kagi i Luther minoniim do monuduk om mangagazad dit ongomurid dau do mamasa di Kitab sid boros Yunani om Ibrani, okonko iadko i koubasan do gorija do bai mamakai i solinan sid boros Latin. Okonko bai i Luther, gam a-ko piro it ongoprofessor sid Ongouniversiti minongimbulai di hoturan do suvai sid boros banal dit onogogulu om atag-ogi mamasa di kovosihan dioti dino, okonko sid ongobuuk di bai solinan do kovosihan dit onogogulu-gulu. Sabap ino, varo duvo o koruhang di Luther sid Universiti dino, i guru di boros dot Ibrani om i guru di boros Yunani. Manjadi banalko ogumu it ongomurid ozi misisingilo sid di Martin Luther sampai banalko avantangan it ulion do Universiti ino gama di Luther di iadino.

2. I hiza sid Jermani gulu-ko i Reformasi

a) i kopidadahavan, gima varo hoturan antad sid Pope, retanko ringgit mangapus di sala dot ulun.

TM 1516 tinumimpuun-no i Luther moniag di gama do gorija mongorukut do siin, retanko i siin mananus di kasalaan dot ulun. Osusa i ginavo di Luther diri, tu varo't ulun di minamalid di razat retanko, Ong sukul mamarai do siin, iri-ogi it ulun a-kosuvang sid apui do naraka dit aso kopisakan, inoi nga kolombus sid kosinangan do Kinoringan, ka. Gulu-keno, ahatul i gama dit ongopandita mongindorosi di razat, retanko ipat-ipat it ulun ong kodung matai, iada-no sid apui dit aso kopisakan dot amu songkuro kalaid om iri-ogi osorob-no i sala om nosusi-no it ulun dino, iri-ogi lumombus iosido sid kosinangan do Kinoringan, ka. Na sid razat sid Europa varo-no laid koubasan dot it ulun di kisala kadapat mangapus di sala dau sid gama mamarai do ringgit. Manjadi i gorija minamakai dinot undang-undang dino, gulu-no ong sid rumpak salib, ino-no, isai-nopo i minamarai di kogumuo do ringgit, Amas ko perak, amu osusa iosido mozo di rumpak kumaa sid Palistina. I siin dau mad minongontok di guvas dit ulun, ka. Na sabap i sokoviai i hoturan sid istana di Pope sid Rom, nga amahal sampai amu miuma i balanja dit istana di Pope sid Rom, iri-ogi hinatul-no ino't undang-undang dino dot isai-nopo i mamarai do siin, ino-no kalabus sid hoturan ko kasalaan, tu mad notobus-no i sala om i nunu-nopo i hal dit amu kopionong. Amu songkuro banalko obas-no it gorija mangapil om mokiapil sid hal di iadino. Pengkaa dino it ongoulion do politik, nga minoghiim do vaza mamaga do siin antad sid razat do tasantanid-tanid o tomodon om panangan.

TM 1506 minonuhu-no i Pope Julius II do poturug do valai do panambayanan, i ngaran dino, i St. Petersdom om pinorikot sid ongopomogunan dit ongosurat di mad rasit dumagang di surga om pangalai sid naraka do mongorukut bahagi di Petersdom o tomodon. Antad di hiza diri varo't ongopandita monoruvang sid ongopomogunan om ongobandar do manalahas di kogunaan di surat pangapus do sala.

Ogumu it ulun antad sid piumpugan sid Wittenberg minoling sid daerah vokon, tu dumagang di surat kopongopusan do sala. Iri-ogi sinumusa-no i Luther, gima i gama di iadino. Sabap nakaharati iosido dot banalko amu kopionong i gama di iadino sid Kitab om tudukan di Yesus. I toun 1516 nemot-no di Luther dot ogumu it ulun di dau do piumpugan minamanau kumaa sid bandar vokon, tu dumagang do rasit di kaadaan do sala dau. Sabap sid bandar dino varo pandita, i ngaran dau i Tetzel i mongoituval dit ongosurat dino. Ino-no i vaza di Tetzel mongoituval dit ongosurat dino. Boros dau, kodung kosondot om kiuni i siin sid tuung di pongumpugan di siin bahagi di panambayanan sid Rom, turus lumabus i hatod dot ulun antad sid naraka, tu nakapus-no i kasalaan dot ulun. Antad di kobuatano di Tetzel varo tangon dot iso't ulun minokidagang do rasit kopongopusan di sala dau, nga dinuat-no laid dau i Tetzel do kuran ino surat dino. Kaluto ong amu-po notimbaru i sala, kakali kadapat mamarai di sala, ka dit ulun dino. Manjadi, sabap i Tetzel banalko ogorot mokisisiin, minangakun dot it ulun

mangapus di sala dit amu-po agama. Do susuvab, hiza do nokolombus i Tetzal sid pomogunan vokon, inavangan iosido sid himbaan sampai narampas-no i tuung di siin diri dot ulun. Kodung hinumungot i Tetzal om mimamajal do retanko iti siin diti dang Kinoringan om dang gorija sid Rom, ka, nipemot dit ulun, i minangarampas di Tetzal, i surat di minanalahas do nabarazan-no laid i sala dau dino sampai minangagauk-po it ulun di Tetzal diri.

Topot i Luther, ong kodung nakaharati iosido dot oholian i gama di mamalid dit ulun Kristian dino, minonurat do 95 ayat di dumahava di kobuatano di gorija dit amu atag dino. Manjadi i surat dit 95 ayat dino pinokuan-no di Luther sid gorija sid Wittenberg ontok dit adau gulu di Pesta All Saints (ko Adau dit ongoulun dit osusi) ino-no ko-31. Okotober 1517. Minoniag iosido di gorija do porontobonno i gama mongojuval do rasit do kaadaan do sala om it a-ko piro i hal vokon sid gorija dit amu nokonong. I tomodon dau diri, mangatag ombo it amu atag sid tanga do gorija. Na it ongobishop amu katama do tumimpa ko moniag di Luther do mongimpuras di gama om kavazao do gorija. Alaid-nopo, niatod dioti i hal dino sid Pope sid Rom, supaya i Pope kondiri o mangaratu di kovosihan om hukum dau. Rontob-nopo, i Pope diri, ino-no i Leo X amu nokelo do Teologia om amu agazo o ginavo dau mangatag di gorija. Banalko olomu om orusuk iosido om sid hoturan dau sid istana di Pope pinosuvang iosido dit a-ko piro o kamanakon om kovorisan dau do jumadi dot setiausaha om ponulung sid istana i retanko Vatikan. Nokorikot-po i habal kananganko i surat di Luther, minonuhuno i Pope dit ulion di rombongan di Luther do moniag di Luther sid gama dau manala do gorija. Na i sinoda di rombongan di Tetzal, ino-no i Dominikan minomorisa di surat di Luther sampai minongolumbatos dot, A-milo-milo i Luther manarik vagu di nongoboros dau dino sid saralom dot duvo vulan sampai pakaa ioti di Luther sid Rom, supaya sid istana do Rom ot manalasai i hal dino. Topot i Luther amu minangakun mamanau kumaa sid Rom, gamko ogumu-po ot ongobuuk vokon di sinurat di Luther dot ino ongobuuk dino minanarang di hal di koringgitan di Pope dot i panambayanan sid Rom o panangan om i vaza dit ulion do gorija do posendaat dit ulun di tanid o pongitungan om keloo dino. Ino-no i kinapangaan dit pihukuman dioti diri: manangkap di Luther om mangatod-po sid Rom, supaya ohukuman iosido sid Rom. Nening-po di Luther i iadino, minanahakno do kovosihan dau sid ulion di daerah do Saxonia. Manjadi it ulion dino amu minangakun dot ohukuman i Luther sid luar, gam suvai atag do sid dau do pomogunan kopitoguvang i Luther om it ulun di kaharati di hal dino sampai midadahava dot ombo it otopot. Varo-no bishop di moniim do potos di Luther. Topot a-koho i Luther do mengkod mumbongut kananganko i karaatan sid tanga do gorija.

Gam minongingut iosido di sokovia i it ongoulun dit engin sumuhut di hoturan dot Injil. Tu, ka di Luther, i gorija do Rom mongolim dit Injil om minonimban dit atag o vaza sumuhut di Tuhan Yesus. Iti-no o sabap, osusa it ongoulun lumabus antad sid kinouripanan do gorija sid Babil om rumamit di Habal do Kovosihan, i nokosurat sid Kitab. Na it ongobuuk di Luther nokoronuw banal sampai tinumongkop di pomogunan do Jermani. Ogumu it ongoulion dit ongodaerah do Jermani, nga ozi di vaza di Luther dumahava di hoturan do gorija sampai minonukung di Luther sid gama dau di iadino.

3. I hukum di Kaisar Charles Kolimo sid Worms

Amu songkuro antad diri varo-no vagu Kaisar. I Kaisar Charles V diri minongingut dit ongoulion sid Dewan Razat sid bandar Worms hiza di toun 1521. Ino-no i tinomod dau, popisuhut dit ongoulun do daerah sid dau do vaza momolitik do Europa. Sid miting diri kinenginan di Kaisar do manalasai di hal di Luther. Nokopitoguvang-po i Luther di Kaisar diri, varo-no monuhu di Luther do mangakun dot ulun iosido di kisala sampai sumuri sid gama dau manala di gorija. Manjadi it ambat di Luther pengkaa dino, Ombo-nopo i nokosurat-oku diti, ong sukul varo't ulun dot elo pahaba di boros-ku, minsanko i Pope, ong sukul elo do tumimpa dohon om manarang do varo sala-ku sid ongosurat-ku diti, isuhut di katapatan do Kitab, tantu sumuri-oku diti. Topot ong a-ahaba i boros-ku dino, amu-oku isuri om amu-oku sumamba sid di Kaisar om i Pope. Siti-oku diti, Kinoringan-no o monulung dohon diti, ka di Luther. Nakalabus-po i Luther, minonuhu-no i Kaisar dot isai-nopo it engin kadapat mamatai di Luther.

Rontob-nopo, kodung nakalabus i Luther sid pihukuman diri, varo't ulun di sinuhu dit ulion do

Saxonia do manabpo di Luther om mangagazad sid istana dit ulion dino dot osusut o gama manabpo om mangagazad, supaya iso nga asot kelo do siombo om kiumuro-no i Luther dino. Manjadi sid hiza do nokosusut sid istana dit ulion sid Wartburg, otibang banal di Luther do tumimpuun manalin di Kitab Vagu sid Boros Jerman. Sid saralom dot hopod vulan, nopongo-no manalin i Kitab Vagu. Varo-no kagi kilang do nokosodia momirin di Kitab Vagu sid boros Jerman dot tolu ribu kaping. Hiza di vulan sembilan opongo-no i buuk diri om kakali vulan sembilan, navi-no it ongokitab sid kadai sampai osusa momirin vagu dot okonko impiro-piro. Sabap banalko ozi it ongoulun do Jerman dumagang om mamasa di Kitab di sid dau do boros. I hiza diri, iso kaping di Kitab vagu, amahal, miabal do horogo do songinan o kuda.

Ong kiroon tokou do nunu banal it onsi di tudukan di Luther, pengkaa dino: Sabap sid RC varo retanko it ulun kadapat mangapus di karajaan do Kinoringan om i koposizan penlaid, antad sid tudukan di Paulus sid Rom kaharati i Luther dot i randavi o tudukan om kosipan do Kristian, nga, Nembanaran it ulun om ensanan i riniba sid saralom di kovosihan do Kinoringan. Okonko it ulun kadapat mamanal di kondiri. Kananganko i hoturan sid tanga do riniba, varo mad duvo o hoturan, ino-no i hoturan ko karajaan do Kinoringan di mad karajaan do rohani bahagi di kosipan dot ulun. Iri-ogi varo-po karajaan do jasmani, ino-no i hoturan sid tanga do riniba, di sid palad dit Kaisar om it ongoulion do pomogunan. Banal-no, ioti ongoulion suvaiko antad sid hoturan do Kinoringan kikuasa ioti bahagi di gama mangahatul om momorinta di pomogunan om i razat. Ino iadino mad hoturan ponong sid gibang. Topot ong i dang Kinoringan, hoturan ponong sid vanan.

Ino-no o rontob, antad di gama momeda di iadino, inot ongoulion o minumpalad di hoturan do pomogunan sampai jinumadi dot porinta di mad mongontok do Kinoringan sampai i vaza dioti mangahatul om momorinta mad, kodung kenginan di Kaisar, retanko iti-no o kenginan do Kinoringan. Pengkaa dino, ombo-nopo i kenginan do raja ko Kaisar ko ulion, atag ko amu, kodung iosido minamalang di kenginan dau, retanko iti-no it abanal, minsanko araat i hoturan diri. I Kaisar om it ulion o minongolumbatos paratu do kovosihan om hoturan om kabanaran, minsanko amu abanal i hal dino. Sid saralom di hoturan dino dit sampai hiza biano dino, ogumu o kinolonduan dit ongopomogunan di retanko pomogunan do Kristian, tu mangaraag om monimban dit ongohal, dot i gorija amu katama mumbongut ko moniag, ong amu kopionong di Kenginan do Kinoringan. Ino vaza momeda do jasmani om rohani, nga nokembulai antad di tudukan di Martin Luther.

4. I rumpak dit ongoulun di mukabun

I hiza diri, sokovia i it ongotana do pomogunan, nga it ulion do daerah om i Kaisar om it ongobishop o sanganu. It ulun mukabun osusa do moniwa di tana om i siwa nga banalko amahal. Vokon-no ong tolu suku dit oula osusa mamarai do siwa om sukoi, vokon-no, minsanko asot ula, tu a-nakadarun ko oholian o darun sampai napasa i gandum sid tulang, nga kakali osusa ioti mamarai di siwa om osusa-po do tumabang sid kabun dit ulion mananom ko mongomot humiza dot i dau dot omoton. Manjadi hiza di kiadau, osusa ioti mozo mongomot sid tana dit ulion. suvai opongo-no i dang ulion om iri-ogi tumoguvang dit dau dot omoton. Ong odorunan it dau dot omoton, ino dino dau do korugizan.

Manjadi kodung it ongoulun mukabun nokening di habal do Kovosihan sid dau do boros om kadapat ioti mamasa di Kitab Jerman, varo kogolivangan om varo kavantangan, gima i habal do Kitab tanid mantadko i hoturan dit ongoulion. Kaharati ioti di kenginan do Kinoringan dot obebas it ipat-ipat it ulun. I tana okonko dang ulion, inoi nga Kinoringan o manansanganu diti pomogunan, sampai nitahak dau sid sokovia i it ongoulun. Iri-ogi i Yesus o minangahatul dit avantang o gama dot ongoulun mioopud sid gama mitutulung om misasamod om mogihim di kabanaran do Kinoringan. I kenginan dit Ongomukabun, i Kaisar mangahatul di pomo-gunan om pengkod di hoturan dit ongoulion, it oholian momogos om monguripon sampai mangakan dit ongomosikim. Rontob-nopo, i Kaisar mad okugui i kuasa dau, gam iosido osusa mangapil dit ongoulion, supaya ioti tumabang di Kaisar sid rumpak dau. Iti-no o sabap i Kaisar amu minongining sid ongomukabun, gam minonuhu dit ongoulion do sumaap dit ongomukabun. Isai-nopo i mongodurhaka onong dot hukuman dot apatai om vokon-po, nga iri-no ko iri i hoturan dot iso nga aso obebas, inoi nga uripon iosido dit ongoulion. Manjadi, it ongomukabun pengkakat dara di hoturan do kobebasan. Topot it ongoulion minongolim retanko

kumiandus dit Ongomukabun. Kodung nehas-no it umpug dit ongomukabun, iri-ogi i sojal dit ongoulion minanangkap om minamatai dit ongomukabun dino sampai iso hoturan diri nga aso dot osimbanan, iri-no ko iri opogos it ulun mukabun om osusa mamarai do sukoi om siwa. Ong i tumimpuuni, i Luther minongonsug dit ongomukabun sid gama humarati di Kitab, dot alaid-nopo, iosido tinumabang dit ongoulion, tu indoson dau dot oholian o gama di mukabun mindamo do kemerdekaan.

5. I Huldrych Zwingli /1484-1531)

I Zwingli nokosikul sid universiti do Vienna om Basel, nga okonko teologia i sinikiran dau. Topot iadko i koubasan diri, jinumadi iosido do pandita om sinumuhut di kavazao dit ongopandita diri, do momodrusuk om miinum. I rumbul satu kiniro dau sid dau do piumpugan, humarati di hal do politik om i vaza mongitung di kobuatano do riniba. Hiza do rumpak, minozo-no iosido sid rumpak dot pandita do sojal iosido. Iri-ogi jinumadi iosido do pandita sid gorija sid Zurich. Sid Zurich om iri-ogi nakaharati iosido dot banal-no amu onong i vaza do gorija Rom sampai minoniim iosido do mangatag ombo it amu atag sid hoturan do gorija. Tinumongkizad iosido sid gorija Rom om jinumadi iosido do gorija Protestant sid Zurich. Ino bandar Zurich, nga kihoturan dit a-nokotombil sid hoturan di Kaisar ko daerah. Iti-no o sabap oruhai-ruhai do pada di hoturan laid om jumadi do pandita antad sid palad dit ongoketua bandar. Ioti minongoringing om minonukung di gama di Zwingli potorongot vagu di gorija. Alaid-nopo, varo it a-ko piro ot ulun di minomoros sid di Zwingli dot amu-po miuma i gama dau mangatag di hoturan do gorija, tu, ka dioti, amu atag do momodsu dit anak-po it ulun. Sabap it anak amu-po kaharati di kogunaan di kopomoduan, ka. Iti-no o sabap, suvai osukod it ulun om miuma do mokipodsu iosido. Gam ioti tinumimpuun do momodsu vagu dit ulun di nopodsu-no dit anak-po it ulun. Iri-ogi hinumungot i Zwingli sampai minonuhu do monunsub om momunso dit ulun di iadino o tudukan om pinolosod iosido dit ongoulun di iadino o kosipan sid bavang Limmat sid Zurich.

I toun 1529 minisamung i Zwingli om i Luther sid bandar Marburg dot i tomodon dioti misamung, miupakat dot ombo it otulid o tudukan kananganko i kosipan dot ulun Kristian. Antad kotimpunaan do Reformasi, ino-no i gama potorongot vagu di gorija ko monulid vagu di gorija, varo pitonidan sid tudukan di Luther om i Zwingli, kananganko i poginakanan di Tuhan Yesus. Ong i Luther mad kakali osomok sid tudukan do RC. I boros dau, okonko i pandita monimban di roti dot onsi di Yesus ko i anggul do jumadi do raha di Yesus. Inoi nga i pandita kakali bai roti om anggul itahak dau sid ongoulun di milang sid poginakanan dino. Topot kodung i dila tumiim di roti om it anggul, sinod kabang dit ulun sumiliu i roti dot onsi om i anggul do raha di Yesus. Ino dino bai suromo dot okonko riniba mangagama, inoi nga Kinoringan dot a-kaharati i riniba di kumuro, tu iadino. Topot ong i Zwingli, tanid i dau dot ohorotizan di boros di Yesus dot, Onuvo-no om akano-no. Iti-no i guvas (raha)-ku di nitahak sid dikou, ka do pengkaa dino: i roti bai tanda di guvas (onsi) di Yesus om i anggul bai tanda di raha di Yesus. Okonko i roti jumadi dot onsi ko i anggul jumadi do raha, inoi nga i roti, iri-no ko iri, roti, om i anggul, iri-no ko iri bai anggul. Topot miduvo duvo dino sumuntu di guvas om raha di Yesus. Manjadi noumpug-po sino, alaid-nopo midadahava-no i Luther om i Zwingli dot aso kinapangaan. Gam alaid-nopo, minomoros-no i Luther di retanko i Zwingli, nga nasanganu do Sundu di tanid mantadko i Sundu do Kinoringan, ka. I harati, i hiza diri aso-po kinopiupakatan om kinopirurutan dot ongoulun Kristian dit sumuhut di tudukan di Zwingli om i di Luther. Antad dino minimbulai i duvo i vaza do reformasi sid Swiss om Jermani, i dang Reformed ko Presbyterian Church om i dang Lutheran Church.

Sabap okodou i hoturan di Zwingli sid bandar Zurich, varo-no kopioduhan sid pialatan dit ulun do Protestant. Iri-ogi sinumaap i bishop dot RC di gorija protestant. I Zwingli minozo sid rumpak sampai kinumavid kondiri do bilok sampai rinumundun sid rumpak diri. Ino dino najadi ontok di toun 1531. Topot i gorija protestant nakatanom-no sid Swiss om i John Calvin minomongo do momihot di tudukan di gorija Protestant sid Swiss.

6. Confessio do Augsburg

I toun 1530 minoniim i Kaisar mangatag di kopigogutan dit ugama Kristian dot RC om Protestant. It Luther om it ongokoruhang dau pinigili sid Kaisar di pongokunan do Augsburg di varo 21 fasal di manarang di kosipan dot ulun Kristian, isuhut di Kitab. Topot i RC pinigili dot 400 fasal di manala di tudukan di Luther, retanko i Luther mangasau di gorija om tumohiang antad sid hoturan dot otopot, ka. I Kaisar minonukung di Gorija Rom sampai minonuhu di gorija Protestant do sumuri om mulit vagu sid hoturan laid diri. Rontob-nopo, aso kotibangan om aso kuasa di Kaisar do mongogusa dit Ongoprotestant. Manjadi antad diri, a-ko piro ot ulion dot ongodaerah minongimbulai di gorija Protestant sid dau do vatas om bandar sampai jinumadi dot ulion di goreja Protestant sid dau om dau do daerah.

7. I karismatik

Kopihiza di Reformasi di Luther minimbulai i rombongan di tinumalib di gama mangatag di gorija. Retan dioti, Osomok-no it adau do kovian. Bianco bai i Sundu do Kinoringan o mangahatul om mangagazad dot amu osusa do varo-po Kitab om varo-po pandita ko teologia. Tu kondiri dit ipat-ipat it ulun, ong sukul kisundu, otudukan do Kinoringan. Gam retan-po dioti dot i dau do piumpugan mad jumadi do karajaan do Kinoringan. Amu osusa do mongontupat-po dit ongohoturan do pomogunan. Sokovia i tana om barang om ulun oebas, amu osusa-po do mamakai di nunu-nopo songhoturan do riniba, tu i Sundu o mangahatul kavi.

It ulun dot elo minamakai di boros dit osundu. Sid pialatan dioti dino ogumu ot ulun i retanko nabi do Kinoringan sampai pinentalang dit ongohal dit amu songkuro om kosunu-ogi, ka. Na it ongoulion om i Luther minoniag di gama di iadino sampai ogusa-no ioti sampai natanus-no i hoturan om ongopiumpugan dioti dino. Vokon-no ong ohukuman dot apatai, vokon-no ong osunsub sid pomogunan dino sampai minamadrangkat ioti sid ongopomogunan vokon, iadko sid Belanda sampai sid Amerika, vokon-no ong minogidu-no kondiri mogihim do tempat dot amu osusaan dit ongoulion ko Kaisar.

8. I kopiondusan dit ugama.

Na sid pialatan dit okonko piro-piro toun (1531-1555), i Kaisar om it a-ko piro o bishop di mangahatul do daerah do Germani, minoniim do pengkakat vagu di hoturan do gorija Rom sid songgermani. Topot it ongoulion di minonimban di hoturan do gorija sid dau do watas om razat, sinumaap di hoturan di Kaisar, gam minangajaga di dau do volit do daerah, supaya a-kosoruvang i Kaisar om i tentera dau. Sid saralom di rumpak diri, aso kamanang om aso't otori banal. Topot ino-ma razat ot nosusa di rumpak diri, tu vokon-no ong norungoi it ongovalai om it ongototonomon sid ongotangad, vokon-no ong nouripon it ulun sid iso kampong ko bandar om ginaratan do sumuvang vagu do RC ko Protestant om miguguli-guli vagu sid kosipan laid diri. Suvai i toun 1555 om miniaandus i Kaisar om it ongoulion sampai minangakun dot pengkaa dino, Kodung it ulion RC, ensanan i razat nga RC, om kodung it ulion Protestant, nga i razat dau nga Protestanti.

9. John Calvin (1509-1564)

I Calvin nokosikul do Lawyer, nga minamasa iosido dit ongosurat di Martin Luther sampai ozi iosido do varo katagan do gorija. I hiza diri osusa iosido sumusut om mogidu, tu ogusa dit RC it isai-nopo i mamasa do buuk di iadino. Kakal-po osusut, minonurat iosido do buuk, i ngaran dau, I tudukan dit Ugama Kristian. Manjadi sid saralom dit a-ko piro toun minonoruvang iosido om mininton sid a-ko piro it ongopandita di minangahatul di reformasi sid dau om dau do piumpugan om bandar. Suvai 1541 om korikot-ogi i Calvin sid bandar Geneva.

Na i Calvin okonko bai sumusui di tudukan di Luther ko i Zwingli. Gam kondiri dau minokituduk-po di Kitab. Iadino i gama dau mongonsi di Kitab: Ino-no i vaza do Kinoringan mongintalang di kenginan dau sid riniba, i Yesus Kristus kondiri. Kinoringan momili dit ulun om ozi dot it ulun masi ponong sid kohormatan do Kinoringan. Antad dino kembulai it atag o vazaan do gorija. Topot i Kitab mangahatul dino sokovia. Amu minonodiri i Calvin di Kitab Laid om Kitab Vagu. I kososizan di Kitab Laid nga kiguna bahagi di hoturan do pomogunan om bandar bianco. Sabap ino, kinenginan di

Calvin dot i razat do Geneva jumadi do bansa do Kinoringan. I bandar do Geneva okonko kihoturan antad sid palad do riniba, gam Kinoringan mangahatul di sokoviai i kobuatano do bandar. A-kavasa do varot ulun sid Geneva dit amu sumuhut di hoturan di iadino, ka. Antad dino hinatul-no i gorija om razat om piumpugan do Geneva, varo pandita, varo ongoguru, varo Ketua gorija om varo ponulung. Banalko ahatul diri i gama monunda di gorija. I pandita, suvai nopili do razat. Isai-nopo i tumohiang sid hoturan, osunsub-no iosido. Pengkaa dino, ipat-ipat it ulun Kristian nga posurut di kosunuan om kotulukan di kenginan do Kinoringan.

LIANG KAAPAT: IT KOSURUTAN DIT ONGOGORIJA VOKON sid Europa

1. I gorija sid England

Sabap i puru dot England osodu banal antad sid Rom, amu oruhai i hoturan do Rom ponong sid England. Amu tantu nakagavul i pomogunan dot England sid kopioduhan sid Europa Tanga di sid pialatan di Pope om i Kaisar. Banal-ko varo kosusaan sid pialatan do France om England, tu hatu toun mirumpak-nopo it duvo i pomogunan dino. Banalko alaid i England minomorinta do France om minoniim do monguasa di bansa do Fransis dino. Kagi, i hiza dino bai i raja ot elo momorinta, isuhut di dau do kenginan. Sid gama momusavo dot anak di raja vokon ko mongivan do raja banalko asarok monimban di ongohoturan do pomogunan. Okonko i razat kadapat momili di hoturan do pomogunan dau. Ombo i raja di mad minonguripon di sokoviai i bansa dau. I raja om it ongokipangkat vokon, (ong sid England retanko Duke ko Lord, ko Earl, ko Count) o minanansanganu di sokoviai i tana om kabun om pinoposiwa sid ulun mukabun dot agazo o siwa. Sabap ino, i kipangkat banalko lumundu om kikavazao do livetung, topot i razat banalko mosikim dit a-milo-milo sumamba sid ongolumundu dino.

Na i raja dot England, hiza di Martin Luther, ino-no i Henry VIII (1509-47). Sabap i savo dau gulu dino bai onom ot anganak dot ondu, tumiim iosido do pada di savo dau. Topot a-koho i Pope do popiada dioti dino. Ong it ondu di kenginan dara di raja, suvai mokisavo ong nokopiada-no laid i raja, ka dau. Na i savo gulu, ino-no i Katharina diri, kominan di Kaisar Charles V. Iti-no o sabap o tinomod di Pope dot a-koho iosido do miada i raja Henry VIII. (vokon-no ong varo koubasan sid RC dot ong raja engin pada di savo dau, retanko a-kopisavo banal ioti. Iti-no o sabap do kadapat mitongkizad vagu, tu a-nokosunu i kopisavaan, ka. Manjadi, kodung a-koho i Pope, minongogorot i raja Henry om minanala di sokoviai it ongobishop sid England, retanko a-nokonong i gama dioti mangahatul di gorija. Tu minsanko sid England nokotimpun i gorija do mongojual do surat kapangadaan do sala bahagi di panambayanan sid Rom. I raja minonuhu dot i hoturan do gorija kamung sid Dewan rakyat sampai i gereja England tumongkizad antad sid hoturan do Rom om jumadi do gereja do rasmi sid pomogunan do England, mad gereja negara. Ino dino jinumadi ontok di toun 1534. Iri-ogi i bishop vagu dit antad sid kovosihan di raja, pinopiada di raja om i savo dau laid om pinopisavo di raja om i Anna Boleyn. Na i Pope sid Rom mad minongindaraat dara di raja, nga aso kogunaan dino: retanko i raja Henry okon-noko Kristian-po iosido, ka. 1536 i raja Henry minonutup di sokoviai it ongorombongan do semfug sid England om minanganu di sokoviai it ongotana om barang dit ongokavavalazan di semfug dino. Sabap i savo vagu minaganak do kusai di napatai-no laid sid tizan dit idi, hinukuman-no di Henry i savo vagu do patazon om minanansavo-no vagu di ponulung di savo koduvo dino, ino-no i Johanna Seymour. Humiza di musu it ondu dino dot anak do kusai, minatai it savo. Na minanansavo-no vagu. Topot inot ondu dino, hinukuman-no vagu di raja, retanko minokiagai it ondu dino hiza dit amu-po kopisavo. Bai iso-po it ondu di sinavo di raja kakali hiza di kinapatazan di Henry VIII.

Nakakun dara di raja dot ipat-ipat i piumpugan, varo Kitab Inggeris, isuhut di kinosolinan di Tyndale (1483-1536), nga amu songkuro, minoniag vagu i raja di gama di iadino. Na i raja di sinumusuhut di Henry VIII dino, ino-no it anak di Johanna, i ngaran dau i Edward VI, nga bai hopod toun it umul dit Edward dino di nakaraja iosido. Sabap ino, i kamaman dau o tinumabang momorinta om minongimbulai di hoturan do reformasi, isuhut di hoturan di Zwingli om i Calvin.

Na i gama monimban di hoturan sid gorija sinumuni dot okonko nologot om okonko ogorot. I buuk di

tinumabang sid kinoponimbangan dino, ino-no i buuk i retanko Common Prayer Book, i buuk kopomintaan dua, ka. I buuk dino sampai bianco vozoon di mangahatul di gama manambayang. Kasalaan-nopo, i Edward VI bai oduruk raja. Minatai iosido do bai 16 toun it umul dau. I gumanti dau, ino-no i Maria di savo laid di Henry, inulit-no vagu dau i hoturan do gereja RC. Nga bai oduruk i hoturan dau di iadino, tu ensanan i razat amu ozi sumuhut vagu di hoturan di iadino. Iri-ogi nokosuno-no dot it gereja England jinumadi do gereja Protestant. Na i gumanti di raja Maria, ino-no i raja Elisabet om iosido minomorinta di pomogunan dot England sid saralom dot 45 toun (1558-1603). Iosido minomihot di hoturan dot osodiri i gereja England ko Anglikan om minangapad di pomogunan dau, supaya it ongoraja sid Europa, sid Spaniol om France amu minongunang vagu di hoturan sid England. Gam i tentera do kapal minorori di tentera di raja do Spaniol sampai minongimbulai di hoturan sid ongorahat dot it ongokapal dot England o kikuasa sid tanga do rahat. (i kopitan Nelson o minorori di Spaniol sid rumpak do Trafalgar 1588).

2. Sid France minimbulai i gereja Protestant, gima alaid-laid varo-no ongotudukan di retanko Humanism om Saiens di humarati dot amu kopionong i hoturan do Rom om i Kitab. Ong i Kitab Fransis diri oduruk-no om varo hukum dit ongoulion do pomogunan dot a-kavasa manansanganu om mamakai di Kitab Fransis dino (1536). Na songkuro-nopo iadko rinumidi sid tanga do razat i kosipan vagu, i raja do Fransis dino a-koho do poturut di reformasi sid pomogunan dau, gam tinumimpun-no iosido do mongogusa dit ulun di humarap sid kosipan dino sampai minororob dit ulun dino sid apui. I rombongan di varo-no laid sid ongoburul, ino-no i Waldensis diri di kumavid di Kitab om mongohormat di poginakanan di Yesus minsanko aso pandita sino, ginusa di raja sampai i kogumuai tinangkap dau om nijuval sid ongokapal, supaya it ulun dino uripon sid kapal (kinorovingan do rantai dot a-kedu sid kapal di kakal mamakai do gagau). Vokon-no ong pinatai dau do sorobon sid apui. Manjadi ontok di toun 1572, nabahagi-no i ongkob di raja. I kusai ozi dara do poturut di reformasi. Topot i savo om it ivanon dau tinumabang om minongorinding di gereja RC om i hoturan di Pope. Kodung nokopisavo-no i raja, tigogi varo iso sodop dot i sojal minanangkap om minongogusa dit ongoulun di nokoprotestant sampai isai-nopo i natangkap diri, ginaras-no di sojal. Ino sodop diri bai amu nopunso banal it ongoulun do Protestant. Ombo it a-korundun, osusa mogidu sid Swiss om German. Sabap banalko aso tinganan do mizon-po sid Fransis dino. Ino sodop dino mad sodop dot oholian i hal sid saralom dit usuran do goereja. Topot i Pope sid Rom, ino-no i Pope Gregor XIII minangahatul sid panambayangan sid Rom do sambayang bahagi di gama mongindazou do Kinoringan, gima nabarakatan-no do Kinoringan i gama momunso do Protestant di iadino.

3. Sid pomogunan do Belanda, Sweden om Norwegian, tatanid-tanid-no vagu o vaza monimban dit ugama Kristian antad sid hoturan do Rom sid gereja Protestant. Ong sid Belanda om Scotland nokosunu i Reformasi isuhut di hoturan do Geneva. Topot ong sid Sweden om Norwegian, nga nokosunu i reformasi isuhut di hoturan di Martin Luther. Gam i raja do Sweden om i raja do Norwegian minongolumbatos do kodung nokopotorontog i gereja, ino hoturan dino jumadi do hoturan rasmi sid dau om dau do pomogunan.

LIANG KOLIMO: IT ABAD ko-17-19.

1. Mirurumpak i Protestant om Katolik sid Europa

Antad di kopidukaan do kosipan dot ulun Kristian, isuhut di tudukan do gereja om i hoturan dit ongoulion om raja diri, amu ozom it ongopomogunan do Europa, gam tigogi, mad hinumandab i Europa sid saralom do tolu nopod toun mirurumpak-nopo, mipapatai, misisimban-simban om mitatarik-tarik dit razat sid ugama vokon. Protestant minongogorot dit ongokatolik do sumuvang do Protestant om i Roman Katolik, pengkaa dino. Vokon-no dot araat banal i gama mongogorot. Varo-no ong penum dot ulun do sobu, ko pigison it odung om tolingo, ko hongkosen-no om loposon-no sampai toropatazo. Labaan intanga it ongokavavalazan notutudan om bai iso pitolvon dot ulun a-korundun sid rumpak dino. Oholian ino hiza diri sid Europa, tu nokohino-no banal i kosipan dot ulun, gima it ongoulion di minamakai dit ugama om kosipan do tomod momihot di dau om dau do kuasa

om hoturan om volit. Ino hiza di rumpak diri 1618-1648. Notoliban-po i rumpak dino, norungoi-no i pomogunan do Germani om nosusa-no i gereja om i kosipan dot ongoulun di kakali diri.

2. Sid England varo iso rombongan, i ngaran dioti **Puritans**, dit amu koho di hoturan do gereja Anglikan, tu ka dioti, ino gereja di nahatul-no dit ongobishop om raja, amu sumuhut di hoturan do Kitab. Suvai ensanan i Kitab mangahatul di sokovia i koposizan dit ipat ipat it ulun om ensanan i pomogunan om miuma-ogi. (Puritanism - i hal dit alus banal). Ioti minoniim do posuvang di hoturan di iadino sid sokovia i karajaan dot England.

Hiza minatai-no i raja Elisabet, i gumanti dau minongogorot do posuhut vagu dit ongopuritan sid hoturan di raja om gereja sampai minongogusa dioti. Alaid-nopo minongitung ioti dot banalko aso tinganan do mopung sid England. Sabap norongou-no dioti do varo tana om pomogunan sid Amerika, tinumimpun-no ioti do rumangkat sid Amerika (1620). Boros dioti, sinod pomogunan vagu kadapat-oko i mamakai di kosipan dahai dot iso nga aso moniag dahai ko mongogusa dahai om monusa di kosipan-za, ka. Pengkaa dino, ulun do Protestant sid Belanda, ong kodung okodou banal i hoturan di raja di humarap sid gereja Rom, minogidu ioti sino sampai rinumangkat sid Afrika Selatan. Kagi ong sid England, varo it a-ko piro gama mongoduraka di hoturan do raja om Dewan rakyat, dot tigogi simbanan i hoturan ponong sid Katolik, om tigogi, sinumimban-no vagu i hoturan ponong sid Protestant dot okodou banal, tu kodung nokoprotestant, varo di engin momunso di vokon. Aso tinganan do mongusul ino kavi siti diti.

3. I kinembulazan di Gereja Methodist.

I pandita John Wesley (1703-1791) om it obpinai Charles nokotiim do mangahabal di Habal do Kivosihan sid Amerika Utara, ino-no sid ongoulun di nokorongkap sid Amerika. I hiza diri nakasamung ioti dot ulun Kristian antad sid Germani di nosunsub sid pomogunan do Moravia, gima i vaza dioti kumavid di Habal do Kivosihan iadko hoturan di gama suvab-suvab, gam hinatul-no dioti i gorija vagu dit amu monodiri do bansa om denominasi. Iri-ogi hinumarati ioti Wesley dot amu-po miuma o kobuatano do Kristian ioti kondiri, tu kakal-po mongitung di kahabaran di boros do Kinoringan iadko ponsohorian. Na minuli-no vagu ioti sid England, dot tigogi, nabasa-no di John Wesley i Tafsiran di Luther bahagi di Surat di Paulus pakaa sid Rom om mad notobukan i ginavo dau sampai noposik-no iosido om sinumamba iosido sid Kinoringan dot iseso o ginavo om koposizan. I dau dot ohorotizan, Suvai antad sid kenginan do ginavo sumuhut di Yesus dot aso kiroon vokon, om miuma-ogi do Kristian iosido, isuhut di boros di Yesus sid di Nikodemus, Suvai kalandai vagu antad sid Sundu do Kinoringan om atag-ogi o gama dot ulun, ka.

Antad diri (1738) minengkhotbah-no i John Wesley do banalko apatong do mongingut dit ongoulun di sumamba di ensanan i koposizan dau sid di Kristus. Ino gama dau dino, mogulu sid dau do piumpugan sid Withby om iri-ogi mirimpanau iosido sid ongokampong om bandar vokon do iri-no ko iri o gama mengkhotbah om mongonsug dit ongoulun do sumamba sid Kinoringan. Tinumongkop iosido di Daerah England Timor sampai ogumu ot ulun minongining om sinumuhut di tudukan di Wesley. Alaid-nopo, jinumadi do gereja Methodist, minsanko okon iadino o kenginan di Wesley. Ong iosido bai engin do mongimvagu di Gereja Anglikan dit oholian nakagavul sid jasmani om sid hoturan do pomogunan. It ongotirisan o minanansanganu di pomogunan dot i razat, bai uripon di kadapat moniwa do tana dot agazo o siwa, om ioti tirsan o minangahatul di gorija. Manjadi mula-mula bai gauk dot ulun ino pongoretan do Methodist, alaid-nopo ngaran banal-no dit ongoulun di minikunsi do tumatap sid di Kristus. Manjadi iti-no i doktrine di Methodism, It ulun suvai monuluk di sokovia i kenginan do Kinoringan om ensanan humarap sid kivosihan do Kinoringan, okonko mongitung dot iosido elin om okosog antad sid dau do kavazao om bahazan, sampai mogihim di kosusian di kobuatano dau, isuhut di tudukan di Sundu do Kinoringan. Tu i Sundu o pemumui it ongoulun. Ong varo karaatan dau, i raha di Yesus o monusi dit ulun antad sid karaatan dau.

Manjadi miaamung ioti dot tohopod-hopod ot ulun di jumadi iso rombongan di mitatabang sid gama minta dua om tumatap sid tinoguvangon do Kinoringan.

Manjadi it ongoulun sid ongokampong di nopogos dit ongoulion dioti di posiwa di tana om it

ongoulun do mosikim di ginumaji sid ongokilang dit industri di tinumimpun i hiza diri, ioti kavi sinumuhut di hoturan om onsug di Wesley. Amu ozi ioti mamung vagu sid Gereja Anglikan, tu vokon-no ong nokotongkizad-no laid sino, tu nosunsub dit amu miuma mamarai do rukut do gorija, ko minogidu-no, tu oholian kopogos dit ongohoturan dit ongomangahatul di gorija, antawa amu minangakun ioti dot i raja soumul monimban di hoturan do gorija om mongogorot dit razat do sumuhut di dau do kenginan om kosipan. Sabap sid saralom di duvo natus toun, okonko impiro-piro simbanai i hoturan do varo monuhu do Protestant om iri-ogi Katolik vagu om varo-po kopirumpakan dit ongobishop om i raja dot banalko araat o kososizan, dot ensanan i kopigogutan dino, okonko hal do kosipan sid di Kristus, inoi nga hal do kuasa om garal om bantu.

Suvai i toun 1784 om varo-ogi miting dit ongohatus o pandita di sinumuhut di hoturan di Wesley di minongolumbato do tumanid om pengkakat di gereja Methodist, ino-no gereja dit amu kahagut sid hoturan do raja om porinta.

Na ino gereja Methodist minangaranzat sid Amerika Utara om sid ongopomogunan vokon. Amu songkuro antad kinembulazan, varo syarikat do Mission di mongirim dot ongomisionari sid ogumu it ongopomogunan. Ong biano, varo World Methodist Council di miupakat di sompuruvan dit Ongomethodist sompomogunan. 31 it ongogereja Methodist nakamung-no biano sid World Council of Churches (WCC) sampai duvo it ongoulion di WCC, nga ulun Methodist, ino-no i Philip Potter (1975-85) om i Emilio Castro (1985-92).

4. I Denominasi Baptist.

Nokotimpun-no laid hiza do Reformasi, varo a-ko piro o rombongan dot Kristian di minongitung do suvai osukod it ulun om miuma-ogi do mangasip sid Kinoringan om mokipodsu. Nemot-no dioti dot i vaza momodsu dit anganak di ragang-po, mad aso guna, ong a-nokovoza do tudukan di kosipan. Boros dioti, ino kopomodsu dit anganak bai undang-undang dit aso harati. Ong mongimvagu di goreja, suvai antad kinotimpunan mangatag, minsanko i hal do kopomodsu osusa simbanon, ka dioti. Na it ongogereja minonunsub sampai minongogusa dit ongoulun di mokipodsu, minsanko nopodsu laid dit opodok-po, gam varo't a-ko piro it ongogereja minongonsug di porinta do potorongku om mamatai dit ulun di sumuhut dino hoturan do momodsu vagu dit ongoulun. Manjadi i hiza di nakatalib i Reformasi, ogumu it ongoulun osusa mogidu sid dau do pomogunan, vokon-no ong a-kedu, otorongku ko ohukuman do apatai.

Alaid-nopo minangakun i Porinta dot England om Amerika dot obebas it ulun sumuhut di dau do vaza mangasip. Ino dino o kinembulazan di Denominasi Baptist. Ino-no i kosipan dioti, Ong i raja do pomogunan, bai raja di dang riniba. Topot i hal do kosipan, hal sid pialatan do Kinoringan om it toriso-iso it ulun. Aso kuasa di raja do momialatan om mamantaran sid Kinoringan om i riniba. Iti-no sabap suvai a-kagavul i porinta sid kosipan om ugama dot ulun, om isot ulun nga aso do mangahatul di kosipan dot ulun. Ipat-ipat it ulun, nga kumondiri sid Kinoringan. Ipat-ipat i piumpugan, nga mangahatul di dau do piumpugan. Ong varo't ulun di nakaranggal di hoturan do piumpugan, i piumpugan monunsub dit ulun di kivala. Ong engin mamung sid poginakanan di Tuhan Yesus isuhut di hoturan do Baptist, nga miuma ong mangasip it ulun sid di Yesus, tu i riniba a-kavasa do moniag dot ulun mamung sid piniizaan di Kristus, ong sukul sumuhut it ulun di ralan di Kristus, do iadko iosido o humarati di ralan dino. Atagal do varo't pandita di mangahatul di poginakanan di Tuhan Yesus. Ikid piumpugan mengkakat kondiri. Ipat-ipat i piumpugan nga sabahagi di Gereja di Kristus, nga amu mangarait do daerah ko pomogunan, tu bai iso o gereja.

Na i Baptist World Alliance (sompuruvan do Baptist sompomogunan- okonko gereja o ngaran) popiumpug dit Ongobaptist sid 145 pomogunan, supaya varo kesaan om kososizan dioti. Mad hopod ot ayat o kosipan dioti, ino-no:

1. I kosipan dot ulun, nga antad sid Sundu, antad sid ginavo dot ulun di suka rela.
2. I Kitab nga nituduk di Sundu do Kinoringan, nga iso nga aso sala sid vaza monurat.
3. I gereja, ino-no i piumpugan dit ulun di mangasip
4. i kosopulan di riniba, ginama di kovosihan di Kinoringan sid isai it ulun di mokiada di sala om mangasip

5. Isai-nopo i mangasip, mad pandita ko imam, aso't ulion tanidko i Kristus
6. Duvo o tanda do Kristian it ulun, ino-no i kopomodsuan om i poginakanan di T.Y.
7. I kopomodsuan suvai itolong sid vaig, isuhut di Kitab
8. I hoturan do gereja, nga hinatul di piumpugan kondiri
9. It ongoulun obebas do sumuhut di dau dot ohorotizan do kosipan, tu nagazad di Sundu do Kinoringan.
10. Ong nokopitongkizad i porinta om i gorija, oruhai dot isai-nopo it ulun kadapat sumuhut di dau do ginavo.

Manjadi antad kinembulazan di hoturan do Baptist, banalko agazo o ginavo dit ongobaptist pazazad di Habal do Kovosihan. Topot ong i gama mizo it ongoulun Kristian om it ongopiumpugan ko it ongogorija, banalko obohinut om mangamu, tu rumosi do varo hoturan antad sid savat di momorinta di ginavo dit ongoulun.

5. Sid abad ko-18 mad abasan i Europa sid gama miooduw mirurumpak dot ugama. Mad noposik-no i kogumuai it ulun sampai hinumarati dot okonko ino o kosungguvo do riniba. Minoniim it ongoulun humarati di sokoviai i kobuatano do vinangun om saiens dot a-koho do bai i Pope o manarang ombo it otopot om amu. It ongosaientist tinumanid antad sid hoturan do gereja om it ongoraja minanahak sid ongosaientist do kobebasan sid gama om tudukan di iadino. Kodung iadino i kobuatano do razat, minimbulai it duvo o vazaan masi, ino-no, it ongopandita om ulun do teologia tinumiim do mongolumbatos di kosipan sid a-ko piro it ayat, supaya i kosipan iadko rumbul dit a-milo-milo patatap ombo it atag osipon. I vazaan koduvo, ino-no, boros dioti, okonko i tudukan om i hurup do Kitab o kiguna, inoi nga i vazaan sumuhut di hoturan om tudukan do Kitab, lumuu di kavazao om koposizan di Yesus. Suvai elin om okosog it ulun sid gama posuntu di boros do Kinoringan sid sokoviai i gama om koposizan dau suvab-suvab, sodop adau om atag-ogi. Amu miuma do bai mamung sumambayang om ahatul o liturgi, inoi nga ipat-ipat it ulun kumondiri sid tinoguvangon do Kinoringan. Manjadi it ulun di sinumuhut di hoturan dino, okonko bai minggu om sumambayang ioti, gam suvab-suvab ioti miuumpug mamasa di Kitab om mihohondom om miuusul-usul di pangalaman di kosipan om i gama misasamod sampai minoghiim ioti do vaza do pazazad di Habal do Kovosihan om posuntu di karajaan do Kinoringan sid tanga do riniba.

6. I hiza diri okonko bai i **Spaniol om i pomogunan do Portugal** nokotimpuun do monoruvang sid ongopomogunan sid Afrika, Asia om Amerika, inoi nga Belanda, England, Danmark, France om Belgium o nokotimpuun-no do manansanganu do tana sid ongopomogunan vokon dino. Ong Spaniol om Portugal, sompi nosuhu di Pope do monoruvang di sokoviai it ongopomogunan do songriniba ontok di toun 1493, hiza di norongou di Pope antad sid di Kolumbus do varo-po pomogunan dot amu-po opirikot dot ulun do Europa, ino-no Amerika.

Kodung notori-no it i tentera do kapal do Spaniol (1588), it Ongobritish minonoruvang sid ongopomogunan. Alaid-nopo varo pongitungan dit gereja Anglikan dot avantang ong posuhut dit ongosojal di manansanganu do koloni, supaya varo pandita dioti sid pomogunan di nokuasa dau sid sodu. Iri-ogi hinumarati it ongopandita di nokovozi diri dot mad amu miuma ong bai sid ongosojal mangahabal di Habal do Kovosihan, inoi nga it ulun pasok sid ongopomogunan nga ulun dit atag dot ahabaran dit Injil. Tu, ka dioti, i samod do Kinoringan aso retan do volit ko rontob. Alaid-nopo, minimbulai-no it a-ko piro o rombongan sid England om sid Europa ensanan do minongitung sampai minangahatul do sharikat di posurut di Habal do Kovosihan ponong sid ongopomogunan vokon. Sid England varo sharikat do goreja i retanko **sharikat bahagi di gama pazazad di Habal do Kovosihan**, ka om i Sharikat Mission dot Anglikan, gam duvo-no di dang Anglikan, ino-no i retanko Society for the Propagation of the Gospel (SPG), i Mission di High Church ko Anglikan-katolik, om i-po Church Missionary Society (CMS), i dang Anglikan-Protestant. Varo-po bahagi dit ongogereja Presbyterian om Congregational Church, ino-no i London Missionary Society (LMS).

Sid Europa varo minimbulai i sharikat do **Basel Mission** di nolumbatasan hiza di toun 1815 sid bandar do Basel, i sid volit do tolu o pomogunan, ino-no France, Switzerland om Germany.

LIANG KOONOM: I ABAD DO MISSION, Abad ko-19 (1801-1900)

Ong timungon dara mongusul itit Abad ko-19 om it onogogama dit ongomission, amu oruhai manarang om amu oruhai rumamit. Kagi, amu orusod sid buuk diti. Iti-no o sabap dot bai pinili ot iso o syarikat do Mission di posuntu di kuran it ongomission antad sid ongo-pomogunan do Europa om Amerika Utara minomili om minonoruvang sid ongopomogunan dit a-po opipanau it ulun dot Barat do monginjil o tomodon, isuhut di boros di Yesus dot, Pamanau-kou-no om jodizo-no dikou i sokovia i it ongobansa do koruhang-ku.. Matius 28,18-20. Ino-no ot onuvon do suntuan, ino-no i Basel Mission.

Na hiza di kotimpunaan dit Abad ko-19, norunggal-no i pomogunan do Europa, tu it ulion do Fransis minongorumpak sampai minonoruvang di sokovia i it ongopomogunan do Europa, tanid mantadko England om Europa Utara. Notoliban-no i Revolusi do Fransis (1789), na tinumiim i Napoleon do pengkakat di dau do hoturan sid ensanan i Europa.

Na it ongogorija Protestant diri sinumuhut di dau om dau do porinta. Sabap it ongoraja om ulion vokon, nga ulion-po do gorija Protestant di dau do daerah ko karajaan. Manjadi iso raja om ulion, nga aso minongitung ko kikuasa do posurut di Habal do Kovosihan sid tempat tanid mantadko i dau do pomogunan om daerah, opodok ko agazo. Kagi aso kiroon dau bahagi dit ongobansa om ongopomogunan vokon. Iso-no kiniro dit ongoulion, ino-no, ozi ioti dot i gorija om it ongopandita tumabang do pozom di razat om posuhut banal dit ongoulun sid hoturan di raja, avantang ko araat i hoturan dino. Ino hiza diri kakali songitung-itung it ongoulion dot ioti o sanganu di pomogunan sampai it ongoulun sid pomogunan dau, nga kuli om mad uripon dit aso kuasa. Ong iosido nga kikuasa antad sid kovosihan do Kinoringan, gam retanko ioti, "ioku diti o raja dot Wuerttemberg antad sid kovosihan do Kinoringan", ka om momongo iosido momogos dit ongoulun do iposukoi dit ongotana om it ongotonomon om kinozuvan dot ulun. Vokon-no om minongojuval dit ongo-sojal dau, supaya kadapat iosido do barang ko amas ko miuma i balanja bahagi pengkakat dot istana dot ahatul ot agama.

Ino hiza diri hinumarati it ongoulun Kristian do varo ogumu-po ongopomogunan dit amu-po orikatan di habal do Kovosihan. Ioti dino, ulun do kampung. Nening-po dioti dot a-ko piro ot ongopandita di nokovoza dit ongo-sojal mangarampas dit ongopomogunan vokon, nga nokotiim do polombus dit Injil sid ongoulun do pasok sid ongopomogunan dino sampai sid England varo syarikat do Mission. Na mula-mula minangahatul ioti do rombongan di miuumpug do mongining om minta dua bahagi di kosurutan di ponginjilan sid ongo-pomogunan o tomodon. Alaid-nopo, nonsug ioti do pengkakat do syarikat dit iri-no ko iri o tomodon. Rontob-nopo, amu oruhai o vaza mangahatul di iadino, tu vokon-no ong amu ozi i porinta dit a-ko piro o pomogunan do varo hal di iadino, indoson, ong mongoduraka it ulun. Iti-no o sabap minomili ioti di bandar do Basel do tempat bahagi di pusat di rombongan, tu i bandar do Basel piboborutukan do tolu o pomogunan, ino-no Switzerland, Fransis om Germani. Pinengkakat ioti do sikul bahagi di kosikuran dot ongomisionari. Ino dino nokosunu i vulan sembilan di toun 1815. om i ngaran di syarikat dino, **Protestant Missionary Society sid Basel** ko Pertubuhan Ponginjilan sid Basel. Manjadi i gama di iadino amu nokokunsi do gereja di siombo-nopo. Ioti kavi i minitatabang sino, nga nonsug antad sid dau dot ginavo dot agazo bahagi di kosurutan di Habal do Kovosihan. I sokovia i gama dioti suka rela om pribadi.

Kodung nening-no dit a-ko piro ot ongopimpugan di miting mingguan do mamasa do Kitab om minta dua, miniupakat-no ioti do monulung di Basel Mission sid gama mongorukut, minsanko ioti kondiri nga ulun do mosikim di bai okudik o gaji sid ongokilang. Varo-no miupakat do manahak di gaji do sanjaham songminggu, supaya i rombongan dioti monukung di balanja dit iso o missionary.

I tumimpuan, ombonopo i nokosikul sid sikul do Basel dot onom toun, minamung sid CMS sid England sampai minozo di CMS sid ongokoloni do British, ino-no sid Kenya, i sid Afrika Timur. Na amu songkuro varo kopiguvelan om kopigogutan, tu it ongomisionari antad sid Basel okonko Anglikan sampai okihizon ioti. Iri-ogi minongolumbatos i Basel Mission do mogihim do pomogunan vokon bahagi di dau do tugas pazazad dit Injil.

I toun 1828 nikiran di Basel Mission it onom o misionari sid Ghana (Afrika Barat). Nokorikot-po,

sino dot sangadau-ogi, minatai it iso-ogi dioti do Malaria dot amu-po navi tolu vulan, bai iso-po kakali. I vokon, minatai-no kavi, tu amu agasan it ongopanakit do Malaria. Bai iso dot a-nokorundun, nga minamanau-no iosido ponong sid sarazo sampai nokemot do tempat dit amu oholian kimalaria. Ong sid tombing do rahat, tantu amu agasan ong ulun do Eropa. Na pinapanau di Basel Mission dit ongomisionari vokon. Ioti misingilo dit ongoboros daerah om minangahabal di Habal do Kovosihan sampai pengkakat dot ongosikul dot anganak. Sabap i British minomorinta sino, a-koho i porinta dot it ulun do pasok mamakai do tana kampong, retanko i sokoviai i tana, tana di raja (crown land). Kenginan di British do sokoviai i tana kosuvang sid lembaga dot it ongoulun bai kuli di kumaraja sid lembaga om sino-no o ponsohorian dioti. Nemot-po dit ongomisionari do iadino, minogihim ioti do vaza do monimban di hoturan dino. Manjadi i komitee sid Basel tinumbang do mogihim dit ongokristian sid England di nakamung sid Dewan Rakyat do London, supaya ioti monulung dit ongoulun pasok sid Ghana. Iri-ogi kavasa ioti manganu do tana, om it ongomisionari minonuduk dioti do mananom do Koko. Na sampai biano, aso pomogunan di miabal di pomogunan do Ghana mananom do Koko sampai koko o kabalanjaan di pomogunan do Ghana.

Ong onsizon i gama di Basel Mission sid Ghana, iadino ot atag do momoros:

I Basel Mission pinengkakat dit ongokampong di kipiniizaan dot Kristian ponong sid koturugan do gorija Ghana sampai pinosikul di razat sid dau do boros om koundango. I sokoviai it ongomisionari do Basel Mission di minatai sid Ghana sid pialatan di toun 1828 om 1914, ino-no 141 kinozuan.

1834 pinorikot i komite do Basel Mission tolu misionari sid Koling-Selatan. Ioti nga misingilo dit a-ko piro boros daerah, gam minangagama dit ongokamus bahagi dit ongoboros iadko Tamil, Malayalam, Telugu. Inot ongokamus dino kakali apakai do porinta sampai biano om mongoguna banal dino nongogama dit ongomisionari. Nokoronuw banal i gama dino bahagi di kosurutan dit ongoboros do Koling.

Na sid Koling banalko tanid o razat. Osodiri banal it ongoulun isuhut di dau do turunan, pakarajaan om tutusan ko tirisian. Varo tirisian dot asavat, ino-no it Bramani, bansa di miniranzat dit ongoulun do Europa kodori diri. Ioti o mangahatul dit ugama Hindi om sanganu di kogumuai do tana sid Koling. Varo a-ko piro segi di manaud di dau om dau do turunan om rurungan, isuhut do modsupu ioti ko tukang kayu ko tukang jahit. A-koho it ongo-segi dino do kopigavul om kopisavo om kopitokin sid turunan vokon. Iri-po it ulun di retanko Harijan, ulun di mad dupot, tu aso hak om aso ngaran dioti. Aso tana om a-kavasa ioti gumavul sid ulun dot ugama. A-kavasa ioti sumagou sid talaga do kampong ko gumavul sid panambayanan. I kosisizon dioti atandas antad sid karaja sid ongokabun om tana dit ongoBramani. Na it ongobramani elo monguripon dit ongoharijan dino sid gama poutang dioti dot asavat o bunga do sampai pempatai it ulun om it onkob dau gumaji mangapus, nga kakali sumurut i kogosoo dot utang do sampai mitutungskus-tungkus it onkob, it ama om it anak om i muaki, nga uripon dit osusa gumama sid tagad om kabun dit ulun do lumundu dot banalko okudik o balanja. Savo, anak, nokotokin, nga uripononi sampai pempatai.

Manjadi kodung ahabaran-no ioti di Habal do Kovosihan, agazo o ginavo dit ongomosikim sumuhut di hoturan do Kinoringan, tu nengat dioti dot ong sid tinoguvangon do Kinoringan aso gama momeda ko pokihi dot ulun, gam isai-nopo nga kenginan do Kinoringan. Amu songkuro ogumu it ongoharijan nakamung-no sid ongopiumpungan. Kasalaan-nopo, kodung nokosuvang ioti do Kristian, nosunsub-no ioti dot a-kavasa-po gumaji om mansahari sid ongotana di Bramani.

Iti-no o sabap minogihim it ongomisionari do gama, supaya varo kosisizon dioti dot amu osusa ioti sumamba sid ongolumundu ko lumikop. Pinengkakat i Basel Mission dot a-ko piro kilang di mangagama do bata (iadko i taap sid Balai Pusat do Taman Gereja) om kilang di moningkol om mangavol do gapas (cotton), supaya varo kumut dot omura sid Koling.

I hiza diri a-koho i British dot it ulun pasok mamakai dit ongoenjin moningkol om mangavol, tu kenginan do Kolonial dot i gapas antad sid Koling iatod sid England om sori tingkoron-ogi om ovoron om iri-ogi ijuval vagu ino kumut dino sid Koling dot asavat o horogo, tazonko alaku i barang antad sid England sampai varo kohuntungan dit ongokilang sid England. I hiza diri hopod kilo gapas miuma

do dumagang do sompudung o kumut di miama do mangagama do sarong. Dot i gapas dino miama do labaan do hatas hela kumut. Amu oruhai i Basel Mission kadapat do kabanaran antad sid Dewan Rakyat do London, iadko bahagi do Ghana, supaya it ongomisionari dumagang dit ongoenjin moningkol om mangavol sampai pengkakat dit ongokilang dino. Kagi nokemot ioti do warna di banalko avantang bahagi dit ongopomogunan dot alasu om asapou ot ulun, inoi-no i warna Khaki. Sabap ino varo pongoretan dot i Mission popigavul do kumut do koton, khaki om kosipan.

Varo-po kilang di momirin om ino dino nga kinotimpuunan do Printing Industri. Sid kilang dino misingilo it ongoulun mangagama dit ongobuuk, iadko it ongokamus om it ongobuuk do sikul, dot alaid-nopo, banalko nokoronuw it ongokilang dino. Iadino nokemot it ongoharian do karaja om kogojian sampai minamaju. Gam sid ongokilang dino minimbulai do hoturan di mad EPF om varo insurans bahagi it sumakit it ulun ko varo kopunavatan dot ulun, supaya ong pukung-no ko a-no kadapat do gumama-po, varo pension dau. I hiza diri, iso nga aso-po pomogunan di varo EPF ko insurans do sumakit.

I hiza di toun 1913, varo 191 ongomisionari do Basel Mission sid Koling Selatan, vokon-no do bai mangahatul dit ongokilang om it ongosisikul om Rumah Sakit.

I kotolu o pomogunan do varo pinorikatan di Komitee do Basel Mission dit ongomisionari, ino-no sid Kina. I toun 1842 varo rumpak i retanko rumpak Dadah, sabap it Ongobritish, Fransis, Belanda om Amerika sinumaap di Kaisar do Kina. I toun 1839 sinuhu-no di Kaisar do manangkap di sokoviai it ongoulun di mongojuval do dadah sid Kina, di nokotiim do porikot sid Kina do dadah dot olingob o gama. Sangadau nokemot it ongosojal dot 20 000 tuung dit oponu do dadah do to-50 o kilo kavagato. Manjadi minonuhu i Kaisar do pouza di dadah sid rahat om sid ongoolungan. Na it ongokumpani di minongojuval dara di dadah dino, minongogorot dit ongoporinta do mokiganti di horogo di dadah, antawa, ong amu sumuhut i Kaisar do Kina, mongorongoi dit ongobandar om it istana di Kaisar. I toun 1842 sinumarazo it ongokapal parang sid ongoolungan sampai minonimbak di istana di Kaisar om it a-ko piro ongobandar vokon. Iri-ogi minangakun i Kaisar sampai tinumurut di kenginan dit ongoulun do Barat, ino-no:

a) i pomogunan do Kina mongogiang do limo pangkalan bahagi di gama midagang do dada om i barang vokon antad sid Barat.

b) I Kaisar do Kina mamarai di horogo di dadah di nouza-no sid olungan om rahat om mongoho dot it ulun do Barat obebas monoruvang sid pomogunan do Kina. Ikid porinta dit ongopomogunan vokon kadapat pengkakat do konsulate dot i tana do konsulate mad tana di porinta sid sodu.

c) mangakun i Kaisar dot it ongomisionari kavasa monoruvang om mamananau sid ongobandar om ongokampong, tu pazasad di Habal do Kivosihan. Minsanko it ongoulun Kina di mamung sid Kristian, nga obebas om kihak do iadko ulun do Barat o pongiraan dioti.

Ino hiza diri, nasalin-no laid i Kitab sid boros do Kina. I pandita, hiza di minanalin diri, kakal-po otutup i pomogunan do Kina, tinumabang dit ongoulun dit olingob o gama mongojuval do dadah sid gama midagang, hiza dot adau. Ong hiza do sodop, minanalin iosido do Kitab. I balanja dau sid saralom dit a-ko piro toun dit osomok iosido sid pomogunan do Kina, mad siumusut sid iso o puru. I gaji dau di midagang do dadah pinakai dau bahagi kolombusan di boros do Kivosihan.

I toun 1847 nokorikot i tolu o misionari do Basel Mission sid Hongkong om linumombus sid daerah do Quangshou. Na sid Kina minonoruvang it misionari sid ongokampong iadko i vaza dioti sid Ghana om sid Koling, minangahabal di Habal do Kivosihan sid ulun do mosikim sampai pengkakat dit ongosisikul bahagi dit anganak om ongondou. Antad dit ongosisikul dino varo kosurutan di keloo om komojuan dit ongokampong om razat. Sid tohudi, ogumu it ongokina di suku Hakawa di nokokristian, rinumungkap sid ongopomogunan om ongopuru vokon, sid Tahiti, Hawaii, USA, sid Guyana om Sabah, do siombo-nopo it orikot dioti, pinengkakat ioti do gorija isuhut di koundango sid Kina. Na i nokorongkap-no ioti sid Sabah, sampai biano kakali mamakai ioti di ngaran dit inantadon diri, ino-no Basel sid ngaran do gorija Basel Christian Church of Malaysia.

Suvaiko sid toun 1885 om kinodim-no i Basel Mission di Kaisar do Jermani do momuka do gama sid koloni do German, ino-no sid Kamerun (Cameroon). Na sid Kamerun varo-no laid a-ko piro misionari do British Baptist om a-ko piro ot ongopiumpungan di minaliu sid Basel Mission. Topot varo-no a-ko piro o piumpungan di sinumodiri, tu a-koho do sumuhut di hoturan do Basel Mision. Antad diri varo Gereja do Baptist sid Kamerun.

Na i gama di Basel Mission sid Kamerun miabal di gama sid Ghana, Koling om Kina, monulung di komojuan dit ongokampong om i kosurutan di pongilaan dot ulun sid gama pengkakat dit ongosikul sid pentongkop do Kamerun. Sinod Kamerun, varo-no vagu o kinosusaan, tu i gobinal minoniag dit ongoulun do manganu do tana. I kenginan dau, it ongokumpani do German manansanganu di sompomogunan om momuka dit ongokabun do kumpani, dot it sokovia i ulun di nokosuvang sid iso o kabun, nga kuli sid kabun bahagi di kumpani dino, dot i kumpani pagaji dit ongoulun, isuhut di dau do kenginan om i kumpani mongimbulai di koposizon dot ulun, isuhut di dau do horogo om kovosihan. Manjadi banalko araatan it ongomisionari di gama di iadino. Sabap ino, minongoruput ioti di gobinal sid Dawan Rakyat sid Berlin sampai nosunsub-no i gobinal om nosimbanan-no i hoturan, supaya it ulun do pasok Kamerun kadapat mukabun kondiri.

Na i sokovia i it ongomisionari nokosikul sid Seminari do Basel Mission dot enizo ioti sinumikul dot onom toun do misingilo di Kitab om i tolu i boros kodori, ino-no Ibrani, Yunani om Latin ko boros Rom om i boros dot apakai sid sompomogunan, ino-no Inggeris ko Fransis, isuhut di tempat dit inantadon ko rikoton sid Afrika om Asia. Antad di pongilaan do iadino, varo agazo o kosurutan dit ongomisionari manangkap dit ongoboros do daerah sampai manalin di Kitab sid boros dit ulun di toudon dioti om varo kotulungan ponong sid vaza potiru om popud om potungkus di koundango dot ongobansa om suku bansa.

Nakatalib-po i Rumpak do sompomogunan dit insan-ogi (1914-18), varo pomogunan dot it ongopiumpungan do Kristian dino mad usan-usan. Tu hiza di rumpak, nosunsub-no it ongomisionari do German, dot otoliban-po i rumpak, i mission a-kadapat papanau vagu dot ongomisionari sori, tu aso balanja mongirim dit ongomisionari. Sabap ino, i mission dino minindamo di Basel Mission mongontok dau sid Kalimantan bahagi dit ongopiumpungan do Daya. Antad 1922 varo gama do Basel Mission sid Kalimantan Selatan. Nemot-po dot alaid-laid varo't ongopiumpungan, minangahatul-no it ongomisionari di kengkakatan do Gereja Evangelis Dayak om i kapamarakatan dit ongopandita Daya dit insan-ogi abarakatan (1934). Ong i kinotimpunan di mission sid Kalimantan, ino-no i toun 1834, i harati, hatu toun antad kinotimpunan do mission sid Kalimantan om varo-ogi pandita Daya om iri-ogi gereja Kalimantan Evangelis (GKE).

LIANG KO 7: PONONG SID OIKUMENE.

Ong onsizon i kobuatano do sompomogunan hiza dit abad ko-19, ogumu it ongopomogunan do Europa nokengkakat kondiri dot minsanko it ongoulion dit ongopomogunan di kakali sid tinaud do Roman Katolik, amu tantu hinumarap-po ko sinumuhut-po di hoturan di Pope, inot ulion do Gereja RC, bai i hal dot ugama kakali antad sid Rom ot ataud om ohoturani. Topot i sokovia i hal do duniawi, kondiri-kondiri dit ongoraja mangahatul, kakali retanko ioti raja ko ulion antad sid kovosihan do Kinoringan. Ombo i pomogunan dot it ulion nga Protestant, obebas banal sumuhut di kobuatano do mokilulundu sid ekonomi om i gama midadagang. Miaamung kavi it ongopomogunan do Europa do mogihim om manansanganu dit ongopomogunan sid Asia om Afrika dot aso kiroon dot it ongopomogunan om ongotana sori nga dang bansa vokon. Ino gama di iadino, kakali andaman dioti i sinuhu di Pope diri dot it ongokuasa sid Eropa kikuasa sid sompomogunan do posuvang dit ongobansa om it ongopomogunan dioti sid kuasa di Kristus, ka, dot ong otopot, ioti o minomorinta dit ongopomogunan di mad rinampasi. Aso nokiro dioti dot ino gamaon dioti do iadino o vaza manakau do pomogunan, gam retanko dioti, antad sid kenginan do Kinoringan mongumbasih ioti om manaud di pomogunan di retanko koloni. Iadino it Ongobritish sid pomogunan do Sabah om Sarawak sampai Semenanjung piningonuvani dioti. Ong varo gama dioti ongoporinta do mamaju kapamarasan, baiko i komojuan bahagi di kojukuran do barang, nizuw, ko kopi ko kolopioi ko tee o kiniro dioti bahagi

mangatod sid Barat. Minsanko i gama mananom do dadah sid Koling om Siam sampai Burma, nga vaza do mangaganti do perak sid Kina.

Na it ongororija Protestant sid Eropa om USA ensanan nakakaput sid ongoulion, i Kaisar ko raja om President. Iti-no o sabap, okudik nga aso kiroon dit ongororija kananganko i kahabaran dit Injil sid ongomogunan vokon ko kumiupakat dit ongokristian sid pomogunan vokon do pengkakat om mizo do gorija. I sokoviai it ongororija minamakai di ngaran di bansa om pomogunan bahagi di dau do ngaran do iadko i pomogunan manansanganu di gorija. Suntuan, Gereja Anglikan, gereja Belanda, Gereja Wuerttemberg, it iso suku sid Germani.

Bai it a-ko piro it ulun di nakamung-no sid ongosyarikat do Mission, ulun do kampong om it ongomangahatul dit ongopertubuhan Kitab minomurimon dot a-kopionong ino kosodirizan dit ongororija Daerah. Sabap ong otopot, bai iso o Kristus om iso o Kinoringan. Alaid-nopo miniupakat om minongitung ioti do katagan sampai minangahatul do kopiobpinezan do Kristian sompomogunan.

a) Varo i ngaran: WORLD CHRISTIAN ALLIANCE ko sompuruvan do Kristian sompomogunan. I kinembulazan dino toun 1846 sid London. Ino-no i syarat mamung sino, Isai-nopo i kusai di banalko atapat Kristian do mangasip dot i Yesus o Minananggung dau, kadapat mamung sid kesaan dit ongoobpinai di Kristus. Ong ongondou amu-po kaamung. Ino kesaan dino dit insan-ogi, amu minongitung dit ongovolit om ongohoturan dit ongomogunan, ong sid hoturan, nga kakali varo gama monodiri om pokihi, ino-no it ongondou, antawa hiza do rumpak, nga varo kopitongkizadan vagu.

b) Amu songkuro minikunsi-no it ongorombongan do Belia i retanko YMCA, Young Men's Christian Association ko Pinumpugan dit Ongobelia Kusai do Kristian. I kinengkakatan di kesaan dit ongobelia Protestant sompomogunan dit ajadi do World YMCA, nga sid Paris ontok di toun 1848. Ino-no i tajuk di kososizan dioti diri:

I YMCA ino-no i rombongan dit ongosolompok vagu do kusai Kristian di humarap om mangasip dot i Yesus o Minananggung di monuhu di kinoruhangan sampai it ongosuni vagu do pasasi di ngaran dau sid tanga do razat.

Antad i hiza diri minonoruvang i YMCA sid ogumu it ongomogunan sampai pengkakat dit ongokalab sid ongobandar, vaza monginjil sid ongosuni vagu di sid ongobandar. Tu ong okonko sid saralom dot ongekob it ongosolompok vagu, oruhai dot atarik sid karaatan. Topot ong mozo do kalab di YMCA, kadapat it ongumulok do mongining di Habal do Kovosihan.

c) Iri-ogi miniaamung it ongorombongan sompomogunan di minonginjil sid ongouniversiti, tu it Ongosolompok vagu di sumikul sid Universiti, nga ulun dit amu otunda dit ongekob dau sampai ogumu o pensubaan sid Universiti. I mula-mula bai sid toriso-iso o universiti di varo rombongan di Kristian di sumikul o miniupakat do pahabal dit Injil sid ongokoruhang dot alaid-nopo, miniupakat sid ongouniversiti dot iso pomogunan, om iri-ogi sid ongouniversiti do sompomogunan, supaya varo sompuruvan dit Ongokristian di sumikul ponong sid kosurutan di Habal do Kovosihan sid Universiti. Iri-ogi jinumadi i retanko Student Christian Movement ko SCM. 1896 om nokosino i rombongan dino.

Na i President dioti, ino-no i John Mott, ulun dot USA, banalko agazo o ginavo bahagi di kosurutan di Habal do Kovosihan, okonko bai sid universiti om sid ongosuni vagu. Tinumongkop iosido mamananu sid ongomogunan do memot di kosurutan dit Ongomission. Ino-no rontob, i hiza diri kakali it ongomission di tasantanid-tanid ot inantadon om denominasi, asarok okonko miupakat monginjil, gam milawan monginjil sampai mad magapon sid rambat om sid pukot dit mission vokon do misosolod-solod dot ongoulun, supaya i dau do piumpugan sumurut om kumambang. Vokon-no ong oholian o gama mongizap dot ombo o mission nakadapat di kogumuai dot ulun vagu di mamung do Kristian.

I toun 1905 minamarakat i Gereja Anglikan sid Koling it iso-ogi ulun Koling do Bishop, i ngaran dau i Azariah. Manjadi kodung kihak i Bishop Azariah, minamalang iosido di dau do kosusao. Boros dau, Ong mongingut-okou dot ulun Koling sumuhut di Yesus, asarok varo timpa dot ulun dot, Ombo i Yesus o boroson-nu di mongingut dohon, ka, om, Ombo-ka i Yesus ot suhuton-ku dara, ka, tu mad ogumu it

Ongoyesus. Varo Yesus dot Anglikan, varo dang Katolik, varo-no dang Baptist om Methodist om ogumu-po vokon. Ombo o Yesus ot otopotko i Yesus, ka dit ambat dot ulun. Manjadi, mad nabahagi-no i Yesus dot amu alanta sid ongoulun dot isai i Yesus. Ino kososizan di tasantanid-tanid o denominasi o potuvong om posusut di Yesus sampai a-emot dot ulun. Sabap ino, i vaza dit ongomission manarang di Habal do Kovosihan ot kohigangan keso dot a-kadapat it ongoulun do labus minsamung om sumuhut di Yesus, ka di Azariah. Iti-no o sabap minindamo i Bishop Azariah dot varo kotibangan dit ongomission miumpug om miupakat di kosurutan di Habal do Kovosihan sid gama mitatabang om miaamung it ongomission. Nening-po di John Mott i iadino, minongumba iosido do miting dit ongomission sompomogunan, supaya varo kopiupakatan di vazaan do mission hiza dit abad ko-20.

I. Miting keso dit Ongomission sompomogunan /First Missionary Council sid Edinburgh in Scotland 1910

I miting diri nokosunu i toun 1910 sid Edinburgh, Scotland. Labaan do 1500 ot ongomisionari om ongopandita miniuumpug sino. Dot i kogumuai ulun dot Europa om Amerika. Bai tolu-no ot ongopandita dit antad sid Kina, Koling om Afrika. Na apatong o boros dioti tolu ulun dino sid gama manarang dit ongokalamahan om ongokodolikadan dit ongomission om kuran it atag o gama pobeabas dit ongogorija di natanom-no sid ongopomogunan om miizo it ongogorija om ongomission sid gama posurut di Habal do Kovosihan ponong sid iso o Gorija di Kristus, okonko i dau om dau dot piumpugan om denominasi. Na varo cadangan di miting diri dot, A-milo-milo sid saralom dot iso o generasi pazazad di Habal do Kovosihan sid ensanan i riniba dot iso pomogunan nga aso't alazan, ka di John Mott. Na minongolumbatos-no sokovia i noumpug sino sampai minangakun dot ino-no o panangan di sokovia i mission dot ulun Kristian.

Iri-ogi miniupakat ioti do pengkakat do Kunsil Mission Diantara Bansa, ino-no it International Council of Mission dot ino kunsil dino mongodim vagu do miting hiza dit a-ko piro toun katalib.

Kasalaan-nopo, minsanko iadino atapat ot piupakatan diri, kodung nokembulai i Rumpak Dunia kensan, enizo it ongomission om it ongogorija sinumuhut di hoturan di dau do pomogunan, okonko it upakat do miizo sid gama pazazad di Habal do Kovosihan. Ong sid ongokoloni do German, otorungku it ongomisionari do British, ko sid ongokoloni do British, it ongogerman ot atangkap sampai otorungku-no, iadko i Pandita Schuele om Fritz sid Sabah, i minangahatul di Gereja Basel Fui sid Sabah diri. Dot otoliban-po i rumpak diri, miniupakat i Mission dot Anglikan (SPG) om i Porinta do British dot a-koho do miguli vagu it ongomissionari do German sid Sabah om Kudat. I harati, i rumpak dit ongobansa do Europa minongunang dit upakat sid Edinburgh. Minimbulai sino dot i raha do German ko British kakali lobipo alanut mantadko i raha di Yesus di popezo dit ongoulun Kristian. Kakali it Ongokristian lobipo sumuhut di hoturan di bansa dau mantadko i gorija di Kristus di mad Bansa do Kinoringan (iadko i boros di Petrus sid 1. Petrus 2,9-10).

Sinod miting sid Edinburgh varo-po upakat dot okonko bai i hal do mission atag do miupakat sid pialatan dit ongokristian dit ongobansa, inoi nga atag do mongitung-po do nunu banal it onsi di kosipan dot ulun Kristian om kuran it atag o gama dit ulun Kristian posurut di kabanaran do Kinoringan sid sompomogunan. Tu atalahas-no dot amu enizo it ongokosipan dit ongoulun Kristian om it ongogorija.

Pengkaa dino nakaharati ioti antad sid kososizan dit ongoulun antad sid Kina, Koling om Afrika, dot amu atag dot it ongobansa do Europa mangaladtak om mangakan dit ongobansa vokon sid gama mangavi dit ongobalanja dit ongobansa vokon om monguripon dit ongoulun sino sampai araat o vaza momuhorogo di barang dioti om mongojuval dit ongobarang dot Eropa om Amerika dot asavat o horogo. Iti-no sabap varo cadangan do varo-po duvo kunsil om umpug vagu, it iso i monodiri di kosipan om i hoturan dit ongogorija (Faith and Order) om i koduvo, i miupakat om monodiri i vaza posondot di kosipan do Kristian sid gama mongusaha di kosipan om posurut di kabanaran om samod do Kinoringan.

Manjadi i toun 1927 om miniting-ogi i rombongan Faith and Order sid Lausanne om miniupakat do monodiri dit ongokosipan, supaya alanta, ombo i kosipan banal om ombo bai koundango om hoturan

dit okonko kiharati sid kosipan, kokiraa, kuran i kiroon dit ongorija kananganko i kopomodsuan, i poginakanan di Tuhan Yesus (retanko Eukaristia) om i vaza mangahatul di Goriya (Ministry). Inot upakat diri suvai nolumbatasan hiza di toun 1982 sid Lima. Iri-ogi varo panarangan dot sid sokoviai it ongorija mad aso tantu o pitonidan om sangkut dot amu mizo it ongorija. I sokoviai it ongotonidan mad bai tradisi om usuran, okonko hal do kosipan, ka di kinapangan sid Lima.

II. I koduvo miting di Mission sompomogunan sid Yerusalim 1928

I toun 1928 varo miting di rombongan koduvo, ino-no, Mongusaha di kosipan, sid Oxford om i kotolu it umpug, kananganko Mission, miniumpug sid Yerusalim 1928. Ino-no i retanko *Second World Conference bahagi do Mission*. I tajuk di miting sid Yerusalim, ino-no, I kapangahabaran di Habal do Kovosihan sid ongotomogunan dit okonko Kristian. Sid miting diri kakali varo pongitungan dioti do varo't ongotomogunan di Kristian om varo-po dit okonko Kristian. Kakali amu-po kaharati ioti dot ong otopot, iso pomogunan nga aso di nokokristian, tu ikid generasi osusa do kumoristian mangasip, tu i hal do goriya om Kristian okonko iadko tungkusan di mituturun-turun sid ongotohudi. Kodung varo kumanis sid iso't onkob, mitutungkus-tungkus it anganak, muaki, muaki lombus di kumanis dino. Ong i kosipan okonko iadino. Suvai ipat-ipat i generasi mangasip kondiri om tumatap kondiri sid tinoguvangan do Kinoringan om miuma-ogi.

Ino hiza diri amu-po kaharati it Ongokristian sid Europa om Amerika Utara dot i dioti do pomogunan, nga pomogunan om razat dot ulun di tilabus ko nakalabus-no do Kristian sampai i rogon do Nationalism om Racism banalko minongogorot do monguasa dit ongotobansa. Nationalism ino-no i kosipan sid dau do bansa retanko bai i bansa kondiri o randavi sid pialatan dit ongotobansa vokon sampai iseso harapan sid bansa dau dot amu monodiri, araat avantang, sukul dau do bansa: right or wrong, my country, ka di British. Antawa Racism, ino-no o harati, varo pitonidan sid ongotobansa. Ino-no i tumorindak dit ongotobansa, it ulun i retanko Orang puteh (minsanko amu opurak i kulit dioti), ka. Vokon-no ong varo pongoretan dot, i turunan di retanko Kaukasian (ulun Eropa om Tirisan Bramani sid Koling), o bansa randavi, nga banalko pokihi dit ongotobansa vokon, retanko okonko riniba banal ioti. Vokon-no ong ino racism antad sid vaza mangaharati di Kitab retanko it anganak om muaki di Ham, it anak di Noah, nga bai uripon dit ongotobansa sampai it anganak di Ham, nga ulun dot etom sid Afrika, ka. Ong otopot ino kosumbungo dino atandas karaatan om vaza monongkudau om mongindaraat dit ulun vokon.

Na ino hiza sid Yerusalim diri varo dara upakat kananganko ino duvo panakit do riniba om Kristian dino, nga aso kapangan dioti diri, do bai limo toun antad diri, it Ulion do Jermani, i Hitler tinumimpun-no do momunso dara di bansa do Yahudi sampai minonuhu do pogaas do labaan dot onom juta ot ulun Yahudi. Ong kopiupakat dara ioti ongokristian sid Yerusalim di hal dino, oruhai kaharati it ongokristian sid Jermani ombo it a-konong sid hoturan di Hitler sampai mingkakat dara sumaap di Hitler.

Sid hal dino kembulai do kuran dara ong miupakat banal it ongokristian sompomogunan di katagan do pomogunan sid gama mitatabang om mioonsug mangatag ombo it amu atag dot amu tumurut di hoturan do porinta, ong varo hoturan di sumaap di pinonuhuan do Kinoringan. Topot antad di miting sid Yerusalim diri, ogumu it ongomission minongitung dot aso tugas tanid mantadko pazazad di Habal do kovosihan dot amu osusa do monodiri dit ongotohutan dit ongotobansa om ongotoprinta. Kakali amu-po kaharati it ongomission om Kristian dot i Habal do Kovosihan nga Habal di mongoronggal ko potuvarig dit ongotohutan dit araat sampai mongonsug do posurut di kabanaran do Kinoringan.

III. I kotolu miting kananganko i Mission Sompomogunan/ Conference on World Mission of the International Council of Mission sid Tambaram/Koling 1938

Antad di rumpak keso varo kosimbanan do Teologia sid Europa, tu varo a-ko piro ot ongoulun di Teologia di minomoros dot otoliban i hiza di retanko i Europa nga nokokristian. Oholian pirumpak dit ongotobansa do Eropa sampai navi-no it ongohopod om limo juta ot ulun minatai, sojal om vokon-po. Kagi, ensanan i pomogunan dot agazo, ino-no Russia nokosuvang sid Hoturan do Kommunism, ino Ideologi di pakaso do Kinoringan, i retanko mongimbulai di surga sitid pomogunan. Ong okonko

araat laid i hoturan di Kaisar do Russia om i Goriya Orthodox, di sompi nokoponguripon di razat do Russia, tantu a-kengkakat i hoturan do Kommunism sid Russia.

Na i Teologia vagu di kembulai di hiza diri minonimban di pongitungan dit a-ko piro ongoulun Kristian, tu nakaharati-no ioti dot i Kosipan do Kristian okonko bai hal di mangahatul di korohanian dot ulun, inoi nga mongimvagu-po dit ensanan i kavazao dot ulun Kristian, i gama om i kobuatano dau. Iti-no o sabap, retanko i Teologia vagu dino, Teologia di kavazao, tu i vaza momoros om manarang do Kinoringan ponong sid koponimbanan di kavazao dot ulun. I Kinoringan monguasa om ozi dit ulun dot ensanan, guvas om ginavo, gama om bahazan, ka. Ino teologia minonuduk di pitonidan di hoturan di karajaan do Kinoringan, i sid Habal do Kovosihan om it ongohoturan dit ongorinta di mongunang di hoturan do Kinoringan (minsanko retan dioti ko, ioti o wakil do Kinoringan om i pangkat dau, nga antad sid kovosihan do Kinoringan). Sampai i hiza diri, varo tudukan dit ongorija Daerah om Wilaya dot it ongoraja om ulion do pomogunan momorinta, isuhut di kovosihan do Kinoringan. Kodung kovosihan om hukum di raja ko ulion, retanko kovosihan om hukum do Kinoringan.

Na amu oruhai pazazad di teologia vagu om monimban di teologia om koundango laid di nakakapit sid teologia dino, do lobi-po humarap sid bansa om suku bansa dau mantadko sid piniizaan dit ongoulun Kristian sompomogunan. I harati, it ongoulun lobipo sinumuhut di hoturan di Kaisar om raja ko i suhu do Kinoringan dit antad sid Habal do Kovosihan. Iti-no i kinobungahan dit Ongokristian do Europa sumuhut dit ongoraja sampai mamung sid gama mamatai dit ongoulun Kristian di bansa vokon.

Na sid Miting kotolu sid Tambaram 1938, varo nosodia it iso buuk di minanarang di Tugas do Mission, isuhut di Teologia vagu, ino-no i tajuk di buuk dino: **I Habal do Kovosihan dit Ongokristian sid tanga dit ongorazat dit okonko Kristian.** Manjadi aso boros sid Tambaram dot, mad oruhai ko oduruk opongo i tugas do pazazad di Habal do Kovosihan, gam hinumongkob i miting diri do kodung nemot-po i kobuatano do pomogunan do Koling. Minsanko labaan do duvo natus toun varo mission sid Koling (om varo-no laid mission di Rasul Thomas antad kinotimpunan do varo goriya,) kakali bai 2% ot ongoulun do Koling nokosuhut di Yesus, dot inot okudik o Kristian, nabahagi-hagi-no sid labaan do 20 ot ongorija om denominasi.

Varo-no kagi kopurimanan dot oduruk-no om varo korunggalan vagu di rumpak do sompomogunan kenduvo. Ogumu it ongovaza laid sid gama pazazad di Habal do Kovosihan dot ulun do Eropa pazazad, nga natabanan. Topot it ongomisionari kakali amu-po osodia do pavaliu di tugas do mangahatul om mangagazad dit ongopiumpugan vagu om it ongorija di mingkakat-ogi sid palad dit ongokristian pasok. Suvai hiza di rumpak koduvo dino, (1939-1945) ong kodungko nosunsub-no it ongomisionari sid ogumu it ongopomogunan, osusa it ongopiumpugan di mad usan-usan ko bituanon, do mangahatul dit ongopiumpugan om pengkakat do goriya Daerah om mamalanja di kondiri sampai tumimpun kumavid di Habal do Kovosihan sid gama monginjil. Sampai i hiza di sid kosusaan diri, kakali it ongoulun do luar kinumavid di sokoviai it ongohoturan.

Tanid mantadko ino, i Komitee kananganko i Kosipan om Hoturan do goriya (i nokengkakat sid Lausanne 1927 dot i tugas dioti, monodiri do kuran i kosipan dit ongorija kopionong ko mitanid om kuran kadapat mizo sid kosipan om hoturan), nokomiting-no vagu sid Oxford 1937, nga a-kemot do kosurutan di gama. Tu it ongorija do Eropa kakali oholian kopitombil sid hoturan di dau do porinta. Minsanko varo dara upakat do mongumba ponong sid kesaan do Kunsil dit Ongorija Sompomogunan, nga amu nosunan dioti i hiza diri. Sabap amu songkuro antad diri nokorikot i Rumpak koduvo. Hiza di Rumpak diri, it ongorija sid Europa minomongo do mamarakat dit ongopakakas do rumpak. Ino pakakas sid palad dot ulun Kristian minamatai do 55 Juta ot ulun sid rumpak dino.

Otoliban i hiza di banalko osusa, it ongonabakal ponong sid kesaan dit ongorija minisasamung-no dit ongoulion di Goriya sid Germani, tu miupakat di kosurutan dit upakat laid diri. Sid Stuttgart o pinisosomungan ontok dit Oktober 1945 sampai varo kopongokunan di kasalaan dit Ongorija

Germani, gima a-nakasaap i gorija dit araat o hoturan di Hitler. Tu i gorija diri om it ongokristian kopigavul sid ongokaraatan di rumpak diri. Sid miting diri varo't upakat do pengkakat koduruk di Sompuruvan dit Ongogorija Sompomogunan, ino-no i retanko World Council of Churches (WCC) ko I Kunsil Oikumene Sompomogunan.

Assembly Keso di WCC sid Amsterdam 1948

I kengkakatan di WCC sid Amsterdam, Belanda pengkaa dino. It ongowakil dit 148 ot ongogorija miniumpug dot i tajuk di miting diri: I hoturan do Kinoringan bahagi di riniba dit banalko amu ahatul o hoturan (ko **i Hoturan do Kinoringan sid tanga di korunggalan dit ongobansa**). I Konferenz dino minomili dit onom ot Ulion ko President om i Setiausaha, ino-no i Vissert Hooft, ulun do Belanda dit alaid-no kamung sid gama ponong sid kesaan dot Oikumene. Varo-po upakat dot it ongowakil dit ongogorija, toronom ko toturu-turu toun miuumpug do mangahatul dit ongoliang di WCC. Sid pialatan di turu toun, varo duvo o komiti di tumabang di Setiausaha, ino-no i EXKO di toronom-onom vulan miuumpug om i Komitee Umum (Central Committee) di miuumpug monikid toun insani do mogkovosihan om monunda di gama di Setiausaha om it ongokoruhang dau.

Na minongolumbatos-no i miting diri dot iadino ot kinonsizan di kosipan di WCC,

I Sompuruvan dit ongogorija Sompomogunan, ino-no i piniizaan dit ongogorija di sumasi dot i Tuhan Yesus Kristus o Kinoringan om Minananggung, miaamung sid gama posurut di tugas do mongohormat di Kinoringan, isuhut di tudukan di Kitab dot Osusi.

Assembly koduvo sid Evanston USA 1954

I tajuk diri, **I Kristus o harapan di sompomogunan**. Sid konferenz dino ahatul-no do nunu banal o harati ong Kristian om i vaza pazazad di Habal do Kovosihan ponong sid ulun labus om ponong sid ulun di bai songkobinarasan-po do Kristian, supaya oposik ioti.

Assembly kotolu sid New Delhi Koling 1961: I Kristus o panganavau di pomogunan.

Sid miting sid New Delhi, it ongogorija dot Orthodox minamung sid WCC om i WCC om i Kunsil do Mission diantara Bangsa nakamung-no, supaya i tugas do Mission, nga nokosuvang sid Agenda do WCC om ajadi dot iso segi di Tugas do WCC.

Ino kunsil do Mission nokomiting laid di kodung notoliban i rumpak Dunia sid Toronto, Kanada 1947 sampai miniupakat do kuran it atag o gama momongo di Mission sid ongopomogunan do varo vagu it ongogorija, iadko sid Afrika om Asia, supaya engkod i kobuatano dot it ongomisionari mad ama om idi, ko molohing dit ongogorija vagu, om it ongogorija vagu bai anganak dit ongomission. Nolumbatos noboros sino dot i hiza dot it Ongomission mangahatul dit ongogorija vagu, nga nakatalib-no. Suvai it ongogorija om it ongomission mikunsi mangahatul do iadko miobpinai ko partner, okonko iadko molohing om anganak. Tu suvai iadino om sumuhut banal di kenginan do Kinoringan. I tajuk diri: Partnership in Obedience (**miobpinai tokou sid gama sumuhut di kenginan do Kinoringan**, ka).

Nokomiting-no vagu i kunsil do Mission sompomogunan sid Germani 1952 dot i tajuk diri, **It agazo o tugas tokou polombus di Mission do Kinoringan, tu ong otopot, i Mission, nga gama do Kinoringan: MISSIO DEI.**

Iri-ogi sid miting vagu sid Ghana 1957 om nolumbatos-ogi miupakat do kopiamung sid WCC sid Assembly vagu sid New Delhi 1961.

Kodung nokopiamung i duvo it pertubuhan dino, mioolot-olot varo miting di WCC om i segi World Mission. Varo miting sid Mexiko 1963. i tajuk diri, I Kahabaran di Injil suvai sid sokoviai it ongopomogunan, sid onom o kontinent do pomogunan, sabap i Habal do Kovosihan om i nokokristian it ulun okonko hal do mitutungkus-tungkus iadko barang ko valai ko tana. Suvai ipat-ipat i generasi vagu kening om karamit om kosuhut di kodim di Yesus om miuma-ogi. Iti-no o sabap dot i Mission ot agazo o tugas sid sokoviai it ongogorija om ongopomogunan, okonko bai ponong sid Afrika ko Asia.

I GORIJA ORTHODOX di nakatanid antad sid Gorija Rom hiza di toun 1054, nakamung-no sid WCC i toun 1961, i hiza di Assembly sid New Delhi.

1. I ngaran Orthodox dino, ino-no o harati: i pongitungan dit otulid om arantang om iri-ogi i kosipan dit abanal. Antad dino, isai-nopo i mongitung dot iosido ot abanal, retanko orthodox, tu i kiroon dit ulun, iosido ot abanal om atatap sid hoturan di nunu-nopo. Ong sid gorija, napakai-no dit ongorija ponong sid Timur (antad sid Rom okiroon). Rontob-nopo, antad kotimpunaan do varo gorija Orthodox, nabahagi-no laid i hoturan sid Orthodox Timor om Orthodox Oriental. Ino-no i kinopitongkizadan keso dioti, Sid kunsil Oikumene sid Efesus 431 om sid Kalkedon 451, varo-no laid i gorija dit amu tinumorima di kinapangaan di duvo i kunsil diri. Ino-no o sabap dit amu minangakun ioti, Keso, varo hal do teologia kananganko i Yesus Kristus do Kinoringan iosido, om varo-po, tu i Kaisar nakagavul sid sinoda om kunsil dino sampai minongogorot di kinapangaan om kinolumbatasan isuhut di dau do kenginan. Ioti diri, tantu amu minangakun dot i porinta o momorinta-po di gorija. Ino Kaisar diri, nga Kaisar sid Konstantinople.

Iri-ogi toun 1054 om ompus banal i kopitotongkizadan gam i gorija sid Konstantinople minongolupu di Pope sid Rom om i Pope sid Rom minongolupu dioti sid Timor, retanko amu nokonong i kosipan dioti. Iti-no o sabap niada ioti dot okon-noko-po Kristian ioti, ka. Ong otopot, nabahagi-no laid i gorija, isuhut di kinobohogizan di karajaan do Rom sid Rom Latino (Barat) om Rom Byzanz sid Konstantinople, i gorija om porinta di mamakai di boros Yunani.

Ino-no i sabap di kopitotongkizadan dioti duvo bahagi do gorija: I Pope sid Rom minongogorot manarang dot bai i dau do vaza manafsir di Kitab ot nokonong. Na varo panarangan dau, kananganko i Kosipan dot ulun Kristian (i retanko APOSTOLIKUM): i Sundu dot Osusi, ino buatan kotolu do Kinoringan mimbulai antad sid Kinoringan it Ama om it Anak. Topot i gorija sid Timur minangamu dot i Sundu antadko it Ama om it Anak do Kinoringan, bai antad sid Kinoringan it Ama oimbulai i Sundu dot Osusi, ka dioti. Manjadi antad di kinopigogogutan kananganko i tolu linsou o boros OM IT ANAK o nabahagi-no i gorija diri. Kagi a-koho i Gorija Orthodox dot it ulion sid Rom, ino-no i Pope ot ulion di songgorija sompomogunan, retanko iosido paratu di kovosihan om hukum bahagi ensanan it ongorija om ongopiumpungan dot ulun Kristian.

Antad diri tinumiim i Pope dot okonko impiro piro mongohukum dioti sampai minonuhu-po do sojal do popisuhut sid gama mongorumpak di Konstantinople om mongorongoi di panambayangan sid Konstantinople.

Na i kosusaan di Gorija Orthodox amu miabal di Gorija sid Barat, tu i pensubaan om kosusaan okonko antad sid saralom om i gama rumaag i gorija kondiri do mad mobuk-robuki, inoi nga i kosusaan, Nosoruvangan-no di Silam sid ongopomogunan dot okonko enizo o gama monoruvang. I tinumimpun, tu banalko opogos it ongorazat sid Sur om Palistina di hoturan do koponukazan di Kaisar sid Konstantinople, minongingut ioti dit ongoulion do Silam do mangalabus dioti antas sid hoturan do Byzanz. Iri-ogi sinumurut i hoturan do Silam sampai minonoruvang-po sid Asia dot opodok om sid Afrika Utara sampai nokorikot sid Konstantinople i toun 1453 om pinosiliu di gorija i retanko Hagia Sofia (i Gorija dit keloo do kosusian) do Masjid.

It onsi di Kosipan di gorija Orthodox: I Kristus, nga Kinoringan, jinumadi do riniba dot osibak banal iosido, nga sid kinapatazan dau minonimbaru iosido di vinangun. It okudik o tihi di raha di Yesus o minonimban di sokoviai i vinangun, ka. Varo kopoulosan vagu, isuhut di Galatia 3,27, sampai ipat-ipat it ulun Kristian nga tanggung jawab di kinourugan.

Na i kosopulan okonko bai kotindalan antad sid karaatan om kasalaan, inoi nga pajadi dit ulun dot pakaanak do Kinoringan, iadko nosingkapu do Kinoringan (Galatia 4,6 om Rom 8,15). >I harati, nokensomok i riniba sid Kinoringan (Zabur 8) do tumalib dit ongomalaikat. Sabap ino, it ulun Kristian kihormat iadko Kinoringan om iosido valai om inintoronon di Sundu dot Osusi(1. Kor. 6,19), nga tumabang mananggung di vinangun ponong sid kopudan di vinangun (Yahya 6,51). Iti-no o sabap dot i gorija okonko organisasi duniawi, inoi nga piniizaan dit ulun dit osusi (1. Petrus 2,5 om 1. Kor. 12,-13)

Na i Kristus om i Sundu dot Osusi, ino-no i duvo palad do Kinoringan it Ama. Ensanan i kobuatano dot ulun Kristian nga persembaan bahagi sid Kinoringan, okonko bai i sid rinuvang do

panambayangan it ulun. Sabap ino i gama monginjil ko posurut do mission do Kinoringan, okonko sid monginjil koubasan tokou, inoi nga sid sokoviai i kobuatano om gamaon dot ulun Kristian ohormatan i Kinoringan om ososizan sid ongoulun vokon.

Na ipat-ipat i piumpugan om gorija Daerah varo kuasa om hoturan kondiri. Topot nakamung ioti sid hoturan dit iso o bishop i sid Konstantinople.

Sabap i sokoviai i gama sumambayang om manambayang o gama di pandita, it ongoulun Kristian koubasan bai mamung om memot om mongining. I Kuaya dit ongopandita mindolongoi om mamasa di Kitab om monutud dit ongorilin om kovongio, minta dua dot it ongoulun bai manangameni. Sabap ino miama do bai insan sontoun gumorija, tu i gama sumasi di Kristus om mongohormat, nga sid gama om kavazao do suvab-suvab, ka. Minsanko iadino i kobuatano di Gorija Orthodox, vokon sid tanga do Silam om it ongopomogunan dot i Silam o momorinta ko varo hoturan do Kommunist, iadko sid Russian antad toun 1917 sampai 1991, minopud i Gorija Orthodox, gam varo't ulun di mamung sid gorija dino. Ino-no i kososizan dioti:

I Kristus o koposizan dit ensanan i vinangun. Na i Gorija di Kristus okonko organisasi ko institusi di dang riniba, inoi nga koposizan om vangun vagu sid saralom di Kristus sampai i gorija kumuruhang di Kristus dot i Sundu dot Osusi monulung om pemumui di gorija sid kopikoruhangan dino.

Na i kogumuai dit ongogorija Orthodox nakamung sid WCC sampai banalko ahatul o gama dioti tumabang om posurut di kopiupakatan om kopiobpinezan. Bai iso o kakali osusa. Ong varo Eukarist, ino-no mongohormat di poginakanan di Tuhan Yesus hiza di komiting it ongowakil dit ongogorija ko sid pusat sid Geneva, amu mamung it onkokristian Orthodox sid poginakanan dino, ong ohoturan ino do pandita dit okonko Orthodox. Ong Pandita dot Orthodox o mangahatul di poginakanan di Tuhan Yesus, a-koho ioti do varo't ulun Kristian dit okonko Orthodox do mamung sid poginakanan dino. Suvai opongo ioti mongohormat di poginakanan om bohogizon-po dioti it ongotopot do roti sid ongoulun Kristian vokon.

Assembly kaapat sid Uppsala Sweden 1968: Tajuk: Boros di Kristus, Mongimvagu-oku di sokoviai.

Ino hiza minomurimon it ongowakil dit ongogorija do banalko agazo o kokuguzan sid tanga do riniba om tanga do gorija. Nakalabus dara it kogumuai it ongobansa antad sid hoturan do kolonial dit ongorinta do Europa (British, Fransis, Belanda, Belgium om Spanyol (amu-po ong Portugal), nga kakali amu kopionong i gama miupakat om midagang. Banal-ko agazo o pialatan sid ongopomogunan di namaju, tu antad sid gama momorinta om mangaladtak om monguripon dit ongokoloni om it ongoindustri. Topot ong it ongopomogunan di kalabus antad sid hoturan do kolonial, banalko mosikim. Aso-po hoturan tantu om amu-po miama it ongokeloo dit ulun di mangahatul sampai aso-po komojuan dioti. Norugizan it ongopomogunan dino sid saralom do hinapadan om hinotusan do toun, dot i hoturan laid, nga norungoi-no. Iri-ogi it ongoekonomi naraag, tu kodung nakalabus sid kolonial, mad aso horogo it ongobarang di momongojuval, iadko nizuw, kopi, koko, umau kelapa sawit, tii om i iadino, ko tumbaga, tima, ko kazang.

Na miniupakat it ongowakil do manancadang sid ongogorija dot omogot, ong it ongogorija mamahagi di dau do balanja do patanid i 5% di dau do budget bahagi dit ongogorija vokon. I WCC o mamahagi di kotulungan dino, dot i Rombongan: Kotulungan bahagi di komojuan dit ongogorija o mangahatul dinot ongoalanja dino.

Sid Bangkok, Thailand miniumpug-no vagu i Konferenz do Mission Sompomogunan di toun 1973 dot i tajuk: *I Kristus o kosopulan di riniba*, ka. Na sid upakat diri miningkakat it ongowakil dot Afrika sampai minindamo do varo kosimbanan di vaza mongomission sompomogunan. Tu sampai i hiza diri, i sokoviai i mission nga minimulai sid Barat sampai nunu-nopo i gama antad sid Barat, retanko Mission. Topot i sokoviai i gama dit ongogorija posurut di kahabaran dit Injil, mad oolingan. Iti-no o sabap, ka dioti, Bianco o kotimpunan do Mission sompomogunan om nengkod-no i mission dit antad sid Barat. Okonko West-Mission, inoi nga World Mission, ka. Iti-no suvai mikunsi banal it ongogorija sompomogunan sid gama posurut di Habal do Kovosihan om i kosopulan di riniba.

Rontob-nopo, varo a-ko piro ongokristian om rombongan do mission dit amu minangakun do iadino. A-koho ioti dot ulun vokon gumavul sid dioti do hoturan om gamaon. Ioti kakali engin kumavid di hoturan do Mission dot a-koho ioti dot it ongororija gumavul sid dioti do hoturan. Iti-no o sabap do tumanid it a-ko piro ot ongorombongan sampai minongodim di dau do miting om i dau dot upakat. I miting dioti dit insani, sid Lausanne 1974 dot i tajuk dioti: Sokovia i riniba a-milo-milo mongining di boros do Kinoringan, ka. Na varo't onsug dit a-ko piro ot ulun dot i miting dino miupakat do Kesaan di sumaap di WCC, retanko i WCC bai mangahatul di Duniawi sampai nolingan i Rohani. Topot inot umba dioti dino, amu kosunu, gam it upakat om kolumbatasan diri, miabal dit upakat laid do WCC dit hopod toun katalib sid Mexiko om sid New Delhi om varo-po kopongokunan dot oholian o gama posurut di Rohani sampai noolingan i kopudan dit ongopiumpungan i kakali sid tanga do riniba om it ogumu ot ulun di banalko mosikim antad sid korusuko dit ongobansa do Barat.

Assembly kolimo sid Nairobi, Kenya 1975: Thema I Kristus o pobeas om popizo.

ko: I Yesus Kristus membebaskan dan mempersatukan. Ontok di miting diri, minamung i PCS sid WCC dot it ulion Manjil Madalag nakawakil sid Nairobi. Varo nohorotizan sid miting diri, kananganko i vaza minsamung om mongitung dit ongoulun vokon, i sid gorija sompomogunan om it ongoulun di mozo dit ongougama vokon: okonko antad sid savat o gama minsamung dot ulun, antad sid keloo ponong sid kobungoho ko buta hurup, ko antad sid bansa dit amaju ponong sid amu-po amaju, antad sid ugama di nakaharati do Kinoringan ponong sid ongougama di retanko kakali sid kotuvangan. Tu ino gama do iadino, nga antad sid kosumbungo om antad sid gama momorinta di vokon. Topot ong i Yesus minonulung om minokiuripon dit ongoulun. Sabap ino, atag dot i gama mongitung om sumirot sid ulun vokon, iadko mamakai it ulun Kristian dit mato di Yesus, tu iosido minanamod dit ulun dot asarangka o vuos dau ponong sid isai-nopo it ulun. Amu minonodiri om amu kumihi ko minongusiba i Yesus dot ulun. Gam agazo o ginavo dau ponong sid isai-nopo. Sid isai-nopo i vuos dot ulun kotutun tokou di vuos di Yesus. Iri-ogi engkod i gama monodiri om momili ko pokihi, gam mongoguna tokou di sokovia i ongoulun, tu antad kavi sid palad do Kinoringan.

Na i toun 1980 sid Melbourne Australia miniumpug-no vagu it ongomission om ongororija dot i tajuk: Porikoto-no i karajaan-nu, ka. Sid miting diri hinumarati it ongororija do Barat do banalko apagon, ong ulun antad sid pomogunan dot amaju om lumundu poromut di Habal do Kovosihan sid ulun do mosikim sid pomogunan do mosikim. Iti-no o sabap, kondiri dit ongomosikim kumavid di Habal do Kovosihan om poromut sid ulun vokon, tu kaharati ioti di kosikimo dit ulun vokon, iadko i gama di Yesus mongintutun di kobuatano dot ulun (Matius 4,23 om 9,35-37).

Varo-no kagi laid boros do pandita antad sid Sri Lanka, ino-no i D.T. Niles dot,

Ino-no i tugas tokou pazazad om polombus di Habal do Kovosihan. I tokou okonko ulun di manansanganu di Habal do Kovosihan ko mumpalad di Habal do Kovosihan. I tokou okonko ulun di nokosuvang laid sid karajaan do Kinoringan. Inoi nga i tokou iadko it iso't ulun di mokitahak dot akanon, tu tilikop, do kodung nakaharati tokou do siombo varo koposizon, turus mangahabal-po sid ulun vokon di tilikop do siombo kadapat do koposizon om koposizan.

Nopongo-po, ogumu it ongowakil di sid Melbourne miniumpug vagu om minamung sid miting do rombongan vokon sid Pattaya, ino miting koduvo iadko Lausanne 1974, tu miupakat do kuran kadapat polombus di Habal do Kovosihan sid tasantanid-tanid o koundango dot ulun. Tu sid dioti atalahas dot i Habal do Kovosihan okonko iadko it ongorumbul dit siombo-siombo, nga iri-no ko-iri o harati, kodung iso, iso-no om kodung duvo, duvo-no dot aso bida, sid Kina ko sid Afrika. Inoi nga i Habal do Kovosihan mogihim dit ulun sid dau do pomogunan om intoronon om kobuatano.

Assembly koonom sid Vancouver, Kanada 1983: I Kristus o koposizan do riniba.

It ongowakil di niumpug sid Vancouver minangatod sid miting dit ongokosusaan di dau do gorija om pomogunan. Manjadi antad dit ongokosusaan dit ahatul banal sid sompomogunan, varo tolu o pongoretan di manarang di tugas di gorija sompomogunan i hiza di valu-nopodan, ino-no

KABANARAN - KOPIOONDUSAN - I GAMA MANAUD DI VINANGUN, supaya amu orungoi i vinangun dit inurug do Kinoringan.

I hiza diri kakali akansang o piouhan dit Ongokuasa dot agazo sid riniba, ino-no USA om Russia. Sompomogunan ioti di kosukupan dot ongopakakas rumpak di miuma dot inghatus mongorongoi di sompomogunan. Minongohomu it Ongokristian sid Europa, tu sori-no nosodia it ongoroket di mad popitinganu do riniba. Minindamo-no ioti di **kopioondusan**.

Na it Ongokristian antad sid Afrika o minongohomu om minongogizak, tu aso kabanaran dahai sid gama mongojuval dit ongobarang dahai iadko kopi, ko tii om i vokon do banalko okudik o kadapatan, tu osibak o horogo, om dumagang dit ongobarang antad sid Barat di banalko amahal. It ongobansa do Barat mongorongoi dit ongohorogo sampai momongo mangakan om mangaladtak dahai om gumavul-po sid ongopolitik dahai, supaya miouduw it ongobansa sid dahai dit inonsug dit ongoulun do luar, ka. Iti-no o sabap dot aso kopioondusan, tu aso kabanaran. **I kabanaran om i kopioondusan**, mad mioobpinai, isuhut di boros do Kitab dot i kabanaran om i kopioondusan mikavid om mikoruhang.

Na it Ongokristian antad sid Pasifik o minongohomu om minanarang dot it ongokuasa dot agazo, USA, Fransis om vokon, pavanit dit ongopuru om it ongorahat sid gama moniim dit ongonuklear Bomb om rokit, dot i panangan dioti, it ongopuru sid Pasifik. Ogumu it anganak dahai, ka dioti, norungoi i vangun. Vokon-no ong bai mad bolung hiza di kalandai, okonko riniba, tu norungoi-no banal i vangun dahai om ogumu it ongoulun varo sakit do kanser antad sid ongorasun dioti dino. Minokitulung ioti dit ongogorija do tumabang moniag dit ongoporinta di gama momongo mongorongoi di pomogunan om vinangun dit antad sid palad do Kinoringan bahagi di tokou biano om it ongogenerasi di rumikot-ogi.

Manjadi minupakat i Assembly sampai minindamo dit ongogorija om ensanan it ongoulun Kristian sompomogunan do mokiharati om mokituduk di Kitab, supaya it ongokristian om ongogorija posurut di kabanaran do Kinoringan om jumadi do pakakas di kopioondusan sampai mamung sid **gama manaud om mongumbasih di vinangun**.

I Bishop Thu En Yu, nga wakil do PCS sid Vancouver diri.

Tanid mantadko ino, tinumorima i Assembly di Kinapangaan do LIMA, it upakat kananganko i KOPOMODSUAN, POGINAKANAN DI Tuhan Yesus om i HOTURAN do gorija. (Baptism, Eucharist and Ministry =BEM). Nakaharati ioti antad sid kinapangaan dino dot aso tantu o pitonidan sid ongoteologia dit ongogorija om i Kitab, ko sabap di moniag dit ongogorija miaamung om mizo sid Iso Gorija di Kristus. I sokovia i it ongopitonidan bai tradisi om koundango sampai i kobolotian dot ulun kumavid di kesaan sid di Kristus di lobipo kiharati om kiguna mantadko i tradisi di dau do bansa om boros om koundango dau. Tu i raha di Yesus popezo di tokou. Topot i rahat dit ongobansa om i boros om kulit mad popitongkizad.

Na sid **miting sid Seoul, Korea 1990, kananganko i KABANARAN, KOPIOONDUSAN OM KOPITONGGUNGAN DI VINANGUN** minimulai dot okonko mizo it ongogorija sid gama tumoguvang di tolu i pongoretan kabanaran, kopioondusan om kotoudan di vinangun. Inoi nga ombo i dau do kopurimanan do osusa banal, ino-no netung dau om nihabal sid miting sid Seoul. Ong it ongoulun sid Barat, tu nengkod-no i piouhan dot USA om Russia, gima norungoi-no i hoturan do Kommunism, mad a-nakaharati do kakali ogumu o kosusaan sid ongopomogunan vokon, dot vokon, ino kosusaan dino, natanom dit ongoulun do Barat. Tu it ongokavanit di varo sid Barat, iatod sid ongopomogunan vokon, ko sid gama dumagang dit ongokazu dit omura antad sid ongohimbaan, mangavi ioti dit ongohimbaan, ka, dot antad-no sino i harapan dioti, tu katarik do darun om koposizon dit ongobansa sid ongopomogunan dot alazu. Ino-no ot atalahas, amu-po miuma i gama dit ongogorija om ongokristian do mongitung di kosurutan di ponong sid kabanaran, kopioondusan om kotoudan di vinangun sid sompomogunan.

Varo-no vagu **Miting kananganko i Mission di sompomogunan sid San Antonia, USA 1990** dot i tajuk: Posunuo-no i kenginan-nu, ka di boros di Yesus minta dua. Sid miting dino atalahas dot i kososizan dit ongopiumpungan sid sokovia i kavazao om gama lobipo kiguna mantadko i sokovia i

gama mengkhotbah om povongo dit ulun sid bai momoros om mangahabal. Pengkaa dino i miting sid Manila 1990 (Lausanne III) dit ongorombongan do mission vokon. I kogumuai it ongowakil sid San Antonio, nga wakili sid Manila.

Assembly koturu sid Canberra, Australia 1991: I tajuk nga mindamo: O Sundu dot Osusi, rikot-no sid dahai, ko Siti-ko-no o Sundu do Kinoringan, ka. Varo pongohorotizan dot sampai bianco, i WCC oholian minongitung di teologia dau sid bai i Kristus, i Minananggung sampai mad noolingan i kuasa om Sundu do Kinoringan. Sabap ino, i Assembly sid Canberra minongonsug dit onogorija do humarati banal om mongitung di kotulungan om gama di Sundu do Kinoringan, supaya i Sundu dot Osusi posondot sid di tokou di kenginan do Kinoringan om agazad tokou di Sundu sid atag o gama sumasi di Kinoringan di minongurug di tokou om i kakali mongopud di tokou sampai bianco, om i Yesus, i minananggung om mangahatul di tokou do iadko ulion do gorija, om mokitunda tokou di Sundu om kuasa do Kinoringan, supaya aso kuasa vokon om aso rogon kopomorinta di tokou.

USURAN DO GORIJA PCS

ino-no i Gorija Protestant sid Sabah

UMPATOD

Iti hiza didino dot kiumul-ogi i PCS do labaan-no 40 tinouan, ong kiroon antaad sid kinosinaan do PCS hiza di nokositi it iso-ogi misionari ontok di toun 1952, nokopongitung-no laid dot banalko avantang, ong posurat-po di sokoviait it usul do kuran banal i kinoturidangan di PCS om nunu i nongohajangan dau sid saralom dino't iad-ogi dino it umul do gorija. Ong kiroon tokou do kuran i vaza do Momogun kodori minongusul dit ongonahajangan di bansa dau, tantu amu osodu banal it ahandaman dioti. Oduruk banal om ooling-an-no dioti it ongohal di bana-banalko najadi. Sabap ino bai ajadi-po do tangon om okon nokousuran-po dot abanal. Sabap iso't ulun nga aso kadapat mongohodom dit okonko iosido ot nakahajang om nokemot om nakasasi. Minsanko i habal antad sid ama om it aki, amu songkuro koledo ong imbuliton-no dau i habal dino, varo-no nakamung ko nohinaan it ongohal. Harati, amu-no nemunsui banal it inumpak do hal di bana-banalko najadi. Suntuan bahagi dino:

Hiza di toun 1964 varo't ulun dot it umul dau labaan do 70 toun minongusul iosido ombo it dau dot nelaan kananganko i kobuatano do Rungus, ino suku Momogun dit osomok sid Kudat. Ino-no i vaza dau mongusul:

Manjadi, ong tuturanon-ku i kodori-po antad di kinagaman do Kudat, mad amu-ku avi banal i tuturan dit aki-ku, nga a-ku-no bo tuturanon ong it a-ku nelaan. rontob i tuturanon-ku i nelaan-ku. Ino-no ot elaan-ku, i gulu nokorikot i Tuan Ligis. Nokorikot-po i Tuan Ligis, it aso-po pinikavid dau, nakatahak-no i hukum om hoturan dau sid dahai ulun do Momogun sitid Kudat. I Tumanggung-nobo i pinikavid dau. Boros di Tuan Ligis, Tumanggung, ikou diti, tumimpun-kou-no mananom do nizu, mananom-kou do kolopioi, om muranau-kou-po. Sabap iti pomogunan diti, ong alaid-no, ogumu-no o Kina do korikot. Ovian-kou-no do pomogunan. Manjadi, Tumanggung, ikau-no o milo do mangahatul dit ongokoruhang-nu. Ong abanal-no, kadan-kou-no mubinatang, kadan-kou-no mivaliu-valiu-po. Mongitung-kou banal do mukabun, ka di Tuan Ligis.

Na ambato-nopo di Tumanggung, Tuan Ligis, ka dau, amu-oku. Tu amu-oku-pogi, ka di Tumanggung. Ong mongukad-okoi do tana, ka di Tumanggung, kapatai dahai ino. Ong momokok-okoi do bavang, na kalangau dahai, ka di Tumanggung. Na amu-nobo nokopuka-bun-po. Na iningkadan-bo di Tuan Ligis, Na iti pomogunan aso nasip, ka di Tumanggung, sabap i Tumanggung-no o minongoguvail.

Kalapas-po i Tuan Ligis om ginumanti-no i Tuan Soromin, nga ino i boros om hoturan dau sid di Tumanggung, tu iosido o pongohoturon dit ongoulun sid saralom do Kudat. Dot iadiko i hukum di Tuan Ligis, tu popukobunon om popuranahon it ongomomogun. Na dolu-po ong i Tuan Ligis, minsanko i Tuan Soromin-no, nga miradi i hoturan, tu pamaju om mamasi di pomogunan siti sampai minigaganti-ganti i tuan, nga asoi natanom. Sabap it ongoadat o kagama di komuan mangasip di Tumanggung. Sabap tanid dau do pongohorotizan om dau dot etung. Tu it ongoadat o kagama do iadino. Manjadi sampai nongogontian it ongotuan sid Kudat diri, nga aso nasip-asip dit Ongomomogun, tu nasabap dit inanu di Tumanggung it ongoadat dot araat do pangadahava dau. Manjadi ino-no i nakagama do komuai mangasip. Tu dolu-po ong i Tumanggung, tu ino-no it osukod, nga kakali dot amu nohorotizan. Iri-poka't ongoparanak dau, ko kinoruhangan dau nga lobi-po, ka, amu nakasip. Tu tanidi ko tanid isangkaan dioti. Bahagi di Tumanggung, bai i nengat dau, iseso-ko dalai om parai o tonomon. Ino-no i nengat dau. Inoima ong i nizu, kolopioi, maling ko parai ong i roduvon, momokok do bavang, kakali dot inamu. Rontob tosongtoun-toun maliau-no. Ino-no i nengat dau. Topot-nopo ong i suhu di Tuan Ligis om i Tuan Soromin diri muranau dot misimban-simban, toun toun bukaon, ino-ko ino, supaya i tempat dit nopogos mongusaha, amu orubatan. Iad-no dino i boros di Tuan Ligis, i gama dau mangahatul sitid Kudat.

Nemot-po di Tuhan Ligis do mosikim banal i Momogun. Na ino-no i kagama komuan mangasip, itit adat. Tu amu-po horotizan i hukum di hoturan di Tuan Ligis sampai i Tuan Soromin. Manjadi ino-no i tuturanon-ku kodiri, ka dit ulun diri.

Ong mongimpuras tokou dino tuturan dino, alanta-no dot ogumu o hal di nokousul sino dot a-nontok

banal. Hiza di sinumuvang-ogi i British sid Sabah sampai minangajadi di Kudat dot Ibu Kota do Sabah (i retan diri British North-Borneo), i Momogun nokentoron sid tanggui do Kudat, dot sid tanggui do Kudat varo bavang om olungan, i ngaran dau Tomborungus. Antad sid bavang dino dati o pinongonuvan di ngaran **do RUNGUS**. Ino hiza diri agazo o kenginan do British dot mongoi sid Sabah dot umau do nizu. Topot hiza diri aso-po't nelaan do mongoguna do bungug antad sid kolopioi. Kagi ino hiza diri aso-po kazu do kolopioi sid Sabah ko sid Semenanjung. Bai sid pomogunan do Baradzil-ogi o varo kazu do kolopioi. Suvai i riniba nokotimpun mamakai do kurita di kienjin, iri-ogi varo mogihim do bungug di mamakai sid ruda do kurita, supaya amu otingkau i panahon do kurita. Topot sid tuturan dit ulun dino, mad miabali do hiza di Tuan Ligis minongonsug do mananom do nizu om kolopioi. Iti diti bai iso o hal di kembulai sid tuturan dino.

Ong mongitung dit usuran do Momogun sid tanggui do Kudat, ogumu-no banal it nalazan sid tuturan dino. ino-no, i vaza pinajadi di tanggui do Tomborungus di Kudat, i pongonuvon di ngaran do Kudat (antad sid sakot dati= **kogutadan**), it upis do British sino, i pangkalan dit ongokapal, i kinorikatan di Kina dit insan-ogi di minuvalai sid Lausanba, i retanko Old Settlement. Bai valu nopod toun nakatalib, mad iso nga aso't andaman. Iti-no o sabap, ong biano, osuhul tumimpun koduruk patandon dit usuran do gorija sid surat om buuk, supaya iso nga asot olingan sampai atalahas it ongoliang-liang do kuran banal i kinengkakatan di PCS om kuran i nokengkakat-no sampai sinumukod i PCS om nunu i sabap dot i hoturan do PCS najadi iadko i varo didino diti. Manjadi antad sid usuran diti oruhai o horotizan do nunu i tomodon dit ongohoturan om it ongokavazao do gorija mopud sid tanga do ranzat Sabah om mongumba di kolombusan do gorija ponong sid ongotoun-toun di rumikot. Antad sid pangalaman di hiza di nakatalib, kaluto ong oruhai mongintutun om mongumba sampai monodiri dit atag o gama lumombus sid gama posurut om mongopud di gorija.

I HIZA KODORI SID SABAH

It usuran di pomogunan do Sabah guluko i hiza do British, okudik nga aso nakatandon sid surat om buuk. Ong it ongotangon, varo-no om mad varo kolu dot usuran. Rontob-nopo, amu osodiri sino i hiza do soira ko isai ko siombo om i kinumuro it ongohal om pangalaman dino. Amu avalang it inantadon do Momogun ko soira varo bansa vokon di nokosoruvang sid Sabah sampai varo piouhan dit ongobansa do sampai mangazu om mipapatai sampai monindaat.

Antad sid ongousuran dit ongopomogunan sid Asia, ino-no ot atalahas: hiza dit abad ka-8 sampai ko-10, varo hoturan di raja di nokosuvang dit ugama Buddhism di nakaranzat sid ensanan it ongopuru di sid pialatan do Tana Asia om Australia, ino-no it ongopuru do Sumatera, Java, Kalimantan om Sulawesi om it rinibuan it ongopuru dot opodok sino dino. Sid a-ko piro o tempat kakali kadapat mongimot dit ongopuvavalazan om panambayanan do Buddhism, iadko i Borobodur sid Java. Iri-ogi minimbulai i karajaan do Koling di minonoruvang sid ongopuru sampai minanansanganu dino karajaan laid diri om pinazazad-po dit ugama do Koling ko Hindi siti ponong. Ino karajaan dino suvai nompus hiza di toun 1378 ontok di notori-no i raja Majapahit.

Topot ong sid Sabah diri, tanid-no o hoturan, ong sukul nonong-no i surat di raja do Kina. Sabap sid usuran di raja do Kina varo nousul-no dot i Tumpu sid Burunai kopipanau kumaa sid pomogunan do Kina. I valai di Tumpu sid Burunai dino, rumbizo ot ipanaap om i gama midagang dit ongobarang antad sid Kina, kazu dot mihang om kulit do labi om sonit om it ongobokuvis do godingan ot nipongohorogo ioti. It ongobarang di dinagang, ino-no mangkok om saring, amas om perak om it ongokiluvang vokon. Iadino o laporan dit insan-ogi varo tumpu di nokorikot sid kina:

Ontok di toun 977 TM nakapanau-no i Tumpu, i ngaran dau (ong boros om surat do Kina) Hiangta, kakaa sid pomogunan do Kina do lumazag om varo't inovit dau dot ogumu o barang dot itahak bahagi di raja do Kina. Na i raja do kina minonuli di tahak dino, ino-no mangkok dot obisa, agong om boginisan dot ongokakanan dot angod om kihorogo. Na varo-po boros do mad nakasamba-no i Hiangta sid raja do kina sampai minangakun dot osukazan iosido di raja do Kina do monikid toun nga mongirim iosido do sukoi sid raja do Kina, ka.

Varo-po laporan dot ontok di toun 1082, varo Tumpu Sri Maya antad sid Burunai di minamanau-no kumaa sid Kina, tu mangatod do sukoi. Iti kavi nokosurat sid usuran di raja do Kina. Ong mongugal-

po vagu dit ongousuran om ongolaporan sid Kina, varo dati vagu it a-ko piro o hal di kembulai, dikakali nosusut sid ongo buuk kodori dino.

Na it ugama Silam, i nokembulai hiza di toun 622 TM sid Makka sid pomogunan dot Arab, sinumurut-nopo ponong sid Timul sampai nakasampai sid Semenanjung om kinuta-no i Malaka toun ko-1403. Kodung nokosilam-no it ongoulun sid Malaka, amu songkuro antad diri, i Solutan do Malaka minomorinta dit ensanan i pomogunan do Malazu om varo-po't upakatan dau sid raja do Kina om i Tumpu sid Burunai. Ong i Burunai, ontokko i toun 1410 sampai 1425, varo ingonom pangatod do sukoi sid raja do kina. Iri-ogi sinumamba i Tumpu do Burunai, i ngaran dau i Marajakali sid Solutan Manshursha, ino solutan do Malaka.

Na kodungko nokosuhut-no i Tumpu do Burunai di hoturan di Manshursha, minanganu-no i Tumpu di pangkat do solutan om sinumilam-no sampai minangahatul-no do posilam di pomogunan do Burunai. I ngaran laid di Tumpu do Burunai dir, ino-no Alak Bertaka do kodung nokosilam-no, iri-ogi i Solutan Muhammad o ngaran dau. iosido dino bansa do Bisaya dot okonko ulun iosido do nokosikul. Na it iso it anak dau nokotokin sid Kina di sid kinabatanan, i ngaran dit anak dino, i Solutan Ahmad. It anak koduvo nokotokin sid Solutan do Malaka, i ngaran dit anak dino Solutan Sulaiman.

Hatus-no toun kihoturan do Silam sid Malaka om korikot-ogi it ulun do Portugal sampai notori-no i pomogunan do Malaka di raja do Portugal dino (1511 TM). Hiza diri kakal-po ogumu ot ongokina sid Semenanjung di nokotokin-no sid Ongosilam dot okonko osusa ioti sumilam. Notori-po i Solutan do Malaka diri, minogidu-no om rinumangkat-no i kinogumuan dot ulun di midadagang sid pomogunan do Burunai om sid ongoolungan dit ongopuru dot i kiniro dioti, momongo di gama midagang sid pialatan dit ongobansa sid Asia Selatan. Topot it raja do Portugal minoniim do manansanganu om mangahatul di gama midagang.

Na hiza di kinorikatan dit ongoulun do Europa sid Malaka (1509) om sid Burunai (1521), nabahagi-no i hoturan sid Sabah. I ponong sid Barat nokosuvang-no sid kuasa di Solutan do Burunai. Topot ong i pomogunan sid sid ponong Kosilahon, nga dang Solutan do Suluk. Manjadi kodung nokorikot it ulun do Portugal sid Malaka sampai sid ongopuru do Pilipi, it bansa koduvo dit elo lumazag sid Europa, ino-no i Spaniol minilawan do Portugal sampai pinapanau dot ongokapal lumazag. Na okonko ponong sid kosilahon o kinapanahan didoti dino, gam sid Barat o linazagon do maza sid Amerika Selatan lumobus siti ponong sampai kodompil sid Pilipin om Palawan om banggi sampai sid Burunai. Ino-no it ulun do Spaniol di nokorikot sid Burunai, i Pigfetta, i kopitan di nakaganti di Magelan. Sabap i Magelan, napatai-no laid dit Ongopolipin dit miniodu ioti di nokodombil iosido sid puru sino.

Sid laporan di Pigfetta nokosurat dot i kogumuo dot ongoulun Burunai diri, labaan do 25 ribu ot ulun. Na i Magelan om Pigfetta, tolu toun sid panahon lumazag om nokotutuk-ogi ioti di pomogunan sampai nakasasi-no banal ioti dot iti pomogunan bola diti iadko bola adapati intutukan lumazag.

Antad diri amu nengkod-ingkod dit ongokarajaan do Europa do monuhu dit ongokapal dioti lumazag siti ponong om monoruvang dit ongopuru siti. It Ongobelanda minanansanganu di puru do Java ontok di toun 1619 om pinengkakat do station sid Batavia, i ngaran dino ong bianco, Jakarta. I tinomod dioti dino, mongimbulai do kumpani midagang, ino-no i East India Company, tu indoson dioti, ombo it ponong sid Timor antad sid Koling, ino-no East India. Ino kumpani dino minongorumpak sampai minonori-no di pomogunan om kuta do Malaka (1625) om minonutup di vazaan dit ongokapal om alud sid pialatan do Malaka om Sumatera, supaya iso kapal om alud nga aso maza sino dot okonko koponukoi-po laid i barang di nokoudan sid kapal ko alud. I tomodon di Belanda do iadino, mokihuhuntung ioti dit ipat-ipat ongobarang dit antad siti ponong dit iatod sid ponong Barat.

Kopihiza dot it ongkapal dit ongoraja do Spaniol om Portugal minanansanganu dit ongopuru siti ponong om kiumunsi it ongoraja do Kina om Jipun, varo a-ko piro o misionari do RC di nokovozo do tomod pazazad di gorija RC sid Kina om Jipun sampai sid Pilipin. Ong sid Polipin nokengkakat-no i gorija RC, sabap ensanan it ongopuru do Polipin nga sid kuasa di raja do Spaniol kiro-kiro hinotusan toun. Ong sid Kina, mula-mula tumorima i Kaisar dit ongomisionari di minonuduk dit ongosaines sid

istana di Kaisar. Ino misionari diri tinumiim do lumuu dit ongoulun do Kina sid koundango. Topot, sabap a-ko piro it misionari vokon di dang rombongan do Jesuits minongoruput dit ongomisionari di mad guru di Kaisar sid di Pope sid Rom, retanko ioti mongolim di kosipan sampai sumiliu do Kina om i Pope minoniag dit ongomisionari dino do iadino o gama, turus i Kaisar do Kina minonunsub di sokovia it ongomisionari om minoniag dit ugama Kristian sid Kina.

Ong sid Jipun, varo nokotimpuun pengkakat do gorija Jipun sampai varo ongoduvo natus ribu Kristian sid Jipun. Topot kodung varo kopurimanan di raja do Jipun dot it ongoraja sid Barat tumiim do monoruvang om manansanganu di pomogunan dau, turus minoniag iosido do varo-po kazazadan do Habal do Kovosihan, gam minonuhu iosido do momunso dit ugama Kristian sid Jipun. Ino iadino ontok dit abad ko-18.

Ino hiza diri, bai it ongoagazo o pomogunan orikatan dit ulun do Barat. Suvai i toun 1878 om varo-ogi upakat di British om i Solutan do Burunai om Suluk dot i kumpani do british, ino-no i Chartered Company kadapat sumuvang om manansanganu di pomogunan do Sabah.

Kodung nokorikot ino hoturan do British diri, om tumimpun-no ioti mongodim do Kina supaya ioti pamaju di pomogunan do Sabah, om tumimpun-ogi i sejarah do gorija sid Sabah, ino-no i usuran di Gorija Kina Basel Fui ko ong ngaran biano, Basel Christian Church of Malaysia.

IT ONGOGORIJA DO KINA OM VOKON

I. It usuran do Gorija Kina Basel Fui

Sid tanga dot Ongokina di nokorikt-no sid Sabah hiza di TM 1882 om it ongokina di sumusuhuti, varo-no laid nakagavul it a-ko piro ulun di nokosuvang-no laid do Kristian di kakali ioti sid pomogunan do Kina. Nakamung-no laid ioti sid Gorija Kina sid daerah do Quangdong, ulun di suku Hakawa di nokokristian antad sid gama di Basel Mission pazazad di Habal do Kovosihan sid Kina antad di toun 1847. I gulu nokorikot ioti sid Kudat toun 1884 sid Lausanba, i retanko Old settlement sid KM 8 di Jalan Sikuati. Sabap i hiza diri i tempat do Kudat kakali bai govuton om himbaan. Vokon it ongoHakawa do Kristian, minizon sid Sandakan om Api-api i sid Bukit Bondira om Mangatal, Tuaran, Tamapruli om Tenom-po. Kodung nokorikot om nokentoron ioti sid Sabah, minongitung ioti do kuran o kengkakatan do piumpugan dot ulun Kristian, isuhut di hoturan laid sid Kina diri. Minongumba ioti do varo valai do sikul om varo guru dit anganak dioti, dot ino guru dino, isuhut di hoturan laid di sid pomogunan do Kina, guru ka dot ponulung om ponginjil-po bahagi dit ongosukod ontok dit adau do minggu. Iti-no o sabap, i valai do sikul nga apakai do gorija ontok dot adau Minggu. Alaid-nopo di nokosurut-no i kogumuai dit Ongohakawa do Kristian, minindamo-no ioti sid Basel Mission do varo pandita di mangagazad om mangahatul dioti sid Sabah. Na minangakun-no i Basel Mission sampai pinaapanau i pandita Schuele ontok di toun 1905. Iosido dino pandita om Tukang Kayu, sinod Kudat o tinumimpun iosido do monodia di gama menggembala di ongopiumpugan do Hakawa dino. Isuhut di koubasan dit ongomisionari do Basel Mission, gulu banal pengkakat iosido do valai sid tana di nasanganu-no di Basel Mission. Sinod KM ko-4 retanko Batu dua o pinongonuan dau do tana sampai minanagad dit ongoipil di kakali sid tana dino om minamasagi dit ongokazu sampai minamapan sampai varo kosukupan do mangagama di valai di kakali pengkakat sid Taman Gereja Protestant biano. Okonko oruhai i gama muvalai. Sabap i hiza diri aso-po injin do garagadi ko injin mangatam. Longonon kavi mamasagi mamapan om mangatam om sampai sid minanangkap dit ongorongobon om gondila om it ongokosukupan vokon di valai diri. Ong i pinanaap, pinokikirim dau sid pomogunan do Koling, sid kilang do bata dit andang Basel Mission o minangahatul.

Manjadi i komite do Basel Mission di kodung norongou-no do nopongo-no i valai dino, sinuhu-no vagu i Schuele monodia vagu dot iso-po station sid Sandakan. I kiro dioti diri, ogumu ot ulun sid Sandakan, sabap i Sandakan hiza diri nga ibu kota do Sabah, osuhul ong sid Sandakan o pusat di gorija do Kina Basel Fui. Na suvai opongo it ongokavavalazan do Basel Mission sid Sandakan hiza di kinotimpuunan di Rumpak Pomogunan kensan-ogi, do kodung nokembulai i rumpak dino, it Ongobritish minanangkap di Schuele om minonunsub dialo dot a-koho dot iosido momongo menggembala di gorija do Kina. Tu i Pandita Schuele dino, ulun do Jerman.

Manjadi iti-no i kinengkadan do Basel Mission tumabang sid gorija Kina Basel Fui dot alaid-laid om

koguli-no vagu sid Sabah, ino-no hiza dot otoliban i Rumpak Pomogunan kenduvo.

Minsanko iadino, it ongoulun Kristian do Kina, ulun di mukabun om midagang, minilombus kumavid di kosipan dau, isuhut di tinungkusan antad sid pomogunan do Kina sampai hinatul dot ipat-ipat i piumpugan sid dau om dau dot intoronon kondiri mangahatul. Minisosombol-sombol ioti gumorija om sumambayang dot isai-nopo it nakaharati dot okudik, iosido-no o mangagazad di piumpugan om umpuk dioti dino. It a-ko piro o guru dit anganak jinumadi do pandita do Kina di kadapat momodsu dit anganak om mamarakat dit ongomogontong sampai mangahatul di gama mongolobong di minatai, isuhut di hoturan do Kristian.

Notoliban-po i Rumpak Pomogunan keso diri, tinumiim-no vagu i Gereja Basel Fui do mongodim dit ongomisionari do Basel Mission. Topot keso, a-koho i Gobinal do kosuvang vagu ong German, retanko ong ulun German momulitik dot sumaap di British, ka, koduvo, i Basel Mission a-kemot do kosukupu do balanja do pokirim vagu dot ulun sid Sabah. Iti-no o sabap miniumpakat om minongolumbatos it Ongohakawa do Kristian do pengkakat di gorija Basel Fui dot ajadi do Gorija banal di kihoturan om kiperlembagaan sampai kihak sid porinta, supaya kadapat manganu do tana om pengkakat do valai gorija om i iadino. Ino kinopongolumbatasan dino ontok di toun 1924, sampai pinungaranan-no dot, **Borneo Basel Selfestablished Church**, i harati, i gereja antad sid Basel, nokengkakat kondiri sid Borneo. Antad diri, ipat-ipat i piumpugan dioti, varo pandita i retanko muksu om i mangahatul di sokoviai, ino-no i Zungmuk, ko i retanko i pandita do randavi. Ikid piumpugan hinatul-no do sokoviai i hal, ioti kodniri o mangahatul, iadko valai do panambayangan, valai do sikul, it ongoguru om i pandita om i balanja dioti sampai i kosurutan di piumpugan. It osukod do piumpugan okonko i pandita, inoi nga ulun vokon di suka rela tumabang om mangahatul di piumpugan. Sabap ikid piumpugan osusa mogihim di kosukupu do balanja bahagi di sokoviai i gama sid piumpugan. Topot ong i sompuruvan dit ongopiumpugan dino, bai alambat misasamung oom miupakat di kosurutan do gorija. Kagi i hiza diri amu oruhai o kapananahan ong magandaha i sid Sabah, tu bai sid kapal do rahat o vazaan kumaa sid ongopomogunan tanidko it ongokampong om bandar di sid sarazo do Api-Api. Ong sid Kudat, Sandakan om Tawau, aso tinganan rumikot tanid mantadko mozo di Kapal.

Kasalaan-nopo, minsanko iadino avantang o gama di gorija Kina mangahatul dit ongopiumpugan dau om i kosurutan di gorija Kina dang Hakawa, mad aso-po pongitungan dioti diri ponong sid Momogun ko Sama om Murut. Ino kinosuruto do gerja o Kina nengat-no dioti do tugas dioti kondiri ino. Bai toriso-iso ulun Kristian do Kina dit osomok sid ongobinatang do Momogun minongitung om minongumba do kuran kadapat polombus di Habal do Kovosihan sid ulun dino.

I Gorija Roman Katolik

Nokopihiza di kinorungkapan dit Ongokristian Basel Fui sid Sabah dit 80-pulohan ko abad ko-19, varo-po Kristian do Roman Katholik antad sid Kina maliu om rumangkat sid Sabah, tu pinanggih do British. Tu i British amu minonodiri dot ugama antawa amu engat do varo't ugama dioti dino. Ino-no rontob kenginan do British, varo't ulun dit aparu pamaju do pomogunan om mongimbulai koduruk dot ula di koloni do Sabah, supaya i kumpani do British kadapat mangatod sid England dit umau nizuw bahagi dit ongoulun do mosikim sid England dit amu miuma do balanja dumagang dit umau do sapi ko vogok sid England. (Ong aso't umau sid akanon dit ongomosikim, amu kogoos ioti gumama sid ongokilang do british dot 14 jaham sangadau do bai okudik o gaji. Ong it umau nizuw, minsanko iadino osodu o pongonuvan, kakali omura mantadko i umau vogok om sapi o kiniro dit Ongobritish diri. Na nizuw amu opud sid England, tu pomogunan dot osogit. Iti-no o sabap, minogihim-no ioti do pomogunan siti ponong, ino-no i pomogunan do Sabah om Sarawak dot aso nokiro dioti diri dot amu atag ong monolod di tana om pomogunan dot bansa vokon).

Na inot ongokina do Kristian RC antad sid suku bansa Kina do Hokien. Ino suku Hokien, tanid o boros mantadko i Hakawa. Ong i surat do Hakawa om Hokien, enizo, topot i vaza mumbongut di boros dino, banalko agazo o pitonidan sampai amu kopiharati i Hokien om i Hakawa. Do nokorikot-po sid Sabah, amu-no nokopisodiri i gama dioti mizon ko mintoron om mukabun sid Sabah, nokopigagavul ioti Ongohakawa om Ongohokien momuka diti pomogunan do Sabah, inantad-no sid ongopangkalan ponong sid sarazo, dot i vaza dioti mukabun, mad mininganui ioti dit

ongokogovutanani it ongotagad do Momugun om tanaman-no do nizuw om muvalai sampai manganu sid porinta do katarangan dot i tana dino, ioti-no o sanganu. Sabap i kiniro do porinta British, sokoviai i tana do Sabah, nga tana di raja ko Crown-land, ka. Iti-no o sabap dot i British minaamahagi di tana sid ongokina, ombo o kenginan dau dot okonko amahal o gama mongohorogo. Makin alaid makin pogofoon dit ongokina i dau om dau do tana isuhut di pongumoon dot Ongomomogun om it agasan do momuka om managad kondiri. Ombo i tana dot arantai, jinadi-no dioti do ranau, supaya varo kopudan dioti antad sid parai om nizuw om i gama mananom dit ongosayur om i gama momiara do dupot, karabau om vogok om manuk.

Na it Ongokristian Kina do RC, iadko it Basel Fui minongitung di kosurutan do piumpugan do Kristian di sumuhut di hoturan do RC, nga minuvalai do sikul om gorija, dot i gama dioti, porompit di dau do gorija sid gorija do Basel Fui. Alaid-nopo, pinungaranan-no i ralan di kapit sid ongogorija dino do retanko Mission Road ko ong bianco-no, Jalan Mission. Minsanko sid Kudat varo-no iadino, om sid Sandakan, Api-api i gulu diri, sid Tuaran, Tamparuli om Manggatal.

Kananganko i gorija do RC di sid kohoturanan di Pope sid Rom, tantu varo pitonidan mantadko it ongogorija do Protestant. Sabap amu osodiri om amu abahagi i gorija dot RC isuhut di bansa om suku bansa, inoi nga bai iso gorija RC sid sompomogunan dot osinggazung o gama mangahatul om sumuhut. Ino-no it ulion do RC, i Pope (i retanko i Ama), i ginumanti di Petrus di mongontok di Kristus. Manjadi siombo-nopo varo piumpugan do RC, ino Pope o mangahatul dioti dino dot amu monodiri do pomogunan om bansa ko boros om porinta. Kodung varo piumpugan dot RC sid Sabah, varo-no nosuhu di Pope dot a-ko piro ot misionari, supaya ioti mangagazad om monuduk om monunda dit ongoulun RC sitid Sabah. Na ino misinari diri antad sid pomogunando Belanda, ino-no it Ongopandita antad sid rombongan dit Ongoamai dot opurak, tu opurak it ongosulung dioti dino. Nokorikot-po ioti dino, minisosodiri-no ioti di dau om dau do tugas sid Sabah sampai nohorotizan-no dioti dot okonko bai Hokien bala o o nokezon sitid Sabah, gam varo bansa di minamasok, ino-no it Ongomomogun di mintoron osomok sid Api-api. Tu sid Api-api nokogulu nokorikot ioti diri. Kodung nemot om nakasamung-po dit ongomomogun sid Penampang, ino suku bansa Momogun di retanko Tanggara, varo it a-ko piro o pandita do Belanda di minintoron sid Penampang, tu i nokiro dioti, minsanko it Ongomomogun atag dot ahabarani di Habal do Kivosihan. Iad-no dino i kinotimpunaan do varo gereja RC okonko bai sid Kota Kinabalu, i retanko Api-api, inoi nga sid Penampang varo, sid Tuaran, om sid Bundu Tuhan nga varoi, sid Tombunan om Keningau om Papar om varo-po sid tanga dit Ongomomogun sori ponong.

(Ong sodirizon dot onibak i pitonidan do Gorija RC om i tokou Protestant, ino-no it puun do RC, It ulion dioti di bai iso-no, i retanko gumanti di Petrus di kumavid di kungsi do surga (imatai sid Matius 16 i boros di Kristus kananganko i tugas di Petrus). Ino Pope dino it iso it ulun sid Gorija RC dit elo manafsir di sokoviai i Kitab om paratu di harati do Kitab. Iosido mangahatul di sokoviai i gorija, mapangkat dit ongopandita om ongobishop, isuhut di dau do kenginan om i vaza dau momolitik. Varo a-ko piro o hoturan, iadko a-kavasa mangakan dot onsi ontok di hari lima, tu i kinapatazan di Yesus, ontok di hari Lima ko Jumaat. Suvai mamung sid poginakanan di Tuhan Yesus, ong nakakun-no laid i sala sid pandita do toduvo-duvo kopitoguvang sid almari (dot osusa mangarait di sokoviai i karaatan om pongitungan dot araah, retanko suvai iadino om osusi-ogi do tumoronong sid meja do Kinoringan). Kagi ong mongohormat di poginakanan di Yesus dino, hiza dot i Pandita mamarakat di roti om it anggul, ino roti om anggul retanko jumadi dot osni banal om raha banal di Yesus, supaya it ulun di milang makan, mad mongogop di Yesus. Ong it inumon, bai i pandita minum, tu kaluto ong amu osusi banal it ulun Kristian, kisala iosido ong amu apatut o gama dau mongohormat di poginakanan di Tuhan Yesus om mongoguna dit inumon dino. Sabap bai i Pope o kavasa manarang di Kitab, alaid-nopo it ongoulun Kristian dot RC a-no kavasa mamasa di Kitab, lobipo ong sid dau do boros. Ogumu o gama sid liturgi om sid gama minta dua, varo-no ong sid Bahasa Rom om okonko sid bahasa dau kondiri. Bai hiza dit enampulohan om varo-ogi Pope do minangaratu do kivosihan, dot ipat-ipat it ulun RC kavasa-no om inonsug-no do mamakai di solinan do Kitab sid dau do boros om sid gama sumambayang, sampai ino boros kondiri dot ulun o pakazon sid gama mongohormat do Kinoringan. Varo-po gama mongohormat dit idi di Yesus, ino-no i Mariam, tu retan dit iso i Pope kodori diri, dot i

Mariam dino, minsanko nousu-po i Yesus, kakali sumuni iosido pempatai, gam it idi di Mariam, nga Sumuni-no laid dot pempatai. Tu ong sumuni, ino-no ondu dit a-minolunung do kusai om amu napakai do kusai. Retanko iti-no o sabap dot i Yesus ulun dot aso sala, tu okonko antad sid kusai o kinosinaan di Yesus sid vaza rumanzat. Sabap sid RC varo-po tudukan dot i gama mirompit di kusai om it ondu, nga kasalaan, retanko iti diti okonko kenginan do Kinoringan. Ino boros di Zabur 51 i minamalid di gorija RC retanko hiza do mogontizan it ondu o nokotimbaru do sala, om i kusai nga iadinoi. Minsanko i pongitungan do pinizaan di kusai om it ondu, nga pongitungan-no do kasalaan, ka. Iti-no o sabap kagi dot labaan do 700 toun, a-koho i Pope do manansavo it ongopandita, retanko, suvai iadino om osusi-ogi banal i pandita sampai kadapat-no kumavid di poginakanan di Tuhan Yesus om mangagazad om menggembala di piumpugan. (ong otopot, sid pialatan dit 400 000 pandita dot RC di didino, varo ongo 80 000 di kisavo ko kikoruhang dot ondu, minsanko okonko retanko savo dau. Ogumu o pandita RC dot amu kogoos dot iseso iosido, nga lumabus do tugas do pandita, tu kakali a-koho i Pope do kisavo ong pandita dot RC). Tanid mantadko ino, i gorija RC manaud dit ongokinodou* do gorija di mad minonsiou do gorija, ino-no it ulun di minokipataii, gima i kosipan dau hiza dot kakali ogusa-no it ongokristian, ko pandita om Bishop dot ahatul o gama dau monuduk om mangagazad di gorija diri. Inot ongoulun dino, retanko it Ongosusi do gorija, gunaon banal sampai minsanko minta dua do mokitulung om mokiontok dioti ko mokitambangan dioti kavasa. Lobipo ong i idi di Yesus, i Mariam, tu ong i Mariam mongontok banal dot ulun sid gama mongontok minta dua om mokitulung. Ong a-katama it ulun do mindamo do Kinoringan ko i Yesus, mindamo sid di Mariam, tu i Mariam, retanko polombus dit indomoon sampai iosido agazo o ginavo dau mobpuput dit ulun dit osusa. Ong sukul inhatus mindamo dot, Tulungai-oku o Mariam, tantu agazo o kotulungan, ka.

*(Ot Ongomomogun oubas mongitung dot kodung minatai it ulun do kironuw, retanko sumiliu do lumaag. Ong kusai =Ongkosigal, ong ondu = Divato. Ong sumakit ko kikosuaan, kadapat mongodim (mangambo) dioti mokitulung. Mangambo do lumaag = 1.) minta dua sid ongoosundu, 2. mongodim do mokitulung. Lumaag (osundu) = kinoringan, ansamung, barat ko nunu-nopo i retanko osundu)

Ong kiroon tokou i Gorija RC hiza di nokotongkizad i Martin Luther om i Zwingli om Calvin antad sid Gorija RC, agazo-no o pitonidan di diri om i bianco. I kogumuai it ongokolonduan do Pope i hiza diri, natagan-no vagu, ino-no, it ulun Kristian dot RC kavasa-o sampai ionsug-no mamasa di Kitab. Ogumu it ongoulion do gorija RC dot amu-no modtingaha dit ongopomorinta di momogos om monguasa di piumpugan do Kristian, gam mogihim di katagan, ong opogos it piumpugan antad sid ongohoturan dit ongodiktator iadko sid Latin amerika. I hiza di milang sid poginakanan di Tuhan Yesus, ino roti notuntugan-no laid dot anggur om akanon-ogi dot ulun, i harati, it ulun RC kotiim dit ongotanda di kinapatazan di Yesus sid duvo-duvo o buatan, onsi om raha ko roti om anggul. I-po vaza do gorija RC kodori pakaraat dit ongoulun, retanko kisala-nopo dot i sala mad tinungkusan antad sid di Adam, okurang-no o gama ong bianco do pohodtol-po dino tudukan dino, minsanko kakali i Pope amu mangakun do varo famili-planning dot ahatul. Kakali retanko dau do bai sid gama mangagama dot anak atag dot i kusai om ondu di minisavo mirompit mizut. Topot ong bai tomod mirompit nga kakali sala dot ulun. ka dau.

Ong kiroon om onsizon i sokoviai i kosipan dot RC, tanid-no, okon-noko mangasip-po dot i Pope ot ulion di sokoviai i gorija, tu iosido-no o panakai di Kristus, ino-no i hal di pomodsuan, om i poginakanan di Tuhan Yesus om i hoturan do gorija, mad aso-no bida tantu mantadko i pongitungan om kiroon om kohorotizan dit ongogorija Protestant om Orthodox. Iadino it kinolumbatasan di sid Lima toun 1982, upakat dit ongoelo it ongogorija dino mongonsi om mongimpuras dit ongokosipan om tudukan dit ongogorija.

I Gorija Anglikan

Okonko insan-induvo-no i Porinta British pongonsug do minongodim om mongingut do Kina sid Hongkong om sid ongodaerah dit osomok sid Hongkong do maliu sid Sabah. Manjadi hiza di kotimpunaan dit abad -20, varo-no vagu songtumpuk o Kina rumungkap sid Sabah antad sid daerah do Quanshou, ino-no ulun di nokosuvang-no laid sid Gorija Anglikan sid Kina. Ioti dino, tanid-no

vagu o bahasa daerah dioti, a-kopiharati do Hakawa om Hokien. Na ino pongoretan Anglikan, antad sid Ingeris ko England, ulun di sumuhut di denominasi do Protestant, i nokembulai sid England, ontok dot i raja do England nokotongkizad antad sid Gorija RC. Supaya osodiri, inot ulun Kristian di sumuhut di hoturan om liturgi di gorija sid England om i Bishop sino, retanko Anglikan, minsanko sid Kina ko sid Sabah ot intoronon dioti dino.

Kodung nakarangkat sid Sabah, sinumusui-no it Ongoanglikan dit ongororija vokon do pengkakat di dau do gorija sid rompit dit ongororija vokon sid Jalan Mission, tu i kiroon diri, okonko gorija, bai mission, tu sid pomogunan vagu. Sabap i pomogunan do Sabah di hiza diri sid hoturan do British, sinukung di porinta i gorija dot Anglikan. Sabap minsanko it a-ko piro it ongapagawai om ongokarani do British, nga nokosuvang dot Anglikan, na tinumabang-no di gorija dioti dino. Ong kiroon tokou it puun banal do gorija Anglikan, ino-no keso, i reformasi do Anglikan okonko antad sid vaza do kosipan om pongohorotizan do Kitab om i sala do gorija dot Rom diri di nokotongkizad antad sid tudukan do Kitab, inoi nga i gama di raja dot England dit amu minangakun iosido dot i Pope o mangahatul di pomogunan dot England. Manjadi i pitonidan ponong sid Rom, aso tantu. Kagi sid tanga do gorija Anglikan, varo mad duvo ko tolu o vaza mangasip om sumuhut do hoturan do gorija. Varo retanko dot it Anglikan dit asavat, kihoturan iadko RC ong i Liturgi om i vaza manampakai di pandita om mongumpakai dit ongopanambayanan, rontobamu humarap ko sumuhut di hoturan do Pope sid Rom, varo-no ong retanko, Gereja Anglikan dot osibak, isuhut banal do hoturan do Protestant iadko i Luther om i Calvin moniim do kumavid banal di Habal do Kovosihan dot okurang o gama manampakai om mongumpakai om okurang o liturgi, topot anaru o gama mengkhobah, tu antad sid panarangan om pasandatan di boros do Kitab kaharati i razat Kristian dit atag o gama mangasip om sumuhut, ka. Varo-po sid tanga sid ongohal dino. Na it ongomisionari di nokorikot sid Kina om i tinumabang dit ongoanglikan sid Sabah, nga ponong sid Anglikan dot asavat. Na antad sid gama di raja potongkizad di gorija sid England antad sid hoturan do Rom najadi-no dot i raja om i sumuhut dau turun-tumurun mungkus-tungkus, monungkus-no ioti ot ulion di gorija Anglikan. I raja m mangkat do Bishop sampai i raja dot England, retanko i monotuod do gorija om i mangapad di kosipan, ka. Iadno dino i nokosurat diri sid ringgit do British North Borneo, Sarawak, Singapore om Semenanjung, i retanko Straits-Dollar: Raja Elisabeth koduvo, i mangapad di kosipan. ka.

Denominasi vokon

Sid pialatan di Rumpak Dunia keso om koduvo (1914-18 om 1939-45) varo-no vagu nokorungkap dot tolu o bansa do Kristian, ino-no i **Gereja Isa yang benar**, ino piumpugan do Kristian sid Kina di siumodiri antad sid ongororija dit inupu sid Barat. Boros dioti, Suvai mugamut banal i gorija di Kristus sid dau om dau do pomogunan om atag-ogi. Amu atag dot i gorija Kina mugamut sid Rom ko England ko siombo-nopo. Manjadi suvaiko gorija do dang Kina banal, ong Kina o mangahatul om mamakai do kobuatano om sulung do Kina om hoturan dit antad sid pomogunan do Kina, longoi do Kina, musik do Kina dot amu-no agavul-po it ongohal do kobudayaan do Barat, ka. Suvai iadino om otopotko-ogi ko gorija di Kristus, ka. Iti-no hal diti o nokembulai-po sid ngaran di gorija dino. Retannoko ioti-no sumuhut banal di hoturan di Kristus. Kondiri dioti sid di Yesus nakanu do kosipan om hoturan. Ong otopot, ioti iadko i rombongan sid Korintus di minomoros dot, iokoi diti, i Kristus o suhuton-za (1.Kor. 1,22-25) Sabap baikoi ioti ot otopotko Kristian, amu miupakat ioti dit ongororija vokon om amu nakamung ioti sid Sompuruvan dot Ongogorija Songmalaysia om Sompomogunan.

Varo-po nokorikot i hiza diri i **Borneo Evangelical Mission** antad sid Australia. Gulu sinumuvang ioti sid Sarawak dot sid Lawas o pusat dioti, om iri-ogi sid Ranau-po. Sabap i Mission dino antad sid pomogunan dot osodu it ongokampong om ozongou o pomogunan dot okurang it ongoalun-alun, oubas-no laid it ongomisionari mamakai do tarabang. Kodung sid Sarawak om Sabah, iadino o gama dioti tumulud rumikot sid ongoulun do pasok. Siombo-nopo o varo padang tarabang, sino-no o rikoton dioti monginjil ko i varo riumantai, minonuhu-no dit ongoulun pasok do mangagama do padang tarabang. A-ko piro ot ongapadang tarabang, ioti o minonodia sid sarazo do Sarawak om sid Marak-Parak om Ranau. Na ino Mission (BEM) organisasi do pribadi antad sid Australia. Okonko

gorija o monukung dioti. Sinukung ioti dit Ongokristian di sid a-ko piro ot Ongogorija do Presbyterian, Anglikan, Methodist, Bepstist, Congregatinalist om vokon di sid Australia. Ino mission minongimbulai di **Gereja Sidang Injil Borneo (SIB)**. Ino gorija dino amu nakakaput sid gorija di siombo-nopo. Tu i kiroon dioti, atagal ong varo-no hoturan om varo-no puruvan banal. Ikid piumpugan, dau om dau do hoturan om gazadon. It ulion do SIB aso kuasa mangahatul dit ongopandita om ongopiumpugan om aso sinoda di miupakat om mongolumbatos di ralan do gorija. Varo limo-no o hal di toudon dioti dino do mad Dasar do kosipan, retanko Fundamentals dit a-milo-milo kovidanng kodung otopotko Kristian it ulun, ino-no:

a) I Kitab banalko atarang o tudukan dot iso hurup nga aso sala. I Kitab iadko buuk Sejarah do pomogunan di manarang di kosondoto do pomogunan. I Kitab bai unturu do riniba o minonurat. Topot it unturu dino o tinambangan di Sundu do Kinoringan. Sabap ino amu momoros dot, Iti-no i boros di Rasul Paulus, okonko hoturan do Kinoringan. Inoi nga it ongohurup do Kitab, boros om nituduk do Kinringan, antad kavi sid Kinoringan, tu boros banal do Kinoringan, ka.

b) Ong i riniba, ensanan napalid om kisala sampai penlaid natagak antad sid kovosihan do Kinoringan. Iti-no o sabap suvai opus banal it ulun om mokiada di sala dau, dot i sala dot ulun antad sid kinosinaan mad tinungkusan antad sid di Adam. Sabap ino, ogumu it ongolongi dioti mokiampun-nopo o pamarasan.

c) Suvaiko ulun Kristian it ulun, ong retanko "nakalandai vagu". Ong amu elaan ko ohondom di sera om siombo najadi ino kinalandazan vagu dino, retanko, amu-po osopulan it ulun, ka. Ong i Kitab monuduk, it ulun oruhai tumolikud sid Kinoringan, na atag ong tumoguvang-no vagu sampai muli sid Kinoringan (Markus 1,15), retanko ioti, kodung nakalandai-no vagu, mad kitiket-no sumuvang sid surga.

d) Suvai mangasip dot i Yesus minatai do iadko boli di monogit di rodus do Kinoringan oom i hungot do Kinoringan. Retanko amu mandus i Kinoringan ong amu araha, ka. A-kavasa do mongitung dot ino boros sid Surat Ibrani di mamakai di suntuan do pasamba do dupot, bai vaza manarang di kinapatazan di Yesus, tu kuran-kuran amu oruhai manarang di gama di Yesus om i kinapatazan dau. (Ong i Paulus, vokon-no ong manarang di gama di Yesus sid pamarasan dot, I Kinoringan mamanal dit ulun dit amu abanal, ko, Kinoringan mangalabus di tokou, ko i Kinoringan minonobus di tokou di mad uripon tokou, ko i Kinoringan minongobebas di tokou, nga varo-po boros dot i Kinoringan minonogit dot i Yesus iadko boli. Ino-no o rontob, rontob **iadko** boli, okonko, i Yesus-no i boli di minonogit di karaatan, supaya i Kinoringan avantangan-no vagu ponong sid riniba.)

e) Suvaiko humarap do korikatan vagu di Yesus sitid pomogunan dot i guvas dau rumikot sampai aso gama dot ulun bianco sid tanga do riniba tanid mantadko sumodia sumamung di Yesus. Aso harati di gama sitid pomogunan. Iti-no o sabap dot aso hoturan di minisavo ong Kristian ko i gama gumama gumaji om mansahari ko momuka do kabun om monulung dit ulun vokon. Tu iti kavi baiko Duniawi okonko kiharati. Baik o iso-no o kiguna, ino-no i hal do Rohani, ka.

Varo-po nakamung sid limo ot origi dino i hal do suvaiko osusi it ulun, ong amu monigup ko miinum iosido do kinomol ko menggat-po om agazo o ginavo do polombus di Habal do Kovosihan sid ulun vokon, sampai amu-po gumavul di dang Duniawi.

Ong sid Sabah, sid Ranau o kinotimpuunan om sid mintutuk do Ranau. Iri-ogi varo minongovit di Habal sid Tampasuk, ino-no sid Taginampur it osomok sid Kota Belud om sid Tuaran-po. Topot sid Tuaran, tanid o hoturan. Ong bianco, varo sikul do Kitab sid Emaus it osomok sid Poring. Na i pusat dit okonko tantu-ko pusat, ino-no sid KK.

Na i BEM, i minongimbulai do SIB retanko Faith Mission, Shareit Mission di kikosipan,ka. Sabap ipat-ipat i misionari dioti osusa do mogihim dit ongoulun ko piumpugan di mamalanja di misionari hiza di sid Sabah iosido. Aso balanja dioti dot atatatag. Ombo i siin dit otorima antad sid Australia, ino-no i balanja, okudik ko ogumu. Baik o it ongotarabang diri antad sid pusat dioti sid Lawas. Pengkaa dino i vaza dioti monuduk om mangagazad dit ongopiumpugan sid Sabah: i piumpugan mingkakat kondiri om mamalanja di kondiri, i panambayanan om i ponulung om i pandita. Okudik nga aso kotulungan om bontuan antad sid luar bahagi dit ongopiumpugan. Aso kotulungan ponong sid komojuan di razat do piumpugan ponong sid mutanom ko i vokon. (Bai i Mr White, ong sid

Momogun, Asang o ngaran dau, minomuka do Sawmill sid Taginambur om minonuduk dit ongoulun do mamapan sampai sinod sawmill o pongonuvan di kosukupu di mangagama dit ongopanambayanan diri sid sarazo do Tampasuk hiza di tiga pulohan sampai enam pulohan). Minsanko sid Sikul do Kitab, it ongomurid osusa mogihim di balanja dau. Sabap ino, ong apat toun i kursus penginjil, ong otopot, duvo toun bai muranau om mutanom bahagi di balanja om duvo-po toun sumikul banal do Kitab. Iri-ogi ipat-ipat i piumpugan mamalanja di dau do pandita om ponulung, ogumu okudik, omboko i piumpugan do kuran i vaza di ponulung om pandita mongonsug dit ongoulun mamalanja. Aso tantu rukut bahagi di pusat do gorija om i Pusat aso tantu kuasa mangahatul dit ongopiumpugan om it ongopandita. Ombo-ka-nopo i ginavo om kenginan di ponginjil ko pandita om piumpugan. Manjadi iti diti, varo kavantango dara, tu suvai mongonsug mongorukut ong varo projekt do piumpugan, tu magavi banal it ongoulun mongorukut. Topot varo-po karaatan, tu kodung amu kopionong i tudukan di pandita ko ponulung sid ginavo om kenginan do piumpugan, minsanko avantang banal i tudukan isuhut di Kitab om kenginan do Kinoringan, iri-ogi kumurang i balanja di pandita sampai tilikop i pandita ko maliu om mogihim do piumpugan vokon. Suvai kopionong i tudukan di pandita om i kenginan dot lun om varo-ogi kosukupu di balanja do pandita. ino-no rontob, sabap it ulun dot SIB amu monigup om amu mangavi do balanja sid kinomol om sataut, osukup o gama dioti mamalanja di gereja ponong sid penginjilan.

Varo-po nokorikot sid Sabah antad sid US-Amerika i retanko **Seventh Day Adventists (SDA)** ko Hari Enam. Ino denominasi nokembulai ontok dit Abad ko-19 sid Amerika. Varo iso't ulun sino do mongoguvail di pandita dau, retanko iosido kisundu om kaharati di Kitab lobipo mantadko i pandita. Alaid-nopo miguvail, varo boros dau, Kisala i gorija, tu i gorija amu mongohormat dit adau do Sabat iadko it ulun Yahudi. Suvai adau do Sabat (Sabtu) om atag-ogi mongohormat dit adau do pongitaranan, ka dau. Retan-po dau ko, ino hoturan dino antad-po di hiza kinourugani do pomogunan tungkus-monungkus a-kavasa do simbanon. Manjadi ino tudukan dau dino najadi do kongkod di kosipan dit ulun SDA. Banal-no ko varo iso't ayat sid Kitab di momoros dot, Ong sukul ensanan i riniba mongohormat dit adau do pongitaranan dot iso nga aso karanggal, iri-ogi kembulai i Karajaan do Kinoringan, ka. Iti-no o sabap momoros it Hari Enam dot, Baiko iokoi ulun dot SDA ot otopotko sumuhut di Yesus. Ong i vokon kavi Ongokristian nakalandu, tu amu sumuhut di pinonuhuan dit Adau do Sabat, ka. Sinod hoturan dioti varo-po nakamung dot, A-kavasa monigup (minsanko kavasa mananom om mokihuhuntung sid gama mananom do sigup, iadko sid Goshen), amu mangakan do vogok iadko it ulun Yahudi, amu minum dot inumon di kavuk, ino-no i kinomol, anggul, tee om kopi. moniag-po dit ongondou do Momogun mamakai di sulung Momogun ko moningkol ko mongorilit do saring ko monontimpuku dot obuk. Tu iti kavi dang rogon o hal,ka. Manjadi, ong akansang o gama sumasi sid ulun vokon di kosipan dau, ino-no it ulun dit a-milo-milo sumuvang sid surga. Sabap it ulun SDA mad monobus di tiket bahagi sumuvang sid surga.

Manjadi i gama dit ulun dino mongingut dit ongoulun vokon nga banalko nokosurut i piumpugan om rombongan dau sampai bianco, jinutaan it ulun SDA. Minongirim ioti dot ongomisionari sid sokovia i it ongopomogunan songriniba di pengkakat di gorija SDA. Ong sid Sabah, sid Tamparuli o nokogulu do norikatan om sino-no i sikul om pusat dioti. Ogumu o balanja om bontuan antad sid Amerika, kosulungan om koringgitan.

Sabap a-ko piro it ongomisionari ulun do mukabun, minonuduk ioti do muranau dit ongoulun do pasok siti om tumabang-po dit ongoulun manganu dit ongotana dit arantai, iadko sid osomok sid Kota Marudu. Gam pinentoron dit ongoulun sino sampai minangarait di konopuan sino do Goshen, iadko i pomogunan di sid Masir, inintoronon dit anganak di Yakub. I boros dioti sid ongoulun, Ikou dino, nga it ulun Ibrani di mizon sid tanga dit ulun dit amu kasip, ka.

Na hiza di TM 1950 varo it -ako piro i penginjil dot SDA rumikot sid Daerah Kudat, ino-no sid Tamburulan om Merebau, it ongopomogunan di sompi kikonopuan di miuma ranahon. It iso i penginjil diri, i Bohan o ngaran dau, ulun do Batak antad sid Sumatera. Iosido o minongimbulai di piumpugan sid Merbau sampai minonginjil iosido sid Kumbatang om Parapat.

Suvai notoliban i Mononjipun, omvaro-ogi misionari do **Baptist** (i gereja di mamakai di kopomoduan di bai it ongosukod ot obuli do podsuon, ong anak-po amu obuli, retanko ong bai anak, amu-po kaharati di kogunaan do kopodsuan. Aso nokiro dioti dot i kopodsuan dino tanda di barakat om kovosihan do Kinoringan di nitahak sid riniba, minsanko anak-po it ulun) om misionari do Lutheran (ino-no i gorija di sumodiri antad sid Protestant, retanko suvai sumuhut banal di Martin Luther iri-ogi atarang o kosipan dot ulun, ka. Ioti kavi sinumuvang sid Sabah do tomod tumabang dit ongosikul dit ongogorija om porinta mangatag ombo i norungoi hiza di mononjipun. It ongolutheran tinumabang di gereja Basel Fui sid KK om sid Sandakan. Alaid-nopo i Gereja basel Fui minamung sid Federasi Lutheran do Sompomogunan, tu ogumu o kotulungan do nadapat dioti antad sid Gereja Lutheran sid Amerika. Topot ong it Ongobaptist minongimbulai di dau do gereja, isuhut di hoturan do Gereja Baptist sid US-Amerika Selatan. Manjadi sampai biano atabangan ioti di gorija sid Amerika dot ogumu o balanja antad sid Amerika do tomod pazazad di Gereja Baptist sid Sabah.

I KINOTIMPUUNAN DI GEREJA PCS: GEREJA PROTESTANT SID SABAH

I hiza dit nosunsub-no kavi it ongomisionari antad sid pomogunan do Kina, varo iso misionari di Basel Mission, ino-no i Pandita Bienz di minaliu sampai rinumungkap sitid Sabah. Alaid-nopo minongodoraka-no i ranzat do Kina, gima araat i hoturan sid Kina, ino-no it ongoulun do kitana minomogos dit ongoulun dit aso tana, om it ongobansa vokon minogihim do momorinta di pomogunan do Kina. Sid saralom dit 35 toun orunggal-no i pomogunan do Kina sampai nakamanang-no i hoturan do retanko Kommunism. It ulion dioti dino, ino-no i Mao Tse Tung. Iosido minonuhu-no dot monunsub di sokoviai it ongoulun di bai ombuvoi di moniim do monguasa dit bansa do Kina, minsanko it ongomisionari, nga sinunsub dau, tu ka dau, ioti bai mamakai dot ugama Kristian sid gama monguasa om momorinta di bansa do Kina. Banal-no, i Kaisar do Kina suvai minangakun do varo kazazadan di Habal do Kovosihan hiza dit notori-no iosido sid rumpak dot Opium ko Dada. Sabap i toun 1839 nemot-no dit ongosojal do Kina sid ongovalai dit ongoulun di minongojuval do Dada do 20 000 tuung dada do tolimo-limo nopod kilo, i minoniim ioti do ongojuval sid Kina, minsanko a-nokoho i Kaisar do Kina di gama mongojuval do iadino. Osusut om olingob o gama dara dioti porikot sid Kina do Dada. Manjadi i Kaisar minonuhu-no do pada di dada sid rahat. Iri-ogi minongogorot dit ongomidagang di dau om dau do porinta do mongorumpak di Kaisar om mokihorogo di dada dino. Na it ongoporinta British om Fransis om USA om Belanda minongohukum di Kaisar do Kina dot osusa iosido mangapus di dada di norungoi om mangakun-po iosido dot antad dino kavasa mongojuval do Dada sid Kina om manahak iosido do laisen sid ongomisionari rumikot sid Kina om monginjil sid razat do Kina.

Na i Mao Tse Tung minongolumbatos-no dot a-kavasa momongo di gama monginjil, ong ulun do luar. Ong varo gorija sid Kina, suvai kengkakat kondori i gorija do mamalanja di kondori, okonko varo-po bontuan antad sid luar, om mongohatul di gorija kondori sampai monginjil kondori. Iti-no o sabap do nosunsub-no kavi it ongomisionari. Minsanko i misionari do Basel Mission dita-insan nakagavul sid gama midagang om momolitik, nga nosunsubi.

Na i hiza diri minangahatul-no i komitee do Basel Mission dot i Pandita Bienz rumangkat sid Sabah, tu kaluto varo tugas dau sid Gereja Kina do Basel Fui, i nokengkakat kondori i toun 1924 sid Sabah, minsanko aso kotulungan do Basel Mission diri. Nokorikot-po sid Sabah (1950) om rinumaun i Bienz sid Sabah diri, varo-no cadangan dit Ongokina do mizon iosido sid Kudat, ino-no sid valai di nagama-no laid di Pandita Schuele. Sabap ino valai dino, hiza do Mononjipun inanu-no di Jipun do Rumah Sakit dit ongosojal do Jipun, sampai ogumu o sojal do Jipun minatai sid valai dino. Iti-no dati o sabap dot amu katama banal it pandita do Kina mintoron sid valai dino. Na i pandita Bienz minizon-no sid valai dino om tinumimpuun-no magandaha dit ongopiumpugan do Basel Fui antad sid Tenom om Papar om Api-api sampai sid Tawau. Ong hiza di sid Kudati iosido, rinumikot iosido sid a-ko piro it ongopiumpugan sid Kudat, iadko Pinangshu, Bak-bak, Lausanba, Tamalang, Bandau om Pitas, isuhut di kotibango dau diri. Na a-milo-milo nemot-no dau it a-ko piro ot ulun di Pasok Momogun sid pasal ko i gumaji sid kabun do Kina sampai nakaharati-no iosido do varo-po ongondou do Momogun di nakasavo-no do Kina. Tu varo't Kina di manansavo dara, nga amu miurna do balanja momuru, ong

ondu di dau do bansa, na minanansavo-no iosido sid Momogun, tu amu agazo banal ong i buru sid Momogun diri. Nemot-po dau i iadino, minonginsosok-no iosido dit ongokina do siongo it ongoulun vokon dino i retanko "Dusun", ulun do govuton. Na i timpa dit ongokina, Ioti dino bai ulun do govuton di tanid o boros om ulun di humarap sid ongorogon di banalko tanid o kavazao om bahazan nga tanid banal. Jadi aso tinganan do gumavul sid dioti. Aso sikul dioti om aso pamaju dioti. Suvai monombitil ioti om mindamo ioti do karaja sid kabun. Iri-ogi minsanko bai okudik o gaji, aparui ioti gumama ioti mongoluvus dit ongokabun do Kina.

Bai toriso-iso Kristian Kina minomoros sampai minongoduat om minongkokuro do kuran dara ong ioti-po ot orikatan di Habal do Kovosihan, iadko i Sigu Tong sid Tamalang di nakasavo-no sid Momogun. Topot minsano iosido a-kemot do kotibangon om koriatan, tu guru iosido sd sikul do Kina, om sabap amu agazo banal i gaji dau sid sikul, osusa-po iosido do pamaju di dau do kabun om mogihim-po do kosukupan dit ongkob om it anganak dau.

Insan't adau minongining i Bienz do boros antad sid Tuan Dio (i District Officer) sid Kudat, varo boros dau dot it Ongomomogun siti ponong mad aso guna. Amu elaan dau do hopod-po ka toun ko duvo-no nopod toun-po om opunso-no ioti, tu, ka dau, ioti dino banalko aso tinganan do misisingilo do monimban di kobuatano dau sampai tumorima do komojuan do pomogunan. Ong ioti dino banalko aso harapan do varo kosurutan om komojuan dioti dino, ka dau.

Minsanko iadino i boros om pongitungan dit Ongokina om i porinta, minongitung-no i Bienz sampai minongonsug-po iosido dit a-ko piro o Kina do tumiim sumamung om monoruvang sid a-ko piro o binatang do Momogun dot i tomodon pendongou dioti di Habal do Kovosihan. Sabap ino minongingut iosido di Wong Khiam Fuk, i kotua Gorija sid Sikuat, ulun do midagang om oubas-no laid kumiboros do Momogun do rumikot sid pomogunan do Lajong , handal, Angkob sampai nokorikot ioti sid kampong Rondonom om sid Kimihang. Na iso valai nga aso sinumaap ko minoniag dioti rumikot ko mendakod sid dioti. Isuhut di koubasan sid Gorija Kina, minamakai it Pandita Bienz dot a-ko piro lukisan sid gama dau manarang di ralan kumaa sid Kinoringan om i Wong khiam Fuk pinolombus di tudukan di Bienz sid Momogun. Ino-no it nokohorotizan di Bienz, inot ongoulun sid ongobintang osodia om onining kananganko i Habal do Kovosihan sampai aso sangkut dot amu monginjil sid Momogun. Kagi, hiza di Kristmas 1951, varo a-ko piro o Momogun antad sid Kimihang om Masangkung di ginumaji sid Kabun do Kina sid Tamalang di sinumamung di Bienz, hiza do iosido o minanambayang sid Tamalang minongoduat do kavasa ko amu memot do kuran i Kina sumambayang sid gorija. Na minangakun-no iosido sampai ioti dino minogom-no sid bombong memot om mongining do kasalaan bai sid boros do Kina i tuturan, ino-no i tuturan di kinosinaan di Yesus om iri-ogi sampai nakamung-po ioti do minangakan do kinulat om minimum-po do tii. Manjadi minongoduat-no vagu i Bienz dioti dino do kuran i purimon dioti, avantangan-no ka ioti di habal dino ko kuran, nga minambat-no ioti dot avantangan-, gam engin vagu ioti mongining om mamung.

Ino-no i sabap dot i Pandita Bienz minongirim do surat sid komitee do Basel Mission mindamo dot i Basel Mission pootibang dot iso o misionari bahagi dit Ongomomogun, tu ka dau, ioku kondiri, amu otibang dot asarok-oku ponong sid Momogun, tu ogum u o gamaon sid gorija Kina, kagi amu miuma ong bai mamakai dot ulun di polombus di boros-ku di bai boros do Kina o tudukan-ku, ka. Na i Komitee do Basel Mission miniupakat sampai minongolumbatos dot it iso misionari di kakali linumatang diri antad sid tugas dau sid Kalimantan, ino-no i Pandita Honegger dot iosido kumaa sid Kudat sampai mangaraun do varo tugas sid pialatan do Momogun ko kuran. I harati, i Komitee kakali do bai mangalu-kalu dot ozi ong varo tosodiri do varo gumama ponong sid Ongomomogun. Topot i Pandita Honegger, ong kodung nokotorima dot iosido o gumama ponong sid Momogun, na kodung nabasa-no dau i laporan di Bienz, minomoros-no dot olumbatos, Ioku diti, aso kiro-ku dot bai tumiim, gam iti-no i dohon do gamaon monginjil sid Ongomomogun sid daerah Kudat. Manjadi hiza di 23. di vulan ko-11, 1952 nokorikot-no iosido sid Kudat om rinumusod di Bienz mintoron. Iseso iosido do kinorikatani dau, tu niopung i savo om anganak dau sid Switzerland, tu kakali i harati bai poniiman, ka di Komitee. Suvai atalahas do varo gamaon sid Kudat om iriogi nisuhut-no i suvang dit ongkob dau.

Songminggu-ogi kinorikatan di Honegger, minozo-no iosido di Bienz kumaa sid Sikuat. I hiza diri it

alun-alun rontob sid Sikuati kadapat mamakai do kurita. Mininsamung ioti di kotua do Gorija Kina sampai minongingut dizau do mozo kumaa sid iso binatang, ino-no sid Rampai. Tanid mantadko ino, ontok di ko-9. Disember minokigazad ioti di Sigu Tong kumaa sid binatang do Masangkung. Sorid Masangkung miniupakat ioti di Orang Tua Tuorong do mongodim dit ongoorang Tua dit ongobinatang dit ombo it osomok-somok sid Sikuati do misasamung sid Sikuati ontok di ko-11. Disember dot i Turopong o mangahabal om mongodim.

Norikot-po i janji do kopisosomungan diri, varo't ongo-43 ot ongosukod antad sid ongovalai dit osomok sid Sikuati di mininsamung di Pandita Honegger om Bienz om i Wong Khiam Fuk om Sigu Tong. Miniumpug ioti sid valai do baas Sikuati di mad bai dundung di nataapan do taap om norindingan do noruhak o pagung. I Wong Khiam Fuk minionodia do kinulat om tii. I Tuorong sino om i Dompitok antad sid Tinutudan, i Titikon antad sid Handal, i Ronsunan antad sid Merebau, i Kumpani antad sid Rompai, i Tobubul antad sid Kimihang om ogumu-po i vokon, nga sirii. Iri-no hiza diri o i Wong Khiam Fuk pinentutun di Bienz om i Honegger om i Tuorong o pinolombus di boros dau dino sid Ongomomogun. Nopongo-po, minumbongut-no i Honegger do mamakai di Bahasa Indonesia manarang di tomod do nokorikot iosido sid Sabah sampai minongoduat do koho ioti ko amu do iosido monoruvang sid ongovalai om ongobinatang dioti do tomodon pahabal sid dioti di boros do Kinoringan. Insan po dino, i Tuorong pinolombus di boros dau sid Momogun sampai minongimbulit mongoduat do koho ko amu do monoruvang i Honegger sid ongobinatang. Na i O.T. Dompitok om it a-ko piro i vokon minomoros mangambat dot, Koho. Aso sangkut om aso sabap dot a-koho do rumikot iosido sid ongovalai, ka dioti sampai ensanan ioti minangakun do iadino.

Manjadi antad sid miting dot ongosukod sid Sikuati dino, amu-no nengkod-ingkod i Honegger mamanan rumikot om mindakod sid ongovalai sid somok do Sikuati om ponong sid Gonsomon. Iti-no it ongoadau dit inan-ogi kendakod i Honegger sid ongobinatang do Momogun, isuhut di nalapor dau sid dairi dau:

16.12.52 kakaa-oku sid Kilahon (kampong Minyak ong biano-no)

18.12.52 kaakaa-oku sid Kimihang om Bangau

23.12.52 kakaa-oku sid Barambangon

25.12.52 sumambayang it a-ko piro it ulun do Kimihang om Masangkung sid gorija do Kina sid Tamalang

1.1.53 kakaa-oku sid binatang do Lajong

11.2.53 kakaa-oku sid Loro dot opodok

19.2.53 mindakod-oku sid biantang do Tiga Papan om Gumandang

25.2.52 mendakod-oku sid binatang do Handal (Kandawazon)

26.2.53 linumombus-oku sid Parapat om Angkob om sid Bonduk-po (27.2.)

10.3.53 kinumaa-oku sid Pilang (Ronggu) om 11.3. linumombus sid Lodung om 12.3. sid Kodungkung om Mogong sampai 13.3. sid Pituru

Na ombo i binatang di nosoruvang dau dit kensan-ogi, isuhut dit noho dit ongoulun, ginuli-no vagu dau, tud momongo monuturan di Tukuran di Tuhan Yesus om mongonsug-po dit ongoulun do sumuhut di Tuhan Yesus. Makin alaid makin mindamo it ongoulun do mokiandaha-po vagu sampai amu songkuro diri, varo-no it a-ko piro it ongoulun do minongitung sampai minongolumbatos-no do tumolikud ioti dit adat gulu sampai engin sumuvang sambayang, ino-no o harati, engin sumuhut om tumorima di Habal do Kovosihan sampai mamung sid gorija di Kristus. I binatang di mogulu banal miniupakat dot ensanan ioti sumuhut dino hoturan vagu, ino-no i valai sid Masangkung, ino kampong di O.T. Tuorong om it anak dau i Majimil, dot banalko agazo o ginavo do mokituduk di Habal do Kovosihan. Iti-no o sabap tinumimpun-no i Honegger do monuduk dioti di kosipan dot ulun Kristian, supaya kaharati ioti di tomodon banal do Kristian om osodia-no ioti do tumorima di kopomoduan dot ulun Kristian.

Ontok dit adau ko-24. Disember 1953 kinopomoduan dit insani sid Masangkung. A-ko piro ot ongakob minokipodsu i hiza diri, minogulu i Tuorong om i Savo dau Setia om it anak dau, i Majimil om i savo dau, i Sinunduhi om it duvo it anganak dioti, i Nupia om i Masiun.

Gulu dit amu-po norikot i kinopomodsuan dioti diri, varo-no laid notunggol o valai do panambayangan sid ompulongan di nokosuvang sid tana di Tuorong, dot i gorija dino, i taap pagung om i rinding, nga kajang dot it ongobabaal inanu sid himbaan isuhut di koubasan do Momogun muvalai.

Susuvab-po diri, adau di Kristmas ko-25.12.53, na sid Ronggu kinopomukaan do valai do panambayangan, i sid pialatan do Lodung om Pilang do kopihiza varo kopomodsuan dit ulun antad sid a-ko piro it ongobinatang di minogulu mokituduk di kopomodsuan, ino-no it ongoulun do Pilang, Kusilad, Kodungkung, Lodung om Pituru. Ioti nokopiupakat-no dot bai iso o panambayangan miuma bahagi dino limo o valai sid Gonsomon. Na ontok do Kristmas, tolu-no o pesta dioti diri, ino-no, Kristmas, kopomukaan do gorija om kopomodsuan dot ulun Kristian. Sabap ino, banal noko obuli boroson dot iso ot adau do banalko agazo-no sid Ronggu di toun diri 1953.

Manjadi antad diri menurut-surut-no i kosipan do Kristian sid tanga dit ongomomogun sid daerah Kudat. Vokon-no ong i Orang Tua om i sakup dau minongitung do "masuk sembahyang", vokon-no ong varo toriso-iso ongakob minongitung sampai minongolumbatos do iadino. Ong kodung Orang Tua minomoros, turus ensanan i binatang sinumodia sumuvang om pada dit ongotanda-tanda do rogon, domburan, bangau, pongiran om i iadino. Vokon-no ong it ulun kondri minongidu sampai pinada dit ongobarang di iadino, vokon-no nga amu-po katama ioti pada, minindamo dot i pandita mongidu om pada om monutud dit ongobarang dino. Kopihiza i pandita minangatod do Kitab sid ipat-ipat it ongakob di sumuvang, tanda dot antad biano i Kinoringan mangahatul om monunda dit ulun om it ongakob dioti.

Toun ko-1954 om varo-ogi valai do panambayangan sid Lajong, sabap keso, kakali varo't ulun sid binatang dit amu-po nokosuvang, om koduvo, tu i binatang, ong kodung tinumimpun-no it ulun di nokosuvang na maliu-no sid dau om dau do sulap om kabun, neduan-po i binatang, oduruk om rumobuk-no banal dot aso tinganan do miumpug-po sino vagu. Nopongo-po i gorija dino, varo kosusaan ngaran, ino-no, it ongokarabau dit asarok amu nokokogos sid natad di valai dot ulun, mininsomok-no sid gorija sampai minongorongoi di kajang do rinding. Iti-no o sabap, miniupakat it piumpugan do Lajong do mangansal di gorija do dawai do rugu.

Na kodungko nokoponoruvang-no i Pandita Honegger sid ongobinatang di sid pialatan do Lajong om Lodung diri, varo't a-ko piro ongakob di nokotiim-no laid sumuhut di hoturan di ponginjil dot Hari Enam dot engin maliu sid Kristian Protestant sampai minindamo dot i Honegger mindakod sid ongovalai dioti.

Ino hiza diri nokembali do kopugogutan kananganko i gama misolon dot ulun sid ugama do Hari Enam ko Protestant. Kopihiza di kinorikatan di Honegger sid Sabah nokorikot-no i ponginjil do Hari Enam antad sid Goshen mangaraun di vatas do Kudat sampai nokemot iosido di konopuan do Merebau om Tambuluran di miuma do ranahon. Iti-no o sabap sino-no tinumimpun iosido do mangahabal dit Injil di dang Hari Enam sampai asarok iosido sino. Na tu abangat-no it ongomomogun di adat laid diri om nakaharati ioti dot ong kodungko Hari Enam it ulun, obebas iosido muranau, tu amu-no osusa-po vagu do rogon do tana, varo't a-ko piro ongakob di minamung sid ugama do Hari Enam. Na i Tuan DIO minongitung dot ong varo duvo o vaza do Kristian mongonsug dit ongoulun sumuhut sid dau om dau do vaza, a-milo-milo varo pioduhan. Iti-no o sabap minangahatul i Tuan DIO dot i Organisasi dot Hari Enam a-kavasa rumikot sid vatas do Kudat om i Basel Mission, nga a-kavasa lumapai di volit di daerah Kudat. I pivolitan di natantu di Tuan DIO, ino-no Matunggun. Kodung varo binatang dit nohoturan do Bandau, nga Hari Enam kavasa rumikot, om kodung binatang di nohoturan do Kudat, nga i basel Mission o kavasa monoruvang, ka di kovosihan di Tuan DIO. Bai sid Angkob (Tambuluran) om Merebau i Hari Enam kadapat do magandaha dit isai-nopo i nakamung-no laid sid kosipan do Hari Enam sampai kadapat i Hari Enam do pengkakat do valai do panambayangan sid duvo i pomogunan dino.

Nemot-po di Pandita Honegger dot ogumu o gama magandaha om monuduk di kopomodsuan do Kristian, minangalapor iosido sid komitee do Basel Mission mindamo do varo-po koruhang sid gama

dau. Manjadi i Basel Mission minonuhu di Pandita Haeusermann mamantau kumaa sid Sabah tumalad di Honegger. Kopihiz di Hausermann minozo do kapal kumaa sid Sabah, minozo-no i savo di Honegger om duvo it anak di Honegger. Bai i kotuaan dit anak di Honegger om i sinumusuhut di kotuaan niopung-no, tu nokosuvang-no laid ioti sid sikul. I hiza diri mad aso-po tantu posikiran dot anganak sid Kudat, lobipo ong sid Sikuati. Sabap varo pongitangan do muvalai om mustation sid Sikuati, supaya i Honegger osomok-somok sid ongobinatang do Momogun. Kagi, ong isuhut di kiro dit ongo misionari, mad amu orusod ong duvo ongekob mintoron sid valai sid Batu dua, kopiamung-po dot anak vagu, ino-no i Hausermann.

I kinorikatan di Hausermann sid Kudat, adau ko-15.6.54 om i savo, anak di Honegger, nga nokovozo-no. I hiza diri i Honegger minindakod sid a-ko piro it ongobinatang dot minintutuk mirarapou-rapou mindakod, ino-no sid Masangkung, Merebau, Kumbatang, Ronggu, Lajong, Bangau, Kimihang, Suangpai om Tiga Papan.

Amu songkuro diri, varo-no vagu kopomodsuan sid Masangkung di kenduvo om sid Ronggu, om iri-ogi varo rombongan sid Lajong di minokituduk di kopomodsuan sampai nopodsu-no ioti. Kopihiza minuvalai i Basel Mission sid Sikuati. Notobus-no di Basel Mission i tana do Sama sid rompit di tana do Gorija Basel Fui sid Sikuati. Sino-no o puvavalazan di station do Basel Mission. Suvai vulan kolimo di toun 1955 om nakarangkat-ogi i Honegger om i Hausermann sid Kuati. Nakarangkat-po, varo-no nahatul do misingilo dot ABC dot kensan-ogi banali, sid Boros do Malazu o gama monuduk, sampai i Hausermann, nga bai nokotimpun do misingilo di Bahasa. A-ko piro ot ongokusai dit otuo-tuo-no o minokituduk mamasa dit ongohurup, tu varo kenginan do mamasa kondiri di Kitab Malayu. It a-ko piro it ulun dino, iadko i Angkap, Daang, Diyun, Totong, Angkangon, Majimil om Majukin om vokon-po, nga malingko iadino, nokotimpun-no ioti do monulung mangagazad dit ongopiumpungan sid gama sumambayang om ponginjil-po sid ongopomogunan vokon. Amu songkuro antad diri varo-no vagu rumikot do pandita, ino-no i Werner Sigris om i savo dau, ontok di vulan kohopod 1955. Ioti rinumusod sid valai koduvo sid Sikuati. Topot ong i Hausermann minuli-no vagu sid Kudat sampai varo't upakat dot i Hausermann-no o ponong sid pompod tana o tugas dau, ino-no Tiga Papan, Gumandang, Suangpai, Loro, Kimihang om Bangau nakamung sid dau do tugas. I vokon, kakali sid di Honegger. Tu ong i Sigris, kakali bai misingilo di Bahasa sid sigu do GPS i Sekolah Rendah sid Kudat.

Na i noumba di Basel Mission i hiza diri, ong sukul varo-po iso o pandita, momuka-no vagu dot iso o station sid Pitas. Sabap ino, minindamo-no i Honegger dot iso-po pandita do Basel Mission bahagi do dang Pitas om i komitee do Basel Mission minongodim di Traugott Forschner bahagi di tugas vagu dino. Iosido tinumulak-no sid Germany ontok do Kristmas 1955 om tinumindal sid Kudat di ko-10. Februari 1956. Sabap nening-no dau laid dot amu oruhai karamit di boros Momogun, ong elo-no laid Bahasa, turus minongitung-no iosido dot amu mamakai do Bahasa. Sabap ino, adau di kinorikatan sid Sikuati, adau di kinotimpunan dau misingilo do Momogun. I guru dau, i Bapak Majimil do suvab-suvab mitorungak-rungak di Forschner manalahas ombo it duaton om sangkaon dau kananganko i boros Momogun.

I vaza mangahatul dit ongopiumpungan do Kristian sid daerah Kudat

Iadko hiza laid di Rasul Paulus, kodung mimbulai i piumpungan iadko sid Tesalonika ko Korintus, amilo-milo rumikot i hiza do varo hoturan do piumpungan. Amu miuma do bai poromot sid ongoulun di Habal do kovosihan. Iri-ogi mingkakat om tumurug i piumpungan iadko valai om humatul-ogi i kondiri. Sabap tanid it adat laid di nihatul-no laid do rogon om inumpaladan dit Orang Tua om i bobolizan, om tanid i hoturan di Habal do Kovosihan, dot i Kinoringan paratu dit adat om ombo it atag om amu atag. Sid adat laid varo ogumu it kavasa om amu kavasa, varo't ongohal dit a-milo-milo gamaon om varo ongohal dit tantu-noko a-kavasa do gamaon ko minsan mamalang amui kavasa, ogima ong mongusaha-po ot obuli. Kodung nokosuvang do Kristian i Momogun, atarik iosido dit Adat vagu om mad kakali noboludan-no iosido sid Adat laid, minsanko i pongitangan dau, inedian-no dau it adat om it ongokavazao laid diri.

Ino-no it a-ko piro o hal do minimbulai di hiza diri dit osusa salasazon om sodirizon koduruk. Ong

Momogun, varo adat do kodung minatai i varis, a-milo-milo it ulun mozo sid gama mongolobong om sid gama momukas di lobong. Amu-po olobong i buntung om amu-po nokorikot i sokoviai it ongovaris dit osomok, obpinai, anak, ama, idi, kamaman om kominan, kamanakon om pinsan. Na hiza do mongolobong om hiza do momukas do lobong varo gama bahagi dit ongorogon, supaya orindingan i minatai do kopivozo moginakan. Sid poginakanan dino milang makan it ulun dit onsi di dupot di nakasamba-no laid sid rogon om minum do kinomol, dot asarok sampai avuk banal it ulun, tomodon, supaya olingan om potolong di kosusaan dau sid kinomol. Na ulun di nokosuvang-no do Kristian, gam nopodsu-no, varo-no orikatan do kodim di minatai i varis dau, idi dau ko ama di kakali ulun labus isuhut di adat laid sid rogon.

Isuhut dit adat laid, a-kavasa it ulun dot a-mozo ko mamung sid sokoviai i gama mongolobong om momukas om i iadino. Topot, ong Kristian, kuran? Kavasa-ka mamung sid poginakanan sid rogon om kavasa ka magavuk iadko i gulu diri? Ong i Honegger, tu nakamung iosido sid rombongan dit a-kotudu do kinomol ko nunu-nopo songinumon dot kavuk, engin dara moniag minum do kinomol sampai mangagama do hoturan iadko Hari Enam dot a-kavasa i Kristian minum dot inumon dit akansang. Ino-no rontob, nelaan dau dot i hoturan di iadino sumaap di Habal do Kovosihan. Sabap it ulun Kristian amu orindingan dit ongo a-kavasa, inoi nga obebas it ulun Kristian di nunu-nopo songhoturan di moniag om mongogorot. Kagi, asarok it ongoulun Kristian amu minongduat laid di pandita, inoi nga minamanau mongivas mamung sid gama mongolobong om mongukas do suvai avuk-no laid om orikatan i habal do iadino it ulun dino, minsanko Kotua iosido do piumpugan. Varo om varo di minomoros, Ong sukul ikau Honegger moniag dahai do momoros: A-kavasa do iadino, Kaluto sumuhut-okoi dino, ka dioti. Na amu katama i Honegger momoros om mongolumbatos di iadino, tu nelaan dau laid dot minsanko monuhu om moniag, aso tinganan moniag om monobon di gama dino.

Ino-no it upakat ioti ongomisionari diri minongitung, osuhul-no ong mogihim do vaza mangahatul dit ongopiumpugan sid gama miupakat dit a-ko piro o hal di mad adat vagu do Kristian.

Keso Miting dit ongosukod dit Ongopiumpugan Momogun

Manjadi ontokko i ko-28. sampai ko-29. Disember 1955 varo **miting dot ongosukod dit kensan-ogi sid Sikuati ot pinumpugan**, sid pogun do valai laid di Sama. Ino-no i tinomod di miting diri, mokitalahas di pitonidan dit adat dit angaki om i kavazao dot ulun Kristian. I pandita Honegger minanarang do kuran i gama sumambayang sid rogon nokosokot sid kuposizan dot ulun dot aso't elaan dot amu mongoguna dino gama sumambayang. Hiza do kinalandazan dot ulun, hiza do rumait om mogontong, sampai hiza di kapatazan varo kuasa do rogon di mangahatul om mongunang dit ongomomogun. Manjadi, ong bianco, ka di Honegger diri, tu nakalabus-no sid kuasa do rogon, nengkod-no ino hoturan laid diri sampai it ulun Kristian a-milo-milo mozo di ralan vagu. Antad di kosinaan sampai sid lobong, it ulun sid kuasa do Kinoringan sampai i Kinoringan mangahatul di kuposizan dit ulun Kristian om manahak do kavazao vagu. Kananganko i gama mamung sid pangalabangan do varis di kakali labus om i minum do kinomol, aso kinolumbatasan sid miting diri.

Kananganko it pesta di mongontok di Pamapakan, minonuturan-no i Honegger do kuran it ongokristian sid Swiss om Daya mongohormat di kamatan, ino-no i kapangaan mongomot sid gama mongorukut bahagi di gorija, supaya i gorija kadapat monulung dit ongoulun dit osusa. Iri-ogi minongongsug iosido dit ongosukod, supaya ioti mongitung om miupakat dara do hoturan di kopionong sid Ongomomogun di miabal di hoturan dioti sori.

Iso-po o hal di novit sid miting dino, ino-no it umul dot ondu hiza do kopisavaan, tu nemot-no di Honegger dot minsanko kakali anak-po it ondu, kasarakai asavo-no laid, minsanko amu-po kaharati it anak do nunu o kosungguvo dau. Sid hal dino, tinuturan-no di Honegger dot ong sid dau do pomogunan, varo hoturan dot suvai miuma it umul dot ondu do sampai 20 toun, iri-ogi kavasa patanid dit ondu dino. Kodung noboros-po di honegger do iadino, binanal-no dit ongosukod do sumuhut di hoturan do suvai 20 toun ot umul dot ondu om miuma-ogi do pusavaan. (ino-no rontob, aso-po boros diri dot isai mangaratu dit umul dot ondu, tu i hiza diri aso-po surat do beranakan sampai ong engin, kakali ino kenginan dit ama minanantu dit umul dit anak dau, miuma do 20 toun ko amu. Ong otopot,

ino kinolumbatasan diri a-insan napakai-no sid ongopiumpungan ino).

Koduvo miting dit ongosukod do gorija Momogun

Ontok-ko vulan kapat 1956 miniting-no vagu it ongosukod, kavi-avi i noumpug sid Sikuati diri, 43 kinozuvan antad sid 25 o pomogunan. I tinomod di miting diri, mongimbulit banal di kananganko i kapangaan banal dit upakat di miting dit insan-ogi om momongo banal dit upakat kananganko i vaza mangahatul sid piumpungan: isai mangagazad di piumpungan, isai it ongoosukod do piumpungan om i tugas dau, isai kumavid di kungsi di valai do panambayangan sampai i momuhau, songkuro i balanja bahagi di ponulung antad sid kampong vokon, om kuran, supaya varo kosurutan dit ongominging dit ongosukod. Manjadi miniupakat-no sampai minongolumbatos it ongosukod dot atag dot torono-onom vulan komiting it ongosukod do piumpungan, tu ipangahatul di piumpungan dot ulun Kristian.

Kotolu miting dit ongosukod do gorija Momogun

Ontok di vulan kapat 1957 varo korikot i pegawai do basel Mission, tu mangaraun iosido di gama di Basel Mission sitid Sabah. Humiza di kinorikatan dau diri komiting-no vagu it ongosukod sampai minokituduk it ongosukod dit ongopandita do kuran banal i puun do gorija om piumpungan. Manjadi sid miting diri o kinotimpunaan do varo panalahasan di boros do Kitab sid saralom di gama sumambayang om miupakat di hoturan do gorija. Ino-no it onsi di tudukan diri:

1. Korintus 3,11: I Yesus it origi do gorija, aso vokon.
1. Korintus 12 I Yesus Kristus iadko it ulu do guvas, nga ulion do gorija.
I gorija ino-no i guvas di Kristus. I koburuo sid guvas di Kristus,
i tokou ensanan, nga mokot-sokot sid guvas, ino-no i Kristus.
Aso kopudan tanidko sid guvas, om it ulu, ino-no o mangahatul di tokou.

Na i Pandita Witschi, i ulion do Basel Mission minonuturan do kuran i kinazazadan di Habal do Kovosihan sid ongobansa vokon om minongimbulit-no bana-banalko aso't puun vokon tanidko i Yesus Kristus, i Minananggung do songriniba.

Ontok di miting diri o kinapangaan miupakat di vazaan mamakai di persembaan dit ongopiumpungan, ino-no, iso pitoluvon do persembaan bahagi di pusat do gorija, tu pabalanja dit ongoponulung di monoruvang sid piumpungan vokon. I nobi do parsembaan bahagi di kengkakatan do panambayangan sid ipat-ipat i piumpungan. Varo't osukod di kumavid di persembaan sampai polombus sid pandita di dau do vatas.

Kakal-po i Pandita Witschi sid Kudat, miniupakat it ongopandita do momuka do kursus bahagi di ponginjil/ponulung, supaya varo kosurutan di keloo dioti dino. Na minangakun i Witschi do mogihim do bontuan bahagi di kursus dino.

Na hiza di nakatalib i miting diri, minuli-no i Honegger om it ongekob dau sid pomogunan do Switzerland.

Tolu-no miting vagu dit ongosukod 1957-58

Sid saralom di duvo toun vagu, varo-no vagu tolu o miting dit ongosukod do gorija. Iti-no it onsi di gama mokituduk om miupakat sampai mongolumbatos sid ongominging diri:

I hoturan di piumpungan dot ulun Kristian.

Antad sid tudukan di rasul Paulus sid saralom di Korintus keso inonsi-no i hoturan dino do pengkaa: Varo hopod ongoorigi di piumpungan, ino-no

1. I gorija, ino-no i piumpungan di Tuhan Yesus, di mintoron sid tanga do riniba, nga i kosungguvo dau sid karajaan do Kinoringan.
2. I Kitab dot Osusi o monuduk di gorija dot iso-no o Tuhan, ino-no i Yesus Kristus, i Minananggung, i mangahatul di gorija sampai bianco.
3. I piumpungan opud sid gama sumambayang.
4. I kopomoduan o tanda do nakamung it ulun sid piniizaan dot ulun Kristian.
5. I poginakanan di Tuhan Yesus o tanda om kakansang di piniizaan dit ulun Kristian sid saralom do koposizan.

6. It ulun Kristian okonko iseso, kikoruhang iosido do tolu o bansa, i savo, it onkob dau om i sombol.

7. Sid piumpugan i pandita om i ponulung om it osukod do piumpugan mongontok di Tuhan Yesus mangahatul di katagan do piumpugan

8. I piumpugan dot ulun Kristian engat i gama monunda dit ipat-ipat it ulun Kristian, supaya korikot it ulun om atarang-po i piumpugan.

9. i piumpugan apasi sid tanga do pomogunan om ipamasi diti pomogunan om i hoturan dau.

10. I piumpugan om it ulun Kristian sumasi di gama di Tuhan Yesus moninong dit ulun di kakalpo osodu.

Manjadi nosukup-po i gama mongimbulit di tudukan di Paulus om nosukup-po i gama manarang om mongolombus dit ira dino, iri-ogi minangakun-no it ongosukod om ongoPONULUNG om pandita, ontok di Januari 1959 do iadino i hoturan dit ongoPIUMPUGAN om iadino o upakat om kinosondoto di harati di Kitab dot Osusi bahagi di **Hoturan di piumpugan dot ulun Kristian** om nitahak-no i hoturan dino sid ipat-ipat it osukod om piumpugan.

Kursus do ponulung dit insan-ogi.

Suvai nokensomok-no i vulan ko-10 1957 om osodia-ogi i kosukupu bahagi di kursus ko sikul dit ongoPONULUNG, ino-no balanja bahagi dit apat onkob. Sabap atalahas ong it ongoPONULUNG sumikul, amu-no otibang-po do mogihim di balanja dau kondiri, sampai ong alazan ot santoun o kopongumo, atalahas dot aso balanja dioti hiza di kouli vagu ioti sid kampong kondiri. Ino hiza diri nokoturug-no i valai do ponulung sid Sikuati do varo apat onkob, hopod kaki kosongoho om 12 kaki konoruvo om varo-po iso dapul om popodsuan om onkob do sikul. Ino-no i nakamung sid sikul dino, i Majimil Tuorong, I Diyun Madalag, i Angkangon om i Osuman-po antad sid Rampai. Sabap i hiza diri i Hausermann om i Sigrist sid Batu dua ot inintonon, i Forschner minangajal antad hari satu sampai hari tiga, om hari lima om enam. Bai ontok di hari empat i Hausermann minonuduk do Bahasa Malayu om i Sigrist minonuduk do kotukangan do kazu om pertanian.

Supaya oruhai i vaza manambayang om sumambayang, varo-no nosodia do buuk dot opodok di varo duvo nopod longoi om a-ko piro Zabur om pomintaan dua bahagi ikid't adau om bahagi hizaa varo kosusaan om karamazan. Ino buuk dino, retanko **Hoturan sumambayang**.

Kopihiza monuduk manafsir dit ongotuturan sid Kitab minanalin-po di Buuk i retan **Tuturan di Tuhan Yesus** om **I Kitab Laid**. Ikiid Buuk dino varo limo nopod ongotuturan di manarang di Tuhan Yesus om mongusul dit usuran di nakatandon-no sid Kitab Laid kananganko i bansa dot Israel it antad kinotimpuunan. iri-ogi notoguvangan i tafsiran di Korintus keso (sino-no o pongonuvan dit ongotudukan sid ongomiting dit ongosukod om i Hoturan di Piumpugan dit ulun Kristian. Kodung nokosikul-no it ongoPONULUNG dino, ioti-no pinolombus di nohorotizan i tudukan di Paulus sid ongoosukod sid ongomiting diri.)

Ong hiza di tinumimpuun di kursus dino, indoson-ko miuma dot ongo valu vulan, supaya it ongoPONULUNG kadapat vagu muli om mongumo ong kodung vulan koturu di toun 1958 do nokotimpuun-po, nohorotizan-ogi dioti om it ongoPANDITA do suvai kiguna i kursus ong osombungan-po vagu dot songtoun-po. Iti-no o sabap ino kursus ko i sikul dino antad ko-10.57 sampai ko-6.1959 om opongo-ogi. Hiza do kursus dino, nopongo-po manalin i tudukan dit ongotuturan sid Kitab Laid, varo-po kotibangan diri do mamasa om manalin di nabi Amos. Iti-no o sabap varo-no laid suraat di Nabi Amos om varo-po tafsiran di Nabi Amos di nokobuuk-no.

It ongotudukan vokon, ino-no, kodung hari enam, osinggazung o gama monodia di tudukan di minggu rumikot, sampai ong kodung kouli antad sid piumpugan, hiza di hari satu ipaat-ipat it ponulung minonuturan di dau do pangalaman sid gama manambayang om monuduk di piumpugan. i harati, hiza di sumikul tinumbang i pangalaman sid piumpugan do monodiri ombo i tudukan kiontok banal om ombo it aso guna. Kagi misingilo-no ioti dot ongorumbul om i vaza mongiro do persembaan om momuking do persembaan sid buuk do persembaan sampai i gama mongumba do kosukupu dot onkob om i hal do ekonomi.

Manjadi, hiza di nokuli-no ioti sid valai dau, ikid dioti kadapat-no dot a-ko piro karung parai, ino-no

balanja dau muli, supaya kadapat ioti masi sid kampong, minsanko a-koumo ioti di toun 1958/59.

It iso-ogi valai do panambayanan dit apapag-no nagama

It ongoulun sid kampong Popot minamung-no sid gorija ontok di toun 1956, dot alaid-laid bai sid binatang o gama dioti miuumpug. Alaid-nopo varo't umba dioti do mangagama do gorija. Topot ka dioti, ong kodung mangagama do panambayanan, suvaiko apapag o gama tokou. Sabap it binatang sid Popot, banalko apapag nagama dot it ongoorigi atandas do lugu antad sid ongogovuton. Manjadi miniupakat ioti dot it ulun dit elo mamapan nga mamasagi dit ongokazu sampai mamapan om monodia di kosukupan do babaal. It ulun vokon mangarantai di pagaman do gorija sid lumongon sid pialatan dit ongoranau. Manjadi suvai vulan enam 1959 om opompon-ogi i papan om boruti sampai notibangogi dioti potunggol i gorija do Popot. Tohopod-hopod ulun minonompuzung dit iso it origi di hopod om apat kaki konoruvo om 15 insi kolombono. Ong i duvo i songkol, suvai labaan do tolu nopod ulun minonompuzung di kazu dino di banalko olombon maza sid govuton sid akabong om sid opurun sampai nokorikot sid pagaman do gorija. Aso't iso o kazap dioti dot a-napalas di minanaandi kazu dino, nga otomoni ioti, tu nokorikot sid tempat poturugan do gorija i songkol dino. Manjadi sid saralom dot tolu minggu notunggol-no it ongoorigi om norindingan-no sampai nataapan-no do zeng om varo-po gondila dit aso simpong do basi, inoi nga kazu i simpong, supaya ensanan i rinding kadapat momuka om monutup, supaya ongis banal i gorija. Sid savat varo-po pintuod om it a-ko piro it tukang kayu minangagama do meja dot songinan o lugu ot inanu om linongguvai-po i kazu dino, supaya kotimpak i meja monuturan om varo-po potimpakan di pinggan bahagi kopodsuan om i meja bahagi di poginakanan di Tuhan Yesus. Adau di ko-17.7.59 kinopomukaan di gorija dino om i minggu di sinumuhut, kopomodsuhan dit insani sid Popot. Tu hiza di mangagama do gorija varo tudukan di kopomodsuhan diri.

Miting konom dit ongoosukod do piumpugan.

Manjadi i kinentaranan di sikul do ponulung dit insan-ogi, hiza-no di miting dit ongosukod ontokko 29. sampai 30.6.59 sid Sikuati. Irino hiza diri o kinapanarangan sid ongosukod do kuran i pangkat om gama om i tonggungon dit ongosukod sid piumpugan. I tuturan om tudukan inanu sid Matius 20,25-28 om 1. Timotius 3,1-7 sampai i tudukan di Yesus sid Matius 18,15-17 o inanu do vinazaan manarang bahagi di gama menggembala om monunda om mangagazad di piumpugan do tanggung jawab banal i kotua Gorija bahagi di razat dau..

Tanid mantad keno, nokotimpuun-no i hiza di toun 1957 do varo hoturan do palan minggu, ombo i rikoton dit ipat-ipat i ponulung om nunu i turuan om tudukan di minggu dino. Vulcan-vulan varo nosodia i palan dino sampai miniumpug it ongoPONULUNG monikid vulan, tu mokituduk dit ongotudukan dino.

Kenduvo sumikul it ongoPONULUNG

Kodungko nopongo-no mongomot di April 1960, sinumikul-no vagu it ongoPONULUNG sid Sikuati do poturug laid dot iso-po valai, inintononon dit a-ko piro ongekob dit ongo-ponulung. I nakamung sid sikul diri, hopod om apat ot ulun, vokon-no ong kiongkob, vokon-no ong kakali anak vagu ioti diri. Na it ongotudukan dino, mongimbulit di Tuturan di Tuhan Yesus om sid Kitab Laid, iri-ogi mamasa sampai manalin om manafsir dit Injil di Markus, it Usuran dit Ongorasul, i Surat di Paulus pakaa sid Galatia, Tesalonika Keso om Timotius Keso om Petrus keso. Ino kavi dino najadi-no do buuk di nigama-no sid stensil.

I Pandita Hausermann minonuduk-po di nabi Yesaya om Yeremia sampai i bahasa. I Inai Forscherer nakamung-no monuduk di boros dot Inggeris sid a-ko piro it ongoPONULUNG. I-po tudukan do mongiro do rumbul om koringgitan, nga varo vaza posurut barajal hiza di sikul dino.

Varo-no vagu a-ko piro valai panambayanan dit apapag-no nagama

Sabap noruhak-no banal i panambayanan do Lajong, tu nokinis-no i taap om i kajang, minongitung-no it ongosukod do mangaganti di valai dino. Na suvai atahan o rinding do papan om taap do zeng om

miuma-ogi, ka dioti, sabap nemot-no dioti i gama dit ulun sid Popot diri. Manjadi sid saralom dit a-ko piro vulan nokotunggol-no i gorija Lajong sampai nobuka-no ontok di vulan kolimo 1960. (25.5.1960)

Na sid Kumbatang ontok dit Adau di kinogulianan di Yesus 1960 varo barat dot ologod sampai ginumuzo-no i gorija om rinumosi it ongoulun do humaba sampai ohotungan it ulun. Kopihiza di kakal sumambayang varo't ongokusai di manatas do sungkod om minonungkod di gorija dino, do kodung nopongo-no sumambayang, miniumpug it ongokusai, tu mongitung do kuran kadapat mangaganti di panambayanan dino. Tu ka dioti, orobuk-no it ongoorigi, aso tinganan do monungkod-po ko mangaganti dit a-ko piro i babaal. Suvai gorija vagu om atag-ogi. Alaid-alaid ioti mongitung, varo kinahatasan dot upakat do iadino: okurang o pongonuvan do kazu dot olombon di miuma mamapan. Kagi aso't iso't ulun sid Kumbatang dot elo mamapan. Topot varo kosukupan do persembaan bahagi dumagang do babaal om papan. Ino-no rontob, kuran vaza porikot di papan om it ongoapasagi, tu ong lori a-korikot. Ong it alun-alun di kakali i Porinta monodia, bai sid Parapat o nokorikot lumombus ponong sid Angkob. Na varo cadangan dot, Osuhul i tokou kondiri mangagama dot alun-alun mantadko bai mingguli-guli sid Parapat manaan do papan om it ongobabaal, ka dioti, do turus-no ioti miniupakat dot osuhul mangagama-po laid dot alun-alun, supaya oruhai porikot dit ongobabaal do gorija, tu lori om kurita o mangatod. ino-no i kinapangaan diri, susuvab tumuhun sid Parapat mangarantis om manangkul dit alun-alun, ka. Noboros-po om sampai natantu-no do susuvab diri, bana-banalko tinumimpuun-no ioti manangkul do sid saralom do tolu vulan, nokorikot it alun alun sid pagaman do gorija sampai oduruk nokoturug-no i gorija vagu dot apapag ot origi om papan ot nipongoringing om sampai Taap London o pinanaap. Na sodop gulu di kinopomukaan di gorija vagu nahaba-no i gorija laid, hiza dot ologod o barat.

Miting koturu dit ongoosukod do piumpugan

Manjadi hiza di kinapangaan di sikul dit ongoponulung di koduvo ontok di vulan ko-7.1961, varo-no vagu miting dit ongosukod do gorija. I tajuk di miting diri, manarang om manantu di vazaan do hoturan misavo om i mogontong dot ulun Kristian. Sabap notontuan-no di porinta dot it pandita Hausermann om Forschner do pasasi di kosainan do misavo sampai sid gama mamarakat di misavo hiza do sumambayang, nopihot-no om notontuan-no banal i kopisavaan i dang porinta om i sid gorija. Na it ongosukod minongining om miniupakat dino hoturan vagu sampai minongolumbatos-no dot antad-no dino mamakai om sumuhut di hoturan do minisavo isuhut di hoturan do porinta i retanko Christian Marriage Ordinance.

Ino toun 1961 minonuhu-no i Komitee do Basel Mission do manganu do tana sid Bavang Gazo bahagi sikul mutanom. I hiza diri varo't pongitungan dit Ongogereja sid barat dot avantang dati ong monulung dit ongorija siti ponong, supaya ioti tumabang pamaju do razat sid dau do pomogunan. Minongumpug ioti do bontuan bahagi dino gama dino, om i Komitee sid Basel sinumuhut di cadangan di Pandita Sigrist do momuka do tana om sikul pertanian sid bavang Gazo. I Pandita Sigrist hiza dit insan-ogi iosido sid Sabah, nokotiim-no laid do monuduk mutanom sid a-ko piro o tempat, ino-no, minangaradu iosido sid Sikuati om minanaom do kasang, nga a-nopud, tu ong otopot, hogis i tana sid station Sikuati. (Ino-no o sabap dot i Sama minongojuval di tana dau sid Basel Mission.)

Iri-ogi minoniim iosido mangagazad dit ongoulun sid Rondonon do muranau. Rontob-nopo, banalko apagon rumikot sid Rondonon. Ong mingalud antad sid Tungkang, vokon-no ong ododos banal i rahat sampai aso tinganan rumili di Batu Mandi. Iri-ogi varo Kina di kitana sid Andab dot 48 tinikaran dit a-insan kobuka mangaranau. I tana sino dino, kokutadan-nopo. Sabap ino toun-toun ahandab. Manjadi minangagazad-no i Sigrist dit apat o ponulung hiza di sikul dit insani, tu momuka di tana dino do bai mananom ong kodung varo-no vaig do rodvon-po laid. Kasalaan-ka nopo, kodung kivaig, aralom banal o vaig sampai amu miuma i konoruvo do bibit. Na varoi dara dot oula dot okudik. Rontob-nopo, noumpug-po i parai sid sulap, do sid sulap dino i sokoviai it ongopakakas, radu, surud om vokon, iso o sodop hinumandab-no vagu it andab sampai navi-no i parai om i sulap sampai novuvu-no it ongopakakas dino. Antad di pangalaman di Sigrist di iadino, minongitung-no iosido do

suvai varo kabun om tana do Mission, baru kadapat iosido monuduk di gama mutanom tanid mantadko i koubasan laid do Momogun.

Na i miting-po it ongopandita minongitung-no di cadangan di Sigrist kananganko varo Sikul Mutanom sampai minonimpa sid suhu di Komitee do Basel Mission dot inot umba dino a-kopinong di kavazao do Momogun. boros dioti, It Ongomomogun asarok gumaji sid kabun do Kina om tumabang mangaranau. Elaan dioti mananom do nizuw om kolopioi om momuka do ranau. Bai iso-no ot okurang, aso balanja dioti do dumagang do bibit nizuw ko pakakas iadko radu om surud ko karabau bahagi muranau. Ong sukul varo guru di mamanan om mintoron sid ongokampong tu monuduk om mangagazad om mangahatul do katatanaman dot ongokabun om kadapat mamahagi do bontuan bahagi do bibit om pakakas, tantu miuma i gama do Mission monulung, sampai kodung natanom-no sid kampong, i sanganu o pagama om i sanganu ot manganu di hasil. Ong sukul mangagama do iadino sid a-ko piro o kampong, ino kampong dino mad suntuan bahagi dit ongokampong vokon sampai it ongokampong vokon sumuhut dati di suntuan dino. Kagi, ong bai ongosolumpak vagu mongodim sid sikul dino, anganak do kusai dit a-nokosikul laid, mad aso guna. Tu koubasan sid Momogun ong i hiza dino, ong kodung miringkozou it anak vagu, humago it molohing do patanid om popusavo dit anak dino. Iri-ogi it omulok-po i kusai bai uripon dit ivanon dau sid saralom dit a-ko piro toun dot okonko it anak monuduk dit ivanon, inoi nga it ivanon monuduk dit nokotokin do kuran atag o gama mogihim do kosukupan bahagi dit ongekob dau. Iti-no o sabap i nunu-nopo i nopisingilaan dara dit anganak sid Sikul pertanian, amu kadapat polombus sid ongosukod. Sabap mad mongolumbatiu di hoturan di noubasan do Momogun, ong sid anganak tumimpun monuduk.

Nakahabal-po i iadino, kakali i Komitee do Basel Mission sid Switzerland minongolumbatos monuhu do manganu di tana sid Bavang Gazo. Manjadi amu-po kouli-no vagu i Sigrist, nohoturan-no mangarantis di tana om rumilik-no i sambahagi, supaya kodung korikot i Sigrist di vulan ka-8 1961, kadapat iosido mangasok om posurut dit umba do momuka do kabun om Sikul Pertanian. Amu alaid antad di kinogulian dau vagu, varo-po ulun do pertanian o nokovozo, ino-no i John Staehelin di mamung sid Bavang Gazo. Na hiza di minonutud ioti di tagad do Bavang Gazo, nahandab-no it Nunuk Aragang di banalko agazo om opusok-no do orkid om ongovusak vokon. Ino-no i kinotimpunan di Kabun Pertanian. Sabap i valai di ponulung hiza di kursus koduvo sid Sikuati amu napakai-no vagu, tu i hiza diri aso-po pongitungan do varo sikul dit atapat diri, narangkat-no i valai dino sid Bavang Gazo, supaya varo dara intoronon do pongodumparan, nga kakali sid saralom do sontoun miuli-uli ioti sid Kudat, tu sid Kudat ot inintoronon dioti, om minonodia ioti di sikul pertanian. Suvai vulan ko-10 1962 om nobuka-ogi banal i sikul bahagi di bai ongosolumpak vagu di mokituduk do surat om pertanian.

Kursus Ponulung 1962.

Antad di pangalaman di sikul ponulung koduvo varo pongitungan dot amu posurut do do sikul banal do ponulung do songtoun, inoi nga mongodim dot ogumu ot ongoPONULUNG ontok kokotuai, supaya sid pialatan di kapanganan mongomot om kotimpunan rumilik vagu oguna i hiza dino sid kursus. Tu kodung lumatang it ponulung do sontoun mutanom, osusa i gorija mamalanja do duvo toun. Topot ong mamakai dit iran dot aso gamaon, varo balanja dau kondiri. Kagi, sabap nokosurut-no it kogumuo dit ongopimpungan, suvai miuma it ongoPONULUNG di kisikul om atag-ogi. Manjadi kinumursus-no it duvo nopod om duvo ponulung do sizam minggu kolaido i palajaran, niajal i Surat di Paulus pakaa sid Rom om minongonsi di kosipan om it Ongoadat Vagu do Kristian, ino-no i kavazao dot ulun Kristian.

Upakat bahagi di kosolinan do Kitab sid Boros Momogun

Ontok ko 2. sampai 15.7. 1962 varo miting sid Lawas, sinod pusat di BEM sid Sarawak dot i tinomod di miting diri, popisamung dit ongomisionari sid Sabah om Sarawak, tu mogihim do vazaan popezo di boros Momogun om i vaza manalin di Kitab dot Osusi bahagi ensanan i Momogun. I British and Foreign Bible Society minangahatul di miting diri. Manjadi duvo-no minggu miniupakat it ulun antad sid Ranau om Tuaran om antad sid Kinabatangan om Kudat, nga aso kinapanganan. Bai nitarang-no dot osusa ong amu mizo it Ongomomogun di nokosuvang do Kristian om okonko iseso o Kitab do

Momogun. Tu varo kopurimanan diri dot amu oholian apagon dara popezo dit ongoboros, ong sukul okosog mogihim do katagan. Bang ipat-ipat i mission mongitung do bai i dau do vaza nokonong, iri-ogi a-kemumui i vokon. Kagi varo-po kiboros do banalko humago manalin, supaya opongo koduruk i Kitab, ka. Ino't ulun di hinumago diri mad amu-po nokotiim do bai monodiri-po di boros do Momogun, bai minomoros sid iso't anak vagu sid boros Malazu it ongoboros do Kitab sampai minonurat do kuran i gama dit anak vagu dino manalin di boros dino sid dau do boros. Ong i wakil do Bible society kakali minanansadang dot i gama manalin, suvai kata demi kata om onong-ogi. Ino-no i rontob do kinolumbatasan diri, misasamung vagu it a-ko piro it Ongorongus om ulun do Tanga om Bundu om Ranau sampai Sunsuron ontok di vulan kosizam 1962 sid Ranau. I wakil do Rungus sid Lawas, ino-no i Diyun Madalag om i Forschner.

Sid miting sid Ranau, i Angkap Mangalis, i Diyun Madalag om i Forschner nokovoza do miupakat vagu di boros Momogun. Manjadi sid saralom di miting diri, tinantu-no dioti i surat di dang Rungus ot otopot. Bai kasalaan nakalandu-no i vokon do mamakai do duvo o bansa "e" om "e' " di mongontok di hurup "o" sampai apaganan-no banal ioti do monimban-po vagu dinot ongohurup dino. Kagi ogumu o pitonidan sid gama manarang di kobuatano om kohorotizan di Kitab dot varo-po kopurimanan dot inot ongohal dino okon banalko hal do mitanid i boros, inoi nga mitanid i teologia sid Ranau om sid Kudat. Na kakali miniupakat do miting-no vagu sid Lawas ontok di vulan kotolu 1963.

Iri miting vagu sid Lawas, Mar 1963, i Diyun, Majimil, Hausermann om Forschner o nokovoza. Ino-no i tomodon, monodiri-no banal dit ongopongoretan dit agazo o harati sid Kitab om sid kosipan. Duvo-no minggu dot suvab-suvab dot okonko bai asadapan, vokon-no ong sampai tanga sodop mogom-ogom monodiri manalahas ko mokitalahas, sampai midadahava-po, nga kakali dot aso kinapangan diri, gam varo boros dot ipat-ipat i mission mogihim di dau do vazaan posurut manalin do Kitab.

I kinotimpuunan do varo Asrama dot anganak sumikul

Sabap i vulan ko-5 sampai ko-6 1956 varo-no laid kursus ABC sid Sikuati bahagi dit isai-nopo it ozi mozo, varo pongitungan dit duvo it ongosukod sid Tiga Papan dot avantang dara ong i dioti dot anganak kosikul banal, om okonko bai kumurus dot oduruk. Gam rinumikot ioti sid di Hausermann sid Kudat sampai minindamo do posikuron i duvo it anak dioti sid Batu dua. I kiniro di Madalag om i Manahil, i Basel Mission kadapat-no mongimbulai do sikul. Na i Hausermann, tu obas-no sid guru di Sekolah Rendah sid Kudat (dot i hiza diri bai iso Sekolah Rendah sid ensanan i Daerah Kudat bahagi i Bumiputra, nga bai apat nopod anganak ot oruzod sid sekolah diri) miniupakat-no di Sigu do GPS do pamung di Manjil om i Ibing sid sikul dino. Dot amu-po navi i toun diri, nokolombus-no ioti sid Darjah kapat.

Ino hiza diri, i molohing minonodia di vagas bahagi dit anganak om it inintoronon dit anganak, sid ropuhan laid di valai dot agazo sid Batu Dua. Supaya oruhai ioti mozo di palajaran sid sikul, i Hausermann om i Inai Forschner minonuduk dioti di Boros do Malazu om English kodungko minsosodop. Ontok di kinotimpuunan di toun 1957, nokopisamung-no i Amai om Inai Forschner di Tuan DIO sid padang do Kudat, hiza do minimbaris it anganak sino sampai minonuturan-no i Forschner dot varo't umba di Basel Mission do momuka do Sikul Momogun sid Sikuati, ong kodung opompon i kosupakan kananganko it ongobuuk sid Boros Momogun, ong sukul koho i porinta. Ino-no dati it ontok di kopomukaan diri, vulan lapan 1957. Na ambato-nopo di Tuan DIO dot banalko avantangan iosido dit umba dino, tu kagi nokemot-no iosido do varo a-ko piro ot anganak do Momogun sid GPS. Rontob-nopo, avantang ino ong miupakat-po di Mutip, gam ioku mongodim di Mutip om sumamung dikou vagu sid Batu dua, ka dau. Ino-no rontob, kodungko nokogom-no i DIO om i Dato Mustapha sid bilik garakan sid Batu Dua om nening-no vagu it umba di Basel Mission do suvai osukup-no it ongobuuk sid Momogun om kotimpuun-ogi i sikul sid Sikuati ontok di vulan lapan, varo't ambat di Mustapha dot, Alaid banal ong ino. Ong ioku mangahatul dino, vulan kaapat obuka-no i sikul sid Sikuati, oholian alaid dino, ong ikou o monodia. Kagi, suvai Boros do Malazu mamakai sid sikul dino. Na i Tuan DIO minonukung di Mustapha sampai ino-no i kinahatan do

boros dioti duvo dino: We go ahead = iokoi mangagama do sikul, okonko ikou Basel Mission. ka. (Ong otopot, banal-noko banal do vulan kaapat o kinobukaan di sikul di Porinta sid Sikwati. Rontob-nopo, okonko toun 1957 iadko i boros di Mustapha diri, inoi nga toun 1959. Topot rontob notiag i Basel Mission mangagama do sikul Momogun.)

Hiza di koguli-no vagu i duvo it anak antad sid Tiga Papan, ino-no i Manjil om i Ibing antad sid kampong ontok di Januari 1957, varo-no nokovozo vagu dot onom it anganak, tu tisikul, ikid ioti kotorindak do sagantang o vagas, kokorui sumikul. Boros dioti, it ongomolohing dahai sumiti miupakat dikou dot intoronon, tu keinginan dioti do mangagama do binatang bahagi dahai sid Taman Gereja. Banal-no it ongomolohing sinumori sid Batu dua miupakat di Hausermann om i Forschner do pengkakat dot intoronon dit anganak dioti dino sampai minangakun dot mamalanja dit anganak do bai vagas tasanggantang-gantang songminggu. I Hausermann minangkun do mogihim di kosukupan dot asin om pangavau om totodukon om it anganak tumabang sid kabun mongumpug do nizuw. Iadno dino i kinotimpuunan di Asrama PCS.

Manjadi toun toun varo tumamba dot anganak om ino-no o sabap dot nosusa vagu nosombungan di binatang dot anganak. Topot sabap, tu okonko nopili banal it ongobabaal di valai diri, oduruk banal orobuk-no i palampag om it ongoorigi sampai kodung norikot i toun 1960, osusa-no vagu mongitung do kuran kadapatan do pentoron do sampai kiro-kiro 40 anganak sid asrama.

Na i hiza diri nakapangalapor-no sid Europa dino kosusaan di valai om i balanja dit anganak, tu vokon-no ong varoi it anak dino dot a-kiovit do vagas, tu i molohing, nga novian-no do parai sampai entanga minggu a-nakan iosido. Dot amu songkuro koledo, varo-no duvo o surat do notorima antad sid Europa, it iso antad sid Basel Mission di manarang dot i Organisasi Bread for the World sid Germani minangakun do mongirim dot 40 ribu Ringgit bahagi mangagama do Valai dot Asrama, om i surat koduvo antad sid Organisasi Kindernothilfe (KNH) minongirim do polokisin bahagi mindamo do kotulungan bahagi ipat-ipat it anak sid asrama, bontuan bahagi di kosukupan do kakakan om kosulungan om kosukupan do sumikul dino, ino ikid vulan varo 30 German Mark. Manjadi minangaplai-po it ulion dit Asrama sid Duisburg bahagi di bontuan dit toriso-iso it anganak. Varo boros antad sori dot sid Germani varo't ongoulun di mangakun do mamalanja do toriso-iso ot anak iadon ko dau dot anak, mad manampaganak dit anganak do Momogun di varo sid asrama. Antad i hiza diri varo kotulungan bahagi di Asrama sampai nokosuvang-no i koringgitan dit Asrama sid budget do Basel Mission. Ong i kinotimpuunan, sokovia i balanja dit anganak sid Asrama nga antad kavi sid molohing kondiri om i Hausermann om i gaji di Inai Forschner di minonuduk do sontoun sid Lok Yuk School.

Ontok di toun 1964 it anganak sid Asrama minangagama-po dit ongoongkob sid sunsud di Asrama Duisburg, supaya it anganak sid Sikul Menengah amu-no rumusod sid anganak dit opodok-po. Antad diri nokosurut i kogumuai dit anganak do sampai 56 anganak. Na it anganak di nokogulu nokosuvang sid Asrama diri, nakalapas-no, om gam varo ong najadi do guru sementara sid Lodung om sid Sikul Pertanian.

I kolombusan di Habal do Kovosihan sid ponong selatan om tupak

Hiza di toun 1964, i nokuli-no i Hausermann, varo't ogumu ot kodim dit ongobinatang di ponong sid Matunggung om ponong sid rahat sampai antad sid tupak, ino-no sid Pantai om sid Liu-Dandun. Na suvai vulan enam 1964 om otibangan-ogi dit ongoonulung mamantau om monoruvang sid ongovalai di minongodim. Onom tumpuk do ponulung minamanau do vokon-no ong somminggu, vokon-no ong duvo minggu, ong i ponong sid tupak, tu mangaraun om mongumba do siombo ot atag do posurut di gama pazazad di Habal do Kovosihan.

Varo ponong sid Ponudaan om Ritah, vokon-no ong sid Molongkolong sampai sid Kirangavan om botutai, vokon-no ong sid Nangko sampai sid Togumamal, vokon-no ong sid pompod tana do tupak, ino-no Dalas, Kandang Molubang om Mongkubou, vokon-no ong sid Suang-eloi, Kabatasan om Kusilad, vokon-no ong sid Pantai. Nokouli-po, okonko enizo o habal antad sid ongovalai dino. Ong sid Pantai, okonko bai habal dot engin it ongoulun sumuhut di hoturan do Kristian, gam nokosuvang-no do Kristian it a-ko piro it ongakob sampai nokotimpuun-no do sumambayang ontok di minggu di

nakatalib dot iso o ponulung nakakun-no do rumangkat sid Pantai, tu mangagazad di piumpugan. Ong sid Molongkolong, nga atarang-no do sumuvang sampai it ongovaris dioti sid Botutai. Ong i vokon, ogumu mokirikot dit ongoponginjil, tu amu-po kaharati i nunu banal i Ugama Kristian.

Vulan kosizam di toun 1964 om koturug-ogi i valai do mission sid Pantai, dot ulun do Pantai tinumabang mokibabaal om muvalai. I pandita vagu, ino-no i Otto Dilger minsanko kakali misisingilo di boros Momogun, rinumangkat-no iosido sid Pantai, tu mangahatul dit Ongokristian sid Tupak. Kodung sori iosido, ogumu it ongobinatang sid mintutuk do Pantai mindamo do mokiandaha dau sampai minongolumbatos-no do mamung sid gorija. Vulan konom di toun 1965 varo kopomukaan do Klinik sid Pantai om varo-po kurusus bahagi do ponulung. Sabap ogumu it ongobinatang minokisuvang, suvai varo-po ponulung do mangagazad dit ongopiumpugan vagu dino. Sid sikul diri 29 ponulung sinumikul sid Pantai sampai vulan ko-3 di toun 1967. Ino hiza diri nakamung-no it ongovalai do Golom, Taradas, Gunsali, Tangkarason, Penampadan, Medan, Boribi, Lingkuton, Sulakolung, Narandang, Sinukab, Monduring om vokon.

Ong i Peter Osingko Taganau, iadino ot andaman dau do kuran i **Habal do Kovosihan tumupak sid Lubok do Marudu 1964.**

I Hiza di toun ko-1962, it Ongomogun di nokosikul di nokentoron sid Batu dua (TGPCS) varo-no sansabon do porinta monuhu sid ongobansa kondiri, tu gam poma nga varo-no sid tingkatan sumikul. Toun dino, varo-no nanu do porinta do duvo ot anak sikul do povozoon pasain di minggama do gambal (Kad Pengenalan) hiza do cuti sikul November om Disember 1962. I Mangamban John Kastum om i Albert Manangku nosuhu kumaa sid Konibungan.

Manjadi hiza di sori ioti do duvo minggu, pinasain-no ioti dit ongokad panganalan sampai nosomungan-no dioti it ongoulun sori sampai nohorotizan-no dioti dot it ongoulun sid kawasan do Kanibungan nga 70 % o Rungus. Iri-ogi kenduvo mamananau, kinumaa sid Pinapak om sori, nga nemot-no dioti it Ongorongus sori ponong. Hiza di sori ioti dino, sabap tu ulun do Kristian ioti, minonuturan-no dot ioti dino ulun do Kristian sampai amu tumunduk sid kuasa do rogon.

Na ioti dino, tu kakali sumikul, kadung avi i timpu di suhu do porinta, muli-no ioti do sid Taman Gereja sampai ot ulion sampai i Mission nga manahak dot akanon dioti di hiza do kouli ioti, tu banalko otomon i Mission do varo-not anak antad sid dau do gumama sid porinta, minsanko baiko part time. Manjadi, hiza di nokouli-no ioti, minonuturan-no do varo't Ongorongus di nosomungan dioti sid Kanibungan sampai varo-no minongoduat do rumikot-ko amu inot ongopandita sinod pomogunan dioti sid tupak. Pengkaa dino i sid Pinapak, om nakamung-po i tuturan di John Kastum do nakakavid-po iosido dit unturu di Motumpul (it ulun do banalko agazo, sizam kaki labaan kanaru, i kinodim do porinta, tuv porisaon do nokokuro, osusa mongkub i Motumpul di sumuvang sid Rumah Sakit laid. I onkopu do vana di Motumpul, nga iadko iti lunggazan,ka, ka di John Kastum.

Lobi-lobi-po ong i miting it ongoponginjil di kotimpunaan di Januari 1963, minanarang-no i Musaat (Idris) Manangku om i John Kastum sid ongonulung om sid Pandita Hausermann dino, ombo i nemot om norongou dioti sid Kanibungan om sid Pinapak Pitas. Minonuturan-no ioti dot it Ongopertanian, nga varo-no sid Sulakolung om sid Sinukab om sid Piyas. Manjadi ipat-kovian do vulan di hiza diri, varo-no kursus dit ongoponginjil om ipat kursus dit ongoponginjil di hiza diri minonuturan-no i Musaat om i Mangamban dino kobuatano dit nemot dioti it Ongorongus sid Tupak di lubok do Marudu.

Na hiza di cuti di Pandita Forschner kokotuai di toun ko-1963 miniupakat-no it ongonulung polombus dino boros dino sid Pandita Hausermann sampai minonurat it ongonulung di kokunan ong suhuon mamananau momorisa di kobuatano sid Tupak do mongining do kuran banal dino kenginan dioti sampai inovit-no di Pandita Hausermann ino boros dinot ongonulung dino sid miting dit ongopandita.

Manjadi ontokdo bulan ko-2.1964 minamananau-no i tolu o ponulung tumupak, ino-no i Mohigan Ringkuzan, Osingko Taganau om i Motuka. Hiza diri minamananau-no ioti minozo di motol di Asun, it ama di YB Wong Phen Chong, kumaa sid Pitas Kulumpang. Nokorikot sid Kulumpang, linumombus-no sid Kabatasan do baiko gumau. Nokendakod sid valai di Matarak sid Kabatasan di tanga hari diri. Nokopiboros-boros-po dit Osukod Matarak om it iso it otuo-tuo-no i Amai Tongindang,

linumombus-no sid Rukom do ginumau-no vagu minsarazo. Na nokodop sid Rukom om inumpugan-no ioti di sodop diri sampai minonuturan-no ioti di tomodon monoruvang, ino-no, pahabal dit Ugama. Na i sodop diri, ogumu o nokotoning sampai i Amai O.T. Monugkong om i Amai Olilud. Ong i O.t. Mongundol amu-no nokotoning, tu nakapanau-no sid Suangkiping do 20 inangkaban ot inovi dau, tu rinangkat di Tuan Durai, tu hinatul mangaranau sori dot ahatul o raranahon. Susuvab diri, linombus-no sid Kampong Lajung Pitas om nokodop-no vagu do songsodop sid Lajung, sori nosomungan-no i Amai Mogimbang om it ongorazat dau sori.

Susuvab-po diri, linumapai-no sid Sulakolung do duvo sodop sid valai di Bungkak, tu sinumondot-no o darun di kovian do pangi di toun diri. Na sid Sulakolung, nosomungan-no i Masanang (it ulun dit asarok bosoruvang sid kawasan do Kudat pojuval dotongosukang om mongindorosi dot ongoulun, tu osukup iosido do sukang om sindaat. Sino-no mongindorosi dara iosido dit ongoponulung. Topt amu katama iosido, tu nemot i Motuka. Tu, ka di Masanang, "Amu-oku kerad dit idi-no i Muoronzog, tu iosido osukup-po ko ioku, ka) tu i hiza dino aramai sid di Bungkaka, tu poginananan do manantad dot inongkob.

Manjadi sid kotolu't adau sid Kanibungan, linumombus-no sid Sinukab, sid Kampong di Rumambal (it ulun di banalk okuat diri sid UPKO). Sino minonuturan-no vagu it ongoponulung di tomod dioti monoruvang sid pomogunan do Kanibungan. Na noumpugan-no vagu it ongoponulung do banalko aramai, tu maanantag dot inongkob. Manjadi nokodop-po it ongoulun, miniupakat-no ioti tolu dot osuhul ong muli-no i Motuka om i Mohigan, tu kianak kisavo ioti do hondomon sid valai.

Manjadi susuvab diri minuli-no i Motuka om i Mohigan mintana vagu sid Pitas om linumombus-no i Osingko sid Piyas dot iseso om osinang-no iosido, tu amu akasau di manantag dot inongkob. Manjadi minindakod-no iosido sid valai di Rumunji, ino-no i O.T. sid Piyas om noumpugan-no iosid di sodop diri sampai minonuturan-no iosido di tinomod dau. Nosomungan-no di Osingko it ongoulun do gulgulu sino, ino-no i Sugimbung om it ongovokon. Susuvab-po diri, linumombus-no iosido sid Pantai do niatad di Mosuhal om i Lumukad minaza sid konopuan do Gasop. Sodop diri di kinorikatan sid Pantai, inumpug-no di Basang it ongoulun do Pantai do baiko hopod om iso ot inangkaban, sampai sodop-no diri, kodung nopongo i Osingko manarang di tinomod dau, minokisuvang-no it hopod om iso ot ongekob sid Pantai. Topot amu minangakun i Osingko, tu, ka dau, okonko posuvang o tomodonku, inoi nga baiko pahabal-oku sid dikou dot iokoi sid Tinduk do Kudat amu-no mokiuripon do rogon, kagi ong kosuvang-kou om kouli-oku, no, aso-no mangahatul dikou sid vaza sumambayang. Manjadi osusa-kou, ka di Osingko.

Manjadi iningutan-no di Basang i Osingko kumaa sid Golom sumamung di Mojihung om iningutan-no kumaa sid Kingkuton sumamung di Motinggis om it anak dau, i Rumandut do hiza diri, nga moginakan i Motinggis do Manantag dot inongkob.

Manjadi osomok do songminggu i Osingko sid Pantai om minuli-ogi minaza sid alud do baiko Seagull o pinakai antad sid Kanibungan sampai sid Kudat. Na i minuli i Osingko di hiza diri, inovit-no i O.T. Basang, O.T. Rumunji, O.T. Rumambal, O.T. Majupi om i Amai Bahut om i Tungking antad sid Boribi, tu potoguvangon sdi Pandita Hausermann.

Manjadi sodop di kotimpunaan di bulan Mar 1964, nokotoguvang-no it Ongoketua-ketuan kampong do Kanibungan sid Pandita Hausermann manarang di kenginan dioti dot ioti engin sumuvang do Kristian sampai nakasain-n ioti dino kenginan om kokunanan dioti do sumuvang do Kristian mozo di Tuhan Yesus. Na i janji di Hausermann om i Osingko, bulan June 1964 mamananau-no i Osingko sid Kanibungan om varo't a-ko piro o koruhang. Topot i Osingko nokopunovot di bulan Mei.

Manjadi kovian di vulan June nahatul-no dot i Osuman om i Awasang om i Mojukin mananau kumaa sid Kanibungan sampai nosodia-no ioti sid Taman Gereja mogihim do vazaan kumaa sid Kanibungan. Rontob-nopo a-elaan dot isai o vazaan om isai o rikoton om isai o vozoon, sabap tolu-tolu ioti dino aso't iso o kopirikot sid Kanibungan. Na it adau diri naakalabus-no i Osingko sid Rumah Sakit, minozo di Pandita Forscher tumuhun sid kadai di minsosodop, do nosomungan-no i Amai Majatig om it obpinai dau, i Lumogi do banalko notutunan, tu i hiza di sid Pantai i Osingko dot tolu't adauom sid Lingkuton, nga banalko nakopiatag ioti mihaba-habal. Topot i Majatig banalko ovongo, tu nolinganan-no dai i Osingko. Manjadi inovit-no di Osingko i Majatig om i Lumogi

sumamung di Pandita Forschner om minijanji-no dot ioti Osuman povozoon di vinazaan dioti. Manjadi minozo-no i Awasang om i Osuman om i Mojukin kumaa sid Pantai do nokorikot-po sid Pantai, sinumuvang-no do Kristian i hopod om iso inangkaban, sampai minuli-no i Awasang om i Mojukin. Topot amu-no nokouli ong i Osuman, tu amu-no nokoho ioti sid Pantai do muli, tu Ponginjil-no dioti sid Pantai.

Manjadi i minuli i Awasang om i Mojukin, minozo-no i Amai Mojuring om i KK. Basang, tu manarang-no sid Pandita Forschner do nokosuvang-no ioti sid Pantai. Iri-ogi minanganu i O.T. Basang sid Porinta do katarangan, supaya obebasi it ongopandita kumaa sid Tupak.

Ontok di Hari Kebangsaan do Sabah 1964, nosuhu-no i Osingko kumaa sid Pantai mimot di kobuatano dit olungan do Pantai. Kotoluvan i Osingko mozo do gotong royong mamampang dot olungan, tu osusa tumolong sid vaigi mongogivisi dit vatang om manarik dot alud potindal dit ongovatang.

Manjadi nokouli-po i Osingko, atarang-no dot inot olungan do Pantai kadapat sumulok o motor do kosuatan, sampai nosuhu-no i Osingko mingduat dot isai ot Ubiyan do pojuval do motor. Do nokemot-no it alaid di haji antad sid Mariangin, tiniiman-no di Pandita Forschner om Dilger om i Osingko kumaa sid Pantai dot hopod om iso jaham om korikot-ogi sid tuhanan banal do Pantai, ontok do tanga sodop. Ino hiza diri miniupakat i O.T. Basang om it ongopandita di puvalazan do valai do pandita sid puru di sid osomok sid binatang dioti. Nokouli-po, dinagang-no i Motor dino bahagi do Pantai om ino-no i Motor keso-ogi sid Pantai, i pinungaranan do Bayan. Rontob-nopo, varo iso o kosusaan, baiko i KK Basang om i Amai Mojuring o sino do miduvo-duvo ioti dino nga aso kositat. It insan-ogi mamantau ioti muli, suvai varo monitat om mamantau ioti. Nokorikot-po sid Pantai, hinatul-no dioti dot i Masarap o sarang.

Vulan sembilan di 1964 om tinumimpuun-no i Pandita Dilger muvalai sid Pantai dot it ongoorigi om lombiou, inanu sid puruvan Pantai om it ongopapan antad sid Barambangon. Amu-po avi i toun diri, rinumangkat-no i Dilger om turus ogumu it ongokamong sid mintutuk do Pantai sinumuvang do Kristian. Iti-no o sabap do kodung vulan Mei 1965, tinumimpuun-no i sikul dot ongoponulung sid Pantai do 27 o kinumurusus do kamung-po i Osuman om I Osingko di iadko pembantu di pandita Dilger. Minsanko antad sid Tanggui do Kudat, varo it a-ko piro o ponulung di sinumuhut sid Kurusus Pantai diri.

Hiza di kurusus dit ongoponulung dino, pihabagon manangkal dot alun-alun antad sid Tuhunan do Pantai sampai sid station do Pantai. Om antad sid Station do Pantai kumaa sid Gunsali om Taradas om antad sid Pantai kumaa sid Kanibungan, dot it ongoponulung asarok tumabang manangkal om minggama dit ongojambatan om momudung dit ongovatang do kiluvang jodizon do karabut. Gam varo-po't alun-alun do ginama di hiza diri do 22 vatu konoruvo, antad sid Kanibungan sampai sid Datong dot it ongoulun do kampong minangagama do mad pogihiman dit ongoulun sori ponong do kosukupu di hiza monombital. Hiza di kovian di kursus do ponulung sid Pantai, varo-po ginama do jambatan sid Kanibungan dot it ongoorigi om suluw antad sid karajaan. Topot i palampag om parapad antad sid Basel Mission. Ino jambatan dino nobuka di Julai 1966 di Tuan Dio antad sid Kudat. Tanid mantadko ino, varo-po nagama it alun-alun do kijambatan dot agazo ponong sid Gunsali om Taradas, dot sino dino, tongog o paalampag om santing ot origi dom suluw.

Tanid mantadko ino pihabagon di Pandita Dilger mangahatul do mamahagi dit ongobibit do nizuv om mongonsug dit ongoulun mananom sampai it ongokouvaan, nga ogumu o bibit dot ikirim di Forschner sid Pantai dot ipatanom dit ongoulun do Kanibungan. It ongoponulung nga kasarakai-no monulung dit ongoobpinai sid mintutuk do Pantai mongomot om vokon-po do pemot dit ongoulun sori ponong di kobuatano do ponulung do piumpugan.

Hiza dino pinengkakat-no di Klinik sid Pantai. Amu-po nopongo i valai dot agazo, sid tambing di valai di Dilger o nanu do Rumah Sakit, iri-ogi varo tingkang sid somok sino do pongodumparan pempongo di pigagama-no i kilinik dot agazo. Na nokorikot-no i Inai Dora Loosli, sori do mongubat do baik otolu minggu misisingilo do Momogun om rinumikot-no sid Pantai mongubat.

Bai iti-no i laporan di Osingko kananganko i kotupakan di Habal do Kovosihan sid Lubok do Marudu.

Na sid tanggui do Kudat nobuka-no i Nangko, Penampang, Tinukadan, Togumamal, Pinavantai, Bonduk, om vokon-no. Ong sid Pitas miningkakat i piumpugan sid Dandon Liu, Suang-eloi, sampai it a-ko piro it ongokampong dit osomok sid Baving. Iti-no o sabap i Mission pengkakat do Station sid Nangko dot i Majimil o ponulung om Baving dot i Diyun o mangahatul dit ongopiumpugan sori. Sid Pitas i Ohigan mingalud miguli-guli magandaha dit ongokampong sampai norikot-no i ginavo dioti sumuvang. Sabap a-ko piro o kampong sid mintutuk do Tinangol om mokirikot do Habal do kovosihan, i pandita sid Bavang Gazo o minangahatul di vatas do gorija sino.

It ongosikul do kampong sid Lajong, Tinangol om Lodung

I kakal-po i British minomorinta do Sabah, a-kavasa i Basel Mission momuka om mangahatul do sikul. Manjadi ontok di sumuri-ogi i British, varo-no't orongou dot sumimban i politik kananganko it ongosikul. Iri-ogi minangaplai i Basel Mission sampai kadapat do kabanaran momuka do tolu o sikul, ino-no sid Lajong, Lodung om Tinangol. Iti-no o sabap osusa manganu do tana kampong bahagi di Sikul om mangaplai sid ngaran do Basel Mission om mindamo do bontuan bahagi dit ongosikul dino om mokirikot-po do guru antad sid Europa di mangahatul om supervise dit ongosikul dino. Manjadi ontok di pangkal kotolu di toun 1964 nokobuka-no it tolu it ongosikul dino, dot i Mr. Stettler o minangahatul dit ongosikul dino. Ikid Sikul varo-po valai do guru om varo apat ongkob bahagi dit anganak.

Na it ongosikul dino okonko retanko Sikul do Basel Mission, inoi nga Sikul do Kampong, supaya kadapat mindamo sid porinta i balanja bahagi dit ongoguru. Bai it ulion dot ongosikul, o kibalanja antad sid Basel Mission. I kiniro di Basel Mission diri, amu mongimvagam di gorija hiza sid tahudi't adau kananganko i balanja dit ongosikul. Sabap varo pangalaman sid Kamerun dot opogos banal i gorija mamalanja dit ongoguru sid ongosikul dau. Ino-no i tinomod dit ongosikul dino, sabap tu hiza diri aso-po sikul bahagi di razat do Momogun, kaluto ong oonsug i porinta do mangahatul di kosikuran dit anganak do Momogun, supaya varo iadko milawan di mission om i porinta do potongkop banal do sikul sid watas do Kudat dot bahagi dit anganak dot Ongobumiputra, ino-no it Ongomomogun. Sabap ogumu-no anganak do Momogun nokosikul-no laid sid Kudat, do sid Asrama ot inintoronon, varo it a-ko piro, it inanu-no do porinta, tu jumadi do guru sid ongosikul do Porinta.

I gama ponong sid kosihatan dot ongoulun.

I hiza di minonoruvang-no it ongomisionari sid ongobinatang do Momogun, banalko ogumu ot ongopanakit om ongonuko sampai ogumu o kokurangan kananganko i kosihatan dot ongoulun, rumbul satu it anganak dit opodok-po. Iti-no i sabap, do kodung mindakod sid ongobinatang, a-milo-milo mongugal ioti dit ongoubat om ongoumau sampai minonguru om minongubat dit ongoulun. Kodung nokorikot-no i savo di Honegger, tu naas iosido, minomuka-no i Basel Mission do klinik sid Station Sikuati do suvab-suvab, ogumu ot ongoulun dit osomok sid Sikuati rinumkot mokiubat om mokijarum. I Dokutul do Rumah Sakit sid Kudat minangakun do manganu dot ubat sid Kudat om i Basel Mission minongirim-po dot a-ko piro ubat antad sid Switzerland om Germani. Hiza di minuli-ogi i Inai Honegger, varo-no vagu naas do nokorikot, i ngaran dau i Trudi Sigrist. Na i hiza diri miniupakat i Red Cross Kudat om i Basel Mission do pengkakat do Klinik sid siring dit alun-alun, supaya osodiri i station do Mission om i Klinik. Manjadi i Red Cross Society do Kudat, i ulion dau i Lo Cham En, pinengkakat di valai om minogihim di kosukupan di valai, supaya okonko bai it ulun kadapat mokiubat di rumikot om muli, minsanko mintoron sid Klinik dino dot a-ko piro adau, nga kadapati. Topot ong i Naas, i Basel Mission o mamalanja. Alaid-nopo, minsanko antad sid Tinangol om Pinawantai varo ongoulun di mokiubat, minsanko osusa ioti do mintana rumikot dot asadapan mamanan om korikot-ogi. Sabap i hiza diri kakali aso-po't alun-alun tanid mantadko sampai sid Lajong ko hiza di toun 1960 sampai sid Angkob.

Kodung i Basel Mission minomuka di sikul sid Tinangol, pinengkakat-no do Klinik sid Tinangol (1964) om iri-ogi sid Pantai (1965) om Dandon-Liu (1967). Ong i valai do Klinik om intoronon dit Naas sid Tinangol, tukang do Kina o minangagama, topot ong i Klinik sid Pantai, it ulun antad sid Tangkarason o minangagama, dot minsanko it ongobabaal dioti kondiri, ioti o minamasagi om

minamapan om minangatam-po. It ongonas dino, antadno kavi di Basel Mission. Bai i ponulung do naas, nga sid Sikuati ondu do Kina di minonorundakai di naas sid valai. Na amu songkuro diri, varo iso't anak Momogun di minimot hiza do sid Klinik Sikuati iosido dot i naas banalko ogumu o gama, tu ogumu ot ongoulun mokiubat. Mad katama iosido do tumabang, minsanko varo koubasan sid Momogun dot it ulun suvai tumoronong sid ulun di kisakit, ong varis it ulun dino. Topot inot anak diri amu rinumosi monulung, dot a-nokosongkuro, tinumataap iosido rumusod sid valai di naas tumabang misingilo mongubat. Minsanko it dokutol do Kudat, nga avangaan sampai minangahatul dot inot anak dino kadapat sumikul do naas. Manjadi iadino o kinotimpunan do varo't ondu do Momogun di sumikul do naas. Antad diri a-ko piro ot anganak kodung nopongo-no sumikul, minokisikul do naas sampai sinumuvang sid kerja do kosihatan sid ongorumah sakit om klinik do porinta.

Miting vagu dit ongosukod 29.-31.8.1964

Sid saralom di toun 1962 sampai 1963 varo-no vagu a-ko piro o miting dit ongosukod. Rontob-nopo, mad aso laporan di natahu sid file do Mission sampai a-andaman do varo upakat tanid mantadko bai mongimbulit di hoturan do minisavo om i kosurutan dit ongopiumpungan. Suvai 29.-31.8.1964 om varo-no vagu miting dit ongosukod, hiza do nokomedeka-no i pomogunan do Sabah. Na i panangan di miting diri, miupakat di kavazao dit ipat-ipat i piumpungan om i kuran varo kopudan om kosurutan do gorija sid tanga do Momogun sid saralom di gama mangahatul di pangahabaran di Habal do Kovosihan sid ongobinatang vokon om sid ongopiumpungan di bai kosuvang diri. Manjadi ino-no o kinapangan di miting diri, Notontuan-no i Osuman do ponulung iosido bahagi sid Pantai om hinoturan-no do varo ponulung sid Molongkolong, sid Nangko om sid Baving, sampai nokengkakat-no i tumpuk di monodia do hoturan do gorija (ko perlembagaan). Sabap kodung nokomerdeka-no i Sabah sampai nakamung-no sid Malaysia, varo kopurimanan dot atag dot i gorija mingkakat kondiri, supaya sera dot aso katarangan do Mission sid Sabah, varo-no laid Gorija di mangahatul dit ongopiumpungan. Iti-no i **komiti bahagi di koponedian di Hoturan do Gorija, I OT Madalag, Onginzan, Osuin, Mojih, OT Tuorong, Asim, Daang, Majaman, Majimil, Diyun, Forscher, Dilger om Sigris.**

Sid **Miting 21.-23.4. 1965** nembulitan-no vagu i hoturan do misavo it ulun Kristian. Sid saralom di miting diri, nakamung-no it iso pandita do gorija Basel Fui di nokodim-no do mamung sid ulang Toun do Basel Mission sid Switzerland, tu 150 toun ot umul di Basel Mission diri. Manjadi i miting dit ongosukod minonginsuhut di Kina dino, om minindamo dot iosido o mongontok dit ongopiumpungan do gorija Momogun sid Pesta Ulang Toun 150 Toun Basel Mission. Kagi, i miting minongining do kuran banal it usuran di Basel Mission sid saralom dit 150 toun paazazad di Habal do Kovosihan om tumabang pengkakat dit a-ko piro ot ongorija sid sompomogunan.

Ontok di miting ko-3.-5.8.1965, minamanal-no it ongosukod di bahagi keso om koduvo di Konstitution do gorija om miniupakat di bahagi kotolu om kapat di hoturan dino. Kodung nolumbatasan i hoturan dino, rinumikot i wakil do Basel, ino-no i Pandita Friedrich Maier, ulun di alaid-no sid pomogunan do Kina do missionary iosido. It umpug dit ongosukod minindamo di Basel Mission do manantu di hoturan do PCS. Kopihiza di miting diri, varo kinoptan dit ontok do kengkakatan do Gorija do Protestant sid Sabah, , ino-no i miting ontokko i vulan kapat di toun rumikot. Kananganko i ngaran *Protestant*, ong sid Momogun Potorontog, i harati, potulid vagu, ombo i humaba ko tihaba dara, ino-no ot ohorotizan, "Pro"= ino-no o harati, i gama ponong, om "testant"= i gama sumasi. Tu hiza di kinosunsuban di Luther sid Gorija Rom, araat banal o gama sumasi di Yesus. Gam mad bai Business i gorija diri. Iti-no sabap i sokovia i ongorija di nokosuhut di Reformasi (i gama mongimvagu do gorija o harati), nga retanko Ongogorija do Protestant. Ong i ngaran Gorija dot Injil ko ong Inggeris, Evangelical, okonko miabal, tu varo-po nakamung do harati, Fundamentalistic, tu okonko i hoturan do Reformasi o osuhuton, inoi nga varo a-ko piro ot origi dit amu kopionong sid Habal do Kovosihan, minsanko retan dioti do bai ioti ot otopotko Kristian om ulun di sumuhut banal dit Injil. Kagi okurang banal i hoturan sid ongorija om piumpungan di retanko

Evangelical ko Gorija dot Injil.

Sinoda keso di Gorija Protestant sid Sabah 18.-20.4.1966

Manjadi sid saralom di miting vagu dit ongosukod nokengkakat-no i PCS om minongolumbatos dit iti-no i sinoda keso do PCS. I vaza di kinengkakatan diri, sinumambayang it ongowakil dit ongopiumpugan sid Gorija Kina. Tu i hiza diri aso-po valai do panambayangan sid Taman Gorija. Notontuan-no laid i hoturan di gorija dino om nopili-no dit ongokomiti do gorija, ino-no, i Asim antad sid Kodungkung, i Osuin antad sid Lajong, i Mogiling antad sid Tinangol, i Basang antad sid Pantai, i Dilger, Rusterholz. Ong i Setiausaha, ino-no i Diyun Madalag om i Forschner nga ulion do gorija.

Hiza diri, varo-no vagu nakamung it ongowakil di piumpugan Mongkobou, Baving, Dalas, it ongowakil do Suangelo, Kabatasan, Liu, Dandon om Bilangau om nohoturan-no dot i Pandita Gugger mongorikot sid ongovalai di sid somok di Bengkoka. Na sid Baving i Diyun o minangahatul di kazazadan di Habal do Kovosihan om minangagazad dit tosontumpuk-tumpuk siri sumambayang, sampai nokopunovot iosido do nolonod sid lubok do Molubang, hiza do varo borizu (20.6.66 o kinapatazan di Diyun). Iri-ogi i Osingko om i Suyin ginumanti di Diyun sid Baving.

Sinoda Koduvo do PCS 28.-30.3.1967 nopili-no i Majimil Tuorong do gumanti di Diyun sid gamaon do setiausaha om nembanaran-no i Osingko Taganau do iosido bendahari do PCS. Nembulit-no vagu i gama monunda dit ongopiumpugan om nohoturan-no i kosikuran dit ongoonulung sampai it ongobalanja dit ponulung. Bahagi di balanja dit ongoonulung varo't upakat do mongorukut dot ipat-iat it ongkob ulun Kristian dot sangbandu o parai (4 gantang), ong sukul kiparai it ongoulun.

Sinoda kotolu 7.-8.8.1967 minisamung-no di Sinoda do Gorija do Momogun om i Sinoda do Gorija Basel Fui dit ensanan Sangsabab sitid Kudat, ino-no sid Gorija Kina narasmi i duvo i sinoda dino hiza do miamung sumambayang. Ino joint service di kopomukaan do sinoda Kina om Momogun mad kensan-ogi kohorotizai dit Ongokina do varo Gorija do Momogun om ino gorija dino agazo mantadko i sokovia i it ongorija do Kina Basel sid Sabah. Pengkaa dino it Ongomomogun nakaharati-no dot okonko bai ioti o gorija di Kristus. Tu varo-no laid nokotiim do minsamung it ongoulun Kristian do Kina om Momogun sid Sikuati ko sid Tajau, bai it duvo, ko tolu o piumpugan o nokopurimon dino kopiobpinezan dino. Suvai sid pongumpugan di sinoda diri om alanta-no banal do varo gorija Momogun om Kina.

Sid saralom di Sinoda dino nopili-no i Dilger do gumanti di Forschner dot ulion, tu i hiza diri minulino i Forschner sid dau do pomogunan do bai lumatang dara, nga a-nokoguli-no vagu, tu nokotimpununo i porinta do Sabah dot a-koho do miguli vagu sid Sabah. Om i Gugger niamung-no sid Exko diri.

Minsanko minangaplay i PCS sid Porinta do katarangan, ong kodung nokengkakat di ko-20.4.66 diri, suvai vulan kosizam 1967 om nokorikot-ogi i kabanaran antad sid porinta dot i PCS nga iso o persekutuan sid Sabah di nadaftar sid Pendaftar do Pertubuhan Malaysia. Sabap ino, ino katarangan antad sid Porinta mad kinapangan di kengkakatan do PCS.

I station Dandon Liu sid Tupak nosodia-no sampai rinumangkat i Gugger sid saralom di toun 1966 om varo-po Rumah Sakit ko klinik di nokorusod sid tana do gorija. Na suvai 1967 om nobuka-ogi i Klinik, tu a-nokorikot koduruk i naas antad sid Basel. Sabap kialud i Gugger, nokosuvang sid tugas dau i sokovia i it ongopiumpugan vagu antad sid Bengkoka om ponong sid sarazo. Ong it a-ko piro o piumpugan sid pompod tana di Tanggui Bengkoka, kakali do hinatul antad sid Kudat. I hiza di minonombitil o pomogunan, tu noruzahan-no ontok di toun 1966, varo't umba do mangagama dot Alun-alun antad sid Konibungon kumaa sid Pitas, dot i bontuan bahagi di gama momuka dit alun-alun dino, antad sid Germani. Ino i panangan, kopihiza do varo bontuan dit ongoulun di noruzahan, varo kosurutan di kopomukaan do pomogunan om varo-po alun-alun antad sid Timur do Bengkoka rumikot sid rahat sid Barat, supaya ong ododos i rahat, kakali kadapat kumudat, ong varo't ahali. Rontob-nopo, minsanko mad nopongo-no it alun alun diri, amu tantu inopud om i tinomod dit umba diri, nga amu najadi. Sabap ino, i kogunaan di gama diri, tomod pakan dit ongoulun dit osusa. Na i koduvo o kogunaan, antad di gama di Mission om gorija manangkul om mamampang dit a-ko piro ot

alun-alun, nonsug-no i Porinta do momongo di gama dino. Iri-ogi varo't ongoalun-alun rumikot sid ongokampong om oluvas-ogi i pomogunan sid daerah do Kudat.

I gorija PCS ontok di kovian toun 1967. Ontok dino varo limo o puruvan di nosikid varo pandita, ino-no, Kudat i Dilger, Sikuati i Rennstich, Tinangol i Rusterholz, Dandon, i Gugger om Pantai i Gerber. Ong hiza di Sinoda kotolu, kakali bai 77 o tempat sumambayang ontok do minggu. Kodung vulan ko-12.1967, varo-no 99 o tempat sumambayang ontok do minggu. I kogumuo dit ulun Kristian di nopodsu-no, 3354 ong umpugon sokovia, nga 6514 kinozuvan. I Sikul dit ongoponulung sid Pantai, nakavaliu-no sid Kudat ontok di vulan kotolu 1967. Suvai nakarangkat sid Bavang Gazo vulan kovalu 1968.

Na i Sikul do Rumah Tangga sid Tinangol, kakal-po di toun 1967 nobuka-no. I Inai Ernst, i minangahatul di sikul diri, nokotiim-no laid sid Pantai do kumursus dit ongoondu, supaya varo pangalaman dot ombo it atag mangajal om kuran it vaza mangajal sid ongomomodsuni dit a-insan nokotiim sumikul. I panangan di sikul diri, monuduk dit ongomulok-po it ongondu do kosihatan om i vaza momiara dot ongakob.

Sabap asampit banal it ongointoronon dit on goguru sid Lajong diri, varo-no vagu valai di guru besar, ino-no i Mr. Stettler sid osomok di SRK Tinangol. Ino valai dino, station bianco di Puruvan Tinangol.

Panarangan do sera sinumuvang om kengkakat it ongopiumpugan di kogulu nokosuvang

Sid buuk diti Usuran, di nipirin toun 1993, varo nakamung it ongongaran dot labaan do valu nopod piumpugan om varo kinatarangan do sera nokosuvang-no it ongoulun siri, om sera varo kopomodsu keso om sera varo kengkakatan di panambayangan di bai pagong om iri-ogi i panambayangan dot apapag do papan o napakaii.

Ino rekod a-kosuvang siti, tu ong bianco, varo-no labaan do limo natus piumpugan dot aso tinganan popuhondom siti. Tu aso kerod gima sid dohon diti.

Sid Usuran di nopirin-no, iaditi o nokosurat-no:

Bai iti-no it ongopiumpugan do varo rekod kananganko i sera nokosuvang it a-ko piro ko ogumu it ongoulun do Kristian om it hiza do varo iso-ogi valai do panambayangan sampai i sera it insan-ogi opodsu-no it ongoulun Kristian sid tempat dino. Ombo it ongokampong om ongopiumpugan dit a-narait sid ongonalad diti, a-nokosurat ko natagak it ongosurat antawa a-nokolombus i katarangan sid pusat. Manjadi ombo i puruvan om piumpugan di kakali andaman ko varo surat di manarang dit ongohiza dino, sampai i sera varo kengkakat do panambayangan di vagu om apapag, atag do mangahabal sid pusat, supaya oumpug it ongorekod sid Setiausaha Umum do PCS.

USURAN DIT ONGOMITING DIT ONGOSUKOD DO PIUMPUGAN OM SINODA DO PCS

Minsanko nokosiat it a-ko piro o hal dit ongomiting dit ongosukod sid usuran sid savat, siti-no o oumpug-no i sokovia it ongomiting om sinoda, supaya oruhai mangaramit di panangan dit ongomiting om i kinolumbatasan dit ongositoda.

1. Miting keso dit ongosukod dit ongopiumpugan 29.-31.12. 1955.

Ontok kovian di toun 1955 varo miting dit insan-ogi dit ongosukod dot ulun Kristian.

I tinomod sid saralom di miting diri, mongitung di hoturan do piumpugan om kogunaan di gorija di Kristus. I gulu dot inupakat diri, isuhut di nokosurat sid File, pengkaa dino,

"iokoi ongopandita minongonsug dit ongosukod miupakat om monodiri dit koundango kodori, ombo it apakaii ong Kristian-no di kopionong sid boros do Kinoringan, om ombo it amu atag, tu nokotombil sid kuasa dit ongorogon. I nokogili diri, i adat do musu om rumait/mirait sampai mogontong om i vaza mongolobong om mongohondom dit ulun di minatai. Manjadi sid saralom di miting, banalko agazo o katamanan di ginavo dahai ongopandita, tu ioti-not ongosukod kondiri o minangaratu di hoturan do songkuro ot umul di miuma musavo. Manjadi sid saralom di nahatul dioti dino, suvaiko osukup miduvo kusai om ondu do duvo nopod toun om kavasa-ogi musavo.

Sid koduvo adau diri, varo-no vagu piniupakatan, ino-no, it undang-undang do labus kananganko i kuran mongulok do parai, ong Kristian-no, tu ong ilabusi, suvaiko varo gama bahagi dit ongorogon (I bambarazon), ino-no, suvaiko kimanuk do garason i hiza do pendakod do parai sid sulap.

Manjadi ioku diti (i pandita Honegger o minonurat) minonuturan sid dioti dot, iokoi sid Switzerland antawa it Ongodaya sid Kalimantan, nga tanid o gama, ino-no, mongohormat di kamatan do iadino, varo poginakanan sid gorija, tu monorima kaseh sid Kinoringan bahagi dit ula di toun, kangku diri, om pinopongitung-ku ioti diri dot avantangan ko amu i hoturan di iadino.

Varo-po vagu piniupakatan dahai kananganko i kosiinan do piumpugan do songkuro o bahagi do parsambaan bahagi di piumpugan kondiri om ponong sid ponginjilan dit ongoponulung."

Ong otopot, bai inot umul di miuma musavo ot nolumbatasan di hiza diri do mad ahago-hago o gama mongolumbatos. Tu nakatalib-po it ongomiting, atalahas dot iso nga aso't ongosukod minongitung-po do sumuhut dit kinolumbatasan dino.

2. Miting dit ongosukod April 1956.

Miniting-no vagu it ongosukod dot piumpugan sid Sikuati. Varo 43 ongosukod antad sid 25 it ongokampong nokorikot. I hiza diri, it ongoulun Kristian antad sid a-ko piro kampong miumpug sid iseso o valai do panambayanan (iadko sid valai do panambayanan sid Ronggu it ongokristian antad sid Ronggu, Lodung, Kusilat, Kodungkung, Pituru). Ogumu it ongosukod dino amu-po opodsu. I koledo di miting diri, sangadau om entanga.

Iadino nokosurat sid file di Pandita Honegger:

Iokoi diti miniuupakat di hoturan do piumpugan dit okonko aralom o hoturan. Ino-no o gama dahai miupakat: nunu ot apatut dot opudon antad sid adat do Dusun kananganko i kosinaan dot anak om i gama rumait om i vaza misavo (mogontong) sampai i hoturan do mongolobong om i gama mongumo sampai mutanom ong ulun di nokosuvang dot ulun Kristian, om nunu ot osusa do padaon antad sid ongoadat dino, tu i boros do Kinoringan o panganavau.

Manjadi pinongo-za-no i hoturan do piumpugan dino dot sukul-po agama, ino-no o kinapangaan di hoturan dino, Isai o mangahatul di valai do panambayanan om isai o mangahatul di gama sumambayang.

Manjadi varo-po piniupakatan dahai do kuran o gama mangahatul di poginakanan do mongomot, ino-no monorima kaseh sid Kinoringan iadko mongontok di gama gulu diri di kakal-po sid labus i pendakod do parai sid sulap.

Varo-po vagu piniupakatan daahai kananganko i kogunaan do parsambaan sampai miniupakat do kuran o gama manahak do kosukupan sid ongoponulung do piumpugan, ino-no mongontok dit ongokapagasan dioti.

Manjadi banalko agazo o katamanan di ginavo dahai ongopandita di nemot-za do kuran i gama dioti ongosukod humarati di iadino sampai miniaambat sid miting diri.

Manjadi kijanji sid miting diri dot amu-milo-milo nga miumpug vagu do iadino ong orikot it onom vulan vagu, ka di surat dau.

3. Miting kotolu dit ongosukod dot ongopiumpugan April 1957 sid Sikuati

Ontok di miting dino, varo wakil do Komitee do Basel Mission do nakamung. I ngaran dau i Pandita Witschi, i retanko *i pandita dit agazo*, tu anaru om agazo i guvas dau.

Sid saralom di miting diri, ino-no i nanu do tudukan antad sid boros di Rasul Paulus sid Keso Korintus 3,11 om 12,1-12, tu sid ongofasal dino manarang i Paulus di hoturan dit ongopiumpugan do Kristian. Manjadi sid a-ko piro o ayat di Paulus dino hinumarati it ongoulun di nokopiumpug di puun do hoturan bahagi di piumpugan dot ulun Kristian. Sabap i piumpugan dit ongokristian sid Korintus di hiza diri nga mad miluu i kosusaan om pensubaan sid piumpugan dot Kristian biano sid Sabah.

Atalahas sid miting diri dot amu oruhai o gama mangaratu do hoturan do piumpugan sampai osusa do mongitung vagu di hoturan dot ulun Kristian isuhut di boros do Kitab. Amu miuma do bai mongining dit ongopangalaman dot ulun Kristian sid tanid o pomogunan, inoi nga sitid Sabah osusa humarati om

mongonsi di panangan om lavis di Boros do Kinoringan, supaya atag o gama sumuhut om sumasi di Tuhan Yesus.

4. Miting kapat dit ongosukod dot ongopiumpugan 14.-15.7.1958 sid Sikuati

Sid saralom di miting diri, miniupakat it ongotumpuk do kuran mangahatul dit ongopiumpugan. Inonsizan-no i Kitab do nunu banal it kavazao dot ulun Kristian om piumpugan dot ulun Kristian om kuran i vaza mongohoturan dit ipat-ipat it ulun om it onkob dau sampai i piumpugan sid ipat-ipat i kampong. Antad sid ongocadangan di miting laid diri, nosodia-no it hopod ot ayat do **HOTURAN DOT PIUMPUGAN DOT ULUN KRISTIAN**. Inot ongoayat dino nosodia-no it kumpulan dit a-ko piro ongosukod om ongoponulung sampai i pandita Häusermann om Forschner, na inot ongoayat dino antad kavi sid Kitab om kiontok bahagi dit ongopiumpugan sid Sabah (ko i hiza diri di kakal-po North Borneo o nipomungaranan do porinta British). I panangan di hoturan dino, Manarang di rontob dit atag ong ulun Kristian om piumpugan, supaya amu kagavul sid ongoadat dit nakakaput sid ongorogon.

Ino hoturan dino, suvai alaid-laid manarang om miupakat om varo-ogi kinapangaan dot ino hoturan dino jumadi do hoturan sid ongopiumpugan. Minangakun-no it ongosukod do tumatap sid hoturan dino om manarang sampai kumavid di hoturan dino sid ongopiumpugan.

5. Miting kolimo dit Ongosukod do piumpugan Januari 1959 sid Sikuati

Kovian di vulan Satu 1959 miniting-no vagu it ongosukod sid Sikuati. I tajuk di miting diri, ino-no, i **kosusian do piumpugan dot ulun Kristian** om i gama patatap di kavazao om kobuatano dit ipat-ipat it ulun Kristian.

I sokovia i vaza manarang di tajuk dino, inanu-no sid Kitab dot Osusi. I hiza diri varo-no nosodia i salinan sid Boros Momogun i Surat Keso di Paulus pakaa sid piumpugan sid Korintus, i nasalin hiza di kursus dit ongoponulung sid Sikuati, om it ongoponulung dino kagi tinumabang manarang dit onsi dit ongotudukan dino, ino-no:

1. Kor.6,1-8 I piniizaan sid piumpugan dot ulun Kristian om i kosusaan sid kopioduhan sid tanga do piumpugan. Ka di Paulus, Ulun Kristian amu miruput om mihukum sid hakim di tanid ot ugama. Atag do miaandus om misasalai kondiri sid tanga do piumpugan.

1. Kor. 6,9-11 Varo hal sid tanga do piumpugan dit amu atag, nga i piumpugan o monunda dit ipat-ipat it ulun Kristian, supaya amu kalandu ko kasadu iosido

1. Kor. 6,12-20 I kosusian tokou ulun Kristian antad sid Raha di Yesus. Ong iadino agazo o horogo dau, kuran-ka ong tumolikud vagu di Yesus om monimbaru do karaatan?

Sid saralom di miting diri, i Majimil Tuorong om i Diyun Madalag minongimbulit-no vagu di **HOTURAN DO PIUMPUGAN** sampai pinilolombus-lombus manarang dit ongoharati di hoturan dino, supaya kosondot banal sid ginavo dit ongosukod.

6. Miting konom dit ongosukod do piumpugan sid Sikuati 29.-30.6.1959

Na i kongkod di piniupakatan sid saralom di miting diri, ino-no:

I tugas om gamaon dit ongosukod sid piumpugan dau.

I panarangan dit ongotugas dino inanu-no sid Boros do Kitab, do iadino

Matius 20,25-28 It inantadon di gama dit ongosukod do piumpugan

Matius 18,15-17 I gama pemumui vagu dit ongoulun di nokotohiang-no sid saralom di gama monunda dit ipat-ipat it ulun

1. Timotius 3,1-7 I kavazao dot osukod do piumpugan, i bahazan om tanggung jawab dau.

Rontob-nopo, i sokovia i it ongopiniupakatan diri, amu-no nonsi banal sid hoturan ko surat. Iti-no o sabap dot amu oruhai mongusaha it ongosukod di tugas dau, lobipo ong i adat laid om i kenginan kondiri ko i kenginan dot ulun amu kopionong di kovosihan do Kitab om i hoturan do piumpugan. Kakali apaganan it ongosukod do kumavid di Boros do Kitab iadko ponukat om Adat Vagu dot ulun Kristian.

7. Miting koturu dit ongosukod do piumpugan sid Sikuati 1.-2.1.60

Sid saralom di miting diri varo gama di pandita Honegger om Sigrist manarang di panangan di gama **mintu dua**. I tudukan dino inanu-no sid Matius 6,5-14. Sabap aso minit sid file do pusat, om ioku kagi i hiza diri sid Germani, amu-oku kapanganaru di panarangan diti.

8. Miting kavalu dit ongosukod do piumpugan sid Sikuati 26.-27.7.1961

I hiza diri nakanu-no sid porinta di katarangan dot i pandita kadapat pasasi di kopisavaan dot ulun Kristian mongontok di porinta (i Registrar do misavo). Iti-no o sabap dot i miting diri minanarang om minongolumbatos di vaza mamakai di HOTURAN DO MISAVO ONG ULUN KRISTIAN om i kobuatano do minisavo, isuhut di hoturan do Kitab.

Tudukan keso diri: I Kristian Marriage Ordinance- Hoturan musavo ong Kristian, i vaza manganu do borang om ipasasi i minogontong sid porinta

Tudukan koduvo: Kuran i Kinoringan minonodia di kopianangan di misavo. Kondiri dit ulun o mongitung sampai mogihim di sovoon (pokisavaan) di kopionong sid dau, okonko it molohing om varis o popusavo. Rontob-nopo, suvai osukod laid it ulun om elo-no mongitung. Amu atag do popusavo dit anak-po it ulun dit amu-po oposik o ginavo.

Tudukan kotolu: I minisavo dino, Piniizaan dit ensanan o guvas om ginavo. Piniizaan dit amu engat do koruhang. Piniizaan dit pempatai.

Tudukan kapat: I misavo sid tinoguvangon do piumpugan om porinta, tu i pandita nga mongontok di porinta sampai polombus sid katarangan misavo sid porinta.

Antad i hiza diri varo hoturan sid ongopiumpugan do sumuhut di hoturan dino. Rontob-nopo, amu oruhai do monimban di hoturan laid do misavo om mogontong sid kampong om bai mokibarakat sid gorija hiza do nopongo-no laid kavi-avi it upakat om i gama mamung.

9. Miting kosizam dit ongosukod do piumpugan sid Sikuati 22.-23.10.1962.

I kongkod di piniupakatan sid saralom di miting dino, ino-no, I piumpugan dot ulun Kristian om i gamaan sid tanga di razat do Sabah.

Tudukan keso: 1. Kor. 12 I piumpugan, ino-no i guvas di Tuhan Yesus.

Tudukan koduvo: 1. Kor. 15,58 I katatapo do piumpugan om it onogama posuhut dino amu porosuma.

Tudukan kotolu: 1. Kor. 16,13 It ulun Kristian nga tanggung jawab iosido ponong sid koporintaan. Manjadi amu songkuro kalaid antad diri miniundi-no i Sabah dit kensan-ogi banal. Sabap ino it ongoulun do Kristian minongoduat sampai minokiharati do kuran o gama momihot om mongopud di gama mangahatul do pomogunan. Antad sid tudukan do Kitab o nohorotizan-no dit ongosukod i tugas do Kristian sid tanga do razat, ino-no sumasi di kenginan do Kinoringan sid sokovia i kobuatano om kavazao, supaya otunda i pomogunan do barakat om kovosihan do Kinoringan.

10. Miting kohopod dit ongosukod do piumpugan sid Kudat 29.-30-7-1964

I panangan di miting diri, mogihim do vazaan ponong sid kengkakatan do Gorija do Rungus.

Tudukan keso: I kapagasan dot osukod do gorija om i gama dau mangahatul do piumpugan (1. Tes. 5,12-13)

Tudukan ko-2: I gama monunda dit ongokoruhang sid piumpugan om i gama mamabo dot avagat. I gama om vaza potindal dit ulun vokon. I gama monginsasamod om i gama pememui vagu do koruhang. I gama miaandus om mitatabang.

Varo-po vagu piniupakatan, ino-no, kuran o hoturan sid toriso-iso piumpugan om sid ensanan i tumpuk dit ongogorija sid Sabah.

I hiza diri nopili-no i komite dot opodok bahagi di **Hoturan do gorija sid Sabah**. Nihabal-no sid miting diri do kuran dit ongogumu-po it ongokampong mokirikot di Habal do Kovosihan, gam varo it a-ko piro ot ulun sid Tupak di nokosuvang do Kristian, ino-no sid Pantai. Iti-no o sabap dot notontuan-no di miting diri dot i Osuman jumadi do ponulung dot atatap sid Pantai om i Majimil sid Molongkolong sampai otomon it umpug dit ongosukod do nokolombus i Habal do Kovosihan sid

Tupak om ponong sid selatan di Tanggui do Kudat.

11. Miting ko-11 dit ongosukod do piumpugan sid Kudat 21.-23.4.1965

I miting diri, katatalib-po dit adau do kinogulianan di Tuhan Yesus. I panangan di miting diri, mongimbulit om pohodtol di hoturan do manansavo-mokisavo. I kinopomukaan di miting diri, sid valai do panambayanan do Kina do miniamung it Ongokima om it Ongomomogun, tu manansalamat om monginsuhat di Pandita Chee, i Zungmug do Basel Fui, di huntad dau mamaanau sid Basel. Nokodim-no iosido mamung sid Ulang Toun do Basel Mission dot 150 Tinounan sampai iosido o minongontok dit ongopiumpugan do Momogun sorid Basel.

Iri-ogi miniupakat di kobuatano di misavo di hiza do biano, dit ulun Kristian-nobo. Pengkaa dino ot atag monodia om sumodia: okonko it ongomolohing o momili om popusavo dit anganak dit vokon-no ong amu-po oposik o ginavo, inoi nga, suvai osukup ot umul om pongitungan, iri-ogi it ongoulun di musavo mamakal om mongumba do kuran o kosukupu ong kopisavo-no, supaya amu-no tumingaha-po sid molohing sampai amu-no rumusod-po sid ivanan ong kopisavo. Manjadi i kinapangaan di miting dino, notondugu-no it ongoginavo dit ongosukod sumuhut di hoturan do misavo sid ulun do Kristian.

12. Miting ko-12 dit ongosukod do piumpugan sid Kudat 20.-22.7. 1965

I panangan di piniupakatan di miting, ino-no i kosurutan do Goriija sid Rungus. I tudukan dino, inanu sid 1. Kor. 3,11: I Yesus, ino-no ot origi om puun do goriija. I panangan di tudukan diri isuhut sid ayat keso om koduvo dit Hoturan di noumba-ogi, ino-no

1.) I Goriija tokou sid Sabah, ino-no sambahagi dit iso o goriija di sid sompomogunan, ino-no i Goriija di Kristus. Om

2.) I Goriija o nakaharati dot iso-no o puun do kosipan, ino-no i Kitab dot Osusi sampai i Kosipan dit Ongorasul (Apostolikum ko Kosipan dot ulun Kristian) iadko parapad sid gama mangasip, nga otulungan om otunda di Sundu do Kinoringan.

Manjadi ino duvo ayat do **Hoturan** inokunan dit ongosukod sampai minokitarang-po dit ayat ko-3 om kaapat, ino-no, 3.) kuran i Goriija nga piniizaan dot ongoulun di mangasip, di nokotoguvang-no kumaa sid karajaan om hoturan do Kinoringan. Sid gama sumambayang om sumasi do Kinoringan sid tanga do razat o kopudan do goriija. om 4.) i Kopomodsuan nga tanda do nakamung sid goriija. Na i harati do kopomodsuan, ino-no, Kondiri do Kinoringan o manarang om mananda sid ulun dot iosido dino, nga Kinoringan-no o sanganu. Okonko i keloo om i vaza mangasip ot agazo o harati, inoi nga i kovosihan do Kinoringan di katanda sid ulun di mokipodsu. Okonko i retanko suvai osukod it ulun om ensanan o ginavo dau mangasip om miuma-ogi mokipodsu, inoi nga i kosipan di molohing miuma do mindamo di kopomodsuan dit anganak, supaya it anganak nga anangan do barakat om kovosihan do Kinoringan.

13. Miting ko-13 dit ongosukod do piumpugan sid Kudat 13.-14.11.1965

Minomongo i miting dino di gama mamasa om mokitarang di **Hoturan do goriija**, ino-no it ongoayat 5-10 sampai minongolumbato-no dot ino-no i Hoturan do pakazon dit ongopiumpugan, ong jumadi do goriija PCS. Manjadi i wakil do Basel Mission, ino-no i Pandita Friedrich Maier, nakamung sid miting dino. Iosido minangahabal dot i Komite do Basel Mission mangakun dot it ongopiumpugan dot Ulun Kristian sid Sabah mingkakat kondiri om jumadi do Goriija Protestant sid Sabah. Iri-ogi miniupakat it ongosukod do kodung miumpug vagu, turus jumadi it umpug dit ongosukod do Sinoda Keso di pengkakat om manantu di Goriija Protestant sid Sabah. Ong i ngaran sid Momogun, Ino-no i Goriija di Potorontog, ino-no o harati, i goriija di soumul mogihim om posurut om potulid do goriija, kaluto ong varo't tihaba ko kotongkihal. Iti kagi nga i harati ong Protestant= sumasi ponong sid katagan, ong amu atag o gama do goriija sumasi om sumuhut di Tuhan Yesus.

SINODA KESO DI GORIJA PROTESTANT SID SABAH sid Taman Gereja Kudat 19.-20.4.1966
I panangan di piniupakatan, ino-no i kengkakatan do Gorja Protestant sid Sabah. Varo a-ko piro o

tudukan antad sid Kitab, ino-no

1. 1. Kor. 15,1-20: Nogulian-no i Yesus
2. 1. Kor. 15,21-28 I Adam om riniba vagu
3. 1. Kor. 15,35-50 I kogulianan do guvas
4. 1. Kor. 15,58 I nogulian-no i Yesus, ino-no o pokosog di tokou biano.

Inot ongotudukan dino o minonodia di panarangan do nunu o kogunaan do varo gorija tokou om kuran i tokou nakamung sid piniizaan dino. Manjadi inimbilit-no i gama mangakun om mongolumbatos di koingkakatan do gorija tokou dit nokembulai antad sid gama do Basel Mission pazasad di Habal do Kovosihan om i kotulungan di Sundu do Kinoringan, i minomuka om minongorikot dit ongoginavo dit Ongomomogun. Kodung natarang-no dot iti-no o kengkakatan di gorija dino, minomili-no it umpug dit ongosukod dit Ulion do gorija om i Executive Committee (EXKO), i sakai dit Ulion om i Setiausaha sampai i Bendahari. I hiza do sinumodia it ongosukod do mongundi dit ulion, varo kogolivongo dioti, ino-no, varo minongoduat dit ongopandita (misionari) do kuran: Ong nokengkakat i PCS, muli-kou-no ka sid pomogunan dikou ko kakali tumabang-kou dahai sid Sabah? Tu mad amu-po miUma-okoi do mangahatul om lumombus kondiri? Kadapat-ka ko amu do manacalon dikou? ka di kogolivongo diri. Iri-ogi miniundi-no it umpug dit ongosukod dot i T. Forschner inanu dot Ulion om i Diyun Madalag, nga sakai dau. I Bendahari i Tinzan antad sid Lajong om i Setiausaha i Dilger.

Na minanantu-no it Ulion dot iosido o mindamo do kabanaran do gorija sid Porinta. Na i kinapangan di Sinoda di kensan-ogi sid Gorija do Kina sid saralom di gama sumambayang. A-ko piro ongokristian do Kina nakamung sid kasambayangan dino sampai sinumasi do varo Gorija do Momogun sid Sabah. Inot adau ko-20.4.1966 ot adau do kosukadan di Gorija Momogun sid Sabah.

SINODA KODUVO DO PCS 3. 1967 sid Taman Gereja Protestant Kudat

Katalib-po it Adau di kinogulianan di Tuhan Yesus om tinumimpun-no i Sinoda koduvo. I panangan di piniupakatan dino, i kosurutan do PCS, i vaza mogihim do kosukupan, i gama posikul dit ongoponulung om i gama mongorukut. Kananganko i rukut, varo piniokunan do songongkob songmital bahagi sontoun. Sabap, tu aso-po kabanaran antad sid Porinta, di sokoviait it ongoupakat dino iadko sid ongominging laid diri, aso-po hak om kotontuan banal, isuhut di Hoturan do Gorija. Na i ponutupan di Sinoda dino, sid Gorija do Kina i Sinoda minongohormat di Poginakanan di Tuhan Yesus, vaza momihot di piniizaan sid ngaran di Tuhan Yesus Kristus.

SINODA KOTOLU DO PCS 7.-8. 1967 sid Taman Gereja Protestant Kudat

I panangan di piniupakatan, ino-no i tugas om gamaon dit osukod do piumpugan sid tinoguvangon do Kinoringan.

1. It ongosukod do gorija dino pinili do Kinoringan, om okonko dau kondiri do pangkat om kenginan.

2. It ongosukod do piumpugan dino, baiko mongontok papanau di Habal do Kovosihan om i Hoturan dit ongoulun do Kristian om mangahatul di Boros do Kinoringan.

3. It ongosukod do piumpugan iadko taap di mongodundung do piumpugan. Manjadi bang monihi i taap dino, rumobuk kavi it ongobabaal sid rinuvang do valai.

4. It osukod do piumpugan dino koluu-ko i paku, tu osusa momili vagu kodungko osingkop-no apat toun. Ong kitogol-no i paku, osusa do gontian-no vagu, tu i sabap diti, supaya i gama kumavid om momihot di piumpugan soumul varo kakansangan vagu.

Manjadi i kopomukaan di sinoda, kopiamung i Sinoda PCS om i Sinoda do BCCM di komiting sid Kudat di toun dino, inumpug sid gorija do Kina. Nopongo-po sumambayang, minamanai-no it ongokomiti do BCCM om PCS, tu monginakan sid Hotel, tu miilang makan.

Sid saralom di sinoda nopili-no i Pandita Otto Dilger do gumanti di T. Forschner, tu muli iosido sid pomogunan do Germani di ko-25.8.67, tu posuvang dit anganak dau sid sikul do German om momongo iosido di gama monodia dit a-ko piro o solinan do Kitab om it ongobuuk do Momogun-

Kamus om Hoturan do boros Momogun-Rungus, hiza di kalatangan iosido sid Germani. Sabap sid Sabah nokokodou i hoturan do Porinta, gima i Tun Mustapha o Menteri Besar, a-koguli vagu i Forscher sid Sabah, gam tumimpun i hiza diri dot lologoton di porinta pakaso do katarangan dit ongomisionari, kananganko kentionon om gumama sid Sabah.

SINODA KAAPAT DO PCS 17.-19. 4. 1968 sid Taman Gereja Protestant sid Kudat

Sid sinoda dino pentahan it Ulion do nabanal-no i PCS sid Pendaftaran Pertubuhan do Porinta. I hiza diri i kogumuo do PCS varo-ogi 6514 kinozuvan ot ulun, dot i nopodsu-no, nga bai 3354 kinozuvan sid saralom do 99 o piumpugan.

It hal dit novit sid sinoda dino, ino-no i vaza momuru om kuran o kopudan di kopisavo. Manjadi minangakun-no i Sinoda di HOTURAN DO MIRAIT. 79 dot it ongowakil minangakun do mongimbulai di hoturan dino.

Varo-po piupakatan di kavazao do mongohormat (mongukas) dit ongoulun di minatai. Ino-no i hinoturan di nokunan sid Sinoda, Hiza dit Adau do Kinogulianan di Tuhan Yesus, varo gama sumambayang sid pangalabangan; vaza mongohormat om popuhondom di minatai sid Kiningan. Pengkaa dino, ontok dit Advent keso, mongitung om mongohondom dit ongoulun di minatai sid saralom di toun di katalib, ka dit kinolumbatasan.

Iri-ogi minanantu i Sinoda dot i O. Dilger Ulion do PCS om i Majimil Tuorong o Setiausaha. I Tinzan Amu, nga Bendahari om i Basang, Osuin, Masandul Kasitum om i Karl Rennstich, Heinrich Rusterholz om i Ueli Gerber, nga EXKO do PCS.

Minsanko amu-po nopongo banal i valai do panambayanan sid Taman Gereja, sino-no o kinoumpugan di sinoda, om varo-po nakamung i Pandita Kiting antad sid Gereja Evangelis Kalimantan.

SINODA KOLIMO DO PCS 3.-6. 10. 1969 sid Taman Gereja Protestant sid Kudat

Sid sinoda dino varo-no nongokamung di nongokodim antad sid pomogunan do Germani, Basel, BCCM, GKE Indonesia. Kakali nakamung i Pandita Neubauer, Rusterholz, Voegeli om i Staehelin. Bai i Naas Ruth Weber nokouli-no laid. I hiza diri atalahas-no dot varo vaza do porinta mongogorot monunsub dit ongomisionari. Iti-no o sabap do mongitung-no i Sinoda di vaza mangahatul dit ongopiumpugan om i gorija, tu ong avi-no monunsub it ongapandita, aso-no kosurutan di gorija. Iri-ogi nokopiupakat i Sinoda dot osusa mongimbulai di hoturan do TUMPUK KOPITATABANGAN. Kodung nokemot do katagan sid hoturan dino, minongolumbatos i sinoda do mamakai di hoturan dino, gam minangahatul do siombo ot atag do varo tumpuk kopitatabangan, isuhut di hoturan dino. Ino-no it ongotumpuk di natantu-no di hiza diri:

- a) Pantai Golom Lingkuton om Boribi
- b) Tangkarason Pinampadan Medan
- c) Nangko Marabahi Lokuton
- d) Lodung Kusilad Dompiling
- e) Mongkobou Tanggui Dalas
- f) Lajong Minyak Torongkonggan
- g) Botition Tandek

Ino-no o nakahabal sid Sinoda di hiza diri dot osusa mongimbulai do Tumpuk Kopitatabangan. Na tinahakan-po di Sinoda do kuasa i komiti do mangahatul dot iso-po o Tumpuk, ino-no i Tumpuk sid Angkob - Vingolon om i-po sid Rondon- Jagil - Tuhau om Pata.

Kananganko i kosulungan di Tumpuk do Kopitatabangan, hinatul-no di Sinoda do iadino:

Kumut dot etom, opokong o longon om kilitai dot opurak. I suntuan do banat dino, varo-no laid nagama, tu i Tumpuk sid Botition. Manjadi i banat dino suvaiko pakazon ong mangahatul do kopomoduan, i Poginakanan di Tuhan Yesus om hiza do mamarakat do mogotong.

I hoturan di mamangkat om mamarakat do Tumpuk do Kopitatabangan, hinatul-no di Sinoda do iadino o gama: I Pandita do puruvan antawa i Manaud do Puruvan mangahatul di gama mamarakat om mamangkat di Tumpuk Kopitatabangan, rontob-nopo, osusa do mamung i duvo wakil di EXKO do

mamung, tu sumasi di kapamarakatan dino.

Na i HOTURAN DO PCS di sid ayat B ko 6, nosimbanan di Sinoda do iadino: Atabangan it ongopandita di Tumpuk do Kopitatabangan, tu monulung pagama di nakatahak i kuasa do mangahatul di tanda do boros do Kinoringan (I kopomoduan om i Poginakanan di Tuhan Yesus).

Varo-po hal vokon, ino-no, i HOTURAN DO MOGONTONG, minangakun i Sinoda dot it ongoulun Kristian kadapat momili dot ombo o suhuton dau, it Undang-undang do Kristian Marriaga antawa it undang-undang do Native Kort, isuhut di hoturan do kampung.

Ong momili di hoturan do kampung, kakali it ulun Kristian mokibarakat sid valai do panambayanan, vaza sumuhut di hoturan dot ulun Kristian, ino-no i piumpugan sumasi di kopisavaan dit ongoulun Kristian.

Iri-ogi pinili-no di Sinoda i Patrick Manjil Madalag do gumanti di Pandita O. Dilger dot Ulion do PCS om i sakai dot ulion, ino-no i Tpk Masandoh Majupih.

Sabap i hiza diri varo mongogorot antad sid ugama vokon, minanarang-po it Ulion dot sid hoturan om Undang-undang do Sabah varo ayat kananganko it Ugama, ino-no, ipat-ipat it Sabahan kadapat om kikuasa kondiri do momili dot ombo ot ugama om kosipan o kenginan dau sumuhut. A-kavasa do mongogorot ko monuhu om moniag dot ulun sid hal dot ugama.

Ino-no i kinapangan di Sinoda diri.

SINODA KONOM DO PCS 14.-16. 5. 1971 sid Taman Gereja Protestant sid Kudat

It anggota do PCS i hiza diri 8700. Topot antad sid Sinoda kolimo, varo-no 500 ot ongoulun Kristian PCS o nakalabus. Kopihiza varo-no vagu 700 ot kinozuvan di nakamung sid ongopiumpugan. I toun diri okurang it ongorukut, tu nolizudan it ongoparai, om i toun di nakatalib (1970) napatazan i parai.

I Trusti-Komiti, i kumavid di kuasa dit ongoharata do PCS, nga nahatul-no di hiza diri. Ino-no i nopili: Patrick Manjil Madalag, Majimil Tuorong, Pandita Dilger, Pandita Poong Shon Khon. Ioti dino kikuasa sumain manganu do tana bahagi do PCS.

Nahatul-po i Tumpuk do Kopitatabangan sid Sikuati, Tinangol, Dandun, Pantai om Sinimpadan. Sabap banalko aso parai, hinatasan di Sinoda dot ipat-ipat it onggkop bai mamarai do duvo Ringgit bahagi di rukut.

SINODA KOTURU DO PCS 16.-18. 6. 1972 sid Taman Gereja Protestant sid Kudat

I sinoda o minomili di gumanti di Pandita Dilger sid komiti do PCS, tu a-nokoho i Porinta do momongo i Dilger mintoron om gumama sid Sabah. I ginumanti dau, ino-no i Andan Mongintod. Na i TPK Masandoh di kouli iosido antad sid Indonesia, minangusul do Habal antad sid Gereja Batak sid Sumatera. Ogumu-po it ongohal dot opodok hinatul sid Sinoda dino. Kananganko i sikul do Ponulung sid Bavang Gazo, nening-no di Sinoda dot aso tinganan momongo di sikul, tu it ongoguru nosunsub-no.

SINODA KAVALU DO PCS 22.-24. 5. 1973 sid Taman Gereja Protestant sid Kudat

Hiza di Sinoda dino nokorikot i Pandita Jenny, i wakil do Basel Mission om i Pandita Hausermann. I wakil do BCCM sid Sinoda, ino-no i Pandita Chong Yu Kiong. Manjadi minangakun i BCCM dot i Pandita Thu En Yu om i Tong Fah Dung mamung sid PCS, tu tumabang mangahatul dit ongopuruvan. Pengkaa dino nopili-no i TPK Masandoh om i Masandul Kositum do wakil do PCS sid Joint Komiti sid BCCM. Nahatul-no laid do tolu ot anganak di nopongo-no sumikul di dang porinta dot posikuron sid Trinity College sid Singapura, ino-no i Matius Majihi, i Kololong Sokuroh om i Inggol Puluk.

SINODA KOSIZAM DO PCS 7.-9. 6. 1974 sid Bavang Gazo Tinangol.

Hiza dino amu nokotimpuun koduruk i Sinoda, tu nongoi do CID it Ulion, ino-no i Manjil Madalag om natahan-no iosido sid Polis dot asadapan. Manjadi i sinoda dino minangahatul di manaud di kabun do PCS sid Bavang Gazo, ino-no varo Gotong Royong sid gama manaud di kabun dino.

Kananganko i hoturan do monunda (HOTURAN AYAT B) dit ongoulun di tiratu sid pensubaan do maliau dot ugama, nga tiuli vagu, varo tanid o vaza mangahatul di pouli dioti, ino-no, suvai varo

katarangan antad sid ugama vokon do kalapas sino om otorima-ogi vagu iosido sid piumpugan dot ulun Kristian.

Kananganko i surat katarangan do kapagantangan, i Sinoda minongolumbatos-no dot, ino surat dino, nga duvo ringgit o horogo.

SINODA KOHOPOD DO PCS 27.-30. 7. 1975 sid Bavang Gazo Tinangol

I Sinoda dino retanko Sinoda do Polis, tu rontob nokotimpun om mongoi-no do Polis it 12 ot ongokomiti do PCS sampai pinuli-no di Polis i sokoviai it ongowakil.

SINODA KOHOPOD OM ISO DO PCS 28.-31.7.1976 sid Bavang Gazo Tinangol

I minit di Sinoda dino nokosurat-no sid boros dot English om Momogun. I nakamung sid Sinoda dino, ino-no i Pandita Honegger, Pandita Kiting GKE om Pandita Yusak Sakai antad sid GKPI Tarakan sampai i Chong Yuk Kiong antad sid BCCM.

Amu-po norikot i Sinoda, nakaganti-no laid i Masandoh Majupih di Manjil Madalag dot Ulion do PCS, tu tanid-no o gamaon di Manjil i hiza diri. Na minangalapor i Manjil di nakamung-no di toun 1975 sid Nairobi Assembly do WCC (I sinoda dit ongorija sompomogunan di torikot turu toun varo) do kuran i PCS nakaaplai sid WCC do mamung sid sompuruvan dit ongorija sompomogunan sampai notorima-no i PCS dot Ahli ko 312. Na banalko avantangan it ongowakil di nening i habal dino, tu i harati, natantu-no di PCS sambahagi di Goriya dit iso-no sid Sompomogunan.

Sid sinoda dino, varo-po piniupakatan, tu mongimbulit di hoturan do minisavo. Manjadi i buuk di hoturan do minisavo dino, nga nosodia-no. I hal do kinomol om tarak di hiza dino, nopiupakatan, tu mogihim do hoturan om katagan.

Hiza di Sinoda dino, varo kinopomilian vagu om kinoponontuan dit ulion do Goriya. Ino-no it ongoundi diri:

Ulion ko President do PCS:	TPK Masandoh Majupih, Tangkarason
Sakai dot Ulion	TPK Majimil Tuorong, Masangkung
Setiausaha Umum do PCS	TPK Opook Sokuroh, Tinangol
Sakai di Setiausaha	TPK Olusin sogimpit, Merebau
Bendahari Umum	Henry Gonduman Marajam, Rondonon

Iti-no it kiongotugas sid Pusat do PCS om varo-po nahatul it a-ko piro ot ulun di mamung sid ongokomiti di tanggung jawab dit ongoosegi do PCS, ino-no:

Joint Komiti / Komiti Asrama / Komiti di Sikul Alkitab, Tinangol (SAT) / Komiti di Rumah Tangga / Trusty Komiti / Komiti di kerja Penoh.

Na sid kinompuso minindamo i Sinoda sid Basel Mission do mongirim dot ongomisionari di tumabang sid Sikul Alkitab, dot avantangan ong elo-no laid di boros do Momogun, ka.

SINODA KOHOPOD OM DUVO DO PCS 25.-28.7. 1977 sid Bavang Gazo.

I kogumuo dit ongoulun dot Anggota do PCS hiza di Sinoda dino, 13,594 kinozuvan.

Sabap ogumu ot anggota do PCS sangzazad-zazad sid Kota Kinabalu kumaraja, minindamo i Sinoda di Patrick Manjil Madalag dot iosido o monunda dioti sid kosipan, nga nokunan-no di Manjil.

Nahatul-no vagu i gama mamampang di nizuw sid kabun do PCS sid Bavang Gazo.

Minonuduk i Dr. Rennstich di hoturan do DISIPLIN OM EKONOMI DO GORIJA.

Sid Sinoda dino hinatul-no laid dot kodung kouli i Pandita Thu En Yu antad sid Hongkong, sid Kudat ot intoronon dau. I tugas dau, mangahatul dit ongourusus dit ongojonginjil om Tumpuk om it ongosukod dit ongopiumpugan.

Ong i Matius Mojihi, i sumikul sid Trinity College sid Singapura, nga kakali varo Praktikal dau sid PCS, ino-no Manaud Puruvan sid Puruvan Tinangol, natahan-no vagu iosido do sontoun-po, tu momongo manaud di Puruvan Tinangol, sabap i puruvan dino aso manaud. Manjadi, avi i sontoun, koguli-ogi iosido sid Trinity College do momongo di sikul sori.

Varo-po tinarang sid Sinoda dino kananganko i Persekutuan do Goriya Malaysia. Iri-ogi i Sinoda

minongolumbatos do mamung sid persekutuan dino, ino-no i Majelis Gereja-Gereja Malaysia. Na i HOTURAN DO MINISAVO, nga nembuliti vagu miupakat sid Sinoda dino.

SINODA KO-13 DO PCS 26.-28. 7. 1978 sid Taman Gereja Kudat

I Thema di Sinoda: Porikoto-no i karajaan-nu (Matius 6,10), inanu sid Thema di Miting di WCC kananganko i World Mission = i kahabaran di Habal do Kovosihan sid Sompomogunan, di sid Melbourne 1980.

Antad di Pomintaan Dua di Yesus, it nituduk-no sid kinoruhangan dau om sid di tokou, ohondom it ulun Kristian dot i Tuhan Yesus, i monguasa di sokovia i (Mat. 28,16-20) o minanganu dit ulun Kristian do sasi om tanda di kuasa om samod dau, supaya sid pialatan dit ongoranzat mimbulai it ongotanda di karaajaan om hoturan do Kiningan. Sabap ino, i sokovia i kopudan do gorija ponong sid kosurutan di hoturan di Tuhan Yesus.

It upakat: Ong varo kotolongan do porinta bahagi dit onogorija, i PCs tumorima di kotolongan dino di mad tanda dot i Porinta mongoguna di gama di PCS. Rontob-nopo atag do varo-po kopisombungan i longon kondiri, okonko atandas kotolongan do porinta o poturug do valai do panambayangan ko i nunu-nopo i bongunan dot ingkakat.

Iri-ogi minonuhu i Sinoda dit EXKO do pengkakat dot umpug di mangagama do hoturan bahagi di hal magapid/mokiapid, supaya orindingan it ongoongkob.

Kananganko i gama mongolobong ong Kristian, hinatul-no dot i tanda di salip, ponong sid ulu. I gama monimin do lobong, ombo kenginan om kosiinan dot ulun, topot okonko adat. Kananganko i gama moginakan, okonko iadko magahau, ong mongolobong dot ulun.

Sinoda 14-22...

It ongoegi do PCS antad di kinengkakatan.

A. I Vaza monodia dit ongosurat om ongo buuk sid boros Momogun (Printing)

I hiza di nokorikot it ongomissionari sid Kudat, iso o Rungus nga aso't elo monurat di dau do boros. Baiko i O.T. Tuorong elo monurat di ngaran dau sid surat Jawi.

Na antad di toun 1956 o kotimpunaan do monurat om monginggumu dit a-ko piro o tuturan di Tuhan Yesus sid boros do Momogun, di kodung nopirin-no, nabahagi-no sid ongo ponulung, supaya ioti kadapat mamakai sid ongo piumpungan.

Ontok di kursus keso do ponulung (1957-59), varo-no laid nosodia i buuk do Longoi, ino-no varo't ongoduvo nopod longoi sid Boros Momogun, di noumpug sid buuk dino om varo-po buuk do liturgia. Sid buuk dino nokopiamung-no it a-ko piro o pomintaan dua om a-ko piro zabur om i hoturan do sumambayang. Sid saralom di kursus keso dino, nopongo-no i TUTURAN DI TUHAN YESUS, ino-no limo nopod ot ongotuturan om tudukan om suriban di Yesus, dit inanu sid ongo injil. Pengkaa dino varo buuk do Kitab Laid do limo nopod ongotuturan antad di kinourugan sampai sid ongonabi. I hiza diri nosodia-po i tolu o buuk Palajaran Mamasa, supaya keso, it anganak dit ongo ponulung misingilo mamasa dot amu mongunang di palajaran dit molohing dioti. Kodungko nakaharati dot ino buuk PALAJARAN MAMASA kiguna sid ongoulun vokon, varo-no nopirin i buuk dino dot okonko impiro-piro opirin om kazazad sid ongovalai om pomogunan do Rungus. Tanid mantad koino, nasalin-no om nopirin-no i Surat Keso di Paulus pakaa sid piumpungan sid Korintus om i nabi Amos om varo-po panarangan di nabi Amos. Tanid mantadko ino, varo-no buuk dot opodok, ino-no i HOTURAN DI PIUMPUGAN DOT ULUN KRISTIAN bahagi di sokovia i it ongosukod do piumpungan.

Ontok di kursus koduvo (1960-61), nopongo-no vagu it Injil Markus. Nopongo-po di vulan November 1960, amu-po nakatalib it apat minggu, navi-no i hatas kaping di buuk dino. (I hiza diri kakali apakai i vaza momirin dot i warna do surat rumaliu sid nalad vkon, ong kodung ozopos do supirit i nalad. Ong hatas nalad nopongo-no, navi-no i warna diri).

Varo-po kapangaan di buuk Kissah Rasul, 1. Timotius, 1. Petrus, i. Tesalonika om nembulit-no i Keso

Korintus. Pengkaa dino varo-po't iso buuk di retanko KOSIPAN OM ADAT VAGU DOT ULUN KRISTIAN. Sid buuk dino inonsi-no i kosipan om gama dot ulun Kristian.

Antad di kinosolinan dit Injil Matius sid kursus do ponulung, varo-no buuk MATIUS ontok di toun 1967, Lukas om Rom 1968. I hiza diri nopirin-no sid Basel i TUTURAN DI TUHAN YESUS do saribu o kaping.

I toun 1974 nasalin-po i Surat IBRANI. Iri-ogi varo nahatul i majalah dot 25 TOUN PCS ontok di toun 1978.

Na i sokoviai it ongobuuk dino, okonko impiro-piro nembulit-no kopirin, ko ong i buuk do longoi om hoturan sumambayang, varo-po nakamung dot a-ko piro ongolongi om pomintaan dua om i sokoviai i vaza sumambayang bahagi kopomodsuan sampai i gama mongolobong. Ong i buuk do longoi, okonko hopod-no om duvo liang momirin om pamung vagu ponong sid kosurutan di gama mindolongi sid PCS.

Tanid mantadko it ongobuuk bahagi di kosurutan di keloo om kohorotizan di Habal do Kovosihan om kosipan, varo-no Buuk di manarang di Hoturan do boros Momogun, om varo PONGUMPUGAN DIT ONGOPUUN DO BOROS MOMOGUN, sampai DICTIONARY ENGLISH - MOMOGUN om TANGON DO RUNGUS.

Na hiza di toun 1978 minagandaha i Amai Forschner sid Sabah. Ino hiza diri minindamo i Ulion do PCS sid Gorija Wuerttemberg do varo kotibangan di Amai Forschner ponong sid kapanggaan di kosolinan di **KITAB VAGU**. Manjadi minangakun-no i gorija dau sampai miniguli-no i Amai Forschner di toun 1979 om 1980. Sid saralom dit induvo tolu vulan sid Kudat i Forschner diri, mitatabang di Osingko om it a-ko piro it ulun vokon sid gama manalin om mongimbulit mamasa om mangatag, ombo i nasalin laid diri sampai nopongo-no i Kitab Vagu. Adau ka-4 di vulan September 1980 nokopiupakat-no di United Bible Society Sompomogunan om i PCS di kinapangan di kosolinan dino sampai nakatod-no i surat di Kitab Vagu sid Syarikat Kitab sid Singapura dot amu-po katalib i toun, nokorikot-no sid Kudat i 5000 kaping i **Kitab Vagu sid Boros Momogun**.

Na i hiza di kinapangan di Kosolinan di Kitab Vagu diri, minindamo-no i EXKO sid Gorija Wuerttemberg do kotibangan di Amai Forschner ponong sid kosolinan di Kitab Laid, tu ka di EXKO diri, Banalko ogumu it ongotuturan sid Kitab Laid di banalko osomok sid koundango do Momogun. Kagi, sid Kitab do Momogun kadapat tokou mongoguna om mongubas di boros tokou. Tu it anganak dit alaid-laid sid sikul om okonko sid kampong, amu songkuro mad oolingan i boros tokou ko amu rumalom sid boros tokou, tu amu otoron om amu kening di boros tokou suvab-suvab. Iti-no o sabap dot i Kitab banalko agazo o kogunaan bahagi humarati di Habal do Kovosihan om manansanganu di boros tokou, ka.

Manjadi i toun 1981 varo komitee manalin, ino-no valu ot ulun di miniupakat sampai minamung sid gama monodia di kosolinan di Kitab Momogun, ino-no it Onsi di Kitab Laid, isuhut di kosolinan di retanko Jean's Bible. Sabap nakaharati i komitee diri dot, Ong manalin di sokoviai it ongo fasal do Kitab Laid, mad it kogumuai it ongo fasal dino baiko mangarait dit ongongaran om ongoturunan dit ongoulun kodori diri, ko it ongohoturan do mangagaras do dupot, hopod om limo toun amu-po miuma do kapangan. Manjadi sid saralom do limo toun miguli-guli i Amai Forschner om miniupakat di rombongan manalin, varo-no kinapangan di kosolinan di Kitab Laid iadko i Kitab Momogun biano. Kasalaan-nopo, i hiza di kinapangan diri, ong kodung nakatod i surat sid Syarikat Kitab sid Singapura, varo kosimbanan do hoturan dit ongoyarikat Kitab. Tu i hiza diri varo't upakat do varo-po Syarikat Kitab Malaysia do tanidko i sid Singapura, supaya aso kosusaan posuvang sid Malaysia do Kitab, gima nagama-no om nopirin-no laid sid Malaysia, ka. Rontob-nopo, ino syarikat dino, bai ngaran o varo, aso-po hoturan om aso-po nousoi. Iti-no o sabap, i surat di Kitab Momogun mili-gili dot tolu toun sid Singapura dot aso kopirinan.

Suvaiko 1988 om nosodia-ogi i Pertubuhan Kitab sid Kuala Lumpur mangahatul di pomirinan, dot i Kitab Momogun, nga nopirin-no sid Singapura. Rontob-nopo, amu oruhai o gama monitak om momirin. Keso, i surat do Kitab Vagu, natagak-no sampai osusa mongimbulit monitak. Iri-ogi it ulun di monitak dino, amu elo di boros Momogun sampai okonko hopod-no ribu ot ongosala monitak.

Okonko inglimo-no ot osusa mirim-kirim di surat sid Germani om mokiporisa di Amai Forschner om mangatag-no vagu dot oporisa-po vagu, kakali ogumu-no vagu o sala monitak sampai induvo, intolu mokiatag, nga kakali amu natagan banal. Iti-no o sabap sampai nopongo o buuk dino, kakali varo't kagavul it ogumu o sala monitak dit aso tanganan mangatag. Ino gama momorisa di gama monitak diri, ingapat osusa mamasa di buuk dino do kopihiza momorisa dit ipat-ipat i hurup, titik, hurup om rumbul om ayat om fasal do varo nakamung, varo nalazan, varo nosimbanan ko nokonong i hurup om rumbul ko amu. Suvai vulan sembilan 1990 om nopongo i KITAB MOMOGUN sampai nokorikot sid Kudat i 5000 kaping. I gorija do Wuerttemberg minonulung mongohorogo, supaya it iso buuk dino, baiko onom-no Ringgit o horogo.

I toun 1984 varo-po nosodia do kopipirinan di **LONGOI DOT ULUN KRISTIAN** sampai i Tan Enterprise sid Kudat minomirin dit insan-ogi i buuk longoi dino. Antad diri sampai 1993, okonko impiro-piro pirin-pirino i buuk longoi dino do sampai 15 000 kaping.

I toun 1992 varo nopirin sid Syarikat Perusahaan Percetakan TEP, Kudat i REGISTER OF ROOTS IN THE Rungus Dialect om ENGLISH-RUNGUS DICTIONARY om it Ongotudukan do Kursus 1992. 1993 varo-po TANGON MOMOGUN, ONGOTUDUKAN DO KURSUS, USURAN GORIJA UMUM om PANARANGAN DO KITAB LAID.

Tanid mantadko ino, antad di toun 1957 varo-no nagama sid Printing do PCS it ongopalan om ongopannahon dit ongopandita om ongoponulung dot nakamung sid palan diri it ongotuturan om ongotudukan bahagi dit ipat-ipat i minggu. I tinumimpuuni, vulan-vulan, varo iso palan, iri-ogi toronom-onom minggu sampai duvo om tolu-no vulan. alaid-nopo, bai induvo sontoun momirin di palan dot ino palan dit ongotuturan om tudukan dino, suvai limo natus kaping om miuma-ogi ong bianco. Ontok di Julai sampai Disember 1993, insan-ogi nopirin i palan sid Kadai pirin do Kina dot i komputer o monodia momirin.

Okonko impiro-piro nokotiim it EXKO ko i toriso-iso segi do PCS do mangagama do majalah ko surat Habal PCS ko PLA ko Wanita, sampai bianco mad amu-po kogoos do momongo mongimbulai om monurat do majalah om surat habal, sabap i sokovia i it onogogama sid piumpugan om puruvan om ipat-ipat i rombongan lobipo ahatul om openting mantadko mogom monurat om monodia do surat habal.

Ong mangarait dit ongongaran dit ulun di minangahatul di sokovia i it ongoprinting do PCS diri sampai bianco, ino-no, i gulu, i Osingko om iri-ogi i Asun om i Ajadap om i Masandoh om i Majimil om i Majatig om insanpo i Osingko om i Abui sampai i Asung.

B. PUSAT LATEHAN ALKITAB PCS (Sinurat di Jensey)

Minsanko ko i sid kinotimpunanani do PCS nga aso-po retan ko Pusat Latihan Alkitab, topot ong it ongokursus kananganko i Kitab, varo-no laid. Guluko i nadaftar i Gorija tokou do retanko Gorija Protestan sid Sabah.

It ongokursus gulu hiza diri, hinatul di missionari keso, i Pandita Honegger. I gama dau tumimpun pahabal di Habal do Kivosihan sid Bansa do Momogun Rungus, ino-no tumimpun sid gama mongintutun do hurup. I Bpk Majimil Tuorong om i Ama dau i Tuorong bin Dato Sobunal o gulu-no kotudukai ko gulu-no kaharati di vaza mongintutun do hurup.

I bansa do Momogun i nokotorima-no di Kristus, banalko alangkas sumurut om gumumu sampai it engin mokipodsu, nga iadinoi, sabap ino i monuduk antawa mangahatul amu sumukup. Varo't a-ko piro ongokusai do Momogun hiza diri do kopurimon do kodim do Kinoringan do tumabang dara dit ongomissionari, topot amu miuma i pongilaan dioti, kagi hiza diri mad sokovia i bansa do Momogun amu-po kaharati mamasa.

Kursus MONUDUK DO MONUTURAN vulan konom 1956.

Iti kursus baiko dong ongoponginjil di sumodia mangagazad sumambayang adau minggu. Iti diti

baiko ensan-no songminggu. Ino-no hari enam. Om tumimpuun dot ahatul banal o gama sid vulan koonom 1956.

Kursus sumusuhut September 1957-Julai 1959.

Ioti antad sid Basel Mission, minangahatul-no vagu dot iso-po vagu o kursus. Om i kursus diti baiko dang ponginjil di nopongo-no laid i kursus monurat om mamasa di toun nakatalib. Vulcan kosizam 1957 i Pandita Forscher minangahatul do kursus kumaa sid apat o ponginjil sid Sikuati. Ioti ino-no i Bpk Majimil Tuorong, Angkangon Mogupis, Diyun Madalag om i Osuman. Om ipat-ipat dioti dino nopompon songongkob. Hiza do kursus ioti, i Basel Mission o mamalanja, gima ioti dino amu kotibang do gumama-po.

I kursus dino opongo-no dara hiza do tumimpuun rumilik do toun 1958 (vulan enam). Topot nisurut sampai vulan koturu 1959. Banal-no, i kursus diti 20 vulan koledo. Topot aso retan dot suti, tu i bansa do Momogun hiza diri amu-po nelaan i retan ko suti umum.

Hiza antawa Palan.

It ongopongjinjil iatod sid ongokokompungan dot ipat-ipat minsosodop hari enam, tu mangagazad sumambayang adau minggu sino. Topot hiza diri, baiko mintana ong mamanan rumikot sid ongokampong. Sabap ino, alaid om korikot-ogi sid rikoton dioti.

Tumimpuun barajal antawa misingilo do pukul 2 minsosodop hari satu, it ongopongjinjil opompon-no muli sid Sikuati. Hiza diri okon tantuko misingilo do Kitab. Topot baiko mihalabal-habal ko poromot dit nongonavavasaan dioti hiza sid kampong. Om mad nakamung-po it ongohal do Penggembalaan, kaunseling om Homelitika.

Hari dua sampai hari enam, tumimpuun do pukul 7.30 sasarap sampai tanga hari. Tanid mantadko monuduk monurat, mamasa om hal do mongiro, tumoguvang-po ioti sid gama manalin do Kitab Laid om Kitab Vagu kumaa sid boros do Momogun. antad sino, iso o buuk do retanko TUTORAN DI TUHAN YESUS om vcaro-po 50 o tuturan do pisingilaan sino antad sid Kitab Laid do nasalin om nagama-no.

Ipat ong hari empat, i Pandita Hausermann monuduk do boros do Malazu om i Pandita Sigrist monuduk do pertukangan Kayu.

I pisingilaan hari enam, sumodia do tuturan om barajal antawa misingilo-po do Longoi Kristian. Om manalin do longoi Kristian kumaa sid boros do Momogun nga nokotimpuun-no i hiza dino.

Suvab-suvab sumurut i pongelaan dot ongopongjinjil sino. Sampai i hasil do kursus hiza dino emot-no do banalko avantang. Duvo o buuk dot Injil, iso o Longoi Kristian, Tuturan di Amos, Keso Korintus, Tesalonika, Timotius om it a-ko piro o pasal do Zabur om pomintaan dua di Tuhan Yesus nga nagama-no, do kodung nopongi i kursus dioti diri.

Kursus angkatan baru April 1960 -Julai 1961

Tumimpuun di vulan kapat 1960 sampai vulan koturu 1961, hopod om apat ot ulun minozo do kursus di retan ko Angkatan Baru. Ioti dino, ino-no Bpk Majimil Tuorong, Angkangon Mogupis, Diyun Madalag, Osuman, Osingko Taganau, Mojukin Gundorong, Alung Ganggang, Majaman Gombiluk, Daang, Totong, Asandul Kasitum, Angatang Kadim, Abbah Mongimpal om i Monolinsig Mongingkap. Ioti diri varo kisavo om varo't aso-po. Om ioti kavi nosusa-po pengkakat dot iso o valai vagu, tu intoronon dioti hiza sino.

It ongoprisingilaan di napakai ko noguna sid kursus dit Angkatan Baru dino, ino-no i nagama dit Angkatan keso. Om hiza diri nilombus-no vagu i gama manalin do Kitab. Inji Markus, it Ongotudukan sid Matius, om it ongosuriban sid kas tinoguvang-no banal. Sampai sid toun 1960, hatu nenan o buuk Injil Markus nokojuval-no.

Iso kosusaan dot emot sid dioti ongokumursus, ino-no, i gama tumoguvang do palajaran antawa i pisingilaan mad kumurang. Sabap do iadino, ino-no, varo't a-ko piro dioti sino dot m ad tumuo-no. Om i kakal-po tanga ulun mad migirimsimban i gama dioti, misingilo ko tumorima dit ituduk sino. Topot aso't vongoon, tu antad dit opodok-po ioti amu nokotiim sumikul. Na, nopongo-po i kursus dioti, hinuzas-no i valai dot intoronon sinod Sikuati om rinangkat sid Tinangol, tu kogunaan sid Sikul

do gama mutanom sid Bavang Gazo.

Kursus dot onibak 1962-64.

I kursus diti baik duvo antawa tolu vulan hiza do nopongo mongomot. Tanid mantadko ino, vulan-vulan varo kursus do baik duvo ko tolu't adau bahagi di gama monuduk om monodia dit ongotuturan om tudukan sid vulan di rumikot.

Sid toun 1964, varo-no vagu kursus do duvo vulan. Tolu nopod ot ulun nakamung sid kursus dino sid Batu dua, Kudat. Topot sokoviai ioti, nga ongokusai. Asoft ondu do nokovozo ko nakamung, tu nagama dit ongomolohing dot amu koho dot it anak dot ondu a-engin do kensodu sid dioti.

Hiza do kursus vulan kolimo sampai vulan 1964, i Kiningan minomuka dot a-ko piro o tempat do pahabaran do Habal do Kovosihan. Ogumu it ongoulun sid ongokampong minindamo dot, It antad sid Basel Mission sid Kudat rumikot sid dioti. I hiza diri, i pandita baik i Pandita Forscher. Topot iosido pentoron sid Taman Gereja Kudat. Ong sid Bavang Gazo i Pandita Sigrist om i Amai Staehelin minangahatul di sikul mutanom.

Sumuhut sid gama mongimot dit nongokovozo do kursus, ioti ongoulun sid mintutuk do kampong Mompilis. Molongkolong, Pantai, Suang Eloi, Dalas, Mongkobou om sid mintutuk do Bengkoka, banalko engin do Habal do Kovosihan.

Pusat Latehan Alkitab sid Pantai (Mei 1965-Mar 1967).

Gima, tu i pahabal do Habal do Kovosihan banalko gunaon sid mintutuk do kampong Pantai, iso o Pusat Latihan Alkitab ningkakat ko ginama sino. Om ino sikul dino tumimpuun antad sid Mei 1965 sampai Mar 1967. It ongomonuduk sino, ino-no i Pandita Dilger om i Amai Osingko. Na tolu nopod ot ulun kumursus sino, om i Amai Masandoh Majupih, nakamung-no sino.

Nokosimban sid Tama Goriya Kudat Mar 1967-1968.

I kursus do Kitab diti nisimban-no vagu sid Taman Goriya Kudat sid vulan Mar 1967. Om ensan-po vagu i Pandita Forscher o monuduk sino. Kagi tumimpuun-no vagu i gama manalin do Kitab, ino-no i Injil Matius om i Usuran dot Ongorasul. Om hiza dino nisiat-po o kursus dot Inggeris dot i Inai Forscher o monuduk. I kursus sid Tama Goriya dino nopongo sid toun 1968 om i monuduk hiza dino ino-no i Pandita Dilger.

Nisimban sid Bavang Gazo.

Kodung i pomorinta do Sabah nga amu-no koho do siti-po it ongomissionari Kristian, i kursus do Kitab Nisimban-no sid Bavang Gazo. Ong banal-no, i gulu iti Bavang Gazo sikul do kavazao mutanom. I sikul do kavazao mutanom sid Tinangol, jinadi-no do sikul do Kitab, sampai i Pandita Karl Rennstich o ketua monuduk sino.

It ongomurid dit nokovozo do kursus sid Pantai om Kudat, minilombus-po vagu sumikul do toun kapat sid Bavang Gazo, Tinangol. It ongoangkatan keso om koduvo, tumimpuun-no vagu sumikul siti. Varo't a-ko piro o murid dit nopongo-no laid sumikul, kinodim vagu ontokko maanaud sid a-ko piro o puruvan ko Paroki, iadko sid baving, Botition, Molongkolong, Nangko om vokon-po.

I Sikul do Kitab sid Tinangol tinutup.

kodungko i humolian-no banal i gama do porinta USNO monunsub dit ongomissionari, tu palabus dioti antad sitid Sabah sid toun 1972 sampai pintangan toun 1973, i sikul do Kitab Tinangol tinutup-no dot a-ko piro toun, tu aso monuduk. I kursus do Kitab di nokotimpuun-no laid, amu-nonokosurut vagu. Sampai i gama do Porinta USNO mongorodsit dit Ugama Kristian, tumamba-no banal. Sampai ong it alaid-no, navi-no muli it missionari sid PCS..

I Kotulungan antad sid BCCM

Hiza dot okudik-no banal i monuduk antawa pandita sid PCS, olomi i ginavo do BCCM tumabang. Sampai i Pandita Poong Shong Khon jinumadi do manaud puruvan do Sikuati sid Toun 1969. Om i Pandita Thu En Yu (Datuk Bishop ong bianco), jumadi do manaud puruvan Tinangol toun 1973. Om i

Pandita Tong Far Dung tiumpuun gumama sid PCS di toun 1974.

I Sikul do Kitab Tinangol binuka vagu 1976.

It etung-ko palan di EXKO antawa it ulion do PCS, ino-no, monuduk om mongubas dit ongoulun Kristian PCS, supaya varo pongelaan dioti do Kitab. Antad di kinotutupan di sikul dino sid toun 1973, i EXKO minongolumbatos do bukaon vagu i sikul do Kitab sid Tinangol. Sid vulan kosizam 1976 nobuka-no vagu i sikul do Kitab. Topot rontob-no songtoun o kursus hiza dino. Om i ketua monuduk sino, ino-no i Pandita Poong om varo't a-ko piro ot ulun tumabang dau monuduk sino, dit noponog-no laid sumikul sid Sikul do Teologia sid Singapura (Trinity Theological College). Kodung nobuka, nokotimpuun-no vagu i sikul do Kitab Tinangol do iadko puun do kosurutan di Goriija Protestan sid Sabah.

Minonimban di ngaran do Sikul

Sid saralom di toun 1986, it umpug do mangahatul dot ongosikul do PCS minongolumbatos-no do monimban diti ngaran do sikul, di notutunan mantad di retanko Sikul do Kitab Tinangol (Sekolah Alkitab, Tinangol SAT). Nisimban-no do retanko PUSAT LATIHAN ALKITAB (PLA).

Kursus do duvo toun. Sid saralom di toun 1989, i Exko PCS minongolumbatos do surutan i gama kumursus sid PLA. Ino-no, antad do sontoun sinurutan-no do duvo toun. Topot i gulu, noumba mongitung dot i sumikul sid toun koduvo dino, onuvon antad sid nopongo-no laid kumursus di toun-toun nakatalib. Topot nopiupakatan-no vagu dot, i Sumikul sid toun keso dino, koho-no do milombus do toun koduvo, ong sid toun-no rumikot.

C. SEKOLAH RENDAH KEBANGSAAN LAJONG TINANGOL OM LODUNG (Chong That Shung)

I kinengkakatan dit ongosikul dino: I toun 1964 varo nokengkakat do tolu o sikul. Minsanko i bantuan dit ongosikul dino antad sid Basel Mission, varo-no laid pongitangan do jodizon it ongosikul dino do sikul kampong. Iti-no o sabap do nopungaranan it ongosikul dino do NATIVE VOLUNTARY SCHOOL KO SRK. Sampai i hiza-no diri, kakali dot iso't anak do Momogun nga aso-po kadapat sumikul sid dau do kampong ko osomok sid dau do kampong dot amu osusa mintoron sid Asrama sid Kudat ko asrama vokon. Kenginan dit ongoulun Kristian sid ongopiumpugan do varo kotulungan di Basel Mission ponong sid kengkakatan do sikul bahagi dit anganak do Momogun. Sabap ino, i Basel Mission minonodia dit ongovalai sikul om it ongovalai do guru di kengkakat sid tana do Goriija om varo-po supervisor. Sabap a-nokoho laid i Porinta dot i boros sid sikul nga Boros Momogun, minongolumbatos it komitee bahagi dit ongosikul dino dot i tudukan sid sikul, nga sid boros dot Inggeris.

I kinopomukaan dit ongosikul dino, Januari 1965. Sid Lajong turus varo duvo darjah satu om dua dot 58 o murid. Sid Tinangol pengkaa dino nga 67 it ongomurid om i sid Lodung nga 83 ot anganak sid Darja satu om dua. Ikid sikul, nga varo duvo o guru.

I Sigu Immanuel Stettler dino i Guru besar di gulu di minangahatul di tolu it ongosikul. Navi-no i tugas dau, sinumusuhut i Sigu Werner Braun do guru besar iosido sampai 1971. Ioti duvo dino o minamakal sampai minongumpai om minangahatul dit ongosikul ponong sid kosurutan sampai iadko ino biano dino. Nokouli-po i Sigu Braun, nopili-no i Sigu Chong That Shung, i guru laid sid SRK Lajong antad 1965 do gumanti di Werner Braun do Supervisor om iosido-no pinolombus di tugas dino sampai biano. I komitee Pendidikan do PCS om it ongokomitee do SRK sid ongokampong tinumabang di Sigu Chong, iadko it ongomolohing dit ongomurid om it ongoguru o minihatul, supaya ahatul it ongosikul sampai biano, isuhut di kosurutan di kogumuo dot anganak om it ongobongunan do sikul.

Antad di hoturan do Pendidikan 1961 di notontuan-no sid Sabah i hiza di toun 1969, ino-no, i vaza monuduk, suvai sid Bahasa Kebangsaan ko Bahasa Malaysia, na it ongosikul dino jinumadi do Sekolah Rendah Kebangsaan ontok di toun 1974.

1989 duvo-po o valai do guru nakamung-no sid SRK Tinangol.

1990 onom ongkob sikul nakamung-no sid SRK Tinangol sampai miuma-no vagu it ongoongkob

sikul

1990 Sid SRK Lajong varo-po nagama dit onkob do guru om gudang, dot i bontuan bahagi dit ongovalai dino, antad sid porinta: ino-no 70 000 MR.

Na i Komitee di mangahatul dit ongosikul minangaplai vagu bahagi di kengkakatan dot onom-po ot onkob sikul sid SRK Lajong. It ongovalai laid nga norobuk-no sampai aso tanganan dot okonko gontian it ongovalai dino.

Iti toun biano (1993) varo 42 ot ongoguru om turu ot ulun di tumabang mangahatul dit ongosikul. Varo 660 ot ongomurid dot 99% nga anganak do Kristian.

Ong sid Lajong 158 murid sid Darjah 1-6

Ong sid Tinangol 337 murid sid Darjah 1-6

Ong sid Lodung 165 murid sid Darjah 1-6.

D. SEKOLAH RUMAH TANGGA TINANGOL (sinurat di Lilah N. Gilong)

Varo noumba laid di Komitee do Basel Mission do pengkakat dara di sekolah Rumah Tangga sid Sikuati. Na antad sid pangalaman di pandita sid Sikuati nokembulai do banalko aso tanganan do momuka di sikul sid Sikuati, tu araat banal i tana bahagi mutanom do totodukon, minongolumbatos i komitee dit ongopandita do suvai mangahatul di sikul do Rumah Tangga, ong osodia-po laid i guru sampai varo-no laid pangalaman di guru sid Sabah. Sabap ino, kodung nokorikot i Inai Ernst sid Sabah, minintoron-no iosido sid Pantai sampai minomurimon di kobuatano sid kampong, supaya kadapat iosido monodiri dot nunu banal o tugas dau sid Sikul bahagi dit anganak dot ondu dit nokosikul.

I panangan di sikul dino, It anganak dot ondu di minsusukod kadapat misingilo do mamasa om monurat om i vaza momiara dot onkob sid kosihatan sampai mananom do totodukon om misingilo magazau dot kakanan ponong sid kosihatan.

Iri-ogi ingkakat-no i sikul sid Tinangol i hiza di toun 1965 om kinurusus-no di Inai Ernst do tasontoun-toun sampai 1969. I ginumanti dau, i Inai Kachel di minonuduk sampai toun 1974.

Na antad di kotimpunaan di toun 1975 i Lilah Nancy Gilong o pinopolombus di SRT om piro-piro-no o kinoruhangan dau sampai biano toun 1993.

I hoturan dit ongondou di kumurusus sid SRT, masti kiumul do 15 toun ko asavat ko iri om mangapus do 20 MR bahagi yuran dot SRT. Om i sokovia i bahan di gagamaon, osusa mangapus do intanga o horogo.

Bang varo't amu kavi di sontoun kursus, mad muli dot amu-po opongo, osusa mangapus dot 40 \$ ko manahak do sangkarong o parai bahagi danda dau.

Ipat-ipat kovian vulan varo suti dahai do duvo ko tolu't adau. Isai-nopo it osomok i kampong, kadapat minduruk muli. Hiza do minggu sumambayang-okoi sid gerdja Tinangol om varo-po hiza do magandaha-okoi sid ongokampong sid mintutuk di puruvan do Tinangol, mozo di Manaud Puruvan ko it ongotompok.

Opongo sontoun kursus, varo-po lawatan sid Taman Negara sid Ranau om sid Poring hiza dit amu-po kopitotongkizad momonguli.

It ongogagamaon sid SRT ino-no:

Monombil, mangalangkit, mangait.

Minginulat Koborisihan Kosihatan

Mamasa bahagi dit amu-po elo mamasa

I boginisan di gagamaon sid valai

It a-ko piro o ginis panyakit om kuran i gama manangkis do sakit

Manjadi sid saralom di duvo nopod om turu toun sikul do SRT, vokon-no ong labaan do duvo nopod o murid, vokon-no ong bai hopod om onom om hopod om turu o murid.

E. IT ONGOASRAMA DO PCS (Sinurat di Mojuntion)

Isuhut di nousul-no sid savat kananganko i kinembulazan do asrama sid Taman Gereja PCS, atalahas-no i hiza di kovian dit Onompulohan dot minsan dot it anganak dot ondu di nopongo sid Sekolah Rendah, nga ozi lumombus sid Sekolah Menengah. Sabap bai sid Kudat o varo Sekolah Menengah, miniupakat i PCS om i BCCM di katagan dino. Manjadi i BCCM minanancadang do polos sid PCS do valai laid do sikul dioti sid Lok Yuk bahagi do pongodumpanan dot Asrama dot ongondou. Bahagi di gama manaud dit anganak sid asrama, nahatul-no laid do duvo ot ulun sumikul om kumursus do jumadi do warden dot asrama. I kenginan dara, sid Sikul do Warden di KNH sid Koling kumursus ioti, nga a-nokosunu, tu a-koho i Porinta Koling do monoruvang ioti sid Koling. Iri-ogi sinumikul i Jimmy Asam om i Mariam Majaman sid Trinity College Singapore, minsanko i kursus dioti dino okonko kursus bahagi di gama momiara dot anganak sid asrama, inoi nga bai bahagi do Pendidikan Kristen. Nopongo-po i kurusus dino, tinumimpun-no i Jimmy do mangahatul dit asrama sid Batu dua om i Mariam dit asrama pongodumpanan sid Lok Yuk.

Suvai toun 1979 om varo-ogi bontuan do Porinta bahagi kengkakatan dot Asrama Titu sid Batu dua dot it Asrama dino miuma do pentoron do hatas om limo nopod ot anganak dot ondu. I BCCM minongitung-no laid do kotulungan bahagi dit anganak do Momogun sampai pinengkakat dot Asrama Basel sid somok do Lok Yuk Sekolah bahagi dot 80 anganak do kusai. I kiniro diri, it ongoguru di rumusod sid valai dot osomok sid asrama dino, supaya kadapat mangahatul dit anganak sid asrama. Gam i BCCM minangakun do mamalanja dot a-ko piro ot anganak sid asrama dino monikid toun. Alaid-po, varo-no pongitungan do BCCM dot osuhul ong itahak sid PCS i hoturan dit asrama dino, tu mad a-kopionong i gama mangahatul dit anganak. Manjadi antad diri it ongowarden om i kotua Warden do PCs mangahatul di sokovia i it ongasrama dit anganak do PCS.

Minsan banalko agazo o gama do PCS monodia dit ongointoronon dit anganak dit ozi lumombus sid Sikul Menengah, kakali amu miuma it ongointoronon. Iti-no o sabap do miniupakat-no i sinoda 1978 do pengkakat do Binatang sid Batu dua, intoronon dit ongovalu nopod anganak dit a-kadapat do balanja antad sid PCS. I PCS bai mangahatul di vaig om karant dioti. Topot ong kakanan ko kosulungan om i yuran sid sikul, kondiri-no dau. It ongomolohing minokibabaal do bai i papan o palampag, nga nomungan-no di PCS. Ino binatang dino labaan do hopod toun pipapakai om orungoi-ogi. Iri-ogi varo-no bontuan vagu di Basel Mission bahagi di valai vagu di retanko Asrama Baru.

Sid saralom di kinosurutan di kogumuo dit anganak, i Kindernothilfe nga pinosurut-no di kogumuo do bontuan do sampai 237 ot anganak. Na tanid mantadko i kotimpunan do varo kotulungan do KNH, dot ikid anak siti varo pinokomolohing dau sid Germani, varo-no hoturan vagu, ino-no, varo't ongoulun sid Germani di monukung dot toriso-iso anak. Topot aso pongitungan ko kiroon do mad pinakanak dau, inoi nga i kotulungan dino hinarubi bahagi di kogumuo dot anganak siti, isuhut di kosusaan om kokurangan do balanja. Antad diri amu-no osusa do varo surat dit ipat-ipat it anak bahagi di pinokomolohing dau sid Germani, inoi nga varo laporan dit ipat-ipat i toun kananganko it usul sid saralom do sontoun om i laporan di pinangan do koringgitan dino.

Na i toun 1982 varo-po nagama dot Asrama Geneva, ino-no, i World Council of Churches o minanahak do bontuan bahagi dot asrama sid Kota Marudu, keso, bahagi di valai om iri-ogi bahagi di balanja dot 72 ot anganak sid saralom do limo toun. Kasalaan-nopo, banalko amu nokonong i kobongunan sid Kota Marudu om it upakat bahagi di tana dit Asrama dino, nga amu atag. Tu varo boros di sanganu do tana, dot i PCS bai kadapat mamakai di tana sid saralom do duvo nopod toun sampai i valai, nga alaid-po, dang sanganu-no do tana.

I toun 1987 minomuka i Porinta do Sekolah Menengah sid Pitas. Iti-no o sabap minogihim i PCS do tana bahagi dot asrama Pitas, nga amu oruhai nokemot do tana dot osodu-sodu sid Sekolah dino. Na varo bontuan antad sid Basel Mission bahagi dit asrama dino. I Mogimbang o pinengkakat di valai. Na sampai biano, amu enizo kogumu it anganak mintoron sid asrama, tu vokon-no ong osoduvan, vokon-no ong oholian osodu antad sid kampong i sikul, dot amu miuma bohogizan i balanja antad sid molohing. Sabap i balanja dit anganak, it anak kondiri o mongimbulai. I PCS baiko mangahatul di warden, i vaig om i minyak bahagi di lampu. Tanid keno, aso-no.

Kodung varo Sekolah Menengah sid Pinawantai, minonodia-no i PCS do valai dot Asrama pongodumpanan bahagi dit onom nopod ot anganak di sumikul sino om varo-po warden di momiara

dit anganak sino. Na i toun 1990 notilibi do borizu i taap dit asrama sampai nohuzas-no i valai. Iri-ogi ginontian-no dara di YB Matius, i Mentiri sid Porinta it intoronon dit anganak. Topot kodung nobuka-no i Sikolah Menengah sid Sikuati, pinentoron-no di Porinta i sikul menengah sid Pinawantai sampai minaliu-no it anganak sid Sikuati.

1992 om minangahatul-no i PCS dot Asrama sid Sikuati, tu monodia dot intoronon dit anganak Momogun di sumikul sid Sikuati dino. Kananganko i asrama sid Sikuati, ogumu it anganak di nokosikul-no laid sid Kudat, kodung varo Sekolah Menengah sid Sikuati, minaliu-no sid sikul dino, gima osomok-somok ioti sid kampung. Vokon-no ong miuli-uli sumikul, vokon-no mintoron sid Asrama Sikuati, tu kakali oruhai ioti muli sid kampung antad sid Sikuati mantadko sid Kudat. Na i balanja bahagi kengkakatan dit Asrama Sikuati dino, antad sid bontuan do porinta. Bai i ropuhan, o i Basel Mission o minamarai.

Manjadi ontok di toun 1993, i kogumuai dot anganak sid asrama do PCs, pengkaa dino,

sid Titu	90 anganak dot ondu
sid Duisburg	85 anganak do kusai
sid Basel	60 anganak do kusai
sid Sikuati	95 anganak do kusai om ondu
sid Geneva Kota Marudu	72 anganak do kusai om ondu
sid Pitas	60 anganak do kusai om ondu

Manjadi, minsanko i Kindernothilfe (Bontuan bahagi dit anganak dit okurang o balanja antad sid Duisburg) minonukung di balanja dit anganak antad di toun 1961, nga varo't upakat di komitee do KNH do kodung avi toun 1993, pentoron-no di bontuan bahagi di PCS. Sabap i kiroon dioti:

keso, engin ioti do mongorontob dit ongopomogunan do varo kotulungan dioti.

koduvo, i pongitungan dioti, Sabap labaan-no do tolu nopod toun varo kotutulungan sid PCS, a-milo- milo varo-no kosurutan sid PCS om it razat do Sabah miuma-no mongitung om kikosukupan-no kondiri di balanja dit anganak do PCS. Antad diri osusa-no i PCS mongitung di kosurutan dit ongoasrama.

Varo-no laid upakat di toun 1991 om 1992 dot ikid anak, varo yuran dau do 25 \$M sid saralom somvulan. Rontob-nopo, mad sampai bianco, amu-po enizo kogoos it ongomolohing mamarai di balanja dino.

PONGOSUSUZAN

Boros di President do PCS 3

1. Usuran do Gorija Sompomogunan 5-41

Umpatod 5

Liang keso: I kinembulazan di gorija di Kristus 9

Liang koduvo: I gorija sid Abad 9-15 16

Liang kotolu: I Reformasi 22

Liang kaapat: I kosurutan dit ongorija sid Europa 26

Liang kolimo: It Abad ko-178-19 30

Liang koonom: It Abad do Mission 1801-1900 33

Liang koturu: Ponong sid Oikumene 35

It ongomiting dit Oikumene: Edinburgh 1910 35

Yerusalim 1928 35

Tamaram sid Koling 1938 36

Assembly keso di World Council of Churches Amsterdam 1948 37

Evanston, USA 1954 om New Delhi, Koling 1961 37

Uppsala, Sweden 1968 39

Nairobi, Kenya 1975 (mamung i PCS) 40

Vancouver, Kanada 1983 40

Canberra, Australia 1991 41

2. Usuran di Gorija Protestant sid Sabah (PCS) 43-90

Umpatod 45

I hiza kodori sid Sabah 47

It Ongogorija vokon sid Sabah 48

Kinotimpunaan di kapangahabaran di Habal do Kovosihan 54

Keso miting dit ongosukod do piumpungan 59

Kursus do ponulung dit insan-ogi 61

Upakat ponong sid Kitab Momogun 64

Kinotimpunaan dot Asrama PCS 64

Tumupak i Habal do Kovosihan 65

It ongosikul SRK Lajong, Tinangol om Lodung 68

It ongorumah Sakit Sikuati, Tinangol, Pantai, Dandon 69

Ponong sid kengkakatan do PCS 69

Sinoda Keso do PCS 18.-20.4.1966 70

Sikul do Rumah Tangga Tinangol 71

I sera do varo-ogi piumpungan do Kristian 71

Usuran dit ongomiting dit ongosukod do piumpungan 73

It ongoasegi do PCS: 79

A. I Printing (ongobuuk sid Boros Momogun) 79

B. Pusat Latehan Alkitab (Jensey) 81

C. Sekolah Rendah Kebangsaan (Chong That Shung) 83

D. Sekolah Rumah Tangga (Lilah N. Gilong) 84

E. It Ongoasrama do PCS 85

Pogihiman 87